

清名家詞

二

294010

甲行

~~166484~~

上海图书馆藏书



A541 212 0014 9604B



毛翰林  
詞

運彰



毛奇齡（天啓三——康熙五五）

亦名甡。字大可。號西河。又有僧彌僧開齊于河右初晴秋晴晚晴春莊春遲諸號。浙江蕭山人。以廩監生薦應博學鴻詞試。授檢討。告歸。著書數百卷。尤致力於經學音韻。探入四庫全書及存目者達六十一種。

# 毛翰林詞

蕭山毛奇齡大司

## 南歌子

鐵鑊生梁子。銅樞種棗花。楊柳正藏鴉。閉門春晝靜。是誰家。  
茜染牆頭草。烏飛陌上桑。三十侍中郎。自矜拖紫綬。茜花香。  
蕙幌春前雨。花竿晚後虹。解珥墜青蟲。去年曾借宿。宋家東。  
蕊撲鴉頭淺。鬢梳蠹尾輕。鏡裏未分明。勻殘紅粉絮。掛簾釘。  
高屨宜牆窄。長裙愛欄多。風起動江波。隔江風更急。奈帶何。  
舊苑羅羅在。新教略略成。殿上暗呼名。鍍金黃甲子。墮銀筓。

## 荷葉盃

雙槳紅舡欲度。荷路向前溪。葉搖傾下露珠子。菱刺又牽衣。  
五月南塘水滿。吹斷鯉魚風。小娘停櫂濯纖指。水底見花紅。

章臺柳

楊柳枝。莫教折。留綰衫前散巾結。祇恐飛花上紫綸。認作搖郎鬢邊雪。  
花漏深。春睡醒。二五窺蟾半邊影。燒殘蠟淚泛銅盤。一尺珊瑚沁心冷。

南歌子 又一體

燕尾捎輕霧。花榭涌落潮。朝鮮計吏附書遙。三月隋堤、楊柳暗河橋。  
驅馬東郊道。提筐南陌頭。桑枝欲盡且移鉤。日暮蠶饑、歸去好難留。  
蠟暈眉間粉。裙縈履上珠。陽雲樓上教歌殊。吹暖鳳梢、雙籥卸脣朱。  
澀杼嫌經密。殘絲畏鑷欹。織縑織素總難期。獨對支機彩石、有誰知。  
溢匣箱金斷。青紅鈿暈殘。狂夫塞下幾時還。時見瑣窗、蜿蜿墜雙環。  
掬溜愁蘋捲。投竿喜藻開。蓮舟櫂女夜歸來。爭照水中、鬢子落金釵。

漁父詞

簔簔銀鈎掛竹竿。珊瑚車子鐵連環。蓮葉渡。蓼花灘。烟波淼淼幾時還。

菰葉菱根。冒網絲。曲榔單板立鷓鴣。前浦約。隔江期。江長浦闊。暝歸遲。

摘得新

河沒時。霜繁月已低。錯驚銀榻曙。起來遲。扶上鬢梢。隨意綰。亂絲絲。日滿檐。蟲飛逐檻邊。紅衫腰後結。洗妝鉛。指拂額黃時。轉側。鏡臺前。欲上牀。卸頭留半妝。殘膏銜獸頸。且纒裳。品環繞指。先知冷。假誰傍。漏盡移。還將繡譜披。碧窗連鎖下。響朝雞。坐得畫裾千百褶。夜何其。

瀟湘神

湘渚頭。水北流。麥天風雨綠崖秋。蕉葉緝紗。仍染綠。荆門紅樹。好生愁。邛竹枝。生古祠。叢叢峭壁鷓鴣啼。朝雨過來。還暮雨。不知神女。幾時歸。

蕃女怨

吳娥窈窕。初拂舞。堂下春雨。柳垂鉞。花轉殼。暖翻紅燭。只憐卻。舞汗衣乾。又春寒。胡騰起。作石國語。愁殺蕃女。鬪鞞尖。銅帶軟。蹴踏宛轉。迴頭忽。憶舊安西。兩眉低。

憶江南

江上路。橫曼小長干。日炙水花紅灑。烟浮堤草綠綿蠻。高閣尙春寒。  
江路遠。草際暗塵消。紅藥園深朝墜露。白蘋渚淺夜添潮。人醉畫欄橋。  
堪憶處。曲巷試單衫。菱井啄泥懸社燕。桃根爨火種春蠶。風景是江南。  
風景好。菰葉滿橫塘。碧帶幘頭騎馬客。紅釘屐子攏舡娘。兩兩見鴛鴦。  
臨大道。金碧遶天涯。出郭危樓雲作埽。抱江小檻幔垂沙。記得那人家。  
前浦去。何處最能留。黃鳥挽枝啼不歇。落花細逐往來舟。微月上汀洲。  
妝裹淡。時世在江淮。裙襖緩韜雙籠襪。髻根鬆貼兩梁釵。驅鴨去還來。  
頻悵望。耶水與梧宮。誰浣素紗窺越女。因歌白苧號吳儂。總在石蓮東。  
歸去好。長聽子規啼。紅藕城橋風脈脈。黃梅江閣雨淒淒。愁思望中迷。  
江上市。帆落度橋來。兩岸娼樓懸水柵。平舡擊板暝烟開。漁火夜相猜。  
芳草軟。朝暮藉車輪。鸚鵡蚤寒調婢子。琵琶夜雨賽姑神。愁殺浪遊人。



西溪子

襖襖對襟一抹。帕幘兩頭八撮。抱腰身牽帶孔。持帶孔。卸到燭光浮動。暖烟濃。瀉輕紅。

棋底紅編履子。低撒砑羅如水。夜填時重解袜。重束袜。坐久欲填還脫。忽見月如鉤。使人愁。

思帝鄉

撥振遲。歌挑舞又催。半折紅衫遮柱。柱初移。慢撻銀弰絃急。恐難支。不念中宵起。上絃時。

紅盼紫盼藍綠盼。翠帽玉鈴珠串。壓金裙。垂手正巾徐步。毯毛深未分。倏見暖風吹。繞一堂雲。

霓裳羽衣譜未詳。玉貌何人無力。繞珠璫。曳得鈿纓纍纍。履蹠裙自揚。猶自曲終徐立。聽聲長。

浪淘沙

仙橋山前看橘花。單衫裁就橘山蕨。春江空作揉藍色。浪裏淘來那得紗。杉木爲簞竹作檐。江潮能苦雨能甜。連朝只飲檐頭雨。翻道江潮錯着鹽。

南鄉子

蕉葉領橘花翹。紅藤篾子束裙腰。私念鷄雞顏色好。從誰道。裁作大郎頭上帽。藤菜暖。荔枝乾。青蛤河畔碧魚餐。願絞桃榔皮裏肉。炊烏木。暫與小郎充晚腹。賽起祠叢。木棉花發野椒紅。記得丁郎山下路。敲銅鼓。九孔紅螺扇遮舞。盧橘催酸。風生萋葉瘴烟寒。自賣明珠歸極浦。心苦。白氎單衫着秋雨。

甘州子

銀牀金井曉啼鴉。簾額上。襯紅霞。同心梳子夜開花。和露折來斜。無好意。送與謝娘家。

織金衫重懶提筆。雙扼臂。卸來輕。平頭吹蠟炙銅笙。葉底弄鶯聲。無好意。喚與順郎

聽。

江城子

緒門東上海潮青。古西陵。雨冥冥。越王宮女，着履在樟亭。亭下教兵遺竹矢。秋日晚，墮鴉翎。

日出城頭雞子黃。照紅妝。動江光。采蓮江畔，錦纜藕絲長。欲問小姑愁隔浦。長獨處，久無郎。

江深不畜伺潮雞。春和出戶遲。浣紗稀。雙橋釵子，瑣粟綴紅泥。裁得荷花新樣好。羞比着，嫁時衣。

楊柳枝

花萼樓前楊柳枝。美人翦綵自尋思。千絲萬絲誰作樣。剪來總似一條眉。白蝶愛翻輕粉絮。黃鸝偏上縷金條。雙眉葉葉憑君看。無奈低邊是細腰。

踏歌詞

園裏花成子。梁間絮作泥。風鶯移柱線。雲母貼窗衣。漫摘鬢邊篔。上有鬧蛾兒。網戶黏蟲翅。簾旌壓柳條。整釵時對鏡。結襟屢迴繚。漫折井邊桃。上有合歡梢。

天仙子

蠟炬乍開紅芍藥。枝頭又噪星橋鶻。還疑蕩子蚤歸來。蛛網錯。勾眼角。昨晚下階裙帶落。

玉繭牽絲纏寶帔。當胸繡出承恩字。朝朝獨自捲衣裳。蜥蜴尾。長繞臂。誰識牀頭有龍子。

珠雀五層宮髻直。紅縵盤委花磚級。太平天子用恩多。草露漶。裙裏溼。猶許蜻蜒上裙立。

牆裏花枝牆外影。嘶驕緩踏飛花冷。隔牆見得不分明。金甃井。銀絡綆。井面看身見斜傾。

新殿前頭騎馬去。射生籍裏名初註。紅襠垂鐙手垂絲。迴盼處。風繞絮。羞抱夾金鞍。

子住。

魚網劈來螺粉滑。臂痕細壓金條脫。背人寫就兩行款。花勝纈。銀縷結。織指斜封惹。脂沫。

前調 蠡城爲王郎記事

城上春雲城下雨。倩人留堦傾春醕。偷將堦袷障春寒。烹雪黍。炊玉杵。調堦鄉音隔窗語。

前調

鍼管紅抽丹鳳鉸。螭頭金錯裁雙枕。誰家白苧夜歌來。人未寢。霜又凜。誤翦葡萄紫絲錦。

斑斕紋生雙腕纈。夢中欲笑開嬌靨。醒來記得許多情。檀獸爇。釵燕熱。侍婢相看那能說。

長相思

長相思。在春晚。朝日曛曛熨花暖。黃鳥飛。綠波滿。雀粟銜素璫。蛛絲斷金翦。欲着別時衣。開箱自展轉。

長相思。在秋節。複斗垂垂怨蜻蛚。錦紋砧。素絲鑷。夢苦見參星。關深落榆葉。欲識夫婿寒。花階映微雪。

遇陳王

枇杷花裏誰家院。近叢壇。青漆左廂。開繡戶。坐雙鬟。着地畫簾飛燕燕。當階碧草映蘭蘭。車輪未必成三角。攖住門邊那得還。

阿侯十六南鄰女。對門居。相視欲申無限意。口中朱。朝起青烟縈獸爪。晚來紅燭透蝦鬚。牙箱實裏冰蠶繭。骨裏相思豈是虛。

金斗熨開魚子纈。襯紅裳。銅瓶注暖獅頭炭。理黃妝。頻呼小玉因聲巧。欲寫泥金恐恨長。那見瑤臺成粉幃。果然銀漢是紅牆。

酒泉子

風攪紅簾。愁損隔簾人影。倩秦娥、纏越縠。唱吳鹽。黃鋪白鎖春相望。高閣魂驚難上。那更堪、花滿桁。柳垂檐。

可惜春歸。換得好花成葉。啓金箱、疊絮褶。熨單衣。銀鈎翠籠南鄰女。日暮探桑西去。怕秋胡、回道路。返遲遲。

寧掃空牀。怕見滿欄月色。寫金鍼、縈象尺。坐燈涼。屏欹漏月燈猶悄。坐遠影兒較小。爲孤單、長伴曉。似雙雙。

嬾卸頭

糺糺珠臂繩。宛轉轆轤上。那知雙穗條。夜夜空垂帳。楚雀綠釵橋。胡蜂啣衣桁。製得嬾卸頭。殷勤與誰唱。

定西番

校尉新開疏勒。旋右地。返輪臺。未歸來。奪得燕支萬里。草青春已迴。誰道于闐還有野花開。

月落武陽碑下。控鵠血。挽牛螭。看烽紅。夜半軍中女子。鼓聲寒不雄。恰是深閨人。去。夢魂中。

醉公子

是誰過上苑。試馬歸來晚。雙鐙武威銅。櫻桃馬頰紅。百枝燈並起。解馬歸花裏。花底碎金篋。珊瑚錯燕泥。杏園初試酒。挾彈遮楊柳。醉裏困金吾。教姬倒玉壺。綬絲如鷓子。翠帽團團刺。花片綴衣巾。衣花看轉新。

生查子

綠柰匝菜。癩皂角穿蘿屋。犀榻釘明螺。眼底分朝旭。沅浦長。淇水曲。處處難追逐。欲見有何由。簪蠟成紅燭。

浣溪紗

碧玉蒲芽短短針。雀羅波底刺當心。拔蒲歸去水淫淫。櫂染綠苔疑掩袖。幔漂紅



露似瀟襟。晚風吹轉北塘深。

溪女妝成出若耶。芹絲萍蔓逼流斜。青苔石上浣新紗。

愛把單鬟捎竹葉。羞將雙

臉近荷花。緹油前覆夜來車。

軟綠江波鴨子清。日遲游女遍江城。紅橋度燭緩相迎。

細馬隔裙穿鏡子。平舡素

手撥簾旌。大堤春日往來情。

嬌女新妝村豔濃。四枝鬢插石榴紅。出門還怕隔溪風。

石鏡暗飛山後鵲。荻屏銷

書水邊蕩。西施臺館碧波中。

綠滿南園乳雀栖。重花疊葉不通飛。小姑獨出採薔薇。

珥底珠兒徒刺臉。帶穿貝

子恐磨衣。行行立立自尋思。

叢鬢輕籠象格紗。麴塵巾皺翳朝霞。愁聽江閣按紅牙。

簪管杆鉸銀蓋葉。繡牀空

釘白團花。游絲飛絮近天涯。

水繞空江葉繞枝。竹郎橋畔豆娘祠。佳人邂逅最堪思。

燭近只將遮幔子。風前長

自斂衫兒。梨花初落酒闌時。

巫山一段雲

簾壁含烟澹。椒花滴露稀。風吹細雨曉雲低。十二碧峯迷。神女祠前泪，清猿峽裏啼。瞿塘新水麴塵微。行客自依依。寒雨蘿衣溼。晴雲蕉帳開。空艚峽下近陽臺。誰向夢中來。叢笛江妃廟。孤舟新婦隈。山花石竹不須栽。看作小姑釵。

女冠子

上元少女。誰授玉函金笥。倚香壇。畫帳藤花淺。瑠鐘橘乳寒。南宮除牒子。北斗動旛干。猶見春歸燕。似青鸞。

玄都清曉。坐問碧堂紅草。女仙家。玉鉛量星豆。金鑊煮雪花。駐顏丹作粉。繫肘籙垂紗。浼浼溝頭水。盡胡麻。

上清仙夢。恍到十三春洞。玉顏紅。月下隨王母。花前別寧封。黃神潛解佩。赤鳥緩

弛弓稱名多誤聽。爲呼儂。

仙房寂寂。戲採瑤林珠寶。是何鄉。紅尾梢花犬。青衣覆石羊。

鮫絲裁綬短。鵝管呬

笙長。倘得逢燕使。問昭王。

平明受事。堪惜玉笋初侍。小茅君。薄霧籠青鬢。輕烟曳繚裙。

鳳銜琪樹蕊。虬使玉

堂雲。恐逐童男去。思紛紛。

碧簾初弄。暗想秦樓雙鳳。幾多情。玉鏤分蘆節。金箱貯棗餠。

蕉花含祕閣。松影落

層城。誰搗玄霜盡。見雲英。

短花長葉。到處翠幘相接。洞中春。衣炷熬丹錫。脣脂淪水銀。

盤囊閒繫虎。麈尾笑

遣人。總隔蓬萊路。也生塵。

金巾姣好。長佩玉砂瑤草。受清虛。妝鏡殲山鬼。香奩檢道書。

細眉遮羽蓋。素手滌

仙廚。每當三五夜。望蟾蜍。

赤城紫府。閒貯玄瓏妃女。小仙才。節擁藍絲葆。冠抽綠玉釵。

蜂房融日粉。蝶夢遶

天涯。何事劉郎去，不歸來。

山花子

蟬翅宮綃傅體寒。琵琶掩面夜歌闌。插得鈿頭新撥子，是紅蠻。  
隔舍紫姑星會淺，開門烏白雨啼殘。曾卜金錢今始驗，拆和單。  
小院風搖九子鈴。臨河長對特牛星。欲上玉機愁杼短，織難成。  
擲縷燭翻嬌鳳出，縈絲泪盡溼花生。誰道錦文無樣子，看迴程。

春曉曲 迴文

小屏山上西江曲。深處落梅寒簌簌。曉鑑菱開赭粉紅。殘燈穗卷香脂綠。  
草頭階。剗襪袂金花裏。碧鈎旖旎勝玉。繞鳳雙簧蠟炙新。蚤春驚破霜溪竹。

菩薩蠻

含桃着雨花如雪。井邊吹落春雲葉。鸚鵡結釵樓。新娘半上頭。  
裁衣繙樣子。壓線盤金篋。十五小裙腰。能留線幾條。

山雞栖罷烏啼樹。迎入燒盡柑紅炬。複鑰下銅魚。車前一幟除。  
褥花嘗對縫。羞見雙鴛控。漸減玉鑪烟。人眠故未眠。

宣城二月鶯啼蚤。羅敷十五雙鬢小。錦帶約柔鉤。使君南陌頭。  
連錢嘶日暮。共返

宣城渡。莫是看羅敷。羅敷自有夫。

輕雷鹿鹿宮車轉。晚涼偷弄邠王管。雙甲小蟻蛭。黃鸝處處啼。  
春風吹欲遍。盡作

西清怨。暗裏換歌頭。伊州似石州。

一株柳樹千條葉。桃根巧向梅根接。花塢暗相通。新花隔幾重。  
寶函春信杳。水漫

紅魚小。半格軸頭絲。環環無盡時。

日黃不上妝山面。露圓難綴珠簾線。種得鬱金花。將來浸木瓜。  
枕屏山六扇。上有

江南岸。岸盡是吳關。關前人未還。

### 河瀆神

楚雨歇殘陽。滿庭新月瀟湘。松花溼影墜山黃。帝女花竿廟旁。  
瑤瑟洞簫來極浦。

風吹桂酒椒漿。夜半烟寒翠斂。幾人能上高唐。

丹殿俯嵯峨。洞庭秋水湘娥。深房鬼火暗青蘿。嗚咽神絃白歌。

文木漆光絲纏腹。

蕉花影裏婆娑。祇爲相思美子。燈前一斂雙蛾。

採蓮子

風起蓮江皺綠羅。舉棹並舡歸唱採蓮歌。年少畫屏只見金鸕鷀。舉棹不信雙雙水

鳥多。年少細萍點點釘花舡。舉棹荇線飄飄縛畫竿。年少折得小蓮羞並蒂。舉棹

紅靴鉤入錦裙邊。年少

更漏子

棗屏深。樺燭冷。複壁照人雙影。魚墜管。獸銜環。一牀衾枕單。更漏咽。樓頭月。偏射

小窗明。蛤紅幕掩。鵲橋低。銀河又向西。

小檀槽。新捍撥。彈就夜堂秋月。銀箭斷。玉釵涼。燭槃紅泪長。寒角動。霜風送。驚起

金微殘夢。關戍柝。女郎砧。城南秋漸深。

慢鉤繩。複斗穗。寒夜美人半睡。雲掩絮。月隴明。枕函亭釧聲。蠶燭耀。飛蛾遶。門外  
烏啼難曉。燔蕙燼。隱紗籠。罌罌劃碎紅。  
翦鮫絲。量獸錦。寬窄燈前自審。鈿尺短。錯刀殘。晚來多少寒。園霧薄。林花落。水面  
星搖池閣。山犬吠。草蟲鳴。曲房魂暗驚。  
井梧陰。庭樹暝。寂寂畫闌人靜。蠟子焰。蟹衣筐。鄰家夜績涼。芭蕉露。零如雨。記得  
暗中歡去。宵漏盡。曉鐘催。碧窗殊未來。

木蘭花令

曉鶯昵昵流妝閣。日上燭吹紅繡幕。束將方帶玉芙蓉。裏就半鞦韆芍藥。尋花露  
冷胭脂薄。花底暗翻釵子落。誰開鴛鴦錦。抱輕雲。誤使丁娘枕前索。

小重山

春殿香銷鎖碧空。夜涼宮漏悄。咽銅龍。銀河瀉地水瀼瀼。妝初洗。殘粉膩溝紅。雙  
鳳宿梧桐。小桃金井上。露華濃。長門枉自閉重重。珠闥迥。時拂玉階蟲。

芳草茸茸翠輦遲。昭陽初日影，散彤墀。銀旛綵勝戴雙纒。金錯小，翦出萬年枝。御苑落花時。祠前祈百子，漢家池。承恩唯有臂紅知。中宵夢，頻起視胭脂。

黃帕銜鼈結象牀。捲衣長拂面，侍君王。衫襟深惹御篝香。綃幃影，隱隱見鴛鴦。別院罷霓裳。衆中新賜着，殿頭黃。年來獨繫絳紗囊。江南路，四十杜秋娘。

鷓鴣高翮負日溫。春冰融太液，細流渾。嬾調黃子漬香蓀。羊車近，竹葉滿金盆。十載見承恩。踏青隨例出，望春門。卻收銀鑰暗銷魂。梨花落，深殿又黃昏。

喜遷鶯

榆葉裏，棟花前。燒盡白礬烟。嬌龍自走不須鞭。最喜是鶯遷。歌羽歌，舞羽舞。人在掌中飛去。霧絲裙子本踟躕。何處更留仙。杏苑北，曲江西。殘雪尙依依。輕輪輾絮着人衣。拊馬夜歸遲。蓬宴遙，蓮漏淺。紅燭萬條深院。曉來唯聽乳鶯啼。移上綠楊枝。

臨江仙



澧浦紅蘭開日暮。美人倚徙空亭。幽巖春竹雨冥冥。長思公子，愁絕翠雲屏。碧水尚傳瑤瑟怨。根根夜鼓湘靈。蒼梧南去晚山青。楚江遷客，憔悴不堪聽。

秋藕絲裙春樹面。龍安寺裏爲家。時來空館倚欄斜。欄前新水，日日浸桃花。素手自撩金索動。腕繩輕約紅紗。東風相見各天涯。道傍愁思，散作日邊霞。

高閣近花紅影合。繞牀還種青梧。西施嬌小似無夫。黃金梯滑，不見有人扶。菱根遮浦暗含情。但採菖蒲。金闈門外夜啼烏。女墳前去，寒燭照東湖。

晚渡潮生野火靜。叢祠深對江波。垂鬟接黛一青娥。寶冠珠絡，花帔貼銀鵝。估客往來爭禱賽。隔舡吹鳳鳴鸞。山低如帶水如羅。螭頭黃絹，隱隱畫雙螺。

睡架茶蘼紅刺軟。霧中恍蔽輕紈。幾番覓劍坐花間。香山未暖，石炭擣烟寒。薄絮裝衣縈背脚。空懸辟凍金環。武溪雪淨尙征蠻。杜鵑聲杳，莫是未教還。

### 竹枝

十二峯前竹枝十二灘。女兒嘈嘈急水竹枝渡來難。女兒瞿塘看似竹枝桃花馬。女

兒只少裝成竹枝八寶鞍。女兒錦江春水竹枝白浮浮。女兒擔水嬌娘竹枝踏水愁。女兒洗面好來竹枝清溜裏。女兒洗足當尋竹枝濁浪頭。女兒

雙帶子

紅藕香銷暑殿涼。玉梭橫枕墮釵長。東樓賦得新來怨。中夜看沈龜甲黃。黃甲龜沈看夜中。怨來新得賦樓東。長釵墮枕橫梭玉。涼殿暑銷香藕紅。

君在教頭歌昔昔。妓看垂手落摻摻。裙襴半將遮履點。柘竿長是拄腰纖。纖腰拄是長竿柘。點履遮將半襴裙。摻摻落手垂看妓。昔昔歌頭教在君。

樓高是處盡烏啼。柳外烟同翠眼迷。流水落花春寂寂。浮家一檻近前溪。溪前近檻一家浮。寂寂春花落水流。迷眼翠烟外柳啼。烏盡處是高樓。

春缸玉酒細鱗紅。怨鳥啼花隔數重。銀子蒜垂簾押靜。新開背面兩鸞攏。鸞兩面背開新。靜押簾垂蒜子銀。重數隔花啼鳥怨。紅鱗細酒玉缸春。

誰向妝亭亭後別。望中烟雨帶帆開。絲回漫水藍如襖。黛繞橫山青似煤。煤似青

山橫繞黛。襖如藍水漫回絲。開帆帶雨烟中望。別後亭亭妝向誰。  
紅荷知問白荷長。細細風來細細香。濃露滑篙聯艇側。同來到處問家鄉。  
處到來同。側艇聯篙滑露濃。香細細來風細細。長荷白問短荷紅。  
寒雨江汀隔斷橋。去時當似不來潮。蘭浦憶人愁渺目。漫漫夜夢合花梢。  
梢花合  
夢夜漫漫。目渺愁人憶浦蘭。潮來不似當時去。橋斷隔汀江雨寒。  
鳩浮白水踏歌虛。鬢捋蟲珠雀畫裾。樓上捲裳龍女侍。溝前御宿卸妝初。  
初妝卸  
宿御前溝。侍女龍裳捲上樓。裾畫雀珠蟲捋鬢。虛歌踏水白浮鳩。

甘州遍

青槐路。迤邐返長楊。暮雲翔。銀魚立胛。金鵝仗帶。曾騎黃馬射黃羊。  
歌肆側。酒壚  
旁。調鷹牽犬歸去。愁殺羽林郎。花剗帽。往往賭毬場。暗風揚。薰衣透縷。  
隔巷細生香。  
金槌去。長策棗紅駟。五陵遊。純鉤蒯繞。縵胡纓曲。冰梢獵獵似星流。  
兄執戟。弟長  
秋。射飛逐沒嘗見。便殿賜衣裘。年正少。花發醉娼樓。錦纏頭。幾行歌舞。  
一曲遍甘州。

甘州遍。羌笛又將殘。聽聲寒。黃花碎葉。瑠戈鐵馬。茫茫飛雪滿燕山。邊角靜。戍衣單。紅閨萬里夢斷。都護請生還。雁帛遠。風急墮旌竿。望長安。甘泉鐃吹。何日達蕭關。秋風起。展轉事長征。出邊城。彎弧鵠角。佩刀犀首。趨趨斥突願擒生。收勅勒。捲攏槍。夜涼頻擊刁斗。空磧答遙聲。轉戰苦。車騎未成名。塞魂驚。琵琶孤塚。春草日青青。

十六字令

花下影。跟人上玉墀。誰推倒。橫着半氍兒。

搗練子

青草軟。綠波長。日暮鄉關思渺茫。吳苑隋堤何處是。滿江垂柳又垂楊。

又 泊山塘作

雲淡淡。雨絲絲。舊日真娘何處祠。橫笛短簫聲漸遠。藕花塘子夜來時。

夢江南 當緩緩歸曲

臨安去。陌上已開花。扇影似翻江上羽。車簾剛拂草頭沙。緩緩好歸家。

臨安去。陌上已花開。繞路烟絲籠暖去。清江日影帶潮回。緩緩好歸來。

法駕導引 送一苓和尚還羅浮

江帆暮。江帆暮。六月水西頭。竹子牽來黃蛤履。荷花汎去白螺舟。送汝返羅浮。

憶王孫

東風吹柳覆金堤。夾岸紅樓望去迷。日映游絲捲幔低。畫橋西。一樹嬌花鳥自啼。

又 遊西施山

西施歌館舊城東。畫棟朱欄映碧空。花絮陰陰趁晚風。翠重重。石上胭脂墮雨紅。

翦半

光宅坊前十字街。桃子花開。杏子花開。鈿頭櫪子有人猜。恐是銅釵。不是金釵。縛竹纖纖似女腰。欲上溪橋。怕上溪橋。黑雲遮住北山坳。昨日風潮。今日風潮。木槲花間乳鵲栖。鵲也能飛。花也能飛。臨行空記草花期。二月當歸。三月當歸。

長相思 泛舟西江卽事

一橋低。兩橋低。棗樹灣頭西復西。江深雨欲迷。早鳥啼。晚鳥啼。兩槳歸來鳥未棲。相逢半路溪。

雙頭釵。獨頭釵。一樣金鵝兩樣排。釵梁起四臺。烏帽來。白帽來。湖就磯頭望幾迴。菖蒲花未開。

點絳脣 送春

惱殺啼鶯。逢人還道春歸去。留人不住。誰要留春住。花絮茫茫。萬點愁人緒。歸何處。春歸無路。莫是人歸路。

又 姜亦輿汝長庚庚邀聽琵琶

抱出檀槽。金絲撥子輕輕落。淺圍羅幙。月上欄杆角。夜半嘈嘈。繁手驚相錯。敲銀索。夢回妝閣。花底飛烏鵲。

又 采蓮曲

南浦風微。畫橈已到深深處。藕花遮住。不許穿花去。隔藕叢叢。似有人言語。難尋

泝。亂紅無主。一望斜陽暮。

相見懽

倚牀還繡芙蓉。對花叢。牽得絲絲柳線翠烟籠。銜去一絲紅。

愁思遠。拋金翦。唾殘絨。羞煞鴛鴦

花前顧影粼粼。水中人。水面殘花片片繞人身。

私自整。紅斜領。茜兒巾。卻訝領間

巾裏刺花新。

又 懷人

秋風嫋嫋登臺。強徘徊。兩兩鴛鴦飛去幾時回。又是晚潮來。

錢塘路。西陵渡。總天涯。不是蚤潮

霜天曉角

全丁大聲史憲臣徐徽之蔡大敬來成夫登望京門樓

平沙十里。滾滾江潮水。橫下秋鷹如削。短草岸。朔風起。欄杆人共倚。舊關何處是。記得西施。去路殘陽外。碧烟裏。

又 曉起

柳烟如織。病起逢寒食。昨夜東風吹緊。花梢上。雨來急。曉開銅鏡立。鏡光涵曉色。驚見濃雲堆下梨花月。一輪白。

醜奴兒令 妓席送酒

玉瓶春暖醪醲淺。豔殺青哥。窄袖摩挲。蚤把空杯弄鈿螺。擎來誤溼雙條脫。重瀉金波。斜對銀河唱罷。甘州奈若何。青歌妓名

又

珠繩初結銀河瀉。花滿中庭。露滿中庭。嬾向庭前看月明。山屏幾褶孤眠久。夢也難憑。醒也難憑。翻願今宵夢不成。

減字木蘭花 桑婦詞

城南暮雨。尚有採桑秦氏女。低繫桑籠。獨倚桃花一樹紅。青驄西去。口裏銜絲銜不住。歸到燈前。一任三眠與四眠。



又 全姜八孝廉有訪

陸公祠畔。十里橫塘行未半。花港深深。王四娘家何處尋。  
醪醅初注。又是孝廉缸  
欲去。怕照菱花對面分明又一家。

卜算子

小鳥踏花枝。花落如紅霰。花樹朦朧一徑迷。中有佳人面。  
愁見落花多。欲去還留  
戀。扇子盛來仔細看。點點桃花片。  
門外綠楊堤。門裏紅妝女。何處金羈美少年。故綰垂楊纜。  
風起攪楊花。飛作廉纖  
雨。眼底迷迷不見人。且聽黃鸝語。

阮郎歸 春暮

櫻桃子熟竹初肥。南園晝啓遲。蜂房瀟粉暗成脾。畫垣生綠衣。  
蒲雨漲。柳橋低。鞦韆深院迷。杜鵑啼歇最高枝。有人還未歸。

又 秋暮見曉妝者

拒霜花發傍妝樓。樓前細水流。隔花初日上簾鉤。美人樓上頭。開碧篋，瀉紅油。鏡邊長坐愁。鴛鴦瓦，熱露華浮。玉釵寒未抽。

浣溪沙

和任二王甫迴環韻

陰柳垂庭山枕斜。禽鳴自上檻邊花。深屏午夢隔窗紗。甕啓冰牙蛆瀉酒，襟披雪眼蟹瀦茶。臨妝晚掃淡黃鴉。

迴前

斜枕山庭垂柳陰。花邊檻上自鳴禽。紗窗隔夢午屏深。酒瀉蛆牙冰啓甕，茶瀦蟹眼雪披襟。鴉黃淡掃晚妝臨。

武陵春

登仙桃山

溪口桃花紅欲暮。淺水泛胡麻。行盡空林散紫霞。來到上清家。縹緲香壇松飯熟，石鼎醉丹砂。歸路殘陽噪晚鴉。回首亂雲遮。

菩薩蠻

卽事

花前鼓瑟花間聽。紅燈低照新妝靚。侍婢喚行雲。高唐曾見君。玉籠香霧繞。怕見青銅曉。井上轆轤聲。翻教睡畫屏。

又 詠枕和友

珊瑚鏤枕珠圍細。盤雲散澤香衣膩。枯壓鬢邊花。花紅印一些。與誰同轉側。繡出雙鴻鴻。將枕付陳思。陳思思不思。嘉文小裹雙絲紐。單窩認得孤眠久。淚浥口脂融。相逢一夢中。花函遮短幘。中有相思字。銀燭夜來新。深憐抱枕人。

又 商霖臣納姬

溝頭流水山頭雪。春江幾度迎桃葉。桃葉渡江來。江花兩岸開。珍珠量幾斛。買得雙蛾綠。衫子綠于蛾。雙蛾奈綠何。

又 爲楊生催妝者多見紙落緣上官知書也最後弟子周風遠索性和詞

丹楓葉葉迎春小。錦茵開處香鸞繞。銀扇隔珊瑚。燈花百子紅。欄前烏鵲曙。休道

催妝去。賦得夜來珠。昭容攬鏡餘。

雕籠細壓花毬小。金箱疊鎖蛛絲繞。畫燭滿簾櫳。雙樽琥珀紅。芙蓉清漏曙。曉鳳銜烟去。慢撒帳頭珠。香奩貯有餘。

又 顛倒韻伯兄大千姪阿蓮仝作

藥欄勾墮銜釵雀。雀釵銜墮勾欄藥。花落畫屏紗。紗屏畫落花。關山曉。人遠惜殘春。春殘惜遠人。

曉山關雁繞。繞雁

軟鋪銅甃飛紅淺。淺紅飛甃銅鋪軟。深巷柳搖金。金搖柳巷深。香篝爚。門掩半黃昏。昏黃半掩門。

爚篝香霧薄。薄霧

去春三鳥栖來曙。曙來栖鳥三春去。邊塞絕秋千。千秋絕塞邊。哀彈錯。樓倚謝娘秋。秋娘謝倚樓。

錯彈哀抵角。角抵

井榦雙斷金絲綆。綆絲金斷雙榦井。城上響啼鶯。鶯啼響上城。南園綺。遲日墜鳴機。機鳴墜日遲。

綺園南去騎。騎去

簋錢金壓花裙唾。唾裙花壓金錢。斜日鬪鈿車。車鈿鬪日斜。  
酒胡雕列。笛。笛列  
雕胡酒。孤燭醉當鑪。鑪當醉燭孤。

熨香沈斗珠繩屈。屈繩珠斗沈香熨。花鴨睡籠紗。紗籠睡鴨花。  
減絲荷漏淺。淺漏  
荷絲減。長夜好難量。量難好夜長。

燭槃深影春幮曲。曲幮春影深槃燭。迷路入花溪。溪花入路迷。  
枕函空覆錦。錦覆  
空函枕。遮莫苦棲鴉。鴉棲苦莫遮。

刺桐花滿高橋寺。寺橋高滿花桐刺。魂斷幾家村。村家幾斷魂。  
去騶嘶落絮。絮落  
嘶騶去。娘度夜中霜。霜中夜度娘。

小姑村映青溪曉。曉溪青映村姑小。家是就磯斜。斜磯就是家。  
返舟蓮櫂遠。遠櫂  
蓮舟返。儂識舊娃宮。宮娃舊識儂。

又 寄友

上潮春漲西陵望。望陵西漲春潮上。寒雨渡來難。難來渡雨寒。  
燕泥銜斷檻。檻斷

銜泥燕。時苦作蠶絲。絲蠶作苦時。

又 訪所歡作

路旁廂板烏桺樹。樹桺烏板廂旁路。尋處甚陰陰。陰陰甚處尋。  
縷絲千點雨。雨點  
千絲縷。何若別情多。多情別若何。

又 落帆亭送女士黃皆令遠行

窄帆輕落亭前驛。驛前亭落輕帆窄。紅露浥花櫳。櫳花浥露紅。  
渡淮臨雨暮。暮雨  
臨淮渡。長過莫愁鄉。鄉愁莫過長。

攤破浣溪紗 懷張七雛隱粵東未歸

黃木灣前蘆雁稀。琵琶洲畔竹花飛。南去陸郎烟瘴裏。幾時歸。  
翠鳥羽長臨鏡遠。  
章魚海闊跳波微。看到木棉紅又白。好裝衣。

少年游 過陵下感舊

當時邂逅凌家山下。桃樹滿前津。今來又值桃花開後。不見那時人。  
香輪翠幙陵

前路日影動飛塵。流水橫斜。鳥啼哀怨。愁對武陵春。

南柯子 鬪草詞

喜摘唯紅豆。難攀是白榆。百花亭外展氍毹。藏得宜男。臨賽又踟蹰。綃帕牽藤刺。細欄裏露珠。朦朧卻把翠鈿輸。暗揀花枝。插補鬢邊虛。

又 和楊王客賦得玲瓏隔窗語

青漆垂銀鑰。丹紗映玉櫳。隔窗嬌立小芙蓉。兩地分明。細語一燈紅。好鳥音初剪。幽蘭氣轉濃。相看枉自喚玲瓏。一寸明螺。榻子萬重峯。

又 落花

粉蕊飄來薄。紅英落處稀。一團并作屐頭泥。卻是桃花飛過。李花飛。殘粉留青蒂。零紅斷碧枝。落花那辨蚤和遲。空自曉風吹了。晚風吹。

又 飲龔氏

梧子叢臺敞。荷香小幕開。冰漿雪灑滿罇罍。時見梁間雙燕。自飛回。覆草傳螺盃。

藏鉤覓墜釵。閨中柳絮謝家才。妬煞王郎私遣隔簾猜。

鷓鴣天

絳帳迢迢結作雲。東風吹皺石榴紋。芙蓉弄色調金粉。蛺蝶尋雙認繡裙。  
花羃屨。  
思紛紛。游車歸去日斜曛。不知唱得難忘曲。十二釵邊若箇聞。

又 過女教場有感

銀甲瑠戈小隊工。內家宣敕教從戎。山蘿覆鏃縈金細。野火燒旗閃幔紅。  
宮月靜。  
陣雲空。鳳凰山下抱龍弓。珠兜玉鞞團營路。小雨寒花何處逢。

又 賦得鴛鴦沙路遠

翠鬢紅翹金蹠低。藕花多處一汀迷。誰憐比翼琴臺瓦。枉織雙絲錦字機。  
銀埽遠。  
玉塘稀。天長海闊幾時歸。相離只解相思死。那解相思未死時。  
銀埽遠。  
蓼浦蘭江隔遠涔。彩毛飛去信音沈。十三絃上鍤金柱。二八丫頭琢玉簪。  
無處覓。  
好難尋。空留雙影繡羅衾。幾回欲向沙頭路。到得沙頭路轉深。



玉樓春 姜汝高公子迎婚武林

梅花開滿清江路。北府夜涼新轡度。誰開扇上五明羅。只掛燈前九子瑤。西陵水。創迴潮暮。雙瓊乍傳天欲曙。開元新賜小金錢。撒在帳中無覓處。

又 八月宿姜真源憲使後院夜飲全小農汝旦作

紅蕖小幙開深檻。微雨乍收涼漏淺。酒淹鑪火帶霜吹。風攪燭油和焰翦。銀缸交。泛明河轉。玉樹當軒共婉變。夜深空憶廣陵濤。水繞曲江知近遠。

又 題詩緯

乃若金箱填字。遠過縹囊。鏤管成文。勿需黛椀。秋金懷寶。鍼之篇。晨鏡挂玉。臺之詠。則有寄旨蒲生。興情紈素。藏明月于篋笥之中。望悲風于泉蔭之末。雖或華釵矚首。難問兩思。澀布縫衣。徒傷十指。誠哉托累。歎以敘情。惟導揚之撫志者矣。夫陰陽麗居。玄黃以間。奇偶環生。鍾呂惟錯。故物情以抒播而相宣。幽思緣詠謠而就闡。曩者塗山嬌女。創始南音。於越小君。實憐西往。周

官諧淑女之章。尹姑重都人之什。則夫學士稱詩。不疑備錄。閨中揚誦。能無軼音。泊乎。倅仔似徽。於有漢。令暉振藻。于齊代。烏聽三妹。未誤吹桃。蘭偶二媛。不生上葉。縱左兒金草。數樹遺馨。陶氏鈿箏。幾行斷線。亦且修肴扶寸。而成味。繭絲雜組。以爲色。況復盤中屈曲。刀尺所未傳。錦上迴環。機絞所難及。以至翻風多仙去之思。著日起忘歸之樂。卽新聲苦耳。子夜歌來。舊地驚心。陽春看去。妓童且戀其金鈿。嫂婢竟操夫團扇。沙門留少婦。色比茗華。湘岸送嬰兒。號爲蘭杜。斯亦叢擡所難遺。稱檀之必備也。且夫古之稱採撫者。豈徒規長飾子。周流美好云爾哉。蓋將以離合衆多。區別媿妙。而善用其所至。擾也。雜花非一色。而皆釀于目。紛割非一味。而皆蕩于齒。故混絲匏于條貫之會。則扭矣。列黼畫于纂組之班。則殺矣。故夫曩軼旣備。搜討易爲功。近載未詳。賓陳難爲力。苟其故杼之纏綿。自必殘絲之紹屬。然而空織無緯。求匹自難。絲子未生。春蠶已化。當日婉兒選士。帳殿珠飛。惠姬授書。藜屏火燿。加

以婦功而受婦絲。則緝網不失其文。以女士而作女誠。則窈窕不傷其體。矧玉映嗣本中郎家。餘鮑照紅吟未斷。還傳韻面之詞。綠篋堪留。實儲傷心之句。曾攬珮纒于澧外。已散珠唾于雲間。則其董銅照物。鏡裏花開。魏尺量衣。燈前錦爛。紅蛾著樹。必當收園客之絲。綺瑟停歌。誰謂滅嫫妃之鑷哉。

吳山曉閣妝螺子。山木倒開蠻鏡裏。筆牀閒寫竹衣紅。書帶白垂藤葦紫。機頭小軸穿花綺。纂就散絲盈絡緯。秋波千頃照芙蓉。無數綵雲江畔起。

虞美人 九日蠡城遇雨

龍山秋曙官亭冷。烟鎖茱萸井。西風吹雨雁南來。何處還登戲馬宋公臺。美人壚下桑郎熟。細把金錢菊。遼東皂帽墮堪傷。不道滿城風雨又重陽。

又 廣陵李宗伯寓觀女劇作

蕪城新曲勾欄淺。覆地氍毹軟。小蠻金管雪兒箏。二十四橋明月照人醒。三朝不作銜書鳳。但舞江南弄。曉風散去彩雲愁。可是竹西歌吹舊揚州。

又 喜來我平歸自江右寄詩并詢徐大文張祖望吳雲章消息

布帆婀娜江州至。貽我相思字。懷中一日九開看。記得舊時風雨夜闌干。潮平若  
泛西陵渡。須把滕王賦。南州榻冷劍城涼。借問延陵何日下南昌。

又 寄懷鄒訐士

宮鶯細囀皇州路。花暖金盤露。春風扈從賦長楊。策馬歸來重醉酒壚傍。錢塘五  
月冰壺曉。別館新荷小。瑤辭百幅重南金。思煞梁園客子到如今。

青玉案 渡江有感

夕陽江上丹楓暮。看車馬紛無數。當日西施從此去。城山出海樓船近岸。中有更衣  
處。平沙十里長亭路。空留得花如霧。最恨江流流不住。暮潮初下。午潮還上。今古  
西陵渡。

片帆絳處蘆花白。痛年少、經兵革。庾信江陵歸未得。教兵城下。高遷屯畔。一夜寒濤  
坼。東來西往看如織。問誰是、當時客。睹此茫茫百思集。素車何在。烏鳶散盡。猶有

人寤臆。

瑞鷓鴣 合虞美人調和姪阿蓮

梨花彈鵲驚春雪。柳曲迎車怯曉風。籃外蝶衣籠畫粉。樓頭鳳蠟瀉珠紅。燼迷銀  
葉憐妝坼。露壓金槽滴睡濃。無奈景陽鐘隱隱。數聲和月到簾櫳。

春還繡陌桃初落。日映璫綃幙半遮。黃點額頭花勝結。紅抽靴子蒯繩芽。妬蛾筭

合矜秦趙。細犢車香繞狹斜。空有侍中誇易識。難忘一笑在東家。

吳娃窈窕裁芳紵。楚竹參差聚列星。歌扇影迴屏半褶。舞裙絲挂箔頭釘。觴迎水

曲翻龍鬢。車轉花梢動鴿鈴。天上舊曾聽鼓瑟。歸來幾度暮山青。

董賢館外驕驕騁。班氏門前冷鳥啼。湘浦芰裳迷蔡北。秦臺蘇合出烏西。鍼縈鸞

縷愁丹纏。燈滿蠶塢怨赤蹄。難與故夫攜束素。重逢但唱杞梁妻。

踏莎行 題梅市香奩集後

寶扇橫時。玉堂深處。開奩齊唱金鍼句。漢陽少婦解璇璣。孝標令妹工詞賦。鬱草

名金柳花成絮。滿闌種就珍珠樹。欲聽緜氏海西謠。須尋仙尉江南路。

小重山

麥壠青青菜壠黃。野棠花滿路。日初長。誰家女伴鬪新妝。蜂來往。刺得口脂香。三  
五映垂楊。見人還卻步。背方塘。小姑不解斷人腸。看花落。又看浴鴛鴦。

又 鞦韆詞

繡柱紅繩曳彩雲。雙雙懸畫板。對斜曛。風吹襪子小鴉分。重扶下。低繫水羅裙。天  
際映虹紋。拋來香帶薄。繞氤氳。空園人散欲黃昏。驚鴻墮。花落自紛紛。

又 尋劉氏姬人彈琴時正學織縑催促始出坐後彈幽蘭操指弱苦絃逼又

私顧坐人每彈多誤頻視指爪云爲剪鋸所傷賦小令卽事讀示之

花裏重尋趙璧彈。流黃朝日映。織初殘。停機暗下理雙鬟。調絃請。莫是喜幽蘭。絃  
澀苦難安。機絲曾裂指。沁心寒。思繁錯記寫離鸞。彈多誤。頻脫指環看。

又 得友書

青鳥銜來雙錦鱗。背人佯撇下，小重茵。口脂紅淺，溫香津。緘題處，印得指螺新。素  
字小泥銀。簪花新樣巧，衛夫人。鴛鴦格子，翦江蘋。波紋細，恍見淚粼粼。

又

一過東湖深又深。石橋啼不斷，午時禽。柳黃曾壓，絞兒金。雙朱戶，流水書沈沈。有  
女暗相尋。紅衣羞淚溼，洗前襟。東風吹放小桃心。吹難住，吹落滿庭陰。

調笑令 馮二

馮二馬洲當壚者也。倩鍾子由解牲桃枝詞而就牲焉。跣渡江行不得從。

蘭陵酒壚江縣前。壚頭小妓名阿絃。妝成好詠晚桃曲，手持雙帶黃金錢。金錢綰  
帶隨手斷。願結銀牀幔頭蒜。桃枝本是紅紫枝，翻作當年柳枝怨。

怨怨柳如線。青漆鴉頭紅脰燕。背人偷弄金條釧。一曲桃枝相戀。落花飛滿春江面。  
飛過春江何限。

又 胥荅弟

毛翰林詞

四十三

鄧人伍鱗。字介伍。親毫之胥。吉人。吉女弟。荅弟。嫠居。彊之婚。伍。荅弟辭。既。荅弟慕伍才。比教傅姆。竊伍詩取誦。吉迺效諸葛令婚。江彪事。彊納之。不就也。江右王于一記其事。姓嘗私問伍。伍曰。荅弟愛才者。雖峻甚。然外似夷。曾教婢索書白。紈子。妄意婢攜也。付豔語二十字去。次日婢誦得。詢之。曰。昨主紈子教予也。又曰。納伍時。荅弟倚燭樹哭。嘗時卸頭妝。鬢旁膚倍絲色。肩披絲襦。襠色不及也。比睇瀏欲落。又曰。荅弟博文史。筆才最敏。吉以手寓之。覆寓云。夫者。天也。天固不可逃。夫固不可忘也。又曰。彼天下男子。不幸。瞰予闕。當稱兄姊。善矣。他勿敢聞矣。兄之情。既已知。心如石。不可移。又寓云。昨伍夢。姊同器食。何也。豈天耶。又覆寓云。羞人。何緣使人得此惡夢。

張玄小妹。閨房姿。傾城能作顧。兔詞。孤鴛文彩本相惜。只憐花鴨難求雌。幃幪熊熊燭光動。誤泛桃花到花洞。天青地白何所關。愁煞江郎對牀夢。

夢夢。晚花凍。小妹閨房原解誦。窺幃偏愛求風弄。恰是琴心難動。琴心裊裊春風送。



豈是琴心難動。

又 王琴

人言吳雲章。悅江右妓乳燕。妓比作越髻。願從歸。張參軍席上嘲之。下坐者曰。章少時任子。就北試。諸父勞酒。設東院兩妓。迓之。侑一王琴。一王箏也。琴年弱好章。章時例著紗帽藍衣靴。臨行。琴私呼曰。紗帽郎。背以一觴。別後十年再入都。見琴院西。曰。非紗帽郎耶。謔章寓。告以羶隘。且懼漏大人側。琴立謀購別所安置。詰旦有叩寓婦人聲。則琴也。潛徙去。且曰。昨誤作官人妾。苦贖之。今自由耳。且曰。今乃幸酬一觴。願居移月。章王太君。太君聞之。諷俱歸。琴泣曰。不復爲人妾矣。章歸後。都破不得問。下坐者。章妹壻商子。

眞珠洛下排銀觴。停絃暗呼紗帽郎。金鈿花合入侯幕。重逢仍在光延坊。光延坊南泰娘路。別住街頭有樗樹。傾觴一顧十載心。化作片雲無覓處。

處處繞飛絮。紗帽郎今何處去。章臺折盡長條樹。樗子街頭重遇。玉餅金瓊燈前注。

愁煞夜烏啼曙。

臨江仙 沈康臣生日席上作

五月海榴紅照眼。美人初佩丹砂。金堂綺席啓朝霞。暑衣裁葛葉。冰碗浸荷花。就子虛將入奏。漢庭狗監先誇。秋風錦石動星槎。但懸金似斗。那羨棗如瓜。細結五絲仙勝縷。屏間艾虎交懸。願郎如虎復如仙。山公會典簿。四十正當年。子生難跨萬乘也。應日數官錢。他時花拂錦連乾。欲看三島雪。更泛五湖舡。

男

又 送董琴菴司馬之任汾州

紅旆遠迎汾上路。樓舡還賦秋風。兒童騎就竹龍蔥。寒烟含柳碧。關雨墜楓紅。相江都三策貴。勿需司馬軍容。琴臺撤幕傲芙蓉。高山千萬疊。流水兩三重。

漢

又 贈任石友初度

記得蜀葵花發後。一檜長對花前。鳴鳩初拂杖鄉年。紫簾開碧篠。丹竈有青蓮。十畝綺園還自賦。彥升當日詩篇。玉鉤金轄釣魚舡。枕來滄海外。漱向赤城邊。

十

蝶戀花

蠟子櫻兒飛綠鵲。午睡裁醒，倚遍雕紅藥。青映遠山迴雨脚。殘虹幾暈胭脂削。滿院繁花看漸落。日暮風生，片片吹來薄。黏得斷絲絲又弱。重重絆住鞦韆索。日暖櫻桃紅照水。粉蝶飛來，水上銜香蕊。映水雙雙低復起。影兒也在花窩裏。後缺

唐多令 嘲柳兒

隋苑覆依依。行人迷又迷。風前空惜好腰肢。待得長條堪作線，蠶箔下，又繰絲。折盡渭亭枝。年年送別離。滿欄空白撲人衣。待得飛花堪作絮，交領下，暖風吹。

江神子 送柳兒

紅亭細柳碧條條。解輕舸，渡春潮。沾酒簾低，春色滿河橋。送得柳枝南浦去，人漸遠，楚天遙。臨行重繫綠絲絛。拂花梢。望迢迢。柳絮飛飛，偏惹柘黃袍。春去那堪還積雪，點點下，未曾消。

花銜日色柳銜烟。畫樓前。水連天。緩榜輕歌，鴨嘴小娘舡。新載搖郎湖曲裏，不願取。

渡頭錢。前山深樹有啼鶻。恨年年。未歸旋。紅板人家。獨自掛鞦韆。日薄餘寒春又晚。溪路遠。草芊芊。

祝英臺近

畫欄低。斜日暮。睡起甚無緒。蝶游絲。陣陣惹飛絮。是他梅子生心。櫻桃辭蒂。著甚箇。五風三雨。隔牆樹。聽葉底鶻兒。不住叫誰去。看又黃昏。寂寂閉朱戶。夜來明月何如。幾時回顧。記不出。初三十五。

滿江紅 商雨臣彈琴作

猊火初紅。抱綠綺、夜堂三弄。漸秋老、亭皋木落。晚雲流凍。紫稗霜田翔寡鶻。碧梧涼葉棲雛鳳。似蘭娘、峽裏聽流泉。當時夢。幾曾是、商陵痛。何須作、雍門慟。但前軒月下。手揮目送。三尺冰絃。看似雪。有新聲。進入鴛鴦綜。恰七條、總似一條絲。絲絲動。

又 施愚山憲長招全韋劍威六匠陳集生張南士徐伯調平載問過岳王祠

觀宋高宗手敕用文待詔王弇州韻

第六橋頭。四望裏、水青山綠。柳陰下、幔舟艤岸。管笙低蹙。過雨曉移東嶺盡。清鐘午度西林曲。趁紅裙、同拜岳王祠。閒追逐。雙熊仗、排花谷。交螭字、橫荒麓。啓玉函珠璽。鳳鸞飛簇。漫道明湖春去久。聽子規、尙叫南枝木。痛玉毫、散寫作南枝。枝枝蠹。

玉漏遲

白門張修崖京口呂錫馨遊越全人公讌于右軍祠下卽事

右軍祠下路。勝友高朋。一時雲集。修竹崇巖。遙想蘭亭當日。車轂驟如流水。交履烏。滿堂笙瑟。何處覓。華鐙影裏。管兒歌澀。蚤是千里相思。更命駕能來。四愁都釋。南國佳人。邂逅相逢。車笠梁苑鄴宮難再。金樽滿、倒傾安惜。漏轉急。今夕不知何夕。

滿庭芳

公望遺姓以潞國之琴

漢室淮南。藩封澤潞。紅絃久擅空桑。攜來海甸。寶匣散珠光。碧軫瑤徽。璣額龍門樹。斲羽鏤商。人傳是、乾清供奉。曾遣賜諸王。崇禎題歲月。橫紋印綠。蘇帶流黃。自王孫散去。淪落江湘。故國軒懸。何處燒桐好。付與中郎。誰知得、紅絲繫足。還是舊宮妝。

又

海燕爭春。城烏啼曙。叢叢花滿闌干。虹梁日照。碧葉露初乾。昨夜新衣裁就。薰籠暖、翠簇紅攢。頻提視。羞人難著。只說曉妝寒。長干西去路。春江鴨綠。新水漫漫。蚤青牛朱轂。驅馬金鞍。江畔垂楊萬樹。風吹繞。貝帶嫵爛。妝樓望。翩躚水底。疑向鏡中看。

又 壽諸耿衣五十

紫嶠鸞飛。銀河鵲去。南園長抱金卮。蓮塘晝暖。花影散紅衣。種得兔頭新熟。閒吟望、繡滿町畦。扶瑤瑟。佳人醉擁。日照畫欄西。回思當日事。雞壇會鼓。鶴市吹篴。歎蹉跎隔歲。屈指俱非。但對百城圖畫。家瀕海。有友安期。憑酣飲。朱顏未老。翹首絳雲低。

又 聽商生徵說彈琴永恩樓

微雨涼收。風翻橡葉。女牆斜點三星。永恩樓上。躡履暗中聽。何處瑤琴初發。珠簾外、流水泠泠。停聲久。千崖忽墮。玄鶴舞青冥。汾亭遙奏後。簫憐秦女。瑟怨湘靈。奈晚風吹角。秋雨淋鈴。此際琴心到處。東家女。誰在銀屏。屏中睡。今宵無夢。有夢也應醒。

又 沙綠妓一名沙六商氏姬也度曲稱妙一時既乃爲尼於果園名谷虛矣

亡友祚兵憲姬弱雲初北里有名兵憲亡後從六云甞飲桐音齋詢其事賦  
得長調金秉叔和歌焉

石氏懸樓。王郎開閣。傷心略此芒芒。上宮碧玉。本是舊名倡。總帳空懸日暮。西陵下、  
幾曲滄浪。如何地。漳臺望久。回首見空王。雙雙。尋侶伴。幽吟梵磬。彷彿伊涼。把楊  
枝滴露。暗洗朝妝。滿目天花散盡。雲牀冷。夢斷高唐。褰幰坐。水田衫子。不疊舊衣箱。

倦尋芳 寄駱叔夜明府

渭南萬里。三載攜琴人。誦廉潔。爲葬慈親。歸臥溪山別業。道遠勿辭高士弔。哀來時  
涌丹徒血。苦思君。又蹉跎。相失。暮秋時節。游望冷。薔薇洞口。絲竹蕭條。遠過前哲。  
兔苑雞場。還攬舊時英傑。草暖吟成。樊水調。花飛夢散。華池雪。聽西堂。幾何時。又鳴  
蜻蛚。

桂枝香 姜桐音芳樹齋留別

去冬冬至。剛雪霽梅花。山樓殘醉。兒女燈前感歎。宛如夢寐。春來重訂王孫約。竟淹

留。又攀叢桂。青陽下榻。玄霜解纜。頃刻間事。念晨夕、盤餐並對。更寒雨雞鳴。暖風花墜。巴里聯吟古調。遜君佳細。雲門舊誓。尋難度。頓陽關、衰柳搖曳。幾時還看。賓鴻萬里。碧天留字。

喜遷鶯 祝贈

錦堂清晝。恰瑤瓊傳來。玉荷開後。齊岱基祥。甫侯嗣懿。盛世相君遺胄。呂文安公後。皇覽揆予初度。看綵鳳翔雲岫。況世載有千金一字。國門之購。前侑歌緩處。脆板清絲。花下排紅豆。竹秀聯吟。波流送羽。觴詠蘭亭依舊。當日醉鄉何在。教好女揄長袖。恐有客。飲淳于一石。與君爲壽。

長亭怨慢 賦得春日凝妝上翠樓和葉蕃鮮

春已暮。畫闥頻啓。朝日穿來。又在眉際。麴粉將施。彈綿先拂。鏡兒裏。木瓜漬了。又添上新紅子。爲要好情多。還則向、傍人問箇勻未。畫長繡褶。暖換卻、篋羅淺綺。薰嫌石葉。疊下鬱金細細。臨行道。履線將殘。踏不得。樓頭新纈。誰曾顧樓前。樓外暮春餘。



幾。

念奴嬌 集張登子南華山館

蘭亭秋暮。眺晴原、並到南華山墅。畫檻橫塘看兩岸。多少斷紅殘紫。鰲禁當年。鷺車  
昔日休沐時來此。其先人宮諡侍御兩公先後創此館。蒼梧穎嗣。至今長讀秋水。  
閒備彩纜青絲。玉壺攜酒處。錦鱗鮮美。吳下阿蒙何日至。時金沙呂內翰在坐相對  
鄴宮才子。舞鳳雄圖。放龜遺跡。衰柳頻低起。耶溪相望。不知去幾何里。

又 示姜芑貽留別

謝庭玉樹。乍臨風搖曳。烏衣巷裏。何處羊車還洛市。皎皎雙瞳如水。洗馬清神。黃門  
雋格。少小能文史。玄亭問字。慨然逢故人子。相對芳樹高軒。青鐙殘夜淺。流螢妮  
妮。轉盼河橋解纜去。拳盡江皋蘭芷。燕翼堪憐。鳳毛有待。西水浮新芑。春陽努力。眼  
中吾且老矣。

又 爲白孟新仲調母夫人壽

□□白下。嘆何人不識自家兄弟。長者賢良方就辟。仲舉孝廉相繼。有母年高。北堂娛養。護樹長芬斐。及時捧檄。如君孝弟能幾。幸遇八十華辰。稱觴遠近。各具登堂禮。曾讀前朝黨綱傳。二白齊名杜李。弘光中南相捕黨人時。宣城沈眉生桐城万密之與白氏兄弟皆被逮。滂母賢哉。從容告誡。籍籍盈人耳。風流無恙。百年今且伊始。

春從天上來

擬昭君詞送友出塞

河水東流。看萬里寒風。塞外驚秋。誰遣傾國。遠嫁邊頭。辭鳳輦。下龍樓。記臨行上馬。賜與錦帶共。篋。卸宮妝。向深深毳幕。徐換貂裘。平沙那堪曉發。似露下長門。月墮金溝。滿地燕支。萎紅枯紫。巧勝畫筆塗勾。羨年年塞雁。歸渡海岸。與沙洲。願仍還上林舊宿。同叫更籌。

花心動 寄大敬

蝶裏花欄。微雨後。深苑荆桃如菽。紅粉堆邊。露瑣冰筩。並起是誰華屋。棟花風發。前村暮。空巖畔。有人如玉。牽蘿罷。天寒倚遍。一庭修竹。私唱開元舊曲。見林外春紅。

暗翻秋綠。昨夜驚鳥。夢裏還啼。向日對筵蕉燭。玉牯盤地銀絲繞。吹松粉、墜來金粟。那須聽、黃公烏聲斷續。

西河

春後雪衫兒。因甚難熱。綠叢啼鳥聽吹來。嫩簧小舌。可憐穀雨是明朝。又當花謝時節。翠蛾子。誰與貼。雀花鏡裏誰折。珠娘西去。唱楊枝。怨歌幾闋。長干斷處。苦相迎。桃根桃樹桃葉。枕屏疊下三四褶。攬流蘇帶子雙結。枉對金缸明滅。但轆轤井上。啞啞相接。恰夜烏城頭啼歇。

望海潮 越中懷古全秦淮海韻

東南都會。會稽形勝。居然晉代風流。宛委赤書。蓬萊紫氣。天連星宿牽牛。佳境任優游。向山陰道上。秦望峯頭。萬壑千巖。常時曾此鎮揚州。依稀舊蹟還留。悵蘭亭人散。叢里歌遒。九曲風光。五湖烟雨。望中處處生愁。時泛小犀舟。看西施西去。花謝妝樓。猶見若耶春漲。綠草遍芳洲。

金縷曲 壽商樞部

正小春花暖。繡屏開、碧觴乍舉。黃眉初展。玄扈干雲太宰後。猶見征南季簡。且載酒、閒聽絲管。綠野蚤成江上宅。況採芝、舊日商山遠。問海水、幾回淺。古來七十原希罕。更菁蔥、滿庭玉樹。瑤孟金版。荀氏八龍齊下食。不羨瑤臺瓊苑。是何處、馳歸輕轆。大婦流黃中婦錦。最可憐、小婦調笙緩。榆歷歷、棗纂纂。

蘭陵王

想前此。閣下薇花乍紫。橫欄曲、半臂荔紅。鬢髮新梳理。黃子。按鷓絃第四。忽地吳頭楚尾。看看遠、海雁又來。眼底空留數行字。思量那年事。不合啓、廂東夜雨。燈暗桃花。誤賺劉郎至。奈三載寒食。一朝歡聚。手把窄襪弄花綺。那知夢兒裏。倚徙。病初起。況翠帳寒生。晚秋天氣。暮暮朝朝向誰是。縱迢遞關山。夢魂堪寄。知他去處是百里。是千里。

少年游 汝南官署七夕作

看看又是銀河清淺。織女乍停機。不知何事。今宵殘醉。還聽汝南雞。庭前瓜果妝成巧。暗裏絳蛛絲。記得年前。小礬山下。乾鵲夜來時。

又 過淮城口占

予去淮久矣。康熙十七年。徵車入京。從淮城下過。遂駐馬流涕。占此詞。

馬蹄纔發。陽平門外。望裏是淮安。可憐此地。曾經流浪。一十五年前。曲江高會知何處。秋水晚生烟。惟有垂楊。千條萬縷。還掛酒樓邊。

行來但覓旗亭舊蹟。下馬駐城闌。請看當日。淮流如故。雙汨落征輪。淮陰市上諸年少。相憶總沈淪。誰料衰年。徵車北去。羞見市中人。

又 題陳檢討小影。傍有侍兒坐蕉簟弄笛。

十年苦憶。元龍顏面。夢寐恐難親。不虞相見。長安道上。并見在傍人。停毫一顧。踟躕久。欲待按歌勻。碧鴨消時。紅蕉坐去。何處不傳神。

南柯子 題胡明府小像

江縣看花後。山城種柳時。布袍竹杖鬢如絲。今日畫圖相對，繫人思。

又 題寄史蝶庵卷後

水漲芙蓉粉。烟含楊柳絲。幽人家住五雲溪。行過東坡書院，孝侯祠。篋有中封帖。吟成東去詞。荆南相望一相思。恰又晚村花塚，夕陽時。

又 淮西客舍接得陳敬止書有寄

驛館吹蘆葉。都亭舞柘枝。相逢風雪滿淮西。記得去時，殘燭照征衣。曲水東流淺。盤山北望迷。長安書遠寄來稀。又是一年秋色，到天涯。

惜分飛 答吳江徐菊莊見憶原韻

楓葉吳江長橋畔。別去年華又換。聞在湖南岸。蓮花幕下閒庭院。幾欲從君秋過半。寄到新詞讀遍。何處尋還雁。暮潮但見平如練。

朝中措 平山堂續詞

揚州平山堂。傾廢久矣。康熙甲寅冬十月。予過揚州。值太守金君從故處建

堂命予以酒。且勒歐陽修朝中措原詞。使坐客續其後。予思歐陽公贈劉原父時。平山欄檻方盛。然猶睠念手植。若有感于春風之易度者。況距公千載。而興是堂。其藉于世之爲原父。豈鮮也。因被醉書此詞。附坐客後。

青山猶在畫欄空。人去夕陽中。不道十年重到。還披此地清風。蜀岡無恙。堂成命酒。一聽歌鐘。未審後來太守。是誰能繼山翁。

西江月 續東坡詞

此予續東坡詞也。東坡憶歐陽公而爲是詞。予復憶坡而重續其詞。雖然。予豈能坡哉。太守金君重勒坡詞。與歐陽公詞並列。故予並續之云爾。

聞道歐公當日。賓朋載酒堂中。後來三過有坡翁。長使林花飛動。此事已經千載。我來重挹高風。眼前莫放酒杯空。恐是東坡殘夢。

虞美人 九日同姚庸庵張德遠左夔友諸君汎湘湖登越王城和庸庵韻  
平明載酒登高去。湖畔停船處。幾株烏桕未全紅。猶喜黃花開遍小橋東。長江一

望環如帶。放眼千山外。開罇更上越王城。多少夕陽江上晚來情。

又 過江寺和友

江郎祠外中秋月。城角吹將徹。十年長記此宵中。豪客相過深巷有微風。今來君宿者闔下。又值中秋也。題將麗句最紛披。恍見當時桂樹晚依依。

又 題畫爲李都官壽

是誰畫出潘家果。百琲珍珠顆。羨君原是柏梁才。記取桃梨橘栗李榴梅。玉餅金鎖琉璃甕。且作和羹用。須知仙樹本蟠根。欲借花前一醉石州春。

又 早行口占

秋風槭槭敖陽路。草屋方垂露。當壚夜起數金錢。獨對寒燈此夜不成眠。廿年岐路今方息。又是徵書急。柳梢斜掛月朦朧。不信還來騎馬月明中。

又 己未四月宣城施少參寄雲樓下梅樹忽發二花值是科殿試榜發同邑

孫予立茆楚芬以一甲同授館職既而又發二花則少參與同邑高阮懷並



以制科授館職一時相傳以爲草木之瑞非偶也舉人梅淵公繪瑞梅圖寄至京同館各爲詩頌之予和少參詞書圖卷末

敬亭四月梅花發。正值清和節。慈恩寺裏曲江邊。新舊郎君爭占一枝先。紅羅欲寄無由寄。空寫泥金字。樓頭長贈碧山雲。恰取花枝中半兩平分。

又 題天台採藥圖爲淮安劉六皆比部

桃花又發臨淮渡。錯認天台路。行來莫笑太奔忙。知是赤欄橋畔舊劉郎。平明入直迴西寺。幙被雙娥侍。含香誰問夜歸遲。只恐桃花回首望中迷。

又 爲劉比部題天祿閣燃藜圖

圖書萬軸牙籤滿。辟蠹燒芸暖。果然子政是前身。羨煞當年天祿閣中人。白雲司判西曹事。薇省曾留字。胸藏冰照宛如犀。絕勝西堂終夜對燃藜。

小重山 自涿州至琉璃河達京和同行韻三首

草店雞鳴酒未醒。馬槽聽鬻粟。漸無聲。燈前盥面促裝成。車塵起。疑在霧中行。渡

水石橋平。秋風聯轡過。涿州城。鄉關回首。暗心驚。遙天盡。愁見一雲橫。  
貫酒前莊。日漸低。鞭梢斜掛壁。卸征衣。同行三俊喜相依。垂楊下。長許控金羈。  
水碧琉璃。壩頭風物美。近京畿。徵車欲度。且遲遲。沈吟久。三輔故人稀。  
閭闔嵯峨。天際開。賓門方四闢。重招徠。將車纔到。莫相猜。諸王邸。誰道買臣來。  
市共三街。彩雲遙起處。見蓬萊。秋風歌詠。柏梁臺。承明內。原有揆天才。

九

又

題吳江女士沈關關爲顧茂倫清繡抱甕丈人濯足圖

欲繡平原幾度思。園蛾初作繭。絡成絲。前溪水滿。雪消時。波紋起。綠似小桃枝。  
足散漣漪。夜來開繡譜。度鍼遲。一痕青影。暮煙微。啣絲細。不用洗胭脂。

投

又

朱顏綠髮畫圖中。丹砂長飲酒。醉溶溶。前身王母舊青童。干將佩。花鏢散芙蓉。  
嶠有誰從。蓬萊剛水淺。渡蒼龍。他年笑入杏花叢。瀛洲近。折取一枝紅。

羽

又

過舒漢雲中書官邸有贈

當日吹簾兩渡淮。感君長貫酒，醉高齋。十年分手各天涯。頻頻望，紅葉喜當階。高  
詠謝家才。綵毫裁詔罷，鳳池迴。徵書白首苦相催。平津第，勿厭故人來。

明月棹孤舟 題吳江徐檢討孤舟垂釣圖

甫里先生何處是。家住近、垂虹亭子。著罷新書，開門閒望，但見一湖烟水。放棹偶  
然垂釣餌。人道是、松陵漁史。若問羊裘，投竿何所，應在白蘋洲裏。

千秋歲 和王丹麓自壽原韻

青幡纔換。又是春過半。聽啼鴉，聲將變。能令歲月增，真覺黃金賤。更那顧，秦王有女  
將衣卷。但赴芳林宴。一任花零亂。年半百，休三嘆。文章堪自信，富貴非吾願。君不  
見，比來世事皆如幻。

臨江仙 題畫

姊妹相逢何處是。朱欄斜倚雙桐。坐來委抱鬢籠鬆。畫裙欹履窄，金釧隔紗紅。寂  
寂春園人不到。看時多少朦朧。綠坡生草細茸茸。銀猊閒戲逐，翻向綠坡中。

又 申江署中題麻姑獻酒圖爲丁夫人初度

三月暮春春雨後。申江初放桃花。忻看錦帆掛官衙。名姝如謝女。夫婿是秦嘉。製得香奩妝百福。珠屏爛若朝霞。麻姑曾過蔡經家。仙厨將進酒。圖上見來麼。

又 徐東建納姬自題臨江仙詞卽用其原調并韻嘲之

何處玉臺堪倚鏡。徐陵原有新題。今來同住巷東西。門迎桃葉渡。人勝苧蘿溪。散擲明珠安有價。無錢多買胭脂。只愁初製夏侯衣。茜裙裁翦未。簾外杏花飛。

又 壽姜綺季

五月榴花開似錦。一尊長對花前。看看又值杖鄉年。蟠溪多壽考。綺里本神仙。雖則東方能玩世。無須金馬門邊。君身何事不堪傳。吟來忘歲月。筆下有雲烟。

又 田公子二十生日

海上青騰看負角。丹山鳳翮初成。男兒二十建修名。陸機剛作賦。方朔正談兵。自愧蹉跎多去日。羨君先請長纓。南箕不用詠三星。錦筵香薤發。官閣早梅生。

又 賀徐公佑明府舉子

客舍燈花開似錦。寒屏有夢惟魚。新來喜得弄麀書。藍田秋產玉。碧海夜生珠。繡  
襖畫欄初試浴。遙看紫氣充闕。君家原有舊鸞鷁。他時湯餅會。啼聽是何如。

又 祝蔣文甫壽

洛下久無同甲會。試看江左蒼英。年來七十誦黃庭。孫芝千朵豔。兒竹萬條青。怪  
道探書多綠字。閒堂代有傳經。桃花染得綵衣成。杜陵誰最好。吾愛蔣元卿。

唐多令 詠窩絲糖

梁尙書上元席上。出窩絲糖供客。云是崇禎末宮中所製。今久無此矣。西山  
靜室。有老宮人爲比丘尼。尙能製此糖。每上元節。必餉以銀椀合子。其製如  
扁蛋。外光而面有二凹。嚼之粉碎。散落皆成絲。尙書乃唱唐多令詞。命予和  
之。

擣盡笛頭泥。春蠶已蛻衣。片錫裹作彈丸兒。不破彌羅三寸繭。誰解道。一窩絲。 柜

敕漢宮遺餽。餽久未施。開元宮女尙能爲。今日尙書花餞會。銀椀合使人思。

菩薩蠻 題蔡天聲桃花流水圖記年

溪流雨過增新漲。春山處處桃花放。中有武陵人。花前一問津。幅巾裁白氎。坐聽溪流咽。寫入畫圖中。桃花映面紅。

又 淮上閤牛叟娶姬作詞案和原韻

釵頭勝字裁方幅。定情彈作鶯蘿曲。聞道薛家來。燈花夜自開。清淮一別久。誰解雙垂手。佛日曾摩多。取姬在四月八日香山老去何。

買金欲鑄鳴夷像。頻年憶汝江湖上。何處採名花。西施不及他。白頭吟自在。詩寄錢刀外。恰似遇桓伊。聽歌輒喚時。

又 案贈

客上海數月。歌妓玉烟者。又名玉嬌。解佐酒。日日在坐。張南士有贈妓詞。妓甚愛之。因索及予。時晚春新月生。剛作妓罷。遂出使而書去。其詞後闕。各隱

玉烟玉媽字。

雲鬢縮就青鴉小。春山畫得雙蛾巧。衣翦杏黃羅。紅牙試按歌。錦屏香作霧。慢把金樽度。玉暖起烟絲。申江春去時。榴裙皺褶花千禩。地衣紅襯弓鞋軟。銀箭下來遲。當筵舞柘枝。玉櫳華蠟裏。新月隴隴起。何處最嫣然。花前一笑問。

行香子 卽事

晚色烟和。鳥散庭柯。聽街頭、擊鼓吹螺。酒闌送客。夜火星羅。幡幢引處。看蝶演似鴛梭。法輪常轉。五方何處。現維摩。試問禪那。作天魔舞。于意云何。香壇行過。隨嘯詠。且婆娑。

蝶戀花 客上海過楊生玉衡聽妓作

寂寂暮春楊子宅。昔在烏聊。今在申江側。玉衡本籍新安故。云座上綵雲迴。錦席門前幾樹桃花色。乍雨乍收。欄溜滴。坐擁雙鬢爲我彈瑤瑟。醉後倚歌還弄笛。醒來

微月當窗白。

鵲橋仙 卽事

邑甲聘戊女。有彊委禽者。明府姚公斷歸甲。合卷訟庭。其斷詞駢麗。世多稱之。旣而訟者爭不徹。太守何公復斷歸甲。時予方從兩公游。兩公並命予爲詞紀其事。

東牀先訂。西家願宿。何事穿墉穿瓦。縱教彊委後來禽。卻不道。子南夫也。明府風流。使君瀟灑。兩斷可妻公冶。莫言河漢鵲橋乖。看合浦。在訟庭之下。

天仙子 賀生子

韋氏雙珠真可喜。芝蘭欲在階庭耳。春園況值有鶯遷。人道是。天仙子。曾見宣尼抱送此。里號高陽從此始。鳳毛麟角紛紛起。我來正值浴蘭時。看取醴。金盤裏。半是桃花半雪水。

青玉案 山陰金母隨夫宦南海三藩之亂與夫子並相隔流離數郡百折不



誰暨轉徙歸里已五十矣其子乞予文爲壽予不能應書此詞卷間

東揚不用占星婺是家有眞賢孺曾隔兵戈遙海路合州城外雷陽驛畔多少仳離處。千山萬水歸來暮看膝下人如樹但得朱顏能久駐蟠桃花發蓬萊水淺誰道流年度。

喜遷鶯

荷風乍暖恰紅版橋頭驪駒唱緩待詔公孫彈琴司馬挾策爭游上苑萬里鵬飛在望看翠幕傳金璫況前路有漳臺花柳酈亭絲管迤邐攬轡處大道秋光不覺長安遠丞相延來通侯載去戶外車嘗滿他日玉堂堪繼喜大小皆賢阮裝衣待來年紅杏爲君裁翦。

又寄贈陶燕公移居奉和何毅庵張邇可原唱韻

隔江人遠一別幾何年鬢毛都換但卜柴桑難尋句曲到處堪留堪戀衣上黃塵不落望壠首浮雲變猶相憶在廬江舊第芹泥橋畔可念書畫室半榻琴簫幾樹花

零亂人寄南窗。詩傳北郭，莫道未還東苑。我亦西泠借住，須有日、烟霞結伴。鄰居好，看牆頭過酒，那時相見。

百字令 客滬上爲王鴻資初度

秋風乍起，桂花時，又是東亭初度。四十年來彈指頃，閱歷山川無數。倚馬成文，磨盾草檄，殺盡中山兔。侯王以下，一時趨走如鶩。誰道梁苑歸來，故人官滬上，歡然相聚。有弟同行勝小陸，共作平臺詞賦。弧矢高懸，長庚何在，遙指星明處。壯心未已，莫言歲月遲暮。

又 寄壽施愚山少參六十

林花初放，捧霞觴，遙望敬亭山色。繞地珠繩，箕宿轉，光滿謝公樓側。闕里遺賢，石渠繼世，曾講諸儒易。廿年節度，一身高寄如客。督學齊魯之間，湖西作鎮，到處稱中伯。天下山川游覽遍，無數文章堆積。前遇吳關，今過甌海，千里長相憶。纔週甲子，爲君重數疇昔。

綺羅香 用原韻答贈甬上錢塾庵見贈

古鄧名家，彭城遺胄，所至公超成市。文徵元和詩，以景龍爲體。論學識，雅似顓孫。羨  
經術，精于楊起。第無如，棄世逃名。竄身長向瞿曇裏。君家歷世仕宦，況祖禰忠孝。  
名傳黃紙。每輯殘編，尙見汨痕如泚。尋歡會，偶在申江。嘆孤游，有如樗里。又誰知，廿  
載相思，見君自此始。

萬年枝 梁司農師六十續娶

臘盡春還，御河冰未泮。苑枝如沐。柳又生稊，雙雉朝飛遯遯。花甲週時，花燭啓寶帳。  
妝成百福。由來原有，尙書三娶。東山名族。萬年觴卜。道從此，天長地久。鸞弦終續。  
華茵披來，副髮有珈皆玉。池上歌添黃竹好，探去金桃再熟。那拚人笑。桃花洞裏劉  
郎初宿。

沁園春 卽事

三月四日，曹綠巖明府張弘軒州牧周譽凡孝廉趙愚公監郡朱服萬別乘

羅木桓徐西崖文學招集羣公。修禊于滬城之南園。有女妓三人行酒。卽席。朱別乘作沁園春詞。予依韻次其後。

已度三朝。忻逢四并。重對春波。看楊柳堤邊。羽觴汎去。薔薇洞口。油壁來過。北地賢賓。江南名士。人物加于晉永和。況雜坐。有美人相間。齊畫雙蛾。興來洒瀉銀河。恰巖畔斜陽照綠羅。看環擁楸枰。目縈琢石。暗拋博具。指印紋螺。紅袖香生。碧桃花放。此際春光可奈何。華燈起。見樓頭纖月。徐上林柯。

又 答王西園見贈之作

丁巳之春。我來滬濱。喜遇西園。念當日聞聲。有如日下。今朝高會。竟在雲間。江薛才華。庾徐藻采。所著佳文是偶言。偶言吹蓬折竹。皆新著篇名。箋題外。有吹蓬小令。折竹新篇。挑花初漲平川。又風起城頭。撲柳綿。自畫閣攤書。談深燭下。閒堂贈妓。腸斷樽前。兩次三番。風晨雨夕。是處相逢非偶然。溝頭水。問東西會合。知在何年。

又 送葉天樂游吳門

涼月啣雲。清風出谷。秋滿人間。況出水芙蓉。詩篇絕麗。環溪修竹。酒興將闌。子羽湖頭。伯通橋畔。好友相思。嘗往還。揚舲去。見停來顧渚。望去吳關。橫塘暑氣將殘。更微雨。初過銷夏灣。只陂有雞棲。人歸畫舫。丘當虎去。寺在青山。疇昔曾游。石城深處。夜月清樽。醉未乾。舊有醉月詞。歌詞罷。向旗亭試聽。可有雙鬢。

又 題閻容庵青谿傳後

予夙爲調笑詞。紀馮弦事。惜弦雖令材。而事近于媠。渡淮十日。晤容庵粉巷。出彭生詞讀之。初以爲賦古耳。及讀竟。始知爲容庵少時事也。容庵真今之君虞樊川矣哉。青谿傳辭致幽斐。其所答寓札。亦復激宕可誦。因爲括諸詞。合作一首。詞雖不工。事喜不媠。世毋以予詞入調笑可耳。

桃葉堤邊。琵琶巷裏。人字青谿。本博陵舊氏。愁窺燕幕。汾陽公子。共聽烏啼。春寒愁又度。落盡東園幾樹梨。空回首。正江南烽火。塞北征鼙。相誓盈盈兩地。奈仙源雞犬。望後都迷。況渚下書沈。誤排雁影。章臺人去。遺恨桃枝。隔巷空還繫臂。便鈿合金

致何處思。只蠻牋數幅。堪付新詞。

賀新郎 蕭山縣署贅壻詞

正河陽花滿。秋水芙蓉。豔紅如翦。贅壻淳于千里至。早已題詩齊苑。喜今日。光生銀管。古署催妝開錦席。看一堂紫鬪鋪香軟。雙淺暮。酌來淺。萬條紅燭燒將短。更庭前。幾行畫扇。遮來宛轉。洗馬文章當日事。樂令風流不遠。況種得。藍田瓊琬。最羨今宵乘鳳處。聽秦臺。幾曲簫聲緩。烏鵲到。喜何限。

滿庭芳 南園公讌卽事

初過清明。纔逾上巳。羣賢高會南園。花巖接檻。洞口瀉紅泉。移得行廚竹裏。瑤欄曲。雜坐金鈿。擎觴至。紅兒嬌小。猶弄剪刀錢。樓前爭作伎。枰楸壺竹。游詠依然。看玉斂紛絳。薌澤微傳。醉煞蘭亭舊侶。華燈外。新月纖纖。當筵賦。園如金谷。人似永和年。

又 爲汝南張廣文題傳奇卷首

夏里開基。清河啓郡。曾燃祕閣青藜。高齋寂靜。夜聽汝南雞。彷彿神人告語。他年事。

枕畔留題。長弓後。貂蟬奕葉。不數舊關西。黃梁炊未熟。翩翩蝴蝶。醒後多迷。託梨  
園象板。羽殿銖衣。千載鳳鸞佳配。華茵暖。共酌玻璃。聽吹罷。一聲長笛。無數綵雲飛。

又 題玉妃獻冊圖爲汝寧金使君夫人生日

琳腕瓊妃。瑤臺金母。當年曾駕蟾蜍。因披玉冊。還御五雲車。絳去廬江錦帳。閨房秀  
早被霞裾。淮西路。春城千騎。夫婿上頭居。五花裁作誥。香奩百琲。總是珍珠。看平  
頭擎履。編齒吹竽。獻得龍泥舊簡。傳經後。莫問居諸。閒相視。山桃片片。飛滿玉牀書。

貂裘換酒 題吳寶崖停鞭拂劍圖和其自題原韻

想此爲圖者。計生平。嶽嶙壘落。未經揮灑。富貴何時思量起。凡事盡如此畫。縱滿地、  
才源傾瀉。但頻年驅馳南北。到頭來。抹卻當時話。惟此劍。鎮無價。從前只向車前  
掛。看中原。平沙萬里。儘堪馳馬。建禮門邊題名後。便到晾鷹臺下。且自解。雙鑲重把。  
多少英雄今安在。遇甘蠅。莫折飛蓬射。窮與達。有時也。

念奴嬌 卽事

暮春二月寒食夜。胡繩先招飲上海署中聽妓。酒半爲詞。

申江官舍看桃花開後。柳絲如織。伯始風流纔啓宴。此夜剛逢寒食。燭下新妝。榴裙百褶。翻盡深紅色。那堪小妓。病來歌舞無力。聽蓮漏將殘。玉觴嬌瀉去。脣脂俱溼。夜雨初過花毯上。尙見翠鈿狼藉。明日清明來朝上巳。到處春堪惜。勾欄未散。慢言今夕何夕。

又 徐都官裁枕函實詩名爲詩枕製詞索和漫次其韻

燃髭無計。喚奚兒長向水邊山麓。蒲簟橫陳將偃息。好句吟來斷續。授册嫌頻。開械已緩。紙片紛零碌。游仙欵處。斲成五色文木。試啓小麓中空。方欄連袵。大似青油襪。豹首雞鳴俱不用。但取便便豕腹。夢去無論。醒來何事。栩栩相追逐。蝶庵詩就。此時午睡方足。

桂枝香 卽事

馬丹谷伎席。有小鬟後至。病不能作伎。坐侑間。詢何名。曰未也。弘軒張先生。



以其氏李，且病中遲至，取翮何珊瑚之句，贈名翮來。同席者各爲詞記之。予與張南士、朱拜石、丁殿生、徐西崖、莫蕙先並作桂枝香詞。時康熙十六年二月三日。

夜堂聽伎。正絳帳花垂，玉鑪香細。蓮炬光中，兩兩舞裙拖地。忽來金雀鴉鬟小，算纔堪、瑣兒年紀。欄邊歌緩，油車暗裏，翻然而至。便手把金尊徐遞，似嫩葉裁衣，幽蘭吹氣。病起遲來問取，小名尙未。風流京兆，偏憐惜，道延年、女弟如是。珊瑚可念，何如竟喚翮來爲字。

滿江紅 題吳墨舫桃源圖步原用文待詔韻

圖畫當年，正桃樹、生花時節。有延州高士，酒顏方熱。南浦風光何所似，西疇輿會由來別。恰聞人、洞口憶當年，頻頻說。舟過處，涵冰雪。花落盡，同榆莢。嘆青芝白鶴，一時都絕。凡事總隨風裏絮，披圖恍對雲間月。幸前賢、手澤有傳人，思來切。

水調歌頭 詠鹿脯

家會侯邸舍。以鹿脯食客。方雪岷陳其年及子有詞。

加豆得乾腊。醜酒莫踟蹰。奈何置身巖谷。其命在庖廚。不是籠驢豕。豈是牛糲鵝。脚此物本清虛。但束白茅去。安問綠蕉無。人一食。壽百歲。試何如。陳蕃設艇相食。慢作魯公書。皮不必爲藻幣。腸不足爲酒器。祇噬此些須。客座手能攤。何用倩麻姑。

雲仙引 壽王鄂叔進士

蘭渚亭邊。蓮河橋畔。高門乍啓朝陽。丹絨繞。彩雲翔。云是攬予初度。爭獻仙人九醞觴。何限才名。今纔四十。江左王郎。宮衣試着來長。有花下。新裁小樂章。回首京華。難兄執戟。同是東方。待補山公。正當典簿。努力功名看未央。他日烏衣。黑頭還聚。重醉秋光。

上西平 譚開子貽畫并賦西平樂詞見訊志謝

嘆年年。看不盡。短亭花。更冬殘。雪後停車。問誰相憶。寄來滿幅。是烟霞。分明指有。西陵渡口人家。滄洲近。知何處。空歷遍。路途賒。念君也。留滯西平。思時便望。望時還

見暮雲遮。何年攜我向青山。麓碧湖涯。

慶清朝慢 湖墅高會同王丹麓陸蓋思諸公卽席

候屬添絲。人方繫纜。還逢高會南皮。閒堂夜來紅燭。倒映金卮。爭投博箸。妓簾不掛夏侯衣。頻傾看。有葡萄釀。色似胭脂。夙昔祇愁間闊。長從紙上。汗漫寄相思。今夕不知何夕。能預斯期。城頭統如五鼓。傍筵耿耿玉繩低。那堪與。曹劉沈謝。卽席爲詞。

醉蓬萊 題贈徐涵之小蓬萊別業

是南州高士。東海名家。西河舊里。茅屋數椽。縱亭臺無幾。牆外疏桐。欄前蔽蔓。到處成陰翳。人道蓬萊。逍遙散誕。不過如此。堪嘆年時。燕齊吳楚。汗漫天涯。倦游知止。一任人間。似桑田海水。家有山妻。門無雜客。架上餘書史。安樂窩成。吾其從老。於是鄉矣。

蘭陵王 別譚開子

淮南路。正值嵩陽歸去。梨花晚。寒食初過。與汝東湖最深處。夜涼傾斗醕。聽撥銀箏。

無數。扶紅袖、酒醒回時。長是城頭鼓聲曙。恨一別如雨。更南北東西。春還秋暮。許  
昌宮裏留君住。任作賦繁臺。題詩梁苑。何期此地復相遇。彷彿似前度。看舞。郡中  
署。便圖遍屏山。歌殘燭樹。送君還上棠谿渡。望長淮千里。依然東注。那堪言別。況綠  
柳漸飛絮。

風流子 答和桐城何令遠見寄

浮山如在眼。樅陽路、時望大江遙。想當日長瑜。曾爲四友。今聞子季。仍號三高。從誰  
道。十年黃令閣。一別湛郎橋。湖上風光。全隨蓬轉。江南春信。半在梅梢。幸新來無  
恙。詞中尙記得。醉臥甘蕉。不道安成前度。良夜迢迢。自白鷺洲邊。歌殘織月。紅螺澤  
畔。酒散寒潮。試問梁園賓客。誰憶枚皋。

南浦 和徐西崖贈別

最傷心處。是紅亭載酒。上河橋。多少畫欄干外。楊柳正垂條。五兩南風欲度。趁申江、  
幾曲暮歸潮。奈離筵人散。贈鞭情重。雙泪落征袍。此地遨遊堪戀。遍亭臺、春意鬧

花梢長載佳人油壁。深夜教吹簫。況值歌成南浦也。爲君重撥紫檀槽。且和歌一闋。問當前誰最魂銷。

西河 答和王西園送別

春去久。怕逢客館長晝。寄君書到正街頭。濯枝雨後。那堪黃浦晚潮生。一帆吹下如溜。憶當日方邂逅。按歌新記紅豆。酒間移燭和予詞。霎時草就。囟囟散去鎮蹉跎。蜀葵花發時候。驪駒唱罷頻把袖。看江流如許。繫繖遙指垂楊渡口。更短亭東上酒家。依舊欲放歌。何時還又。

滿庭芳 又一體

梔子開殘。宜男採遍。日長深院啼鶯。正荷衣被暑。裁翦初成。曾向慈恩寺裏。春池淺。蘸筆題名。人爭看。風流拔俗。第一吳興。相驚舊時八詠東陽。雲起處。藻思縱橫。恰衣盤雕錦。紙染紅菱。羨煞絲綸世掌。鳳池上。綵羽爭明。懸弧處。堂前花發。海上雲生。

剔銀燈 詠米家燈

梁尙書席上有燈。爲宛平米氏所製。堆紗疊縠。作山水花鳥人物。座客各有詞。屬和焉。

百尺冰荷可喜。況滿壁。盡張羅綺。翦縠爲欄。堆紗作樹。不數米家山水。隔屏人指道。人在隔花屏裏。金粟玉蟲。纍纍光到處。轆轤齊起。雞戴珠竿。龍啣火籥。總是數條紅紫。燈前且醉。看燈影。照人何幾。

相見歡 桃源採藥圖○姚茂孳將軍繪其像爲五圖各繫以詞今存一首  
何來採藥仙源。尚當年。云是伏波橫海舊登壇。麟閣裏。滄洲意。任相看。一似桃花流水向人間。

臨江仙 爲奉贈何梅莊使君夫子作

當日虎符初下處。桃花開滿山阿。萬層絳帳覆來多。驅鹽投峻阪。拔羽出虞羅。一自龍山高會後。春江曾哭曹娥。天南萬里到祥柯。帝鄉把瓊去。錦里盼車過。誰料十年星紀換。延津還汎仙槎。江淮轉運使如何。金笳開越嶠。繡檝動吳波。幸

得聞堂仍聚首。清樽頻把玻璃。劉郎前度喜重過。公門桃樹老。猶有舊枝柯。

減字木蘭花

燈下收書圖。爲汪蛟門主事作十美图詞今存三首

合歡成被。鋪就鷓鴣單。枕膩豹髓全融。肯負饑燈入夜紅。壁光如曙。翻恨袖梢遮不住。收卻殘書。何用掀翻壘算珠。

菩薩蠻 午睡圖

玉欄長夏金塘裏。軒窗四面荷風起。菀菀織花紋。盤盤散綠雲。柳帷褰未閉。隔水窺人至。待起整釵鈿。郎今未可前。

虞美人 紅絲拂子打檀郎圖

樂陵臺下看紅藥。底處曾相諶。苔衣掩盡石欄花。辜負東園杏子數枝斜。紫龍髯拂珊瑚柄。禿袖紅相映。郎身豈有赭頭蠅。暫作吳宮點墨白螺屏。

兌閣十詞有序

予遊淮時。閻子牛叟與丁少君敦伉儷之好。作兌閣十闋。索子和詞。予未有以

應也。閔一十八年，予赴召至京，值牛叟年七十，丁夫人已亡，其嗣君百詩重貽書并幣，專使赴長安，請和前詞，蓋欲以承尊人歡，當稱觴地也。予始理其詞，對使和去，其十闕皆有題，依題演義，不自解工拙。牛叟知我，定有以諒之耳。

南歌子 齊世家彤史

閔牛叟少君丁氏，牛叟字之曰少姜，又稱濟陽君，從郡望也。其女兄弟中屬季，又名其所居曰兌閣。

朱閔迎齊女，金箱貯楚雲。高閣傍斜曛。阿誰居閣上，濟陽君。

鵲橋仙 證前生

牛叟之尊人仕閩，曾禱九鯉湖而生。後思楓亭荔枝，丁少君爲治裝，卒不果往。

蓬山小吏，上清舊籍，曾控九仙朱鯉。若非花下認前身，幾負卻、雙成久矣。楓亭何在，治裝東去，請食宋家荔子。縱然置驛未能通，也勝看、忠州畫裏。



小重山 雙魚問

避地時。一居金陵。一居吳門。每以書問。偶爲輕薄子偷視。

兩地烽烟天一隅。蔣山西盡處。莫愁湖。誰言流水隔姑蘇。春潮上。中有一雙魚。緘處印含朱。澤浦裁作線。界蜘蛛。簪花小字畫來疏。憑偷看。傳作寶家書。

荷葉杯 維摩天女恰同參

曾參訪耆舊。究向上一層。

乃與阿潘同住。何故花月映江潭。問誰還宿普明龕。參麼參。參麼參。

天仙子 病榻閒情

丁少君鮮嬌容。雖病亦薄妝。讀史。牛叟嘗調之。提學未至。女秀才矻矻何爲。每庭前花木。芾灌。牛叟謂丈夫當掃除天下。少君曰。請從一室始。

長向花前攤女史。一榻自安花蔓裏。儘教春去病還留。捐藥餌。弄筆底。全似建安女傅士。階下雉童搖葛藟。滿院月明清似水。慢言藜藿辟除難。君意氣。且已耳。汎掃

請從一室始。

十六字令 佐家

丁少君以五千金。佐先世鹽筴。

齊代遠。空吟乘馬篇。眞珠釧。解作算商錢。

柳梢青 聯吟

牛叟製杏花天三闋。少君索書帕。出入懷袖。

錦闥開心。綠窗幽興。得句相調。何意東園。杏花開遍。又是春朝。丁娘且索揮毫。甚處見。歡情久要。幾闋清詞。數行細字。一幅生綃。

西河 琴弈雙清

少君好琴善弈。與諸女角。必招牛叟曰。君但事此。當自解。

且慢記。琴心當日何似。只看綠綺繞孤桐。素絲未理。高山流水有誰聽。離懷此際如寄。況花底。楸樹子。舊枰在斷垣裏。空留遺掛紫檀心。琢成纍纍。橫橫直直。試躊躇。

幾曾閒卻纖指。是中意誠莫已。良人惜未能此。追憶爾時佳致。或庶幾、鼓瑟湘靈  
堪比。何況圍棋張良娣。

臨江仙 逮下

少君曾爲牛叟取一妾。今亡後。牛叟又娶一妾。同懸夫人像。以爲菩薩。人各  
製菩薩鬘詞。

不辨黃鸝能卻妬。臨溪且採茵陳。文園能聘茂陵人。君心難問取。我見也憐生。今  
日秦淮相接處。當年桃樹桃根。門前流水記前因。鬘陀花下影。同拜繡幢身。

瀟湘逢故人慢 採菱

常向湖西率諸女採菱。當夕陽下春。翠袖紅妝。與清波碧藻相映。後秋中期  
再踐此約。而不可復得。

採菱歌罷。見紫角新翻。綠苞初卸。問灌湖前汶。女伴恁來遲。停船相送。紅袖風吹。剛  
一望。夕陽西下。喚侍兒。慢捲朱竿。菱刺又牽羅帕。舉棹去。南浦夜。嘆洲盡含霜。灣

名銷夏。此事思如乍。待舊約重尋。流光不借。幾度秋風。看浩浩、長淮東瀉。好愁人、翠藻清漣。猶是參差如畫。

水龍吟 白蓮

前湖十里芙蓉到門。皦皦明如練。波光雲映。蘆葦鷺下。宛然一片。細蒨含鉛。青房瀟粉。素珠成串。便採蓮紅女。絳裙下。褶遮葉住。有誰見。只爲社中人散。倚遙空。削成難辨。赤欄橋子。無端愁把。碧天遮斷。月下飛香。霜前落葉。容華將變。但秋衣未製。剪來朵朵。不須染茜。

摸魚兒 蓴

但秋風有誰還憶。夏瓜冬菜春韭。兒家住近橫塘曲。長在柳姑廟後。相邀取。借鄰女花竿。挑起紅絲瀏。摘來盈缶。任九月豬毛。百莖雉尾。總貫一壺酒。晶澀甚。慢說白如瓊玖。下將鹽鼓烹就。鈿頭釵脚難形似。只顧流匙在口。還念否。料拾鱸分鯖。未是和羹手。躊躇良久。便羊酪能勝。龍酥堪敵。歸去也何有。

湖 詞

海 樓

運 臺



陳維崧（天啓五——康熙二一）

字其年。號迦陵。江南宜興人。以縣學生應博學鴻詞試。授檢討。駢文及詞冠絕一時。有湖海樓集。

序一

予固不知填詞。間嘗從先子坐隅。竊聞春波詞人錢而介先生之緒論矣。詞始於唐。衍於五代。盛於宋。沿於元。而榛蕪於明。明詞佳者不數家。餘悉踵草堂之習。鄙俚褻狎。風雅蕩然矣。文章氣運。有剝必復。吾友朱子錫鬯出而振興斯道。俞子右吉周子青士彭子羨門沈子山子融谷搏九李子武曾分虎共闡宗風。陳子其年起陽羨。與吾里旗鼓相當。海內始知詞之爲道。非淺學率意所能操管者也。其年王父少保中澆先生爲東林領袖。嘗令吾邑。多惠政。與先祖訂交特厚。以故先子與定生先生昆仲世講不衰云。滄桑後。予始得見其年。及其三弟緯雲。因盡讀其先世遺書。辛酉九月。予從京師南還。其年尙賦詩二章贈別。迨壬戌之夏。而屋梁落月之思。遽變作人琴之感矣。今年春。予歸自河東。適家弟六謙爲深澤令。遂憩裝焉。其年季弟子萬。時令安平。安平與深澤接壤。子萬以公事至上谷。紆道訪予兄弟。一相見。卽言及其年詩古文已付梓。詞則海內尙未覩全本。方彙輯迦陵詞全集行世。索予一言爲序。予

間至京師。偶與友人顧咸三共讀其年之詞。咸三謂宋名家詞最盛。體非一格。蘇辛之雄放豪宕。秦柳之嫵媚風流。判然分途。各極其妙。而姜白石張叔夏輩。以冲澹秀潔。得詞之中正。至其年先生縱橫變化。無美不臻。銅琶鐵板。殘月曉風。兼長並擅。其新警處。往往爲古人所不經道。是爲詞學中絕唱。予聞其言。而益信其年之詞之必宜單行也。夫其年與錫鬯並負軼羣才。同舉博學宏詞。入翰苑。交又最深。其爲詞工。力悉敵。錫鬯江湖載酒集。爲友人選刻已久。今方高視詞壇。著作且日新。其年詞雖富。而今已矣。子萬梓成後。錫鬯必竭力爲之表章。又何用予序哉。特以子萬惓惓爲其兄身後名計。友于之誼。足以風世。不敢以不文辭向者。新城王阮亭先生梓其令兄西樵東亭兩先生遺集。海內重之。以子萬之孝弟。與其吏治學問。行且敷歷中外。致君澤民。以繩其祖武。豈僅僅以詞章爲其兄不朽計者。獨予以長貧。餬口四方。祖父遺文。未能盡梓。以竟後人之事。則見子萬梓其年詞。屬爲之序。而不忍固辭者。亦用以自志。吾媿云爾。秀水高佑鉅。



序二

先伯兄詩古文。余於丙寅丁卯兩年節俸金次第付梓。惟詞最富。苦力不逮。至己巳春。始得鳩工鏤板。校讎訖。不禁喟然歎曰。伯兄之詞富矣。伯兄之遇窮矣。方伯兄少時。值家門鼎盛。意氣橫逸。謝郎捉鼻。塵尾時揮。不無聲華裙屐之好。故其詞多作旖旎語。迨中更顛沛。饑驅四方。或驢背清霜。孤篷夜雨。或河梁送別。千里懷人。或酒旗歌板。鬚髯奮張。或月榭風廊。肝腸掩抑。一切談諧狂嘯。細洩幽吟。無不寓之於詞。甚至里語巷談。一經點化。居然典雅。真有意到筆隨。春風物化之妙。蓋伯兄中年始學爲詩餘。晚歲尤好之不厭。或一日得數十首。或一韻至十餘闋。統計小令中調長調。共得四百一十六調。共詞一千六百二十九闋。先是京少有天藜閣迦陵詞刻。猶屬未備。今乃盡付梓人。自唐宋元明以來。從事倚聲者。未有如吾伯兄之富且工也。昔南宋李泳有花萼詞集。後世稱之。余少孤失學。碌碌無可表見。今讀伯兄之詞。能不愴余之蕪落。而重有愧於前人也哉。弟宗石。

烏絲詞序一

丙午之秋。余與陳子其年俱落第。後會黃山孫子無言。意欲以吾兩人詩餘梓以行世者。嗟乎。余與陳子少志觀光。許身稷契。意謂有神之筆。庶幾致君堯舜上。再使風俗淳。誰知蕭條瓠落。而與鶯嘴啄紅燕尾點綠。爭長于鉤簾借月染雲爲幌之間。豈吾兩人之志哉。陳子嘆曰。是亦何傷。丈夫處不得志。正當如柳郎中使十七八女郎。按紅牙拍板。歌楊柳岸曉風殘月。以陶寫性情。吾將以秦七黃九作萱草忘憂耳。雖然。昔裴休爲相。李羣玉能詩。薦授校書郎。而陳去非長于歌詞。亦爲高宗所眷注。孰謂詩詞一道。何嘗不得知己于天子宰相哉。彼尤尙書謂程正伯之文。每過于詩。說者以爲是時當塗諸公。方且以文章薦正伯。尤公之言。可謂識正伯之大者。但不知代往年遙。此事可傳。而復可見否耶。爲勸陳子。生逢堯舜。垂翅青冥。此意宜付之悠悠曠士之胸。且暫往東臬。與汝石交辟疆冒君。每得一好詞。如沈廉叔陳君寵輩。付蓮鴻蘋雲品。清謳爲一笑樂。冬季歸陽羨。當復借紫雲相伴。又何減堯章過垂虹橋。

畔小紅低唱我吹簫也。至于裁雲縫月之妙手。敲金戛玉之奇聲。驅遣齊梁。輿臺溫李。則又當世傳寫。織帕機房。不必待余揚扈矣。時窮冬凜冽。不亞改之寒。甚手顫時。陳子幸爲余沽酒。

烏絲詞序二

樂府云亡。鄭聲競作。黃花滿耳。白雪無人。律有迷於左高。聲不辨夫下濁。陽羨陳其年先生。東吳鼎族。南國才人。首述家風。曾弄章於漢殿。先陳世德。應進笏於唐朝。典午風流。旣傳桃葉之女讖。叔寶詞藻。徒聽蔣山之烏啼。今日布衣。昔年公子。空存老屋。但守殘書。泣不成章。慨當以慷。眼雖青而莫告。頭垂白以無成。無命有才。天只人只。去冬顧我。寒夜論文。燒燭惟嫌其不長。飲酒先憂其已罄。吃不能言。笑諸君之但知用口。文未加點。驚四座之如覺有神。自爾別離。徒勞夢寐。近知栖遲京口。當痛飲之我師。復聞偃息荆溪。異常州之上表。秋風初動。暑氣已闌。三鱣未飛於庭前。雙鯉忽傳於江北。使同青鳥。集曰烏絲。班竹驅馳。不僅風雲月露。畫船迎送。將無城郭山

河振宜幸得買山。何須種豆。雖不及鄭五之歇後。敢輕嗤柳七之爲詞。廬陵定風波。歌清一曲。東坡醉落魄。酒醒三更。余也閒閒。君猶寂寂。或夢池塘之春草。或采汀洲之白蘋。席地幕天。何有於我。遶手頓足。不知其他。泰與季振宜。

陳檢討詞鈔序

予旣序迦陵先生儷體集行世。他所著散體古文。悉歸其季子萬之手。而無副。然先生之詞。則先生之真古文也。蓋嘗論之。文章之源流。古今同貫。而歷覽作者。其所成就。未嘗不各擅一家。雖累百變。而不相襲。故讀之者。亦服習焉。而不厭也。五經文字。無敢輕議。後此則離騷祖風雅。詞賦家祖騷。史家祖遷固。體製殊別。不能爲易。然縱橫變化。存乎其人。譬如遊蓬壺者。耳目睹記。大抵皆神仙窟宅。而所稱三神山蓬萊。方丈之屬。本倏忽變幻。不可方物。入之者。目玩意移。至不能舉其數。若規格一定。意境無異。如世摹畫。化人宮闕。縱極工麗。一覽已盡。又况乎膠滯筆墨者耶。文章之道。亦如是而已。詞之興。其非古矣。花間猶唐音也。草堂則宋調矣。元明而後。駸駸卑靡。

學者苟有志於古之作者。而守其藩籬。卽起溫韋周秦蘇辛諸公於今日。其不能有所度越也已。其年先生幼工詩歌。自濟南王阮亭先生官揚州。倡倚聲之學。其上有吳梅村龔芝麓曹秋嶽諸先生主持之。先生內聯同郡鄒程村董文友。始朝夕爲填詞。然刻於倚聲者。過輒棄去。間有人誦其逸句。至噦嘔不欲聽。因厲志爲烏絲詞。然烏絲詞刻。而先生志未已也。向者詩與詞並行。迨倦遊廣陵歸。遂棄詩弗作。傷鄒董又謝世。問歲一至商邱。尋失意返。獨與里中數子晨夕往還。磊砢抑塞之意。一發之於詞。諸生平所誦習經史百家古文奇字。一一於詞見之。如是者近十年。自名曰迦陵詞。夫迦陵者。西王母所使之鳥名也。其羽毛世不可得而見。其文彩世不可得而知。劃然嘯空。聲若鸞鳳。朝遊碧落。暮返西池。神仙之與偕。而縹渺之與宅。嗚呼。此其是歟。故讀先生之詞者。以爲蘇辛。可以爲周秦。可以爲溫韋。可以爲左國史漢唐宋諸家之文。亦可。蓋既具什伯衆人之才。而又篤志好古。取裁非一體。造就非一詣。豪情豔趨。觸緒紛起。而要皆含咀醞釀而後出。以故履其闕。賞心洞目。接應不暇。探其

與。乃不覺晦明風雨之真移我情。噫其至矣。向使先生於詞墨守專家。沈雄蕩激。則目爲僮父。柔聲曼節。或鄙爲婦人。卽極力爲幽情妙緒。昔人已有至之者。其能開疆闢遠。曠古絕今。一至此也耶。計原藁未刻。迦陵詞合。烏絲詞幾千八百篇。今選定凡若干首。顏曰陳檢討詞鈔。志其闕也。若世有鍾期。愛其全操。則蒐補遺缺。尙自有待。予且拭目俟之。同里蔣景祁。

# 湖海樓詞

宣興陳維崧其年

## 竹枝 粵東詞

番君廟後鷓鴣飛。素馨花落蠻娘歸。  
花田三月黎人多。珠江無風春自波。  
羅浮人家紅蕉布。誰裁郎衣儂所作。  
檳榔酒釀鬱林春。鬱林女兒多絳脣。

## 二十字令

詠便面上梔子花爲陸漢標賦

紈扇上。誰添梔子花。搓酥滴粉做成他。凝蟬紗天斜。

## 望江南 歲暮雜憶十首

江南憶。憶得上元時。人鬪南唐金葉子。街飛北宋鬧蛾兒。此夜不勝思。  
江南憶。最憶善和坊。猿臂醉擎劉白墮。鶯喉嬌唱小秦王。花月去堂堂。

江南憶。少小住長洲。夜火千家紅杏幕。春衫十里綠楊樓。頭白想重遊。  
江南憶。白下最堪憐。東冶壁人新訣絕。南朝玉樹舊因緣。秋雨蔣山前。  
江南憶。懊惱是西湖。秋月春花錢又趙。青山綠水越連吳。往事只模糊。  
江南憶。更憶是蕪城。蘭葉寒塘盤馬路。梨花微雨築毬聲。風景逼清明。  
江南憶。憶殺到如今。白玉堂深人一笑。真珠簾暖夜千金。十載尙關心。  
江南憶。最好是清歛。一曲琵琶彈賀老。三更絃索響柔奴。此事豔東吳。  
江南憶。罨畫最風流。白屋山腰烟內市。紅闌水面雨中樓。樓上漾簾鉤。  
江南憶。不羨五侯鯖。狎客後堂春說餅。廚娘小閣夜嘗羹。鮪歡足平生。

又 宛城五日追次舊游漫成十首

重五節。記得在金陵。綠水沒腰連夜雨。錦帆銜尾半河燈。往事思騰騰。  
重五節。記得在南徐。紅板開喧停畫鷁。翠花磁溼貯黃魚。踏浪最憐渠。  
重五節。記得在揚州。歌板千羣游法海。酒旗一片寫高郵。茉莉打成毬。



重五節。記得在吳門。北寺牆頭蘭葉鬢。桐橋船裏墨花裙。那許不銷魂。  
重五節。記得在西湖。萬馬錢塘堤上戲。六橋士女鏡中趨。髻髻射潮無。  
重五節。記得在嘉興。也共朱郎。朱子蓉茂。湖上飲。菖蒲花底醉難勝。別後見何曾。  
重五節。記得在如皋。小展簾紋融似水。楊枝低唱紫雲簫。回首路迢迢。  
重五節。記得在前門。廟市花盆籠蟋蟀。門攤錦袋養鵓鶉。榴火帝城春。  
重五節。記得在家鄉。麝粉細調蛾子綠。虎釵新破繭兒黃。扼臂五絲長。  
重五節。今歲在南陽。牆脚蝸牛行艾葉。簷牙鳩婦話榴房。絲雨溼年光。

又 商邱雜詠五首

商邱憶。憶煞冶游人。盞葉綠鞵繫兔鶻。鬧花錦袋貯鷓鴣。飛鞞逐黃塵。  
商邱憶。綺席笑顏酡。脆滑韭芽黃勝醬。鬆圓鉅妝白於羅。扶路酒人多。  
商邱憶。馬客似幽涼。棗子集頭調犬路。木蘭廟角鬪雞場。自許儘輕狂。  
商邱憶。梳裹勝江淮。青漆車兒垂繡幔。乾紅鞵子隱弓鞋。相遇宋城隈。

商邱憶。春景浩無涯。坐上一尊桑落酒。門前千畝牡丹花。踞坐撥箏琶。

又 寄東臯冒巢民先生并一二舊游十首

如臯憶。最憶小三吾。水繪園中亭名隔。水紅牆春冉冉。拍波綠箬雨蘇蘇。隱几一愁無。

如臯憶。憶得暮雲天。著醋紅煙經酒脆。帶糟紫蛤點羹鮮。日日醉花前。

如臯憶。記坐得全堂。幾縷椒雞閒說餅。半罌花露靜焚香。絃索夜根根。

如臯憶。如夢復如烟。滿院嫩晴歌板脆。一城纖月酒旗偏。過了十多年。

如臯憶。猶憶看春人。夾巷簾櫳空勝水。後街香粉碾成塵。看煞不曾曠。

如臯憶。曾記臥湘中。閣名萬點水花籠。夜碧半巖火樹落春紅。颺起妓衣風。

如臯憶。憶看小桃花。水繪園門通小寺。春堤一道不曾斜。千樹爛晴霞。

如臯憶。往事倍盈盈。水郭題名新悵望。板橋話別舊心情。雙髻可憐生。

如臯憶。數子總疎狂。剛中酒時思許掾。山濤恰傷春處念曹王。文虎香茗記張郎。孺子

如臯憶。按譜砌香詞。傳語東君須婉轉。此情莫遣外人知。除說與楊枝。

瀟湘神 盱眙舟中作

淮水流。淮水流。蠻絃銅鼓不勝愁。驪山金盃無消息。六月園陵冷勝秋。

桂殿秋 淮河夜泊

波淼淼。月朧朧。神巫爭賽禹王宮。船頭水笛吹晴碧。檣尾風燈颭夜紅。

又 偶紀

春漠漠。雨疎疎。綺窗偷訪薛濤居。凝情低詠年時句。人在東風二月初。結句余舊作無

題詩句

南鄉子 江南雜詠六首

天水淪漣。穿籬一隻撇頭船。萬竈炊烟都不起。芒履。落日撈蝦水田裏。

夔夔喧匝。楓根清酒紙成灰。澤國不知山國苦。銅鼓。醉覓夜深作蠻語。今秋水鄉盡沒

而山民復十室九病。故詞及之

戶派門攤。官催後保督前團。毀屋得繕上州府。歸去。獨宿牛車滴秋雨。

雞狗騷然。朝驚北陌暮南阡。印響西風猩作記。如鬼。老券排家驗鈴尾。  
萬艘千船。今年米價減常年。乍可宣房填蟻穴。愁絕。不願官家言改折。  
笳蓋從風。旌竿十丈壓程紅。卜式相如爭匿笑。驚告。同輩屠沽并傭保。

南鄉子第二體 清明後一日吳閩道中作二首

纔過清明。東風怯舞不勝情。紅袖樓頭遙徙倚。垂楊裏。陣陣紙鸞扶不起。  
捲絮搓綿。雪滿山頭是紙錢。門外桃花牆內女。尋春路。昨日子規啼血處。

楊柳枝 本意

袅娜絲楊水面生。波光柳態兩盈盈。攪來風色昏於夢。不許春江綠不成。

法駕導引 饑鳥

饑鳥噪。饑鳥噪。毛羽忒摧頽。故國稔經霜雪滿。他鄉錯料稻粱肥。曠黑只飛飛。

又 曹南耕表弟禮斗甚虔詞以紀之四首

銅芝蓋。銅芝蓋。縹緲結祥烟。碧柰。開切利市。紫陽宮近夜摩天。一枕小游仙。

西風動。西風動。闌苑一愁無。毛女弄琴紅捍撥。井公戲博紫樽蒲。閒話鮑家姑。  
元始殿。元始殿。瑤陛一層層。丹竈幾聲仙院笛。碧池千盞醮壇燈。人靜露華凝。  
梅廬閉。梅廬閉。長日不曾閒。絳帔黃紵晨控鶴。綠章赤篆夜扶鸞。來往總仙官。

加夢令 贈友

記得西陵小弄。風裏金鞭雙控。今日又逢君。恰值春波微動。如夢。如夢。白髮何堪情重。

甘州子 新霽同南耕散步潘原白園亭主人不在題壁而去二首

沁園春在畫橋西。花月價賤如泥。碧城高與粉牆齊。擬把數行題。題未了。斜日亂鶯啼。  
銅環半面澀蝦蟆。鸚鵡睡。懶呼茶。臙脂新溼小窗紗。柳線漸勝鴉。無人到。開徧一園花。

思帝鄉 夏夜

花底螢。高低穿繡局。慣照人間閒事。一星星。待展輕紈小撲。怯還停。又向牆邊竹。去  
冥冥。

長相思 贈別楊枝

漱金卮。閣金卮。不是樽前抵死辭。今宵是別離。  
撚楊枝。問楊枝。花萼樓前踈地垂。  
休忘初種時。

又 月夜看花作

掩柴門。步籬門。夜色茫茫碧一痕。微酣過別村。  
梨花繁。李花繁。錯道溪昏月又昏。  
風吹銀浪渾。

相見歡 初夏行舟

睡餘獨自推篷。海陵東。一帶人家都住柳絲中。  
黃茆屋。清江曲。綠簷翁。正是雨餘  
斜閣水車紅。

調笑令 詠古七首 張女郎

張家二女天人姿。西風秦隴吹空祠。吳興瘦沈美風調。邂逅一笑難爲持。客亭愴  
悅嬋娟子。翠幘珠駟去如駛。酒坐琴聲箜篌聲。姊妹雙雙落紅水。  
紅水啼難止。弄罷箜篌相顧起。女郎祠掩西風裏。繡幌明簾徙倚。蘭香姨與智瓊姊。  
懷恨多年同此。

又 汜人

湘中蛟娣號汜人。楚天冉冉紅羅巾。一鉤曉月落橋下。風光冶麗偏相親。別來愁  
緒紛難理。鄂渚微波嬉上已。烟裙霧鬢驚淼茫。畫艫回首人千里。  
千里湘中水。江面微風翻繡被。輕別玉娥歸去矣。淚滴龍堂青綺。十年重遘蛟宮娣。  
愁絕楚天上已。

又 苙奴

崔家女弟世所無。彈箏自命爲苙奴。重泉猶作人間曲。摧藏掩抑聲嗟吁。當時舊  
事心猶省。長秋一曲紅窗影。夢裏曾陪元舍人。銀箏淒苦人清冷。

清冷。虛無境。手撥銀箏。心自省。長秋一曲紅窗影。絃裏分明悲哽。泉臺不少人間景。後苑君王巡幸。

又 安妃

九華安妃游玉鄉。交裙攜帶招帝郎。情纏雙好發朗唱。紫清瑣掖排銀房。楊羲自是神仙子。不比人間許長史。左宮亦有王夫人。紅顏調笑斟瓊醴。

瓊醴調芳旨。天上風流聊復爾。楊家自是神仙子。雙笑歡兼昔旨。一幅青書鸞鳳紙。爲授真妃靈紀。

又 劉麗華

通波亭畔風日清。會稽王子愁經行。中流佚女遶烟舫。波光臉態交盈盈。風吹裙帶紅絲纏。箏篋歇拍聲聲顫。西軒夜靜月又低。春條爲爾歌宛轉。

宛轉羞相見。月白風清人婉孌。洛靈羅韞來波面。良夜隨郎游行。小婢箏篋歌又顫。徒倚春流都徧。



又 蔡豕娘子

西堂花茵儂好持。此間風月堪詠詩。溢奴小兒若冰雪。紫綬綠酒饒神姿。竟陵判司大懊惱。夜寒空館眠難好。翠簪膩滑促傳觴。口吃微聞喚鸞老。

鸞老頭腦好。善謔羣真堪絕倒。夜寒空館人聲悄。地下爲歡須早。南鄰娘子翹翹小。共汎玻璃清醪。

又 瑤芳公主

槐安貴主名瑤芳。穠春遊戲搖鳴璫。相牽貪看石延舞。寺前暗調淳于郎。蘭摧玉折一何苦。青春又葬同昌主。淮南裨將慣酒悲。慟哭繁華黯無語。

無語。奈何許。憶在寺門魂暗與。布衣真尙瑤芳主。一霎日斜歸去。大槐安國飛紅雨。腸斷舊游何處。

醉太平 江口醉後作

鍾山後湖。長干夜烏。齊臺宋苑模糊。剎連天綠蕪。估船運租江樓醉呼。西風流落

丹徒。想劉家寄奴。

又 戲詠錢傲宋人獨木橋體四首

紅閨簾錢。綠窗意錢。姬人小字錢錢。佩男錢女錢。  
花驄鐵錢。蘭橈綺錢。癖同和嶠  
惟錢。問直他幾錢。

青苔印錢。朱荷貼錢。空囊誰笑無錢。更漫空筭錢。  
文臣愛錢。倡家數錢。世間萬事  
由錢。向天公貫錢。

吹簫乞錢。販脂鬻錢。西風江岸攤錢。負茶商進錢。  
西鄰醜錢。東城打錢。明朝去索  
碑錢。付黃公酒錢。

錢兮古錢。鏐兮後錢。篋中剩五銖錢。是秦錢漢錢。  
可兒使錢。阿奴惜錢。逢花休翹  
無錢。看風吹紙錢。

又 題孫無言半瓢居

顏淵一瓢。先生半瓢。傍人笑問團瓢。是吟瓢酒瓢。  
巢由飲瓢。先生住瓢。行窩何處

非瓢。任肩挑壞瓢。

昭君怨 詠柳

誰把軟黃金縷。裊在最臨風處。低蘸綠波中。太濛濛。  
雨。一樹倍堪憐。寺門前。愁殺花花絮絮。半是風風雨

春光好 桐川道中作

鶉鷄叫。戍樓平。漆燈明。一路春田四月，少人耕。  
惡木叢中古驛。亂山缺處孤城。安得短衣看射虎。過殘生。

柳枝 人日過畹仙校書家三首

幾陣簾風漾雪膚。正春初。小姑年小理清斂。怯氍毹。  
淺道勝常釵勝轉。紅幡軟籠中鸚鵡爲誰呼。似語予。  
蘭焰平明一縷微。弄餘輝。含嬌和夢換春衣。傍牀幃。  
手拈紅綬通眉語。憑郎主。郎看箏雁會翻飛。便須歸。

雪淨春瓷隱綠光。發茶香。手擎江橘顫釵梁。玉纖涼。  
放夜傳聞今歲早。銀燈好。再  
來須盡十分狂。省縈腸。

點絳脣 阻風江口

濁浪堆空。暨陽城下風濤怒。冰車鐵柱。隱隱轟吳楚。  
獨眺君山。且共春申語。愁如  
許。一杯酌汝。同看蛟龍舞。

又 詠枕

憶得年時。紅綿妝疊紅蕤灑。笙囊綠拵。濃笑釵痕閃。  
說盡山盟。不料巫雲斂。殘荷  
淡。斜鋪楚簟。多了啼紅點。

又 夜宿臨洛驛

晴髻離離。太行山勢如蝌蚪。稗花盈畝。一寸霜皮厚。  
趙魏燕韓。歷歷堪回首。悲風  
吼。臨洛驛口。黃葉中原走。

又 江樓醉後與程千一

絕憶生平。蹉跎祇爲清狂耳。酒酣直視。奴價何如婢。  
喜。笛聲夜起。燈火瓜洲市。

斷壁崩崖。多少齊梁史。掀髯

又 題延令張燕孫秋詞燕孫園次增

吳苑初晴。陽山大好朝來鬢。相逢卻是。山抹微雲罅。

一幅詞兒。滿紙悲哉氣。冬深

矣。重添秋意。秋在君詞裏。

又 舟行秋望

歷亂煙村。推篷愛煞晴秋爽。柴門栗椽。風定誰敲響。

野鴨濛濛。懶漫勤依槳。魚鱗

莽。驚飛兩兩。觸損玻璃樣。

又 和成容若韻

並坐燕姬。琵琶膝上圓冰薄。輕攏淺抹。巧把羈愁豁。

竟去搖鞭。點草霜鬢渴。西風

惡。數聲城角。冷雁濛濛落。

女冠子 本事二首

黃紙翦就。慵上鴛機刺繡。鎮葳蕤。水綠青溪廟。花紅白石祠。愔愔春似夢。漠漠雨如絲。仙洞胡麻熟。有誰知。

始青天上。小織龍綃幾兩。路茫茫。度海雲鬢亂。還宮繡帶長。瓊枝春裊裊。金磬夜琅琅。撥盡天風曲。說興亡。

中興樂 秋夜

水邊小弄靠烟廊。秋宵正掩書窗。忽有人聲飄來畫牆。不辨衣香水香。太微茫。分明有箇玉簪花底。暗箇新涼。

紗窗恨 蝴蝶和毛文錫韻

鬧紅啞翠何時了。漾春心。一生輕薄。誰拘管。粉牆陰。花架底。潛防紈扇。畫梁前。巧鬪紅襟。袖上鴛裙摺。費泥金。

浣溪沙 贈王郎

十五吳兒渲額黃。鵝笙炙罷口脂香。依稀記是小王昌。未解褰簾通暗語。已能映

柱惱迴腸。箇儂年紀未須防。

又 癸丑東溪雨中修禊

春水接藍接遠汀。晚山愁黛蠹銀屏。綠楊城外畫船停。燕翦輕陰拖水榭。鶯翻嫩雨溼蘭亭。半溪燈火酒微醒。

又 春日同史雲臣遠公買舟山游小泊祝陵紀事

春水平如簾一般。茶鐺棋局委潺湲。好風吹去不須還。二月新晴鋤綠笱。半村微雨賣青山。人家俱伐山巒石。垂楊低處隱禪關。

又 投金瀨懷古

格格沙禽拍野塘。離離苦竹上空牆。投金瀨在漾斜陽。擊絮纔憐伍員。音運浣紗溪。又產夷光。英雄生死繫紅妝。

又 偶憩清和庵卽事

壘石緣流一逕斜。寺門幽似野人家。西風黃葉響籬笆。紫入鸚哥名是菊。草花中

有名艷哥菊者其色紫紅歸鴉鼻色如花。僧籬竹下自煎茶。

又 詠橘四首

秋染包山樹樹蒼。高低斜綴絳紗囊。西風飄過滿湖香。  
未免爲奴供飲噉。用橘奴

事微聞有叟話滄桑。用橘叟事霜紅露白儘徜徉。

髣髴輕軀十八娘。生憎柑子道家妝。石榴裂齒也尋常。  
擘罷春纖丹液冷。傳來羅

帕玉肌涼。昨宵酒惡倍思量。

船入荆溪思豁然。曾傳此語自坡仙。擬將種樹遣蕭閒。  
今日亭臺無楚頌。舊時橘

柚滿吳天。風流人去一千年。

藻耀霜林八月中。纍纍蘋卵石湖東。篾包箬裹滿筠籠。  
天上渴烏偷樣好。鑄成一

點橘般紅。蓬萊夜半已瞳矓。

又 山塘卽事

窈窕山塘半酒家。浣衣歸去笑吳娃。東風吹得繡裙斜。  
琴几研光麋綠竹。楸枰敲



落水仙花碧紗窗影浸山茶。

又 蚌埠卽事

潏潏淮河杳似年。森森蚌嶺遠攢天。風來吹作鬢帆圓。柰熟叟擎千顆雨。柳濃兒浴一溪烟。黃瓜涼粉趁墟船。

又 雨中由楓橋至齊門

料峭春寒恰未消。鶉鴣啼急水迢迢。半船微雨過楓橋。薺菜綠平齊女墓。梨花雪壓伍胥潮。柳枝和恨一條條。

又 月夜虎邱紀所見

小立山塘玩暝烟。市樓燈火未闌珊。暗中依約遇嬋娟。風裏繡裙吹浪皺。雨餘紅屐印泥圓。一鉤春月寺門前。

又 陸上慎移居東郊二首

背郭沿溪路不遙。杏花村裏菜花橋。故人和燕定新巢。藥裏暖分花影曬。漁簑閒

受柳綿飄。小樓長聽雨瀟瀟。

水驛家家看打魚。晴簷日日喚提壺。知君高臥一愁無。乍可小詞填幼婦。不妨新

論著潛夫。明年花下引鴛雛。

又 逮下爲閣牛叟賦。牛叟兌閣遺徵曰。妻屢請納妾。予不應。間置孔氏一妾。三年遣

之猶處女焉。

頻笑王家九錫文。犢車塵尾事紛紛。蔡充兒語最傳聞。每遣白公留阿素。卻教坡  
老買朝雲。紅闈若箇不輸君。

酒泉子 詠畫上香櫪爲祖仁淵賦

拌蠟勻檀。搓得軟羅圓。皺。西風拋打。赭黃毬。墮高樓。翠甃紅架貯清幽。分外宜秋。

憑皓腕。劈春絨。和麝粉。絡牀頭。

天門謠 汲縣道中作

已過鞦韆節。看汲冢。苔錢鋪繡。淇流咽。說古今興滅。比干廟。年年啼百舌。月與銅

盤都缺。愁恨織。花落處。棠梨成血。

添字昭君怨 竹逸約過城南僧舍看梅以雨不果詞以柬之

梅壓板橋玉皺。人隔寺牆香透。昨朝花下約同遊。散春愁。准趁平蕪攜手。還傍粉  
帘賒酒。今朝細雨太綿綿。且高眠。

又 夜泊鑾江

今夜月明江上。綠染吳天新樣。萬家簾幕火微明。佛狸城。一點瓜洲玉糝。半笏金  
山雪透。亂帆颯颯響秋江。瀉銀瀧。

菩薩蠻 題青谿遺事畫冊同鄒程邨彭金粟王阮亭董文友賦八首

流蘇小揭人初起。博山烟裊屏風裏。紅日映簾衣。梁間玉翦飛。迴眸驚瞥見。笑倚  
中門扇。准擬嫁文鴛。燈花昨夜雙。乍遇

象牙局上金星吐。香閨戲博紅鸚鵡。深院對挑棋。厭厭春晝遲。娘輸籠玉手。伴靠  
紗窗口。細撚柳綿兒。花冠報午時。弈棋

銀河斜墜光如雪。碧虛淺浸天邊月。月色太嬋娟。行來剛並肩。闌干渾倚倦。小漾裙花茜。風細語難聞。亭亭雙壁人。私語

後堂恰與中門近。當時日傍飛蟬鬢。猶記捉迷藏。水晶庭院涼。侍兒前後邏。何計

將他躲。匿笑顫花枝。鞋尖露一絲。迷藏

迴廊碧斲芭蕉葉。鴨爐瑞腦薰猶熱。春筍抱琴彈。一行金雁寒。聲聲鬆寶串。彈到

昭君怨。促柱鼓瀟湘。風吹羅帶長。彈琴

秦淮水閣多斑竹。平康院院燒燈讀。竹響似行人。檀郎迴顧頻。恰逢紅粉面。送茗

來瓊扇。剛是早回頭。夜深儂睡休。讀書

梨花簌簌飛紅雪。狸奴夜撲毳毼月。物也解雄雌。教奴恣意窺。潛蹤殊未慣。猛被

蕭郎看。羞走暈春潮。門邊落翠翹。潛窺

桃笙小擁樓東玉。紅蕤濃暉春鬢綠。寶篆鎮垂垂。珊瑚鉤響時。花陰瑤屈戍。小妹

潛偷覷。故意繡屏中。剔他銀燭紅。秘戲

又 江行二首

東風吹綠江南道。行人卻說江南好。紅豆兩三枝，低垂聖女祠。  
淥波明似眼。來往人何限。斜日運租船。西風踈脚眠。  
江流只向臺城打。閱江樓上人非也。對此正茫茫。煙波空斷腸。  
布帆搖鐵鹿。碾破長江綠。回首望臺城。依稀橫吹聲。

又 和龔伯通寄于生用原韻

撩人最是眉烟皺。勾人不在春弓瘦。紅燭奈他何。相看淚孰多。  
別來渾不寐。夢裏人誰至。拚倚鈿箏眠。嬌音落枕邊。

又 代于生答伯通仍用前韻

舞餘疊得衫兒皺。酒闌趨得人兒瘦。郎口似隋何。相思謊最多。  
昨宵剛小寐。書與砧同至。砧響伴人眠。寄書人那邊。

又 春日憶西湖次陸蓋思徐竹逸倡和原韻

鬪波曾到西冷去。掠入綠痕難睡處。疎簾雜眠鷗。真成自在游。如今佳興歇。悶過春三月。剛見摘蘭芽。山村又焙茶。

又 柬雲臣訊牡丹消息

銀鈴油幕安排巧。剛剛只等花期早。聞說藥欄東。嬌香將暈紅。連朝天欲雨。苦勒春寒住。何日一枝開。儂應側帽來。

又 雲臣招看牡丹以雨未赴小詞奉柬并柬是日賞花諸子

堂前勸酒清尊急。闌前著雨紅妝溼。多分酒醒時。嬌香和淚辭。留花花不可。索性將花躲。拚做薄情人。懨懨睡一春。

又 遙題廣陵吳元式棣友堂

驅車昨過田真里。千年想像荆花紫。余昨歲中州曾過田氏三紫菡故里今日廣陵城。惟君繼令名。休歌一斗粟。羨汝東西屋。准擬到華堂。來眠大被旁。

又 過雲臣看牡丹歸有作

滿城爭放花千朵。狂夫那肯家中坐。纔得過西鄰。東家喚又頻。徑須衝酒去。那怯廉纖雨。日日爲花顛。何曾讓少年。

又 吳門將歸爲姜學在題歲寒圖

瀕行不折閭門柳。殷勤只勸皋橋酒。笑指歲寒圖。交情如不如。領君珍重意。樹乃猶如此。題罷上歸船。孤帆入暝烟。

又 爲竹逸題徐渭文畫紫牡丹

年時鬪酒紅欄下。一叢姘紫真如畫。今日畫花王。依稀洛下妝。徐熙真逸品。淺暈葡萄錦。挂在賞花天。狂蜂兩處喧。

又 將發吳門時庭際海棠盛開用香嚴詞韻

年年慣作他鄉客。今年怕與花離別。花也替儂愁。春江無盡頭。不如雙粉蝶。鎮日圍花側。花發唱驪歌。人歸花若何。

又 爲友人題像

萬山榭葉西風起。黛痕滴入衫痕裏。硯匣淨無塵。依稀陸子春。他時須獻賦。細馬朝天去。相映柳毵毵。宮娥報捲簾。

又 燕市贈相者

虎坊橋畔逢唐舉。西風酌酒爲君語。鬪鼻與魁肩。何嘗直一錢。浮雲卿眼見。富貴非吾願。酒盡撥三絃。狂歌菩薩蠻。

又 爲閻牛叟新納姬人催妝二首牛叟夫人已逝方爲作悼亡詞

悼亡纔寫菖蒲幅。定情又索消魂曲。淮估附書來。紅槭和笑開。鵲橋填已久。儂是催妝手。老去漫情多。顛狂奈爾何。

雕香刻翠飛瓊像。多時供在妝樓上。揀箇女如花。纖腰同拜他。白家蟄柳在淺漾。東風外。情緒憤瞞伊。欺他尙小時。

又 贈梁陶侶棠村夫子小阮

邯鄲年少春衫綠。鳴箏競唱棠村曲。檀板鷓鴣天。叢臺月正圓。謝公猶子在。才調



空羣輩。誰愛紫羅囊。書籤玳瑁裝。

卜算子 阻閘瓜步

風急楚天秋。日落吳山暮。烏柏紅梨樹樹霜。船在霜中住。  
極日落帆亭。側聽催船鼓。聞道長江日夜流。何不流儂去。

采桑子 送李雲田之吳門迎侍兒掃鏡二首

一羣蕩子揚州住。簾底紅牙。門畔金車。邀笛藏鉤樂事賒。  
如何短李先辭我。云有吳娃。生小如花。日上江樓候客楂。

我言息國夫人好。何不歸哉。早到妝臺。湘水今秋綠勝苔。  
君言聊復爲歡耳。謎語應猜。莊語非談。神物須知是手推。  
時雲田寶鐙夫人任楚

又 題畫蘭小冊 闕爲橫波夫人所繪

回思吮粉調鉛日。紫葍紺芽。露蕊烟葩。壓倒南唐落墨花。  
杜蘭香去多時了。碎錦零紗。飄泊誰家。賸有眉樓小篆斜。

後堂絲管親曾醉。袞徧箏琶。舞煞蠻靴。百幅紅蘭出內家。  
左徒弟子今誰在。只有  
章華。淪落天涯。忍看靈均九畹華。

又 題潘曉庵斗酒百篇小像

畫師貌出高人態。梧竹澄鮮。庭戶蕭然。道是詩顛併酒顛。  
玉山百罰頽唐甚。醉漢  
瓊筵。紗帽微偏。擊唾壺歌寶劍篇。

又 正月二十日從吳天石處獲讀緯雲弟京邸春詞因和其韻聲情拉雜百  
感風生一夕遂得十首不自知其所云也

今年明月無情甚。偏向江東。只照軍容。不放銀花萬樹紅。  
鳳城飛下征南騎。一片  
刀弓。鐵甲呼風。愁殺思鄉沈侍中。

輕輕過了元宵也。春雪纔融。零雨還濛。雨細如愁糝碧空。  
孤燈炙罷和衣睡。莫打  
晨鐘。繡轂銀驄。准擬今宵夢裏逢。

何人又唱安公子。漢苑烟濃。魏寢霜封。犴嶺蠻鄉一萬重。  
雪消巴蜀添春水。誰駕

鱖。陡起魚龍。此夜橫江有阿童。

早年喪亂曾嘗過。復壁爲傭。城旦爲春。兒女宵啼賊火紅。

迴頭三十年前事。箋怨

天公。衰鬢如蓬。莫遣咸陽又舉烽。

杜陵諸弟飄零甚。幾陣離鴻。捩影長空。燕市梁園類轉蓬。

後湖一雁尤酸楚。竟逐

晨風。一去無蹤。雨打天桃墜冷紅。悼弟午雪

添丁屈指今三歲。未識而翁。睡去朦朧。耳畔呼耶語句工。

關河梗絕書難達。何日

相逢。繡襖親縫。顛倒天吳短褐中。

有人來自尙書墓。燕子樓中。紅粉成空。樹樹衰楊夜起風。

非公人盡嫌余嬾。絮酒

難從。疎散誰容。頭白羊曇路已窮。哭合肥夫子

昨冬并說西樵死。送盡英雄。祇剩衰翁。寒日西頰負白虹。

從茲東海無奇氣。魚眼

波紅。鼈背霜濃。瑤島瓊臺何處峯。哭西樵吏部

年來怕作傷心句。雙袖龍鍾。左耳新聾。莫把箜篌唱懊儂。

不如且作消愁計。賣藥

無終鬻春山東。自署人間亡是公。

今朝吾弟懸弧日。四十匆匆。誰薦揚雄。謁者監門孰與通。

耦耕畢竟家山好。山黛

初濃。杏靨纔烘。遲汝風光一笑同。是日爲弟生日

又 吳門遇徐松之間我新詞賦此以答

當時慣做銷魂曲。南院花卿。北里楊瓊。爭譜香詞上玉笙。

如今縱有疎狂興。花月

前生。詩酒浮名。丈八琵琶撥不成。

又 爲汪蛟門舍人題畫冊十二幀

鬱金堂後相思樹。花月瓏璁。庭院迷濛。鳳脰蘭膏澱纒紅。

雙心一氣沈香火。嬌小

烏龍斜壓薰籠。笑爾葡萄寶幔空。

是何年少朝天客。火滿東華。漏歇南衙。蝶夢纔歸尙戀花。

麝衾獸炭團花褥。休數

其他。一例豪奢。不是田家卽寶家。

八盤膩手香蟬委。紅粉輕調。畫的輕描。直得春魂爲爾銷。

道書偏怪郎耽讀。百幅

霞綃十斛龍膏。何必蓬山訪碧桃。

李皇周后年雙小。玉樹宮牆金縷鞋幫。膽怯潛提出洞房。

秣陵往事千年矣。如此

疎枉。莫管興亡。便破家山也不妨。

金籠鸚鵡新來啞。柳樣腰身。月樣精神。小小房櫳少四鄰。

只愁繞院千竿碧。夏觸

疎筠。斷續停勻。幾陣瑋琮似有人。

浪花榻子冰紋檻。綠沁肌膚。涼浸眉鬢。還有炎威半點無。

水明樓上人梳裹。旁立

鴉雛。秀鬢清臚。愛看荷盤瀉露珠。

蒼松陡作金虬舞。似此雲山。不像人間。崑畔相逢吳綵鸞。

情緣未了前塵在。扇子

團圓。暗惜韶顏。飯罷胡麻趁早還。

鷓鴣斑暈鷓鴣杓。玉潤犀香。酒聖詩狂。濃淡屏山墨幾行。

牙籤疊架粗於筍。蕃錦

珠囊。宋榻唐裝。也抵豪門笏滿牀。

紅櫻斗帳空如水。煙月羅羅。人到南柯。一片松濤枕畔過。

雀翹蟬鬢端然坐。裙帶

微按。纖指頻呵。甚處巫雲入夢多。

簾紋綠煥。玻璃皺。極望芙蓉。來往誰歟。風幔煙橈滿太湖。

瑣兒不忿雙栖鴨。波濺

紅襦。潮暈春酥。阿姊身邊竟有夫。

搓酥滴粉。瑤臺侶。要使微頰。戲問幽情。眉黛全低。恚旋成。

紅絲蠅拂拈來打。何事

干卿。口語偏輕。薄怒徐回媚轉生。

盈盈對坐。繡經史。琳笈瓊函。粉印脂鈴。夜冷春葱下幾籤。

在旁蠟燭能知狀。茗苦

香甜。月小風纖。詠絮才高笑撒鹽。

減字木蘭花 秋雨過紅板橋

當年此地。銷魂人記銷魂事。妙舞清歌。不是柔奴定態奴。

西風古道。二十年來人

漸老。漠漠迢迢。秋雨重經紅板橋。

又 渡江宿弟斐玉家

江南江北。握手相看那易得。今夜重逢。翠襟黃花伴燭紅。

浮杯大嚼。願我何如家

弟樂。車馬湖邊。明日西風絕可憐。

又 廣陵旅邸送三弟緯雲南歸

佛狸城下。兄弟禪房通夜話。紅土山頭。兄往吳陵弟亳州。一鞭春暮。重過竹西三日住。江上斜暉。弟作歸人兄未歸。

又 送四弟子萬

前年飛絮。我到故園君已去。今歲青山。君又南行我未還。吳雲郢樹。淚灑臨岐無一語。再唱離歌。六幅蒲帆奈汝何。

又 送五弟阿龍

阿龍最小。失母隨兄偏了了。四歲離鄉。今日重逢斷我腸。阮家姑母。猶子情深思汝久。此去相依。莫以懷吾淚溼衣。阿龍年四歲卽隨四弟子萬居商邱

又 歲暮燈下作家書竟再繫數詞楮尾七首

天涯飄泊。湖雨湘煙無定著。暗數從前。汝嫁黔婁二十年。當時兩小。樂衛人誇門

第好零落而今。累汝荆釵伴藁砧。

余年二十。粗曉讀書兼射獵。三十蹉跎。鼓瑟吹篴奈若何。

堪憐阿堵。垂老詎曾親

識汝。溝水東西。何用男兒意氣爲。

今年離別。石畔梅花開似雪。駿馬馳坡。又見流光換碧羅。

歸鞍暫息。看汝機邊還

作織。秋月當頭。重附租船江岸遊。

地名破冢。郭璞墓前波浪淘。細剔銀缸。話盡秋宵角枕涼。

橘紅橙綠。九月敬亭山

畔宿。水鳥斜飛。又逐孤篷一夜歸。

曲阿湖上。重看縠紋平似掌。及到邗溝。絲雨斜風水驛愁。

敗荷衰柳。且罷程郵紅

玉酒。羣盜如毛。月黑鄰船響箭刀。

吳霜點鬢。客況文情都落盡。檢點行裝。淚滴珍珠疊滿箱。

并州曾到。也擬開懷還

一笑塵務相牽。執手雲郎送上船。

客船風雨冷雁溼猿齊夜語。欲作家書。腹轉車輪一字無。

經年如此愁裏光陰能



有幾預報歸期又在梅開似雪時。

又 上巳後一日途次洧川

花紅草綠。昨日濃春經阮曲。碎雨零煙。今日愁人過洧川。  
三春去半半付郵亭和  
驛館。溱洧潺湲。上巳無人出采蘭。

又 過惠山九華庵係某氏廢園

石蹲奇獸。兀寡玲瓏真險秀。礪束春羅。窈窕空明足淡沲。  
閒庭誰到。祇許碧空懸  
冷瀑。些事消魂。剩有鞦韆斷板存。

又 酷暑馬上口占

陽烏酣戰。身似吳牛偏易喘。緩轡徬徨。我有田園萬斛涼。  
桐廊茗汁。此事如今那  
可得。黃鳥多情。小店風潭囀一聲。

又 題彭爰琴小像

隋宮絲管。曾醉倡家紅玉椀。瘦馬蘆溝。又上燕姬賣酒樓。  
十年一別。往事濛濛那

可說。畫裏逢君。同把揚州月色分。

又 題山陰何奕美小像奕美尊人侍御公以忠節死

多年枯樹。屈鐵拗銅陰翠沍。野洲蕭林。閒坐幽人抱膝吟。傳家碧血。怕聽子規啼。夜月。莫使還鄉。霸國山川冷夕陽。

又 佐家爲閣牛叟賦

牛叟兌閣遺徵曰余世以鹽筴起家後中落妻恆好語相慰

絕無交謫

魚租雁稅。健婦持門心力瘁。黽勉錢刀。助得男兒意氣豪。家緣中落。軋軋機牀拚織作。國士橋邊。賸有蕭蕭冷硯田。

又 題暉南田爲潘原白所畫絳幘橫秋圖二首

花冠粉距。昂首晴秋羞噲伍。惱殺詩翁。得失偏嘷雞與蟲。乾坤夜黑。何日一鳴天下白。角角蹇驚。總是秦關過客聲。

陳倉祠古。當日霸王全繫汝。叢桂天空。舐藥還聞伴八公。而今老大。笑爾會稽雞。

太囉。莫管昏晨斯世誰爲起舞人。

柳含煙 本事

靈和柳弄晴春。輕颺江南綠水。東風陌上又河邊。得人憐。  
亂搭瓊樓絲一把。故與玉郎牽惹。而今香絮滾斜暉。幾時歸。

散餘霞

十六夜卽景元夜暫時此宵復雨

昨宵皓月涼於粉。浸萬家蟬鬢。花下幾兩車兒。翠盈盈偏穩。  
今夜紅燈成陣。被雨絲淹盡。一隻銀鴨牀頭。鎮厭厭春困。

好事近 同友人過野寺

春水碧於天。還與晴山賒翠。歷歷幾家煙店。綴山邊水次。  
鶯聲喚我過溪橋。撲帽暖香墜。風弄杏花低處。露前村小寺。

又 隔院聽琵琶

拍徧小闌干。何限寒鴻明滅。老去怕逢節候。正落紅時節。  
沙場病卒搯檀槽。隔著

鄰垣說。似訴少年陳事。有玉樓金埒。

又 夏日史蓮庵先生招飲卽用先生喜余歸自吳閩過訪原韻

分手柳花天。雪向晴窗飄落。轉眼葵肌初繡。又紅欹欄角。別來世事一番新。只吾徒猶昨。話到英雄失路。忽涼風索索。

又 丙辰早春得雲間張洮侯寅冬所寄書

春水錦鱗通。忽把故人墨跡。一紙三年纔到。訝紅箋無色。當初高譙五茸城。盡江東裙屐。記得傀俄酒態。有瓊筵醉客。

又 食蟹憶南耕時南耕以禮斗齋宿道院

溪友饋霜螯。細擣蠻薑漫喫。更聽糟牀細注。賞半窗晴碧。游仙今夜憶曹唐。正鎖旌陽宅。料在醮壇深處。倚石牀吹笛。

又 郟城南傾蓋亭下作

落日六郟城。一望禿碑蒼黑。怪處蝸黃蛩紫。更蘚痕斜織。我來懷古對西風。歇馬

小亭側樹。恨共誰。隨蓋只野。花相識。

又 坐姜家墩懷呂季字

閒坐竹林邊。綠暗暮禽啁。嘶。跂脚科頭。笑傲。更主人投轄。萬竿叢後。晝陰陰。風動聲敲。戛。憶昔悲歌痛飲。有疏狂呂八。

漁父家風 贈梁溪趙叟

十年小閣自埋名。不愛賣丹青。隨身并少。林逋鶴。人比惠泉清。花一樹。酒三升。了浮生。朝來微醉。拍手憑闌。雨後新晴。

荊州亭 題扇上琵琶行圖

苦竹黃蘆想像。滙浦潯陽。惓惓。半幅小丹青。畫出東船西舫。白傅青衫已往。商婦琵琶猶響。無限斷腸聲。只在行間紙上。

眉峯碧 春夜見新月

寶馬縈簾押。金斗薰珠裕。一團醉玉怯春寒。斜向紅綈壓。無語拋銀甲。且自偎香

鴨。半鈎纖月柳梢頭。問誰偷把青天搯。

琴調相思引 元夕後二日夜雨卽事

綺陌將收五夜燈。後堂鎖到第三層。畫簷殘燭。細雨恐難勝。歌板敲愁飛火鳳。枕函貯夢結紅冰。覺來還記踏月六街曾。

誤佳期 偶作

枕上春醒猶害。樓上東風偏大。金籠鸚鵡喚人來。忙出花陰外。不肯把簫吹。那便將花戴。臉波底事十分紅。莫誤將人怪。

憶秦娥 夢至石城盤馬覺後賦此

桃花埒。依稀醉犯青溪雪。青溪雪。草頭一點。玉聰明滅。驃騎桁前人欲別。錦衣倉後鐘初絕。鐘初絕。一場春夢。曉鶯時節。

清平樂 長至前五日適吳門諸子有填詞社初集之舉同集余澹心秋雪齋

是夜風雨

關山如許。不醉卿何苦。酒潑鵝黃嬌似乳。領受高齋夜雨。莫愁溼透芒鞋。道傍醉倒須埋。不見長洲苑裏。年年落盡宮槐。

又 友人以哭女詩見示作此以代寫哀

紅珠辭掌。絮果因風颺。跌碎菱花樓上響。人與舞鸞同往。昨宵粉壁金闈。今宵孤冢棠梨。思子臺前月落。女墳湖畔鴉啼。

又 夜飲友人別館聽年少彈三絃限韻三首

夜香燒罷。樺燭通宵話。曲項檀槽聲不啞。銀甲憑伊搯打。只圖漫撚輕籠。誰憐雙

袖龍鐘。少日紅箏北里。年來白髮西風。

簷雨雨能。一陣淒涼話。城上老烏啼啞啞。街鼓已經三打。漫勞醉墨紗籠。且娛別

院歌鐘。怪底燭花怒裂。小樓吼起霜風。

歡場纔罷。去對孤檠話。欲擊唾壺聲盡啞。可惜孤城浪打。一宵柳簇花籠。何時萬

戶千鐘。塵世風波似海。狂奴談笑生風。

憶少年 秋日登保安寺佛閣

半村紅蓼。半村烏柏。半村黃葉。寺樓偏作勢。欲斜穿山脅。檻外霜楓眠正貼。被西風陡添鱗鬣。閣中僧夜語。有猿吟相接。

阮郎歸 爲靈雛題畫

吳綾一幅滑如脂。江南好畫師。長松幾樹碧離離。斜添斑竹枝。烟似水。雨如絲。梅  
花簾外垂。更題半闋斷腸詞。樊川杜牧之。

畫堂春 春景和少游原韻

今年愁似柳條長。春宵夢斷昭陽。杏花著雨隔籬香。瘦不成妝。十載流連蜂蝶。半  
生淪落湖湘。殘紅幾斛撲衣裳。和淚同量。

又 小春

不寒不暖好年光。依然在江鄉。春人偷嫁與冬郎。便小何妨。記得年時嶺外。梅  
妃猶未勝妝。如今花滿紙糊房。紅紫成行。



武陵春第一體 舟次虎邱

四面吳山爭窈窕。濃綠罨歸舟。寺外人家橋上樓。春水盡情流。  
惹起舊時愁。石上苔痕青未休。曾做少年游。主簿祠前斜日漾。

鬲溪梅令 小寺

花前小寺背春城。不知名。森森夕陽金刹。著波平。風光難畫成。  
隔溪行。閒鎖階前梅萼。一枝橫。僧雛學弄笙。阿師洗鉢趁新晴。

海棠春 閨詞和阮亭原韻四首

春閨金麥微微響。青鳳脛。輕移銀網。睡眼恰初矚。一片紅酥漾。  
怪昨日。邀儂相賞。遮莫繡簾前。有箇人張敞。曉妝鄰姬眉黛遙山樣。

惺忪春夢何時足。拚畫揜。銀屏六曲。繡倦歇鴛針。藏在沈香褥。  
微睡醒。低呼小玉。何處弄琮琤。似夏瀟湘竹。午睡藕花衾壓桃花肉。

韓馮啄破鞦韆影。瓊扇裏。春醒初醒。半晌卸金蟲。小試蘭湯冷。  
後堂憎殺青銅鏡。

怕照見、雲鬢未整。莫道少人窺。天上堆金餅。晚浴

紅蕤枕上啼紅雨。且坐聽、玫瑰雙杵。纖手剔蘭煤。樓外賓鴻語。

馬蹄連夜堂堂去。

偏無賴、三更譙鼓。難捉是蕭郎。不比牀頭塵。夜坐

又 題美女圖爲閨人稱壽

智瓊年小逢珍偶。多少事、燈前酒後。夜合自開花。搖動珠簾口。

檀奴戲覓南朝手。

圖倩女、爲娘稱壽。一笑溜橫波。媚靨紅於酒。

又 閨詞再和阮亭韻四首

依稀聽得菱花響。三竿日、紅完珠網。半晌注橫波。無數鬢雲漾。

妝成誰見靈蛇樣。

分付與、百花閒賞。一座麗春樓。盡把軒屏敞。

晝長嫌煞烏三足。誰耐唱、摩訶池曲。好夢遠如天。落絮平於褥。

彤墀火迸紅榴肉。

簪不穩、一枝寒玉。怯暑那成眠。走覓銀塘竹。

夜堂月上無人影。小鸚鵡、困酣難醒。正好試金盆。一斛紅泉冷。

浴餘借得蟾爲鏡。

誰愛取、冠兒重整。低髻卸偏荷。茉莉圈成餅。  
絲絲燭淚多如雨。搗盡了、月中媚杵。鏡聽擬來朝。私卜簾前語。  
坐深裙子紅都去。  
早又是、三通譙鼓。談解小郎圍。權拔釵爲塵。

桃源憶故人 人日感舊

書簾垂處春光亂。百感最難消遣。記得風斜彩燕。小立珍珠院。  
歲華又到黏雞宴。  
砌下春蘭尙淺。人日春人不見。日近人兒遠。

又 春日過澹生校書所居舊址

酒闌曾過平康宿。風颭繡簾敝。紅板橋連西曲。微雨櫻桃熟。  
而今風景傷春日。  
不見沿溪花竹。薺麥平疇搖綠。蛺蝶和烟逐。

又 秋日曬扇見故人王湛斯畫柳賦此志感

天涯乍遇宣城叟。御苑聽砧時候。曾寫幾行疎柳。勸我青門酒。  
別來往事消沈久。  
只有齊紈在手。露葉煙條依舊。解與愁眉鬪。

又 重游惠山寄暢園懷秦對巖檢討

松湍百道喧晴雪。冷瀑何年纔歇。水上瘦梅如鐵。眠補紅橋缺。從軍年少巴陵客。三載金笳畫戟。莫聽楚天百舌。千里同明月。

攤破浣溪紗 雨泊秦郵

十頃孟湖碧似煙。四圍蒲稗水連天。渚鳥羣飛聲格格。戲長川。獨對煙波思往事。那堪風物又殘年。且貰秦郵城下酒。撥湘絃。

又 冬閨

綺疏六扇掩玻璃。花影罨窻漾袵衣。學綰翻荷新樣髻。日將西。有恨篝前銀鴨睡。無情箏上鈿蟬啼。獨對水仙花絮語。太悽迷。

山花子 送姜學在由吳門之宛陵清明掃墓

魯國男兒是孔融。如今流落號吳儂。燕子柳條能釀恨。舊江東。謝朓樓邊變布社。琴高潭上石尤風。送爾片帆春上冢。雨濛濛。

眼兒媚 過城南小曲感舊

青樓斜拂小春池。池上綠楊枝。態奴歌管，念奴絃索，唱盡新詞。重來行過章臺弄，往事少人知。半湖碧浪，滿園斑竹，萬種淒其。

又 冬夜聽梧軒舉填詞第二集軒在吳伯成先生署中同集爲澹心園次脩齡山

夫梁汾雲翎靈本

風翦蘭煤夜漸深。泉響答清音。官齋此夜，鱸腮斫玉，梅蕊含金。茂苑酒醒剛幾日，浮拍又如今。十年紅豆，五湖黃葉，費盡行吟。

朝中措 平山堂懷古用歐公原韻

我來弔古傍隋宮。板渚雨濛濛。依舊平山堂外，淡煙疎柳長空。年年此地，漫天榆莢，著地東風。太息韶華幾換，游人猶想仙翁。

又 客中雜憶十首

層層簾幕靜焚香。縈篆裊縹緗。翠鳴嬌擎磁鼎，紅獅滿貯銅缸。如今寂寞，孤燈黯

淡。細雨淋浪。料爾春纖撥火。爲儂也費思量。香

家鄉綠雪翁南山。採摘不曾難。三徑風鱸瓦銚。半廊竹瀨松湍。

昨朝悔未攜將茶

董。同上長干。卻憶蘇門四友。曾經日給龍團。茶

看花常傍隔村籬。攜取折枝歸。沙綠膽瓶磬口。矮紅葉兒烏皮。

端相側正屏常疎

密。用盡幽思。記得臨行囑汝。香綿裏好軍持。膽瓶

燈昏酒盡不勝情。倚幌聽三更。惡草鄰牆馬齧。亂莎別館蟲鳴。

家園此際小樓半

掩。纖月初生。多少幽坊冷市。綠窗一片根棖。三絃子

疎。狂子野住臺城。擷笛舊知名。劈裂鐵龍醉吼。連環寧鳳嬌鳴。

消磨歲月千場蠟

炬。一夜鵝笙。今日偶然閒想。因緣已似前生。簫笛

畫欄雕檻盡臨河。簾內水仙多。記得半塘初買。小船細雨鳴簑。

磁盆歸貯紅泥密

蘆。錦石斜迤。今夜煙廊雨幔。誰人與爾婆娑。水仙

頰。荷檀夢綴蕭齋。幽韻襲人來。乍可酒邊私嗅。偏宜髻底微開。

而今不見踏殘小

逕尋徧蒼苔。側帽臨風不語。幾般愴舊情懷。眼梅

畫眉斜挂畫簾東。愛汝語音工。食器官窰漲碧。藥欄小架扶紅。人今牽絆一般惆

悵。兩處羈窮。寄語憐香舊侶。風前早爲開籠。廊下畫眉

紅魚明鱗映淪漪。相間倍離離。卵色天裝玳瑁。桃花水染臙脂。休嗟盆沼外邊雲

浪。風駭濤飛。輸爾翠漣拍甃。有人濠上相知。沼內紅魚

半生書癖墨成莊。氣壓鄴籤強。寒夜添香炙硯。調娛閒弄朱黃。一身作客牛腰易

束。鶴背難裝。羨殺千年老蠹。鑽穿故紙休糧。書卷

### 三字令 閨情

紅麩枕。卓金車。兩相於。酒醒後。夢來初。挽郎祛。郎欲去。且徐徐。煩塞馬。倩江魚。寄

他書。休信宿。莫躊躇。錦雞城。金雁驛。是郎居

### 太常引第一體 坐積翠閣同吳園次賦

古苔繡壑亂泉鳴。嗚咽說生平。耳畔恍推箏。是落葉、聲耶雨聲。書廊潑翠。茶鑪翻

雪。跌坐證三生。碧透小銅餅。斜插朵、黃梅更清。

歸去來 憶石亭老桂兼寄竹逸雲臣

憶醉石亭山塢。倚桂叢深處。下是誰家高人墓。落英飄、下如雨。蒼莽中原路。並不見、秋香一縷。月中只剩團圞樹。樹芳醕相憐取。

河瀆神 題秦郵露筋祠

湖上水連天。湖光捲盡寒煙。玉娥一去幾千年。盡日凝妝儼然。漠漠雨絲飄碧瓦。人在女郎祠下。一樹紅梨開謝。明朝又是春社。

又 臨津古城隍廟下作

石竹響颼颼。一行斷壠荒邱。無人野渡水爭流。土城蔓草含愁。古廟陰森涼氣瀉。楓葉吐來都赭。門外寒濤暗打。錯疑簫鼓村社。

醉鄉春 秦對巖攜具寄暢園舉填詞第三集

銀甲關時儻情。綠水昏時勝曉。雙粲枕。百嬌壺。好景世間都少。人對燭花微笑。袖



向嶺風輕。玉山倒臉波橫。酒痕一點紅窩小。

又 詠茶花

鼎內乳花將溜。瓶裏玉花先返。眞皓潔。太鈴蟬。雪暗茶園如繡。葉與花情相鬥。花與葉芬相糅。將嫩蕊。比幽蘭。幽蘭還遜三分瘦。

茶瓶兒 詠茗

綠罽茗溪顧渚。拍茶婦。繡裙如雨。攜香茗輕盈笑語。記得鮑娘一賦。邀陸羽。煎花乳。紅閨日暮。玉山半醉。綉幃護。且消酪奴佳趣。

極相思 夜飲友人所阿雲待余不至留詞而去歸後和之

如塵如夢如絲。脈脈意誰知。歸來恨晚。休搖屈戌。慢叩罌罍。一陣碧虛窗外雨。三通鼓。人去多時。空留彩句。蜜花箋淡。鳳脰燈欵。

又 憶夢

溼雲未斂香蟬。斜倚枕屏前。分明昨夜。依稀往事。院後廊邊。下了紅簾。擎翠鑑。悄

不覺笑靨微圓。濛濛脈脈。如塵似影。記也難全。

西江月 詠史

姊嫁猗兒孫策。妹歸顧曲周瑜。雀臺高處瞰三吳。羨爾清歌妙舞。  
一望江東人物。孝廉枉逞雄圖。朱桓前掣大王鬚。文有才高子布。

又 過投金瀨懷古

有女江頭擊絮。何人道上吹簫。我來弔古悵空祠。曠望幾重雲水。  
覆楚爭誇伍相。沼吳又說西施。淮陰往事亦如斯。成敗皆由女子。

又 題六合孫公樹捧書圖公樹伯觀先生孫先生官舍人賜書最多

李白開元供奉。當年恩禮偏隆。賜書稠疊出深宮。玉軸牙籤鄭重。  
絕妙文孫才調。翩翩王謝門風。捧來亂帙悉當胸。月落華清如夢。

又 過馮唐故里

酒罷燕歌竟歇。途窮趙瑟難求。滹沱水抱太行流。行過鄆南關口。  
匹馬霜天古蹟。

三河玉勒長楸。翩翩過客半鳴騶。笑爾馮公白首。

又 夜宿何雍南齋中

一榻奇書繚紹。三間老屋欹斜。天寒沽酒撥琵琶。消盡丹徒客夜。南浦零簫刺管。西風社鼓神鴉。他年夢亦識君家。家在寄奴山下。

又 庭柏約予與杜茶村同詣且訂燒豬以待臨行復以一語墜之曰來朝風

雨如何茶村笑曰除是天降紅雪吾輩便不赴阿師此會也翌日果大風雨

茶村作詞戲柬因依韻答之

莫道從無絳雪。眼前花雨通紅。枉勞燒肉梵王宮。食指朝來不動。云把芒鞋滑滑。擬聽腰鼓蓼蓼。如何也嬾趁齋鐘。君笑曰吾從衆。是日茶村亦未赴

又 雨

故國金戈鐵馬。衰年退筆殘書。心情渾似欲棲烏。偏惹連天絲雨。風掣紅旗縱獵。雨昏銀燭呼盧。此聲記得不曾無。那使淒涼如許。

又 喜見獅兒四首

猛獸產於絕域。驍騰來自安西。一呼百物盡披靡。何論獠奴鶴子。我顧灰頰若此。

兒應跳盪如斯。神仙將相詎難爲。萬事取之以氣。我意殊爲不爾。

昔日游梁枚叔。兒生此地名皋。滑稽敖弄解談嘲。曼倩同時絕倒。

詩書莫誤兒曹。憑他上樹日千遭。長大耘瓜撲棗。

兒已健如黃犢。翁何此日纔來。怒濤雪浪吼長淮。兵火連天四載。

細聽吳音小卻。

戲投粬糗旋迴。怪孃奩畔有子思。笑問客家何在。

牽狗高辛集上。呼鷹埽澤門邊。願兒無若宋人然。莊嶽之間不遠。

六歲定歸家塾。

有甥與汝齊年。西風亟趁下江船。蝦菜東吳正賤。

留春令 感舊

燈前喝雉。樓頭繫馬。山腰射虎。曾放顛狂百千場。要數徧何從數。一霎渾河風葉。

舞。捲舊游何處。誰滴他鄉萬般心。是隔箇窗兒雨。

少年游 感舊和柳屯田

奉誠園內小斜橋。曾記近花朝。簸錢庭院，築毬天氣，春草綠裙腰。而今不道心情換。飄泊墮江皋。眼底人疎，心頭事滿，斜凭木蘭橈。

怨三三 秋懷

離離秋水正拖藍。滑又如簪。擬銷煙帆南隴，南浮笠澤，把黃柑。夏時曾種風稊。與鄰叟，追涼笑談。今日得霜酣。樹猶如此，人則何堪。

偷聲木蘭花 懷戴无忝客成都

前年建業秋將暮。今歲蠶叢春又去。別後思君，望盡南天不見雲。竹郎祠畔紅棉好。濯錦江頭紅鯉少。湘雨巴煙，不寄成都十樣箋。

又 雨中同吳天篆過飲徐竹逸齋頭次天篆韻

熟梅時候蘇蘇雨。遙望君家疑隔浦。我墊巾來，小坐歐公畫舫齋。觥船何用頻催酒。鷹爪鳳團須淪取。說鬼談經，風味依稀退院僧。

又 題范女受小像 青年女受在舟中隔舫有誤認爲余者故及之

君挑獨夜江船火。隔舫有人呼似我。仔細披圖。骨瘦髯清我不如。孤松峭壁疑無路。嘯向此中尋藥去。可許狂生。化作猿猱逐隊行。

又 題關東席端伯小像

畫師要寫蕭疎意。先畫綠楊絲。跪地斑竹闌干。傍倚高人興邈然。五侯七貴粉榆盛。家本遼陽爭借問。總不關渠。只愛荷香撲異書。

又 題南水上人詩卷尾

六朝僧話三生事。雨後人歸花下寺。我最憐渠。不數琴聰與蜜殊。東坡呼惠聰爲琴聰仲殊爲蜜殊借師禪板爲歌板。唱到江東春又晚。晴絮茫茫。縱使無愁也斷腸。

又 詠錢

青蚨鑄就開元字。相看似有團圞意。欲簸還慵。惱煞輕狂小沈充。擲來好卦全無准。買來好事多無分。榆莢山他。偏逐東風不著家。

城頭月 秋月感懷

西風吹得冰輪淡。桂影平於簾。深巷疎砧。嚴城哀柝。做出秋聲慘。月中一片朱旗閃。粉堞青霜染。萬里關河。百年身世。倚幌聽更點。

又 月下

冰輪偏向城頭挂。河漢寥寥夜。一片關山。千秋楚漢。萬帳更齊打。何如移向東湖舍。照荳棚瓜架。草響溪橋。水明山店。兒女追涼話。

河傳第一體 五色鶯粟

曉鶯無賴。也把啼痕。花間沾灑。幾絲絨線。東風分派。暗將濃淡配。繡勻白白紅紅態。黃和黛。野圃層層界。朝來小摘簾外。趁他微雨賣。

又 煨芋

黃茅新蓋。土銼溫糜。霜簷低矮。撩人幾陣。芋香無賴。送來籬落外。凝脂。次雪融仙瀝。餘甘在。塞上酥堪賽。黃粱未熟。休待飽迎朝旭曬。

河傳第二體 豆莢

隴上。曉鶯低唱。豆莢初嬌。小姬一色綠裙腰。迢迢羃野橋。悲歌楊惲家居久。三杯後。慣種南山苴。苴花棚下月。麤麤溪南閒。尋漁叟談。

秋夜雨 本意

小樓細裊愁絲綠。和煙扶上庭竹。飛來簷瓦響。都瀉作、奔湏秋瀑。雨肥越顯孤燈。展夜衾欲睡難熟。別院絃柱促。正滾入、淋鈴哀曲。

醉紅妝 立春前一夕寄暢園小飲時有柳姬翩何在座同園次賦

殘年屈指不盈旬。晚峯愁。翠黛顰。玉杯餞臘漾紅鱗。風動處。酒微燄。柳條偷報隔宵春。歌宛轉。態橫陳。來早春休園內討。鴛帳底。有春人。

玉團兒 初冬寫懷

西風吹老清秋節。送寒空、蕭蕭老鐵。幾片疎砧。數行落雁。一城楓葉。斜陽雨後明還滅。映千年、殘碑斷碣。太息何爲。有杯休放。逢花須折。



探春令 庚戌元夜

去年客裏度元宵。人正懨懨病。撚偃師、癖後黃梅嗅。想洛下、春燈盛。今年準擬酬春興。奈陰晴難定。擁香篝仍別。殘燈半盞似去年心性。

又 詠窗外杏花係叔祖殿元公舊宅

崇仁宅靠善和坊。舊雕闌都壞。問玉樓、人醉今何處。只一樹、花還在。紅香籠帽歸鞭快。更何人能戴。到如今和了。滿城微雨。頻上街頭賣。

又 試燈夜對雪

六街料理做元宵。奈雪兒偏下。小鸚哥、隔著鞦韆架。將六出、花輕罵。滿城何處尋羅帕。掩重門睡罷。想年時多少。畫橋深巷。一片紅燈掛。

南柯子 蝶庵花下送蘇生仲補游京師生善卒

帶醉翻楸局。伴慙惱綺筵。笑他柯爛不知年。輸爾纔拈紅子、便通仙。挾瑟龍池上。鳴鞭鳳闕前。妙齡絕藝有人憐。可憶江南、分手落花天。

又 席上贈讓侯時客有語及蔣大鴻者因并憶之

菊瘦人迴權。橙香客研筭。相逢曾在鳳凰城。記爾飛揚跋扈、舊時名。謂讓侯 萍梗成遺叟。蟾嶸任老兵。停杯忽憶杜陵生。今夜一鉤新月若爲情。

又 午睡

磁枕搖新竹。藤牀蔭瘦桐。人間亦有廣寒宮。半畝荷亭、幾陣藕絲風。簟滑涼於水。幃虛翠若空。花陰得失鬧雞蟲。覺後掀髯、一笑夕陽紅。

迎春樂 本意四首

車兒似水裙兒複。斜綰著黃金犢。趁嫩晴、半醉誰拘束。穿徧了、閒坊曲。鬢彈繡幡簪百福。早暗裏、品紅裁綠。方勝颭銀蛾。春已在、釵頭簇。

訶梨領子蟠螭項。都倚在、斜橋望。指春竿、百尺隨風漾。早一對、春人上。隊隊勾芒籠綵仗。狂煞了、六街鞋鞦。盡道打春歸。銀蠟底、家家唱。

非黃溲就牢丸巧。紅酥滑、銀匙攪正內家。恰鬪櫻桃小。爭覓取、金盤咬。從此春城

春未了。有無數、春花春鳥。撲蝶與聽鶯，且次第、將春討。立春日啖春餅，謂之咬春。立春後出游爲討春。

春衣圍定春來路。花似海、香成霧。囑今年、春到春休去。拚一世、和他住。囑罷東皇心暗許。向鬢影、盈盈低語。來歲杜鵑聲，誰聽恁、催春暮。

憶餘杭 東泉客舍待毛亦史不至

一樹梅花千頃碧。耐盡春寒，眠不得。閒愁如雨，雨如愁，點點在心頭。飄零心事誰知道。又是天涯寒食到。春江盡處是，婁江日斷水雲鄉。

醉花陰 重陽和漱玉韻

滿院黃花趁白晝。絲雨篩銅獸。今夜是重陽，不捲珍珠，陣陣西風透。一從秋怨關心後。淚腕輕羅袖。生怕小樓寒，慢去登高，坐到鑪煙瘦。

又 至吳門喜晤澹心園次展成旣庭石葉諸君感舊有作

昔年相見皋橋下。總是清狂者。惜別泰娘家。淚腕胭脂，冰了鮫綃帕。如今漁火楓

橋夜照沈腰堪把。黃葉似情人也愛飄零。不肯歸來也。

又 初秋劉篤甫以詞招飲次韻奉酬

簾紋柳浪相零亂。淺立烟廊畔。徙倚早涼天。鬪茗捶琴。短幘由他岸。南華手注纔  
踰半。聽得提壺喚。一醉莫思鄉。只恐江東。尊鱸招張翰。

又 夏日小有堂中看邱近夫朱致一葉九來諸子投壺

滿院松風鳴瓦銚。碧淨苔階好。喬木翳新蟬。水檻閒凭。又貼荷錢小。人間萬事何  
時了。無計除煩惱。激矢躍蓮花。出手成驍。暫博天公笑。

又 撲螢

齊紈似粉誰新研。愛把潭香惹。金屋夜無人。熠燿初流。笑覓輕羅打。迎涼不是閒  
貪耍。指定花陰罵。千古好雷塘。總是伊家。做出興亡話。

紅窗睡 冬夜

花影枝枝牆上界。晴月把、小紅樓曬。三更巷口西風大。惹獠兒寒吠。輕薄楊花心

性改。知何處。酒旗戲鼓。輕狂難耐。薰籠銀鴨。卻慊慊長在。

又 詠櫻桃花

一樹垂垂搖繡幌。光映得、小樓都絳。無風誰觸花枝響。墮繁紅兩兩。細雨似聞鶯  
細講。香階下、美人休折。讓花全放。待他成顆。鬪白家昏樣。

河傳第三體 新茗

穀雨嬌女。微遵綠隴。輕攜翠筥。拍茶初。櫻笏廚。一縷。夜濤煎雪乳。酒惡愁將繡衾  
浣。龍團破。頓覺春醒妥。藉庭莎。啜茗柯。羅羅。北窗幽興多。

河傳第四體 黃薔薇

櫻桃已謝。牡丹開罷。薔薇滿榭。夕陽漫漫一架。低亞。檀痕污粉帕。黃鸝一色枝頭  
罵。朦朧怕。誰迸金丸打。畫廊東。繡花叢。芳絨。施朱近也慵。

河傳第五體 紫蛺蝶花

低彈牆陰。微暈簾罅。露濯烟梳。滿園妖紫趁晴鋪。縈紆。傍裙裾。玉娥撲徧花間路。

誰飛去。紈扇今番誤。有時粉翅凝花鬢。輕扶問伊。如不如。

河傳第六體 虞美人花

楚歌四面。戰旗一片。歲歲江東。此花漬透。還是垓下重瞳。舊啼紅。劉郎原廟空千古。咸陽樹。銀雁飛何處。英雄兒女。誰憐總付東流。野花愁。

怨王孫 詠觀音柳一名花柳爭春。弱穗垂絲。花作淺綠色。

小卉清綺。籠窗拂水。柳宿垣中。河陽縣裏。春絮枉自天邪。不成花。煙姿露葉依然。鳥腰逾小。添得花枝好。莫拋隋苑。好向水月金餅。聽潮音。

又 立春戲柬園次時夜有柳校書在寓

柳色如此。住爲佳耳。未到飄綿。已經蘸水。隔巷趙女彈箏。沒心情。巷有趙姬亦園兄所歡。博山熏燬沈香火。衫兒鞞。微覺東風大。麝衾夢醒。驚問還是寒宵。是春朝。

徵招調中腔 冰雪兼旬試燈前一夕始有春意

是誰錯料春光點。費幾許。東皇周折。昨始繡完半絲兒。覺軟紅。上雙頰。雛暄嫩照。

增妍悅。似乍嫁。新娘生怯。小糝樹邊一些春。已漸滑小禽舌。

雨中花 雨中看桃花

絲絲香雨催儂去。依依人、柳留儂住。住也無聊。去還有恨。去住渾無據。今歲桃花千百樹。去年人面應非故。萬點胭脂。一行清淚。總是消魂處。

又 雨窗詠梅和南耕作

連日春工寒勒住。繡不滿、枝頭嬌嫵。一點胭脂。半廊香雪。開在無人處。漫倚畫簷垂玉筍。我含淚、細爲花訴。四海青衫。六宮紅粉。幾陣風和雨。

又 詠薰籠

一架紅篝涼似水。相偎靠、玲瓏莫比。斑竹無塵。疎篁偏瘦。小鴨中間睡。縱向彤奩多轉徙。也只在、簾前被底。繡幔縈時。錦鞋閣處。往事難提起。

杏花天 詠滇茶

穠春冶葉朱門裏。弄東風、紅妝初試。殘鶯天氣香綿墜。悵悵最宜著此。見多少、江

南桃李。斜陽外、翩翩自喜。異鄉花卉傷心死。目斷昆明萬里。

又 題震修杏花小照

虎頭食肉通侯相。君本是、詞場飛將。紛紛餘子真廝養。自署五湖之長。慈恩寺、春從蝶釀。紅綾讌餅如月樣。杏園指日鞭絲漾。鬧煞賣花深巷。

浪淘沙 專諸巷看穀梁買鼓槌

綠水滑如油。漲滿銅溝。柳花伴我作閒游。青漆鼓槌紅架子。別樣風流。買了且歸休。單絞岑牟。世間定有此人。不須向金閭亭下路。打散春愁。

又 趙問波處士坐臥一小樓十年不入城市邑宰高其誼以脫粟餽之詞以

紀事同園次賦

酒盡恰天寒。鹿柴音磬。恆關漫勞麴米想雲安。盡日療飢惟黛色。多謝青山。花縣忽分餐。猿鶴齊歡。溪南村老杖藜觀。怪汝炊烟飄一縷。瑞雪同看。

又 戶雨寫懷



纔惱聽啼鴿。又奏林蟬。青蚨誰爲買流年。舊日榆錢都使盡。且換荷錢。陰雨太綿綿。淚一般般。霞紅驚射粉籬邊。誰道晚霞偏釀雨。明日依然。

又 題園次收綸濯足圖

灑瀟幾千堆。灑雪轟雷。巨鼇映日挾山來。舞鬣揚鬐爭跋浪。晝夜喧豗。濯足碧溪隈。一笑沿洄。龍窩蛟窟莫相猜。我有珊瑚竿不用。不是無才。

又 和容若韻

鳳脰器殘燈。抹麗中庭。臨岐摘阮要人聽。不信一行金雁小。有許多聲。今夜怯涼更。茶沸笙瓶。夢中夢好怕他醒。依舊刺桐花底去。無限心情。

又 雪中舟次語溪

枯柳挂疎汀。夜火星星。昨宵西水驛邊停。猶記津樓綃幔底。誰喚銀瓶。寒氣逼空船。客夢初醒。亂帆又過語兒亭。我與六花同一例。隨路飄零。

戀繡衾 春暮二首

曹騰春夢弄夾衣。壓闌干、凭損玉肌。小玉向、紗窗報、坼紅牆、園筍乍肥。馬蹄得得穿花外。正鄰家、蕩子早歸。歎櫻桃、都謝了、怪伊行沒箇信兒。昏昏綠水乳燕飛。蹙香紅、堆滿地衣。梳洗罷、登樓望、見長天、一碧四圍。行人更在天之外。問地名、甚處武威。想郎處、枝頭鳥、并無杜宇勸歸。

月照梨花 送緯雲弟渡江之廣陵

鐵瓮隱隱。怒濤滾滾。簸宋掀梁。淘吳洗晉。誰泛水調清謳。是鄰舟。望中一抹斜陽恨。可憐消盡。六代金粉。老夫還記舊揚州。紅袖悠悠。滿江樓。

河傳第七體 楊花

藏鴉時候。當初綰住。永豐坊口。絲絲踈地。蘸春波。雨後。和烟籠翠牖。如今滿院喧晴雪。香綿積。滾盡東風力。茜袂遮。翠幃斜。楊花。一生不著家。

河傳第八體 玫瑰

疎籬半掩。輕風斜颭。濃香幾點。藥闌邊。纔綻。盈盈紫豔。粉娥勻睡臉。頓呼小玉私

寒取提籠去。小摘盈階雨。撲幽芬。沿蘚痕。繽紛。刺兜金縷裙。

河傳第九體 檢錢

蕩漾。誰傍。輕如蝶翅。小於錢樣。拋家離井。若爲憐。淒然。江東落絮天。年年苦被東君鑄。啼鵲訴。賤賣韶光去。漲晴湖。翦春蕪。模糊。漫空下五銖。

摘紅英 詠落花

真珠絡。倉琅鑰。如塵似夢。連天落。香車暝。朱闌凭。留他不住。喚他不應。花前約。春前諾。玉娥含淚。思量著。黏犀釘。鋪鴛徑。憎他蕩子。憐他薄命。

鷓鴣天 贈吳中狎客

白帽紅靴態可憐。短簫橫笛興翩翩。曾教錦瑟房中曲。慣請朱門灑上田。人似月。夜如年。何須彩筆賦甘泉。朝來蠟淚堆紅雨。猶擁廬兒醉意錢。

又 秋日撥悶作

一派涼秋似鏡湖。西風蕭瑟雁銜蘆。樓頭竹暗晴難妥。枕底橙香酒易酥。傷老大。

笑鬢。霜紅露白轉躊躇。鮫魚苦筍攔街賤，不見鉗奴并態奴。

又 詠宋子京賜內人

路出繁臺遇玉顏。柳花如夢撲雕鞍。倚他才子吟紅杏，博得君王賜綠鬟。鶯嚙嚙，烏關關。粉娥笑語繡帷間。郎君麝燭修唐史，底事邀靈李義山。子京詞內彩鳳靈犀一

聯皆用義山成語故戲及之

又 七夕後一夕路次淮陰作

袁浦西風響亂灘。楚州織月臥微瀾。今宵新惹雙星怨，此地原嗟一飯難。車歷碌，軸斑斑。故園回首好溪山。赤車應詔渾閒事，贏得征塵澆旅顏。

又 謝史蕪庵先生惠新茗

竹院風嬌夢正長。緡封箬裹十分香。龍團搗罷雲生白，蟹眼煎成雨沸窗。拚冷淡，儘奔忙。不如閒事好商量。人間別有真南董，新註茶經四五章。

又 苦雨和蘧庵先生四首

簷溜淙淙徹夜聞。曉山沒卻髻螺痕。風掀竹尾敲詩夢。雨凝花鬢溼茗魂。拋短杖，閣清樽。蒙頭敗絮睡昏昏。誰傾銅狄千年淚。瀉入瞿塘兩峽門。此首用少游韻  
入夏端然似涉秋。粉雲陰重不曾收。那知四月之間雨。做就中年以後愁。兒女恨，霸王籌。濛濛都付兩溪流。碧天何日紅霞襯。暈徧江南小畫樓。

曾控吟鞭驛館遙。紅氍馬上夢初消。雪登麥積秦箏苦。雨歇叢臺趙女嬌。泥滑滑，鬢蕭蕭。故園仍傍斬蛟橋。老夫輸卻龍孫健。挾雨齊抽十萬梢。

閨苑仙人杖過眉。陡然春去也成悲。新愁洛下銅駝曉。舊事堯年老鶴知。閒握槊，悶彈棋。漫天絲雨且題詩。寄來數闋淋鈴曲。我在街南中酒時。以上俱用稼軒韻

又 寓興用稼軒韻同蘧庵先生作三首

斫屨吹簫吳市間。恨無大藥駐紅顏。詩情浩蕩風前絮。身計微茫海外山。耽放浪，恣蕭閒。烟波境界十分寬。新銜麴部兼茶部。舊署園官并橘官。

曾倚瑤臺喝月行。噴他鸞鶴不相迎。當時酒態公然好。今日詩狂太瘦生。千百輩，

儘容卿。問誰堪與耦而耕。灌夫已去袁絲死。淪落人間少弟兄。

罌粟闌邊已放芽。枝頭梅子著些些。勤過小圃招晴蝶。閒倚疎林數暝鴉。無箇事。帽簷斜。風光消得晚還家。陡然卻憶前生事。看徧蓬萊碧柰花。

又 元夕前二日聞南耕原白諸子雪中有龍池之游作此調之

灑灑街泥未肯晴。羣公高興愛山行。一行翠榜欹烟滑。幾隊紅氍映雪明。真寂歷。劇淒清。寺橋猶欠一聲鶯。歸來更值街燈落。兩地風光醉不成。

又 贈莊山人七十

雨後晴鬢翠可捫。風前畫縠綠成痕。桃花開徧防漁父。蝴蝶飛來認耳孫。書滿架。酒盈尊。舉家耕讀任乾坤。也知丸藥今晨懶。偶愛聽鶯過別村。

又 贈李匪莪

篋裏還存寶劍篇。舍旁已買灑西田。蓼莪久廢中年後。鴻雁難尋絕塞邊。撲帽雪。隔籬烟。綠楊絲隱釣魚船。難封休恨君家廣。仙李山來結大年。

金鳳鉤 春夜同展成飲御之齋頭感舊

東風裏。絳桃樹。驀記起。年時見汝。紅芳正好。濃香乍飽。俊眼相看如許。如今花放長洲路。只是我。朱顏非故。舊情如夢。閒愁似海。悶拈花鬢細數。

河傳第十體 新筍

新筍初引。烟梢墜粉。花闌蒸菌。斑痕隱隱。舞透銀牆翠畛。小園春已盡。釜中一斛瀟湘碧。霜刀劈。糝筆河狔白。留幾圍籠。礪屏他時。成龍破壁飛。

河傳第十一體 櫻桃

丹顆倭墮。雨蕭蕭。昨夜前村板橋。筠籃兩岸賣櫻桃。嬌嬈。玉纖曾亂招。搗絮替將金彈打。流鶯罵。含慣流丹液。妝閣東。颺晚風。朦朧翠樓都染紅。

河傳第十二體 青梅

認否。如豆。春歸不久。亞檻青垂。映簷綠透。纖筍小摘。輕搓奈他翠滑何。粉娥貪結纍纍子。纔拈起。觸著酸心事。將梅仁妾意。兩樣試郎懷。定憐誰。

鵲橋仙 詠竹逸齋頭紫牡丹

歐家碧好。彭門紅好。總讓伊行清綺。畫欄纔放數枝花。映百丈、銀牆都紫。相公袍帶頭廳印綬。凡豔那堪相比。試將花色細形容。烟凝得、暮山如此。花名紫袍金印王勃滕王閣序烟光凝而暮山紫

又 七夕同蓮庵先生暨諸公飲楨百堂中漫賦

天邊枕簟。人間瓜果。比夜嫩涼分取。次公原是醒而狂。誰耐乞、七襄殘縷。穿針樓下。凭肩殿角。何限喁喁私語。只因烏鵲事荒唐。誤盡了、許多兒女。

又 蒙城舟中讀雲臣蝶庵詞

滿河僮楚。盈船蒜酪。鬱鬱吾其誰語。江東詞客盛如雲。別去伴、長淮鹽估。紅蓮半綻。碧鱸正得。醉任無情今古。讀完半卷蝶庵詞。吹鐵笛、灑然而去。

廳前柳 本意

晚妝前。有一樹黃金縷。倍嬋娟。秦樓上、蠻腰樣。只思眠。纔欲抱、便如烟。讓繡幕輕



縈姿愈俊勝長街。拋擲堪憐。莫倚輕狂甚，便成繇。飄陌上，舞河邊。

玉樓春

生日邀陸景宣崔不雕飲廣陵酒家醉後題壁

天涯作客傷心極。廣陵花月無消息。百錢且上酒家樓。終當埋我陶家側。

此兒自

是難衣食。相逢幸是曾相識。左呼陸厥右崔駟。四十今年余竟得。

又 春夜同雲臣遠公天石諸子讌集原白池亭次雲臣原韻

絆人最愛金蟲軟。障燭更憑羅袖展。酒船風動蹙紅鱗。歌板烟籠啼紫燕。

城頭側

聽三更傳玉漏。漸深還道淺。明朝重揭繡簾斜。花底氍毹應未捲。

南鄉子 詠春蘭

三月玉街寒。錦雨絲絲不肯乾。飄得賣花聲到了。春蘭。一種清芬勝麝檀。

對此憶

家山。手折紅苕不忍看。還記那年寒食夜。幽歡。人在花香鬢影間。

又 邢州道上作

秋色冷并刀。一派酸風捲怒濤。並馬三河年少客。相豪。皂櫟林中醉射雕。

殘酒憶

荆高燕趙悲歌事未消。憶昨車聲寒易水。今朝慷慨還過豫讓橋。

又 夏日午睡

新竹菴中庭。荷蓋初齊水面亭。屋小如憚無客到。常局。葉几藤牀矮紙屏。  
蝶夢趨冥冥。行向槐安國內經。正拜南柯真太守。還醒。一片松濤沸枕楞。

又 螢

露井坐三更。無數幽輝印水精。忽地流將深竹去。身輕。卻把深閨繡幔縈。  
惆悵記前生。鴛瓦曾經弄月明。閒話江都隋煬帝。含情。扇暉輕羅撲不成。

又 詠呂仙堂葡萄

誰放白毫光。萬串晶毬綴講堂。髣髴諸天瓔珞會。颯颯。珠母輕盈出海洋。  
碧椀瀉瓊漿。何必金莖肺始涼。寄語蠻姬休浪晒。須嘗。似否卿家十八娘。

又 和放公春暮感舊原韻

老去杜樊川。怕學啼紅小蜀鵲。花謝花開關底事。風前。捲了簾衣上釣船。  
回想也

徒然往事如塵。又似烟。偏是阿師忘不了。情牽滿院鶯聲。賣酒天。

又 搗衣

悄倚繚垣陰。聽誰家響暮砧。不是此聲聽不得。關心自惜離愁。禹種深。夜夢別秋衾。趁了西風返故林。滿巷砧聲都一樣。沈吟。黃葉村扉那處尋。

虞美人 渡江

白蘋花盡凋寒玉。舴艋搖空濶。秋潮恰比篔簹紋平。趁此日斜風細。翦江行。最憐黃歇墳頭土。多少今和古。年來生怕說興亡。笑指楚天新雁兩三行。

又 詠鏡

香奩涼鑑蟠金獸。背壓蛟螭鈕。玉人偏妬小菱花。慣是團圓兩字。不如他。翠鸞莫道心如鐵。春筍曾提挈。紅塵澆處奈他何。我亦受人憐惜。爲人磨。

又 靈璧縣虞姬墓下作

八千子弟來江左。單剩暗鳴我。誰歎歌者楚聲高。還是吾家舊日典連厖。美人駿

馬英雄槩。一死千秋在。荒祠莫恨枕寒田。賤妾孤墳。長在大王前。

又 無聊

無聊笑撚花枝說。處處鶻啼血。好花須映好樓臺。休傍秦關蜀棧、戰場開。  
倚樓極目添愁緒。更對東風語。好風休簸戰旗紅。早送鱗魚如雪、過江東。

又 端午閨詞四首

綠窗輕剖鵝黃繭。更把紅絨翦。製成一對小於菟。傍嵌纍絲、罇葉碎眞珠。  
盈盈暗繫綃裙下。但願無驚怕。莫嫌此物遜鴛鴦。會憊虎兒、明歲出蘭房。

朱砂撚入銀壺酒。此意郎知否。與郎染就好心腸。休戀菖蒲、北里別家香。  
粉和冰麝金盤內。雨過荷珠碎。一生多子是紅榴。更愛萱花、小字號忘憂。

靈符颺上香雲膩。繡虎釵頭睡。守宮蜥蜴粉蟾蜍。還剩元綃、半捻裏蜘蛛。  
燈前笑把檀郎蹴。誰道諸般毒。東家蝴蝶過西家。多恐薄情、心性劣於他。

年年競渡喧歌唱。雪屋崩銀浪。如今不見木蘭橈。門掩一庭、微雨讀離騷。  
風前皓

腕纏紅縷。往事依稀數。多時忘卻辟兵符。今歲重新提起、暗嗟吁。

又 吳門遇嘉禾沈馨聞追感延令舊游賦贈

與君且醉楓橋酒。往事思量否。夜烏筵上盡情啼。曾看兩行紅粉、黛鬢低。建封去後秋娘老。燕子樓空了。阿誰留得最長條。重倚東風、再鬪沈郎腰。

又 題徐渭文畫花卉翎毛便面扇畫虞美人花卉蛺蝶

簾櫳水浸剛初夏。夏淺勝春也。數枝白白與紅紅。飄到一雙蛺蝶、粉濛濛。愁看劉

項興亡史。且讀南華子。漆園栩栩過牆來。笑爾閒花、還傍月明開。

又 賦得一枝紅牡丹

綠窗濃晝逢初夏。滿院花都謝。昨宵絲管醉沈香。重放一枝、欄角鬪紅妝。曲廊軟

幔嬌難畫。提起開元話。楊妃帶笑綻紅鮮。不數阿姨、粉面夜朝天。

又 秦園小憩

綠莎廳折風廊去。是我曾眠處。萬條柳線罨簾櫳。無限狂奴、春夢在其中。花間郭

橐駝來了也較年時老。海棠枝上坐流鶯。認否劉郎。前度問他聲。

又 吳門春暮重見楊枝

千絲萬縷隋堤柳。往事思量否。楊花飛雪暮春時。又向專諸巷口見楊枝。酒旗漾在皋橋下。醉殺休論價。半襟鶻血染東風。可似尙書筵畔舞衣紅。追感合肥先生

又 夏日登舟遇雨小泊北郊卻寄南耕天篆二子

銀濤作陣溪花舞。雙槳如何去。半欲綠簪百潭香。分取水禽飛處一絲涼。禿衿翠茗煎花乳。可少留儂處。湖山大似有鄉情。故遣石尤遲我不成行。

又 泊舟垂虹橋不及過晤舍妹同緯雲弟悵然賦此

碧鱸紅稻江村市。森森重經此。夜深水調起鄰船。記得不曾聽已十多年。北風漸釀篷窗雪。心事和誰說。匆匆忘發大雷書。望裏汀花沙鳥暗南湖。

又 過青駝寺感舊寄示冒子青若青年雲耶隨予北上於此地遇青若

魯山更比吳山翠。路入青駝寺。亂峯怪石甃圍牆。牆裏人家一半棗花香。當初有

箇卿家燕與汝天涯見。曉風殘月憶從前。不道因循過了十餘年。

夜行船 月下汎舟水繪園同冒巢民先生賦

蘭橈輕點春流碧。蘸垂楊、絲絲無力。百頃簾紋。一泓香黛。人在短篷吹笛。更愛月華牆上白。影娥池水禽飛拍。醉吸玉鱗。狂呼霜兔。可認騎鯨仙客。

醉落魄 春夜微雪

春閨日暮。輕寒已著櫻桃樹。博山小篆飄香縷。斜掩青樓。一陣銷魂雨。夜深珂雪偏難住。金尊小泛蘭陵醕。酒紅漸入香肌去。嬾剔金荷。細對菱花語。

又 詠鷹

寒山幾堵。風低削碎中原路。秋空一碧無今古。醉袒貂裘。略記尋呼處。男兒身手和誰賭。老來猛氣還軒舉。人間多少閒狐兔。月黑沙黃。此際偏思汝。

夜游宮 秋懷四首

耿耿秋情欲動。早噴入、霜橋笛孔。快倚西風作三弄。短狐悲。瘦猿愁。啼破冢。碧落

銀盤凍。照不了。秦關楚隴。無數蛩吟古磚縫。料今宵。靠屏風。無好夢。  
秋氣橫排萬馬。盡屯在。長城牆下。每到三更。素商瀉。溼龍樓。暈鴛機。迷爵瓦。  
誰復憐卿者。酒醒後。槌牀悲詫。使氣筵前舞甘蔗。我思兮。古之人。桓子野。  
箭與鷓鴣競快。側秋腦。角鷹愁態。駿馬妖姬秣燕代。笑吳兒。困雕蟲。矜細效。  
誰能耐。總一笑。浮雲睚眦。獨去爲傭學無賴。圮橋邊。有猿公。期我在。  
一派明雲薦爽。秋不住。碧空中響。如此江山徒莽蒼。伯符耶。寄奴耶。嗟已往。  
十載羞廝養。孤負煞。長頭大賴。思與騎奴游上黨。趁秋晴。躡蓮花。西嶽掌。

踏莎行 舟次河橋

別酒纔醒。離程乍遠。蘭橈斜閣烟中飯。霜華昨夜溼銀篝。夜深記有人低喚。  
腸斷難禁。魂銷何限。鄰舟商婦箏聲換。一分明月照河橋。橋頭船裏愁千萬。

又 詠帳鉤

玉色無痕。粉光欲斫。一生管住春風罅。紗幮凝望碧如烟。憐伊蕩漾何曾挂。  
顛處



輕盈控來低亞。流蘇絡在銀毬下。月明風細漸琮琤。依稀似說春宵話。

又 冬夜不寐

舊恨如絲。新寒似水。兩般都著人心裏。五更刁斗泝梁城。一天風雪成臬壘。鐘生鄰牆月死。枕頭欹遍如何是。半生孤憤酒難澆。挑燈且讀韓非子。

古寺

又 西村鄰叟餉予梅子豆莢玫瑰薔薇滿器賦此謝之

北郭澆花。南山種豆。筠籃入市紛如繡。半肩愛惹蝶蜂爭。一生怕聽蛟龍鬪。鄰翁寄聲溪友。向時風景依稀否。前村渡已綠多時。野橋梅定黃如舊。

問訊

又 夏夜感舊

月挂樓梢。風吹沼面。水天閒話人微倦。些些只許枕頭知。星星生怕流螢見。三更淚痕一串。如今舊事思量徧。他生須讀淨名經。小樓已署回心院。

街鼓

又 南耕花徑成

雜卉葳蕤。羣葩葱峭。紅英紫萼紛相照。藤蘿深巷碧如天。薔薇低架平於帽。

韻事

堪矜癡情可笑。隔鄰蜂蝶都知道。今年僅爲乞花忙。明春客定提壺鬧。

虞美人第二體 春夜舟行

紅泉碧杜殊清麗。白舫紗窗閉。春江人在鏡中行。船樓鳳脰一枝橫。夢難成。漁蠻踏浪尋村酒。爛醉歌銅斗。蝦籠灣口賽黃牛。三更珠露溼船頭。似清秋。蝦籠陽羨水名

惜分釵 偶作

擊劍罷。追風射。當時旁若無人者。過橫塘。喚名倡。痛飲狂歌。說霸論王。堂堂。花枝謝人兒嫁。無端夢醒西樓下。袖郎當。淚淋浪。一種心情。滿院斜陽。悵悵。

臨江仙又一體 賦得睡起宛然成獨笑。數聲漁笛在滄浪。爲園次題帳額畫

幅

西塞山前無六月。半間草閣臨流。晚來都聚打魚舟。笛聲四起。劃碎一江秋。正值南柯初罷郡。槐陰螻戰剛休。兼天波浪打閒鷗。寄聲三老。今夜轉船頭。

七娘子 春閨

紅檠斜照人無語。圓冰對漾春無緒。陌上鶯啼梁間燕乳。夢中怕到銷魂處。小樓  
春色留難住。斜橋春水流將去。三月時光一年節序。水晶簾外廉纖雨。

花間虞美人

爲廣陵何茹庵題像

像在荷潭竹嶼間。旁有兩姬人侍。

角弓硬箭黃金弮。須上凌烟畫。不然脫帽五湖天。藕絲篔粉伴茶烟。亦前緣。雄心  
畢竟輕餘子。知我佳人耳。雙按裙帶繞花行。涼軒水檻十分清。說平生。

小重山

泊舟松陵城外未及一晤舍妹賦此寫懷

颿如陣馬驟晴空。一條銀練吼。走虬龍。回頭烟樹失吳宮。靈巖寺塔影。尙籠蔥。榭  
葉滿湖紅。檣燈和估笛。點空濛。夕陽船已過垂虹。無由泊。心事一杯中。

臨江仙 偶作

憶在冶城公膝下。圍棋年少知名。石頭兒女本輕盈。象牀春縱博。珠袷夜彈箏。條  
忽過江門第。換滄桑。飛渡羣僮。吳霜點鬢不勝情。案頭無鬼論。肘後淨名經。

又 酬贈崇川陶月嶠

四十男兒方墜地。家聲列戟風流。翩翩挾彈少年游。兄居長樂尉。主尙富平侯。詎料蹉跎空老大。逢君楚尾吳頭。酒闌話向北風愁。無家徐僕射。有淚白江州。

又 詠竹夫人二首

孤竹君原稱苦節。晚遺弱息江村。夜涼薦寢暫承恩。斑留江上點。冷浸月中魂。青女秋來休見妬。此身自有根源。化爲橫笛響夔門。但憑關塞曲。吹裂小龍孫。十載蕭蕭湘岸住。捎煙惹雨參差。如今枕畔露華滋。身居清暑殿。夢到竹郎祠。琢就細腰冰幾尺。宵來御輦頻辭。一生疏直許誰知。霜砧來別院。紈扇憶同時。

又 春日過訪友人村居。值其往郡城。題詞壁間而去。友人城居爲余比鄰。

早起隔牆花弄影。忽然空館相思。鄰家已換燕空飛。許多惆悵事。訴與落紅知。百里煙航遙訪戴。柴門鎖向春磯。沈吟暗詠壁間詩。徑開山以麓。村在水之湄。二語友人門前自署。

又 武塘贈錢巖燭

黃竹篙兒如雁叫。西風直放江船。櫓聲搖破鶴湖煙。園林排水次。甲第蟲花前。公子才華尤絕勝。翩翩氣壓幽燕。新詞脫手萬人傳。暗香姜白石。殘月柳屯田。

又 贈柯翰周

玉樹三柯偏競秀。枝枝黛色嶙峋。一枝纔茁便凌雲。車從新市出。衣用異香薰。此日相逢猶未晚。當年真恨離羣。狂歌莫問水犀軍。好將腸斷句。寫徧石榴裙。

又 寒柳

自別西風憔悴甚。凍雲流水平橋。并無黃葉伴飄飄。亂鴉三四點。愁坐話無憀。雲壓西村茅舍重。怕他楮樅同燒。好留蠻樣到春宵。三眠明歲事。重鬪小樓腰。

七娘子又一體 汲女

柴門之外清江曉。兩三枝映竹天桃小。鬪茗偏忙。澆花趁早。銅瓶翠綆深深抱。汲餘閒數雙棲鳥。坐晴磯紅上梨渦悄。窄地許防。有人低笑。浣衣娘又盈盈到。

蝶戀花 紀豔十首

劉氏三娘雙姊妹。生小繁華。家住雞鳴埭。梵字闌干花影碎。妝樓恰與春波對。兩  
小後堂曾博塞。阿母簾前。此日教重會。博語翻風空至再。蟬釵只靠秋千背。避人  
簾外桐花閒弄影。不便相辭。悄語博聲請。猶自眉峯烟不定。避人奩內添宮餅。說  
道今宵天色冷。且自留停。莫撼鴉兒醒。珠斗爛斑斜又整。人間第一消魂景。促坐  
犀蒜銀釘紅玉榻。小小簾櫳。不與金堂接。鬪草又慵彈阮怯。邀郎今夜拋金葉。百  
子枝花香粉浥。蘭是椿家。好把豪犀厭。小負紅潮生兩頰。給郎博進惟榆莢。鬪葉  
涼夜金街天似洗。打疊銀篝。薰透吳綾被。作劇消愁何計是。鬢絲扶定相思子。對  
漾紅繩低復起。明月光中。亂捲瀟湘水。匿笑佳人聲不止。檀奴小絆花陰裏。跳索  
梔子簾前掛鵲腦。隔著屏山。愛聽銀箏好。唱盡紅鹽人不曉。依稀記是蕭郎稿。偷  
得新聲三兩調。悄學春鶯。唇綻櫻桃小。銀蒜輕搖郎到了。和羞吹滅蘭缸早。聽歌  
亞字闌干花一朵。每到花朝。春夢偏難妥。女伴相攜爭婀娜。迷藏小捉妝樓左。鬢  
鬢微鬆蟬翼禪。怕有人窺。輕合黃金鎖。戲罷佯人苔砌坐。日移交網花陰簸。迷藏

拂曉相逢花弄口。如此天寒。何事清晨走。小院綠熊鋪褥厚。玉梅花下交三九。招  
入繡屏閒寫久。斜送橫波。郎莫衣單否。袖裏任郎沾寶獸。龍手壓描鸞手。圍爐  
一帶紅牆剛六幅。忽聽簫聲。欲斷還將續。知是東鄰吹鳳竹。邀來教弄相思曲。風  
起落花紅簌簌。香睡猩絨。小印琅玕束。故說玉人吹未熟。明朝重到黃金屋。教簫  
年少雙文能勸酒。笑折花枝。今夜爲郎壽。紅燭厭厭籠翠鈕。飲深忘卻春宵久。若  
下烏程春釀厚。卻笑佳人。腰似三眠柳。明日綠紗窗外走。手搖屈戌妝成否。中酒  
滿院姊歸啼惻惻。隔著中門。悵望游絲織。訊至方知娘小極。潛來小揭蜻蜓翼。怕  
響金梯行不得。半晌徘徊。纔到菱兒側。立久微聞輕歎息。春陰簾外天如墨。潛來

又 春閨同周文夏賦

芳草萋萋人脈脈。綠遍東西。不空南和北。滿院春晴無氣力。海棠花下捱時刻。惆  
悵去年逢玉勒。酒市紅橋。此際曾相識。往事不堪重憶得。餽簫陣陣催寒食。

又 春閨和漱玉詞

曉起春酥呵又凍。風捲西樓。似怯紅欄動。欲倚自憐無與共。和愁況是纖腰重。花影看看移半縫。呆覷庭陰。蹴損鞋尖鳳。莫怪難憑惟好夢。鵲聲也把愁人弄。

又 魏里錢爾斐先生向有四月蝶戀花戲字韻詞病中偶次其韻并索蘧庵

珍百竹逸雲臣和八首

四月荆南山更翠。山下人家。都被嵐光膩。南郭鶯聲纔滿市。東鄰榆莢還絕地。問訊茶園開也未。穀雨過頭。記起旗槍事。自是茗柯饒實理。酪奴水厄休相戲。

四月荆南堪買醉。雪片鱗魚。觸網連湖起。色鬪新鵝松粉細。櫻紅筍綠玫瑰紫。更有蕙羹纔下鼓。一瓊醺醺。醉倒新沙嘴。射虎屠龍非我事。天晴且趁游蜂戲。

四月荆南山雨至。浙浙濛濛。碧窰雙溪尾。水檻科頭閒徙倚。笛聲吹得波紋碎。小院日長惟好睡。睡足揮毫。自笑無新意。滿幅詛神兼罵鬼。先生慣以文爲戲。

四月荆南春去矣。點點花飛。別我彈紅淚。所幸東街連古寺。木香鶯粟還堆砌。水澆花心暗喜。小啜龍團。管甚人間世。更上危巢探鵲子。老來愛與羣兒戲。



四月荆南多賽會。隔浦叢祠。日日村巫醉。午後棟花風乍起。打門社首分鵝載。一  
飽欣然無個事。走趁楊花。飄蕩東村裏。腰鼓盲詞隨處是。分棚又看梨園戲。  
四月荆南桑柘美。泥就蠶房。雪淨無塵滓。紅帖糊門多禁忌。家家阿婦勞纖指。  
語小姑應夜起。好事今冬。早把衣裳備。推卻纜車佯不理。小姑爲惱前言戲。  
四月荆南天著水。濃淡溪山。染做修蛾翠。拂曉家童呼入市。半籠攜得含桃至。一  
幅斜陽紅到寺。新筍排槍。數徧那能記。浴佛人歸深逕裏。鄰閨兒女燈前戲。  
四月荆南風景異。乍雨還晴。晴雨都無次。欲認前村渾不似。茫茫萬頃黃雲膩。一  
巷柴門誰夜閉。打麥聲中。隱隱獺兒吠。酒辣餅香真足喜。竈前搏黍添丁戲。

又 五月詞仍用前韻八首

五月荆南梅雨至。好貯天泉。競滌空齋器。豕腹龍頭堆滿砌。庭前新改瓶罍肆。  
濺沫傾珠差足喜。亟喚樵青。活火須先熾。道是茶聲還不是。依稀松鬣擎風戲。  
五月荆南饒好味。筍脯茶油。都上蛟橋市。細切黃瓜涼欲噀。廚香正熟長腰米。  
飽

飯風前貪美睡。剝啄誰歟。佳客催人起。庫裏葛衣新歲質。迎賓日學披裘戲。

五月荆南花未已。各色戎葵。濃淡搖軒砌。聞道街南花更麗。殷勤乞取三升子。待  
得明年栽滿地。簇繡鋪茵。便作花城矣。此是貧家真富貴。人間富貴還如戲。

五月荆南新漲至。一片菱蘆。總把川光翳。閣外溪風來也未。陰陰先作鏗鐃勢。  
郭漣漪逾十里。買件蓑衣。走入漁翁隊。日落笛聲篷背起。封侯不換垂綸戲。水

五月荆南蒸溼翠。牆脚苔生。礎潤垣衣膩。院靜日長沈水費。曹騰兀坐思陳事。憶

看京江江萬里。爛若銀盤。倒插金山寺。雪片崩濤飛彩幟。妙高臺下龍舟戲。

五月荆南佳節至。角黍堆盤。嫩綠銜前醉。絳縷絲絲斜纏臂。致符顛罷簾痕碎。五

毒羅囊裙帶繫。始信人生。騎虎非難事。折得海榴紅染袂。蒲根鏤作葫蘆戲。

五月荆南多酒會。蜜蟹糟鱸。新自江船寄。杏酪攪酥偏沁肺。桃膏紅透冰瓊內。萬

事蒼茫休問矣。鋪啜吾生。此舉強人意。閒看雨絲蛛網綴。分明空裏穿珠戲。

五月荆南秧早蒔。黃紙飛來。溫語從天至。見說東南民力敝。秋租減半明年事。比

屋歡騰還雪涕。只恐來年。還似常年例。我語村農休過計。官家自古言無戲。

又 六月詞再用前韻八首

六月荆南村貼水。蒲葦成叢。屋傍漁莊尾。溘溘野風波面起。洄稍直灌橋門裏。白髮老翁無個事。掩罷柴扉。選塊陰涼地。招手老妻牽稚子。團團聽話隋唐戲。

六月荆南天似醉。雨嫩如無。恰又吹來細。贏得遙山都欲睡。模糊失卻螺髻。溜漸珊瑚不已。忽見中庭。一縷晴虹起。那禁羣兒爭笑指。碧翁也著斑斕戲。

六月荆南蒸暑氣。過了梅天。市上無兼味。白小黃魚稀少至。老饕鎮日涎垂地。糯新炊淘菡萍。蜺醬葵羹也。自饒風致。鼓腹陶然吾足矣。瓜棚之下閒遊戲。

六月荆南閒也未。一月停忙。暫緩官糧比。聞道開徵今日始。新絲賣了來城市。不信何花名茉莉。卻與儂家。白荳花相類。笑煞長橋橋上子。市兒慣取村兒戲。

六月荆南多水市。鞋棹涼船。柳樹根頭艤。菱白菱紅排九尾。漁翁又糶雞頭米。一望風荷兼雨芰。纔見錢錢。又早田田矣。剝罷蓮蓬何處使。按來做個人兒戲。小兒剝

蓮蓬以線縛之反裘振袂儼然老翁名蓮蓬人兒

六月荆南蟬早沸。做暝連陰。夏已賒秋意。莫謂晚涼饒爽致。田禾最怕牀頭被。六月  
諺云牀上蓋了被田中無了米。長日經營無好計。枕上詩成。記又無頭尾。且拾

廚中青鴨子。糊他一盞螢燈戲。

六月荆南人早起。倚閣看雲。雲氣朝朝異。天矯軒騰兼蔚跂。火雲燒卻銅峯翠。蜃  
國那須誇海市。換狗更衣。反覆須臾耳。若問世間還勝此。天公聊學人情戲。  
六月荆南門屢閉。壁上烏巾。挂著多時矣。客到蕉窗時一啓。不迎不送貪徒跣。問  
我新編今有幾。叩首主臣。夜火燒殘矣。消夏祇餘詞一紙。君休晒我篇篇戲。

又 夏日睡起卽事

幾日戎葵階下長。烟膩吳天。難得心情爽。風裊茶烟斜翠幌。燕雛爭把香泥搶。窗  
小綠陰偏簸蕩。夢覺循牆。暗地閒來往。誰打樓前銅砌響。熟梅自落中門上。

又 本意

記在繡裙親見汝。深院潛行。驀又花間遇。綴綠黏紅無定處。濛濛撲徧東園路。  
粉退來還幾度。天若多情。休遣春光暮。拆了鞦韆飛卻絮。成團滾過牆頭去。

又 詠水仙花

小小哥窰涼似雪。插一瓶烟。不辨花和葉。碧暈檀痕姿態別。東風悄把瓊酥捻。  
灑空濛天水接。千頃烟波。羅襪行來怯。昨夜洞庭初上月。含情獨對姮娥說。

又 清明同諸子集原白齋中

柳線黃時雛燕乳。爲揀芹泥。掠盡廉纖雨。今日風光剛百五。新晴鬪煞新妝嫵。  
聽尊前喧畫鼓。照眼花枝。負了卿何苦。不信試看風起處。亂紅砌滿春歸路。

後庭宴 春日同仲震過譙巖先生齋看牡丹齋名壺天

天寶名花。蓬萊新築。君家最有仙家福。洛陽千里錦年光。攝來都向壺中縮。  
盈盈  
復磴迴廊。裊裊嬌絲脆竹。綠窗低唱。換了華清曲。歷亂夜燈紅。被簾風小蹴。

一翦梅 吳門客舍初度作

風打孤鴻浪打鷗。四十揚州。五十蘇州。半生習氣破除休。少日倡樓。老去僧樓。故壘蕭蕭蘆荻秋。說甚曹劉。只羨孫劉。專語巷內且淹留。烽火邊愁。風雪羈愁。

又 七夕由虞城渡河至單縣

客裏流光迅逝波。五日纔過。七夕將過。殊鄉令節巧蹉跎。星渡銀河。人渡黃河。憐良夜不如他。天上情多。地上離多。紅閨兩地蹙愁蛾。大婦停梭。小婦停梭。劇

釵頭鳳 豔情

薔薇罅。鞦韆架。中門闔鎖聲纔罷。銀牆側。銅屏直。記來約略。行來疑惑。黑黑黑。幽窗下。紅燈射。夜闌綠水昏如畫。花紋榻。玲瓏極。剪刀尙響。冠兒未摘。嚇嚇嚇。

又 讀蘧庵先生詞用原韻

琢月手。談天口。胸中雲夢吞須九。寧遊戲。非文字。問他作者。幾人曾會。未未未。情絲鏤。啼珠溜。斷腸怕學屯田柳。羞溱洧。翻清徵。笛吹江閣。帆騎峽水。似似似。

朝玉階 冬日過惠山下一梅亭

曲徑斜橋澗影遙。空山亭子好，趁閒過。小軒颭水似殘荷。石欄經雨澀，遍青莎。短牆叢竹受風多。一聲漁磬杳，溼烟籠。黃梅著色鬪新鵝。折來堪作供，佛頭螺。

唐多令 春愁

蟬鬢隔花陰。香肌壓翠衾。風前一笑擲千金。記得那時明月底，剛半線，露丹襟。銀鑰杳沈沈。朱樓阻信音。流鶯啼破綠窗深。清淚未彈紅淚滴，流不了，到如今。

又 廣陵上巳

板渚柳枝橫。津樓酒旆輕。舊繁華、猶記蕪城。正是穠春逢上巳，多少事，麗人行。年少愛風情。紅妝識姓名。杜紫微、此地曾經。今日鬢絲真老大，和燕子，語平生。

又 夜飲紀事

無夢覓封侯。隨緣做浪游。儘顛狂、錦瑟紅篝。聽得關山剛入破，重惹起，半生愁。心事付沙鷗。閒身伴杜秋。問乾坤、何地埋憂。月到五更還未落，人倚在，水明樓。

又 重九後食蟹半醉作

無菊底須愁。桂花香正幽。與諸君、且築糟邱。不記昨宵重九節。風雨裏、怕登樓。半  
醉睨吳鉤。吾生行且休。任古來、割據孫劉。龍額岸頭渾不羨。偏只愛、內黃侯。蟹名內  
黃侯

又 擁被

早漏減銀虬。新寒警畫樓。漾罨罨、紅日驚眸。帷裏餘溫猶可戀。纔欲起、又還休。  
花好懶擡頭。簾垂怕上鉤。惱簷前、鬧雀喧鳩。護惜衾窩留夢在。莫捲去、半牀愁。

又 春暮半塘小泊

水榭枕官河。朱欄倚粉娥。記早春、欄畔曾過。關著綠紗窗一扇。吹鈿笛、是伊麼。  
無語注橫波。裙花信手搓。悵年光、一往蹉跎。賣了杏花挑了菜。春縱好、已無多。

攤破醜奴兒 紀豔

隔簾按碎相思苒。斜著烏雲。漾著紅巾。嬈嬈亭亭一段春。是耶。難道是、昨宵人。  
戟門闔卻葳蕤鎖。花氣氤氳。月色繽紛。牆角獼兒吠夜分。非耶。難道是、昨宵人。



繫裙腰 詠裙

滿園草色綠迢迢。都吹上小裙腰。棲鸞宿蝶風流甚，暗暈紅潮。輕颺處，稱垂髫。有時沈在簾兒底，依稀微露輕綃。隔花繡帶無風轉，淺立春宵。想應拂徧落梅嬌。

明月逐人來 惠山山麓謁睢陽祠

壞廊徑仄。哀湍響激。松杉外，層層夜色。悲歌南八，箭著浮圖壁。鐵像賀蘭苔澀。掛得一杯黛瀉，幾甌茗汁。依稀見，雲旗下，食。恰逢泓底。龍嘯潭風急，又認戍樓聞笛。

贊成功 憶梁園客夏避暑開元寺南湖草堂與徐恭士宋牧仲家亦人別駕

子萬四舍弟僧雪笠日夕談讌別來遂及一載詞以誌憶

好風涼夜，新月疏桐。一年前事尚濛濛。記曾避暑，梁孝園中。野塘水碧，古寺牆紅。溪友詞客，雨笛霜篷。弄人衫子釣絲風。別來一載，憔悴江東。南湖魚鳥，定也憐儂。

似娘兒 舟過婁門卽事

渡口綠簑斜，繞子城，碧浪周遮。誰知我是元真子，賣餠天氣，憑撓心事，蕩槳生涯。

水面小窗紗。響根根。誰摘琵琶。東風似夢回頭望。絕無人影。粉牆之內。一樹桃花。

青杏兒 本意

六尺小簾漪。交網外。杏子纍纍。流光暗換無人覺。纔看綠綻。俄驚茜透。忽訝黃垂。回首憶芳菲。記二月。花正開時。勻圓擬把筠籃摘。怪他牆上。誰家颺過。紅畫竿兒。

定風波 懷潁川劉公猷記與茂之公猷小飲紅橋幾一年矣故有此作

昨歲行歌古竹西。廣陵三月柳綿飛。誰更扶筇郊外走。林叟。開元遺事說依稀。時序飈流驚又換。春半。風光雖似舊游非。綠到江南清潁尾。春水。潺湲好爲寄相思。

又 贈牧仲歌兒阿陸

蝴蝶成團榆莢飛。輕狂恰稱五銖衣。若問年華剛幾許。數數。晚峯十二正愁時。莫道梁園非故土。且住。得人憐處不須歸。問控郎君堂後馬。偷跨。陸郎從古愛斑騅。

又 贈歌兒阿增

持底尊前贈阿增。濃纖一幅繚紅綾。上寫蠅頭無數字。須記。千絲萬縷意層層。好

向歌樓并舞院常見。細腰束罷怕難勝。莫到春街閒賭戲。輕棄。他年知否憶來曾。

又 紫薇花

一樹瞳矐照畫梁。蓮衣相映鬪紅妝。纔試麻姑織烏爪。裊裊。無風嬌影自輕颺。誰  
凭玉闌干細語。爾汝檀郎原自紫薇郎。聞道花紅無百日。難得。笑他團扇怕秋涼。

又 九來半繭園東偏爲余新闢一浴室解衣盤礴致甚適也詞以紀之

身是荆南白鷺羣。拍波只愛絮紛紛。自笑此生饒水癖。爲客。那能長弄畫溪雲。竹  
徑粉牆泉又冽。清絕。人從何處有塵氛。浴罷簾痕冰雪做。閒臥。快吹長笛送斜曛。

又 齊世家爲閻牛叟賦

華閨由來數濟陽。風從古說齊姜。輕喚紅閨名更好。仙窈。盈盈林下是閨房。記  
得詩人佳號否。牛叟果然織女配牛郎。門內雙丁尤異事。姊妹。劉家還有第三娘。

蘇幕遮 詠梔子花

玉羅鬆。檀暈嫿。朵朵同心。開在簾垂處。茉莉園蘭猶未乳。早綻瓊葩。借與人消暑。

不禁風時怯雨。浴罷鬢偏。摘向欄邊去。翠帳陰陰宵未午。月黑花明。凝得房櫺曙。

漁家傲 宣城道上

古木叢祠山逕細。野花斑竹黏天際。蕭瑟崢泓誰可擬。墟烟起。家家水驛門斜閉。  
三秋搖落悲游子。一鞭自裊西風裏。歇馬溪橋人乍倚。樵夫指。麻姑大好朝來髻。  
宣  
城有麻姑山

又 聞西樵方爲京口三山之游卻寄

晴日南徐風景異。蒲帆飽趁春濤駛。一片江山千古事。同兒戲。伯符志業何曾遂。  
月下租船人詠史。使君大有凌雲氣。滿目茫茫愁對此。橫笛裏。妙高臺上吹新水。

又 三月十八雨中同杜茶村韓爾鉉黃稚曾過飲錢礎日十峯草堂同用范

希文原韻

說鬼談天矜博異。自循短髮無生意。醉舞仙仙鸚鵡起。深徑裏。怕窺狂態門須閉。  
何用屢屢嗟百里。吾生自有驅愁計。卻笑天公煩惱地。渾如寐。朝朝只灑花閒淚。

又 新秋卽事和雲臣韻二首

蝸響纒將餘火送。砧聲又迫秋情動。天上雙丸誰播弄。閒愁重。人閒白髮憑伊種。  
一枕瑤妃掛綠甕。驂鸞翳鶴羣真哄。覺後匡牀無與共。真成夢。亂雲封卻華陽洞。  
晨喚青童沿砌掃。待他一葉占秋早。浣取幽墀如鏡好。秋已到。碧天萬斛銀潢倒。  
莫使秋光容易老。等閒黃了天涯草。靜聽跳珠荷葉鬧。臨流釣。忘機不怕羣鷗惱。

又 羊流店懷古叔子故里

太傅千秋存故里。我來削面西風起。欲問遺蹤何處是。傍人指。亂碑沒入寒蕪裏。  
今日江山仍戰壘。野花閱盡前朝史。儒將雍容能有幾。休相戲。何如銅雀臺前伎。

又 齊河縣

旬日崎嶇行左擔。征車確犖投山店。魯酒何如愁思釀。心情減。白頭彩筆渾相賺。  
竟有估帆三四點。楓根也繫斜陽纜。新月初黃偏灑灑。鋪竹簟。笛聲快作伊州犯。

破陣子 江上作

千頃晴漪。嫩綠四圍。晚髻黏紅。蛋戶翳帆來海外。犀液龍釐貯月中。寒潮打故宮。  
雁叫酸然欲雨。懣吟。若成風。劉毅宅邊堆蔓草。郭璞墳前擁斷篷。秋江愁殺儂。

又 擬過竹逸齋前探梅。輒因雨阻。詞以柬之。

昨夜雖寒側側。今晨小雨濛濛。屢擬尋花過澗北。屢約聽鶯到水東。心情無那慵。  
麗景偏憐易謝。冶游最惜難逢。四百八十南朝寺。二十四番花信風。鶻啼催落紅。

落燈風 冬閨

五更一陣寒偏準。冷焰挑來纔半寸。無語撥香灰。天應要糝銅街粉。怪底霜風緊。  
簾外烏龍眠不穩。城河小。結冰猶嫩。江梅入舊年。掀破牀頭殘曆本。歲盡愁難盡。

鳳銜盃 偶感

弱柳絲絲街前漾。正初學、小蠻腰樣。有隔水紅牆。翠樓倒映牆頭上。聽樓內三絃響。  
恰重經、人已往。帽簷斜倚風凝想。只似夢如烟。柳花撲地漫天放。尋不出伊門巷。

又 觀晉山游暮歸卽景

香紅暖翠風吹散。依舊在、心頭嵌滿。恰殘夢、憎騰牆圍青粉。誰家館。正隔水飄歌板。柳絲樓。梨花苑。雨濛濛。畫船歸晚。刺薺菜連天。檀心嬌煞無人管。黃了春城一半。

喝火令 偶憶

架上紅鸚鵡。簾邊玉辟邪。兜娘懶上卓金車。鬢髮一窩濃綠未成鴉。嬈我春吹笛。邀人夜鬪茶。如今庭院隔天涯。記得沿街一樹粉梨花。記得花陰微露。幾扇綠窗紗。

醉春風 豔情

月暗蘭缸冥。風細花陰冷。紫茸帳底拍蕭娘。醒醒。良夜難逢。幽歡可惜。休教酩酊。活火初烹茗。寶篆猶生鼎。紅妝枕畔語檀郎。等等。城上人行。籠中鳥喚。如何便肯。

又 上巳陰雨憶乙巳暮春與王阮亭主客修禊洗鉢池上慨然成詠

風約飛紅趁。雨澆香泥印。春歸算隔幾多時。近近。近。挑菜人稀。滿裙節過。賣餠聲緊。已少尋春分。好把閒愁論。那年卻記共王郎。韻韻。絲管精詳。賓朋妥貼。心情安。

頓。

又 春日飲遠公海棠花下和竹逸作

榨就真珠味。瀉向玻璃內。勸花花只苦推辭。醉。醉。醉。鬢淺潮生。杯濃量重。惱郎多事，  
滿院春深閉。六幅簾垂地。抱花花又苦推辭。睡。睡。睡。嬌極難勝。困酣難醒。笑郎無  
謂。

又 春暮

紅老鶯偏趁。綠暗窗難認。等閒颺起棟花風。悶。悶。悶。妝閣凭般。舞衫疊腕。玉釵敲壁。  
不放東皇閤。權取榆錢贖。送春暫去幾時歸。問。問。問。明歲新年。水邊郭外。候伊來  
信。

麥秀兩岐 爲周貞女題詞

既許驅金犢。便合歌黃鵠。斷腸花。貞女木。碧海孤鸞宿。嫁箱提上秋墳鬻。麤蕪難綠。  
何必諧花燭。長願鑄冰玉。夢中魂。看未熟。想像鬢而哭。夸娥有意扶坤軸。愧他臣



僕。

侍香金童 題閨秀畫扇用湘瑟詞韻

蕃馬平沙。六扇屏風摺映的。的腮。過紅暈頰。擘阮研箏都未愜。只把檀槽粉。餽酥貼。偶臨花。蕊樣閒將螺管捻。襯幾筆。烟條露葉。料爾前身枝上蝶。乍搯齊絃。燕窺鶯踏。

獻衷心 商邱城外二十里曰水墅鋪此地白蓮花最盛綿亙數十畝予友侯

叔岱家焉常坐我花際詞以懷之

記故人家在水墅之東。荷十里。白濛濛。想兔園殘雪。尙綴藕塘中。偏作態。將膩粉。換香紅。花隱約。月朦朧。此身疑在廣寒宮。算最難忘得。雨幔烟篷。今何夕。人悵望。水連空。

芭蕉雨 詠秋雨

似夢如塵淅淅。乍無還乍有。何時歇。夜永三更將絕。正值曲巷砧鳴。頽牆蛩咽。陣

陣羅衾涼徹。愁共小屏摺。逢白雁北來、和人說。說道漢、寢唐陵。今夜雨灑丹楓。盡流紅血。

又 春雨

輕暖輕寒時節。東風將柳絮、搓香雪。暗惹翠蛾千結。絕似細雨紅橋。情人乍別。綠窗花影半摺。待折未曾折。儘草上輕狂、雙黃蝶。亂撲著雨和烟。攪得今歲韶光不成三月。

又 驟雨

日午絳雲烘墨。渴烏偏掉尾、威胡赫。一霎溪風涼激。誰取十萬冰絃。輓來霹靂。急雨琤琮裂帛。萬瓦戰金鐵。轟餘怒猶思、壞牆壁。此際白苧涼衫。獨上快閣臨風。鬚如蝟磔。

輓繡毬 紀游

淡蕩刺梅園。被紫蝶成團勾去。雜花肥砌。雛鶯梳院。赤欄銀井。想經昨夜。一場新雨。

門外天寒如許。小樓上有人知否。斷無消息。可勝惆悵。兩層門內。惟聞絃響。悵悵不住。

品令 夏夜

夜色涼千頃。攜笛簾、依金井。輓轡清冷。一天松籟。半規晶餅。慢瀉流光。漸映素蟬綠茗。微茫杳冥。水廊外、風荷整。闌干碎拍。舊游何處。瑤京路永。簾滿空庭。簾影樹影鬢影。

酷相思 冬日行彰德衛輝諸處馬上作

趙北燕南多驛路。見一帶、霜紅樹。又天外、亂山青可數。叢臺也、知何處。雀臺也、知何處。一鞭裊裊臨官渡。雁叫酸如雨。儘古往今來、誇割據。漳水也、東流去。淇水也、東流去。

淡黃柳 道院中見黃木香詞以詠之

蟬黃褪了。爭上枝頭簇。嫩蕊成叢蒙澗竹。覆徧書窗小屋。揉入紅槽碎珠續。壓醅熟。

蕭疏亂秋菊。引柔蔓。暗香觸。月昏黃。料爾傷幽獨。折上鍊師。通明冠子。雅稱厭禳  
妝束。

玉梅令 南耕所葺書舍顏曰梅廬昨始移得古梅一株邊以誇我走筆戲東  
舊營梅舍。不見些梅也。今朝真見梅精嫁。看蘇鋪鐵鬣。并石繡銅柯。黛色成圍。濤聲  
暗瀉。癖處疑顛。狂來相詫。說此樂。甚於僕射。撚橫枝微嗅。何必待花開。香已在。枕  
稜窗罅。

又 同雲臣諸子過放庵禪院看梅時積雨新霽  
禪房甚綺。有粉英嬌倚。連宵雨幾枝。臨水。恰小停響屐。簷隙已微紅。紗窗日影。頓添  
半指。茶鎗酒竈。都饒名理。只軒外。怕東風起。囑成團香雪。休去舞春城。須片片。墮  
金尊裏。

錦纏道 將發玉峯寄緯雲弟村居

老去江東。拚向漁樵寄傲。問何爲。衝炎席帽。年年作苦。雜傭保。赤日紅塵。怕相嘲程

曉。想西溪草堂。雨杉烟篠。傍苔陰、置筆牀茶竈。晚涼濯足、歛湖、恰估船笛響。風定菱絲鳥。

又 冬日溪行

紅葉攢天。烘得柴門如醉。板橋南、昏鴉成隊。遙村界得寒林碎。一派疏簷更繞遙村背。夕照炫紅黃。半陂明晦。且停船、荻花以內。被沙禽喚起西風。激千層銀沫。亂把晴磯確。

厭金杯 戲詠螢燈

小似香囊空於湘水。映疏螢、紗痕逾翠。墨花幾幅。面面小徐熙。涼夜戲。茉莉梢頭輕綴。頻吹難滅。不剔長鮮。耿耿處、無情有思。樓昏月黑。嫌煞燭籠明。冰簟底、窺見一星星事。

垂絲釣 戲詠貓

房櫳瀟灑。狸奴嬉戲簷下。睡熟蝶裙兒。皺綃袂。梅已謝。撒粉英一把。將伊惹。正風光

豔冶。尋春逐隊。小樓竄響鴛瓦。花嬌柳妬。向畫廊眠藉。低撼輕紅架。鸚鵡怕喚玉郎悄打。

行香子 爲李武曾題扇上美人同弟緯雲賦

烟樣羅襦。月樣銀鈎。人立處。風景全幽。誰將紈扇。細寫風流。有一分水。一分墨。一分愁。天街似水。迢迢涼夜。十年前。事上心頭。雙飄裙帶。曾伴新秋。在那家庭。那家院。那家樓。

又 同帖雲上人魯望弟過徐氏園亭

壘石支泉。架壑招烟。小橋外。老屋斜川。潔何忍唾。靜欲成眠。恰半欄花。數陂竹。一湖蓮。距村背郭。噌泓蕭瑟。似蝸廬。又似漁船。無冬無夏。非陌非阡。儘畫呼盧。朝說劍。夜鳴絃。

又 迴舟卽事

紅樹槎枒。綠水周遮。盪舟迴。水驛烟斜。一樽似夢。萬事如麻。歎吾衰也。行不得。住爲

佳。極天烽火。依然此地。小樓前、人戴黃花。船頭側聽。不是悲翁。是前溪口。新月底。撥琵琶。

青玉案 詠糟螿

春醒未析三更後。橙片切、蒹絲糅。食品廚娘偏解鬪。滑應凝盃。鬆難勝齒。幾瓣嫣紅透。金刀小向霜天剖。越襯出春纖消瘦。捧處紅糟先欲溜。小姬無語。老饕狂叫。把與梅同嗅。

又 詠油車螯

擊鮮海錯金盤瀉。絕稱是、春寒夜。輕點吳酸魂已化。和酥爲滿。帶脂成釀。二月花前榨。生平斫鱸兼行炙。枉行遍屠門蟹舍。風味似伊休論價。差宜下酒。雅堪鬪茗。攜向江南詫。

又 詠醉白蝦

半籠春水溶如鏡。早傾向、金盤淨。一片空明嬌掩映。霜著半呷。雪肌半挺。似帶春醞

病。尋常蝦菜空相競。誰解得高陽心性。細憶風姿。心自省。十分酒氣。三分生氣。羞與侯鯖並。

又 移寓積翠閣用藝香詞韻

梯空架就羊腸路。領俊鶻穿烟去。窗豁正當山破處。天風瀕洞。吹完今古。只剩龍窩住。松毛純碧騰猩鼠。下嵌寒潭瘦蛟舞。老樹得風都作語。半牀泉氣。一簾山霧。晴晝家家雨。

又 夏日懷燕市葡萄

風窗冰枕誰消暑。記百顆堆盤處。掬罷盈盈嬌欲語。輕明晶透。芳鮮圓綻。小摘西山雨。長安萬事俱塵土。惟有高情難忘汝。暗想風姿奚似許。爽疑燕筑。醇如刁酒。滑類華清乳。

又 雁字

未乾墨蹟遙天外。閒付與斜陽曬。狂掃八分臨阿買。頰紅霞尾。蔚藍天色。好幅烏絲



界。年年未了銜蘆債。入塞幾時還出寒。盤作壁窠。鬢作蠹。憑誰偷做十三行帖。寫上銀箏背。

鳳凰閣 元夕後一日同雲臣放庵過安樂禪院

枉東風費力。陌頭飄掠。無燈何處好吹落。獨有一枝梅蕊。春意先覺。且步過。寺橋溪閣。一聲幽磬。香氣暗縈林薄。寺門小立。盼寥廓。流水外。遠山尖。積雪埋卻。甚日覩。翠螺如削。

又 汴京夜雨

被東風送到。東京更鼓。又添隔巷數聲杵。暗想半生淪落。廿載羈旅。總不比。今番淒楚。朦朧枕畔。不斷吳娘鳴櫓。醒來有甚好心緒。人瘦也。怪黃花。瘦也如許。滴不了。秋簷夜雨。

又 虎邱喜遇侯記原大年

記摘船吟雨。倚樓題柳。樊川水榭暫攜手。一自消魂賦別。幾度回首。沈家令。帶圍較

瘦。帽簷微側。斟酌橋邊閒走。故人忽遇半塘口。知尹綠小軒前。叢桂開久。卻底事、還眠虎阜。尹綠秬園中軒名

感皇恩 晚涼雜憶六首

記得鎮淮門。風篷競舉。都歇荷潭最深處。綠籬烏榜。雁翅玲瓏無數。嫩涼三萬頃。誰先取。茱萸灣冷。山光寺古。玉笋頻傾水天暮。酒紅上面。笑拊冰肌銷暑。三年渾一夢。揚州路。

記趁過江船。遠帆疑豆。北固喧豗怒濤吼。江山如此。消得幾場詩酒。舉杯遙酌取。黃公覆。水雲膠葛。陽陰雜糅。奇石成獅破空走。竹林僧老。坐我秋林閒晝。半枝邛竹杖。如人瘦。

記在百泉山。盤渦漩湫。雜佩叢鈴暗相觸。礪花如雪。了了遙明山屋。蘇門蒸彩翠。添銀瀑。誰家園子。沿流嵌麓。晚飯家家麩湘竹。流連河朔。此地從無三伏。中原生爽籟。天新沐。

記在玉河橋。天街無賴。被酒狂歌。禁門外。蒲桃晶透。選取招涼珠。賽冷螢流殿。瓦冰初賣。倦聽太液。蟬聲一派。想像宸游甚時再。飄紅墜粉。鳳帽經秋。卻壞。燕丹門下客。皆安在。

記在魯蒙陰。霜楓濃淡。疊巘層崖。幻蒼紺。秋生海市。紅日一輪孤。陷晚涼。催卸馱。投關店。雲迷石匱。烟零玉檢。翠羽金支。半明暗。秦松西笑。華掌碧蓮初染。齊州青八九。纔如點。

記在湧金門。冷雲成畫。落月高樓。水明夜。佯狂脫帽。行到宋諸陵下。碧羊纏石。蘇眠官野。一湖蓮葉。半城樵舍。西子嫣然。晚妝罷。隔江雪浪。隱隱天風。檣馬。狂思橫萬弩。迎潮射。

天仙子 贈寒松和尚同雲臣賦和尚曾駐錫善權今掩關北郭

玉洞銀樓垂碧乳。夜夜老猿吟冷樹。山僧興到愛溪山。飛錫住。浮杯渡。結個茆庵山下路。塵界茫茫無定據。雪裏飛鴻風裏絮。山僧興盡別溪山。一笑去。誰回顧。明月

滿山無覓處。

又 書周我成先生旅歎賦後 先生少年時曾赴馬貴陽之讌酒酣罵座竟

以此賈門戶禍

輦上列侯開夜讌。年少揮鞭奔赤電。酒酣奪得紫檀槽。褰繡幔。人驚散。裂卻當筵丞相面。門戶凋殘風物換。白髮漸離誰作伴。荒江破屋譜牢愁。游俠傳。無家歎。月底栖烏聲歷亂。

婦人嬌 早過友人齋頭書所見

庭院清清漾起捲簾風。大簾底露粉郎閒坐。消停半晌。又甃甃橫臥。無甚事。吹得小池萍破。曲本慵翻。歌場懶作。綠莎上。戲將錢簸。慣尋人事。卻嗔人真個。喚不應。走弄菊花殘朵。

又 閒況

屋對晴山黛影離離爭。山梅瘦。遞香窗眼。細煎綠雪。注乳花盈碗。隱几坐。箋竟黃

庭下卷。飼鶴斜橋聽鶯空館更相邀。兩三狂狷看雲選石趁閒身尙健。此外事付與天公總管。

又 竹逸齋頭紫牡丹一本濃豔異常開日竹逸每約同人流連竟夕今歲花時竹逸越游未返不獲一至花下詞以寫懷

記得君家。跪地垂楊低驪更紫豔。臨風千朵。每逢花發。綠窗邊有我。與兩三禪侶。詞人閒坐。今歲吳天。君浮越舸。壓烟江。一帆斜簸。家園春景說儂然。婀娜無人處。一樹濃香深鎖。

又 晚浴

幾陣蟬嘶。趁了一枝花影。簾底下。井華冰冷。綃裳乍解。更紅酥寒凝。似素藕。浸勾碧湖千頃。浴罷凭闌。晚妝慵整。且消受。涼花綠茗。盈盈皓月。漸低窺金井。又畫就。深院夜香風景。

佳人醉 梁谿道中積雨乍霽

一夜春篷浙瀝。聲亂樵歌浦笛。正吳娘櫓撥。參差水面。夜景如墨。雞喚津橋。夢醒恰。何來新霽。穿牆隙。推窗起坐。九點龍峯。遙蒼暖翠。迎著空舸。滴吟情劇。吮毫微笑。一片晴村歷歷。

江城子 戲寫姬人領巾

石頭城下小蕭娘。眼波長。鬢雲光。少小隨耶。飄泊到睢陽。恰遇游梁病司馬。剛一笑。結鴛鴦。曉寒呵手點梅妝。雪輕颺。怕開箱。只是新年。郎又渡春江。且把木瓜還漬粉。欹枕待。到秋涼。

又 題鄒九揖像

昔年同學半吳中。飲千鍾。筆如風。斂館毬門。脫帽夜過從。看到江南紅豆熟。分散了。各西東。年來汝客晉陽宮。草黏空。沒孤鴻。落照壺關。匹馬弔英雄。一笑畫師真鷗突。偏畫汝。做衰翁。

又 石榴

茜裙提出錦箱中。向花叢。鬪嬌容。裙影花光，都到十分濃。記得夜涼低壓鬢，偏愛把，綠雲籠。如今朱實畫簷東。亂薰風。綴晴空。極望纍纍，高下綻房櫳。欲摘又憐多子甚，相對笑，瓠犀紅。

又 秋懷

商飈颯沓響高天。弄雕弦。散空烟。蕩槎搖林，一夜透吳關。恰值角鷹西極到，側腦視，色蒼然。野夫江閣撥書眠。笛聲圓。倚闌干。那管草閒，狐兔劇喧闐。且擺撼頭船一隻，蒲葦裏，釣秋鱸。

又 鮑讓侯載酒汎舟同于皇仲震商原佩紱家弟魯望小泊城南諸寺紀所見

西風脫葉響高天。酒如泉。發狂顛。驀遇嬌紅，澹粉佛堂邊。恰似溼雲欹一朵，扶不定，竹欄前。老夫側帽興翩然。晚妝鮮。屨痕圓。何事匆匆，又上菊花船。市火風簾十萬戶，人不見，水成烟。

又 春雨新晴過吳城西禪寺登摩利支天閣同澹心園次雲臣南水賦

連宵怯雨思難裁。鵲聲催。曙光開。且逐晴絲，蕩漾繞城隈。我比晴絲還更懶，風送我，轉徘徊。千尋佛閣倚崔巍。眺胥臺。漫生哀。閣外遙山，幅幅疊春苔。爭學諸天螺髻樣，青萬朵，逼窗來。

又 郊游卽事

心情早起太聊蕭。出晴郊。涉蘭皋。雲水茫茫，不認路條條。只揀暗香深處去，還趁著，賣錫簫。春流碧到第三橋。野梅嬌。綻籬腰。何處絲楊，和了酒旗飄。遙望前村偏隔水，亟喚個小船搖。

又 秋日同雪笠家弟子萬過恭士南郊書舍

開元寺外水雲寬。竹檀欒。岸巒岈。晴翠飛來，溼透幾會乾。碧碧黃黃都滴向，籬落外，遠林攤。茅堂恰對此中安。荻花灘。菊花闌。長晝攜僧，同註馬蹄篇。忽見荒城蒼鐵色，百戰後，箭成瘢。



又 沙隨感舊

思量往事極分明。小徐卿。呢雲英。蕭寺幽窗。檀板勸銀罌。兩小一雙描不盡。紅燭下。態盈盈。西風捲起隔年情。寺鐘鳴。記前生。落葉中原。恰又攢離程。淡月曉風昏似夢。和淚也。出層城。

小桃紅 如皋冒天季自署信天翁向予索詞因有此贈每句中俱暗用禽言及鳥名

得過還須過。得過且過禽言力作音做如何作。力作禽言說甚餅焦。婆餅焦禽言管他泥滑。泥滑滑禽言且圖著火。摘筓著火禽言任權山秦吉了鳥名聰明好曹騰些個。姑惡姑惡禽言誰能那。急急歸急急歸禽言休錯。音挫提罷葫蘆。提葫蘆禽言世間那有鳳凰如我。鳳凰不如我禽言歎連朝行不得哥哥。行不得哥哥禽言信天翁鳥名且坐。

月上海棠 游顧龍山山在金沙城外相傳明太祖曾駐蹕此山

一拳小結青蓮瓣。有離離、金剝鋪烟阪。聞說當年翠華巡、朱旗暗卷。殘碑在、搖落空  
捫苔蘚。京江北固千秋顯。傍南朝、易惹傷春眼。何似埋名、卻依然、丹崖蒼巘。春花  
落、鶯囀空山齋館。

歸田樂引 題王石谷晴郊散牧圖

散牧涼秋月。或樹根、痒而摩者。或飲寒湫窟。渡者人立者。蹄者。鳴者。喜則相濡怒相  
齧。矜秋露毛骨。昂首森然如陵闕。綠崖被坂。麝蔽滿林樾。駟一塞馬七豕牛羊百  
三十。牧笛一聲日西沒。

又 題春郊禊飲圖

粉墨真瀟灑。綠楊天樓臺。金碧陣。湔裙社。杵也茗椀也。竹也。絲也。掩映花叢柳綿  
下。風簾烟際挂。牆裏鶯啼鞦韆架。抱琴童子。穿過春山罅。詠者立飲者。弈者謳者。  
一幅龍眠西園畫。

西施 席陵某宅歌姬有旦色演西施者色藝雙絕比再過其主人已逝此姬

亦適人矣。悵惋久之爲賦此闋。

偶然小駐卓金車。聽曲傍簾紗。司空筵上十隊拍紅牙。就裏雙鬢不肯施鉛粉。一縷鬢堆鴉。三年重到蕪城路。空流落、可憐花。銀牆綠柳。愁煞那人家。他日江船。倘遇啼衫客。休輕撥琵琶。

又 玉峯公講席上贈施校書

半街絲柳帶烟拖。深巷入官河。畫船銀蠟。趙李夜經過。聞說蟲娘新自茸城到。喚取奏清歌。闌花簌簌聞歌落。重趁拍、小婆婆。地衣翠滑。扶不穩鸞靴。嫌煞流鶯。偏在東風底。學唱定風波。

千秋歲 壽柏鄉魏相國二首

黑頭台鼎畫戟牙門整。文筆健。風裁正。芙蓉丞相府。屈軼中書令。論事業。從來魏自同於丙。北斗斜珠柄。南茹陳金鏡。司馬相。臣民慶。明堂朝玉帛。太廟編鐘磬。魚水樂。千秋不數貞觀盛。

沙堤隱隱。直接丹青近。臣稷契。君堯舜。天留黃閣老。月照頭廳印。還說道。秋期今日懸弧準。簾外涼飈緊。階下新桐引。仙醞熟。宮袍俊。地居卿貳上。骨帶神仙分。齊獻祝。恆山蒼翠堆千寸。

又 詠紙鳶二首

翩翩自喜。跌宕青天裏。麥鐵杖。鳶肩子。盤空筭夜叫。削草鷹秋起。輕俊也。一場搬弄真兒戲。三十年前事。觸著難忘記。楊花港。桃花寺。鄰童誰更在。老眼頻經此。重拈看。原來依舊情如紙。

摩空決起。此事偶然耳。材最小。風偏利。輕狂應有恨。浩蕩憑誰致。須記取。青春牢把長繩繫。已自飛騰遂。也算雲霄器。莫浪語。休私喜。送來天上便。望向城頭悸。真險著。老夫只合街頭睡。

又 滄州戴浴扶以人日懸弧作詞以贈

新鷹決背。已作摩空勢。筆陣快。詞鋒銳。溫邢何足道。燕許真同輩。才八斗。綵毫人是

青雲器。鷓鴣君家事。三禮箋完未。才地盛。門風貴。新春歡七日。小令歌千歲。微醉也。斜飛玉燕東風細。

離亭燕 雨中將發梁溪雲臣拉赴竹逸齋頭看梅小飲數巡匆匆判袂升臚

若失悵賦小詞

花妮行人小惹。鶯怪行人低罵。正值小樓開似雪。抵死只將帆挂。粉淚臉邊明。脈脈含情待話。囑付梅清月寡。暫耐雨婚煙嫁。此去春江帆正滿。路隔纔踰一舍。待汎惠泉歸。相賞水邊籬下。

于飛樂 鴛鴦

彩翼文禽。一生睡暖漣漪。葡萄春漲初齊。度朱欄。穿綠浪。做弄葳蕤。畫樓低處。金塘好。漾盡紅衣。孔雀樓頭。錦雞關上。讓他毛羽芳菲。惹黃鶯。和乳鴨。妬爾雙栖。生憎杜宇。東風裏。只向人啼。

隔簾聽 聽舊家歌伎隔牆度曲

十載畫樓烟月。凝想歸何處。黃纒新作瑤妃侶。悵碧海茫茫。瓊樓清苦。無一語。掩紗窗。低籠雁柱。將情訴。妝樓一所。紅粉牆圍住。歌聲偏透紅牆去。想他牆內。新愁萬縷。伊知否。隔牆一般悽楚。

師師令 席上同雲臣詠雛姬

勻紅剔翠。擲星眸斜賣。春嬌尙未忒玲瓏。卻已會三分無賴。笑匿花叢衫影在。怨風吹羅帶。銀箏研緊雞鳴快。做殢人情態。玉船頻到只推辭。道酒病。昨宵曾害。按碎紅梅庭下灑。罵粉郎心壞。

又 汴京訪李師師故巷

宣和天子。愛微行坊市。有人潛隱小屏紅。低唱道。香橙纖指。夜半無人鶯語脆。正綠窗風細。如今往事消沈矣。悵暮雲千里。含情試問舊倡樓。奈門巷。條條相似。頭白居人隨意指。道斜陽邊是。

隔浦蓮近拍 飲小三吾亭前古樵下

今朝禮春天氣。絃服爲佳耳。人在梅根治。暗香疏影。迢遞。棧內紅生。杯中綠汎。小吸  
宜城。錢消魂死。那人蛾綠。料應玉貌如此。難憑春驛。折寄一枝千里。橫笛誰吹東  
風起。生怕玉鱗。飛著春水。

又 夏日村居

空村如澹靜悄。不用鄰翁掃。水榭簷聲響。沙映水逾瀟照。傍岸松半老。閒來靠。漫理  
晴江釣。釣絲裊。涼颼暗襲。得風叢竹都笑。帆投極浦。兀兀櫓聲將杳。興倦收綸起  
荷蓀。恰好。窺人一點月小。

又 暮秋江上偶步萬佛林卽黃介子先生舊宅

西風吹響古木。亂葉埋僧屋。略約鋪蒼蘚。攀樹癭穿崖腹。江郭圍楓榭。登山麓。遙望  
銀濤。蠹賊心目。王珣池館。沙鷗浦鴨爭浴。一聲齋磬。彷彿雨淋鈴曲。踏徧繚垣尋  
斷鏃。茶熟。老僧帶暝歸獨。

又 夏日寓吳門花溪草堂與西溟夾水而居賦示西溟

玲瓏雲水幾處。借我閒消暑。掠檻沙鷗過。潭香觸碎成雨。千頃風荷舉。紅妝嫵。細葯中心苦。最憐汝。披襟脫帽。新涼隨意奉取。松風細響。綠雪暗翻花乳。林際濛濛皓月吐。四鼓。隔波尙有人語。

又 賞荷同南耕緯雲賦

空明雲水浩淼。渚瀨叢幽篠。綠淨誰能睡。瓊奩啓簾漪悄。啁晰騰翠鳥。菱潭窈。紅藕花開了。數枝裊。蓮娃極浦。羅裙爭盪清曉。盈盈翠榜。烟舸競將紅鬧。摘得荷房縹葢小。月皎。兀波柔櫓聲杳。

傳言玉女 雨中舟次吳閶不及過晤園次同緯雲子萬寄懷

記得尋君。纔過匆匆燈市。伯通橋下。挽征衫且憩。垂柳幾樹。臨別倚欄斜指。再來看汝。定鵝黃矣。柳已鵝黃。擷頭船恰又至。滿船絲雨。捲春簑困睡。微茫驛樓。料想水城將閉。知他花下已應微醉。

又 舟經懷遠訪凌道一



半載繁臺憶。別來秋水。今朝重見。喜碧猶如此。無數簪簪零亂。烟橋夜市。估船夾岸。鄉愁千里。聞道君家在街頭。黃葉裏。情親小話。喚篙師暫艤。崢泓淡沲。隱隱江樓。笛起關山一望。何其明綺。

百媚娘 春日憶洛下舊游

草把裙兒腰比。花與臉兒潮似。恰聽枝頭鶯語滑。眉逗一絲新喜。聞說酒旗歌板地。多少嬉游子。憶在洛橋晴市。又向洧川烟淡。一斛柳綿飄不定。撲著車如流水。無數鞦韆牆角裏。天半紅繩起。

又 送晦仙校書落籍次友人韻

日午鶯猶貪夢。風定花誰搖弄。聞說長條新有主。縱與纏綿何用。雖不干卿愁卻種。嬾把春鉤送。夾路香塵將動。一曲紅綃權奉。從此真成千里隔。只有月明相共。戲語小樓燕赤鳳。掌舞休嫌重。暗用飛燕故事校書微豐故戲之

別銀燈 佛手柑不至詞以寄慨

記得當年此際。風送閩天柑子。珠舶帆輕。花洋浪細。香徧吳頭楚尾。武夷仙使。向縹緲鯉湖傳至。詎料巖關笳吹。竟隔千山萬水。天竺烟深。潮音月落。今日不知何世。匆匆彈指。都不道、江山如此。

又 春景

陣陣蘭情水意。隊隊描朱刷翠。小巷蘼蕪。斜街皂筴。都被雨酥烟膩。東風多致。簸弄做賣餚天氣。莫負年光韶媚。早辦漁樵家計。故國繁華。前生詩酒。身似潯陽江伎。且拚沈醉。做蝴蝶、向花間睡。

又 燈節前一日雨中雲臣招同楨百大士雪持集飲蝶庵四事

記得昇平佳麗。此夜是上元天氣。圓月打頭。暗塵隨馬。陣陣梅邊水際。茜裙珠髻。喧笑處、香街聲沸。今歲冷清清地。未晚禁城先閉。一盞燈昏。千家門掩。釀就春寒恁細。雨絲飄砌。展幾疊、小屏圖醉。

解蹀躞 夜行滎陽道中

峽壁成皋古郡，人雜猿猱過。斷崖怒走，蒼龍立而臥。此乃廣武山乎。噫，曩古戰場哉。悲來無那。卸鞍坐，烟竹吹來入破。一林纖月墮。雁聲不歇，砧聲又攪和。歷歷五點三更，馬前漸逼滎陽，城頭燈火。

又 秋雨夜宿田舍

蝻蝻孤村斷壠，只浪花翻舞。疏檠自綠，茅簷伴人住。休問紅糯黃梁，總塞菰米菱絲，溼烟難煮。夜將曙。白項鴉啼棠樹。樹西近官路。叢叢古廟，老巫擊銅鼓，敢倖今歲西成。祇祈暫歇牀頭，淙淙秋雨。

下水船 暮次丹陽宿周丹申齋中同湯谷賓夜話

風吼慶亭樹，曠黑難投逆旅。徑詣君家，呼酒喃喃爾汝。此間路。一派濤轟沙莽，幾陣烟淒風苦。凭欄顧，鬚氣荒終古。笑問寄奴何處，若爲吾歌，吾爲若拍張舞。天將曙。起掃車箱冰花，爭火僕夫寒語。

碧牡丹 牡丹鮮碧著向在鄢陵曾見之追賦是詞

隔葉尋難著。勝玉樹、欺紅藥。縹色衣裳。睡熟沈香亭角。一朵雲鬢。被雨梳風掠。趁花容。輝烟萼。柳陰薄。色向苔錢落。波痕皺。眉痕弱。鸚鵡籠中也。整綠衣。偷學。一別名花。恨碧雲天各。倩青鸞。到湘閣。

風入松

上巳後二日洗鉢池汎舟卽事同亦史山濤賦

蜻蛉小泊斷橋東。人在櫓聲中。水面殘霞飛不定。春波靜、暝翠玲瓏。夾岸緜桃斑竹。半船淡月微風。紗窗盡摘簾紋融。心事暗惺忪。小拂絲楊人語細。春衫碧、恰似新桐。可惜小浯溪上。明朝更與誰同。時阿雲將小別數日

又 苦暑戲與客語

炎炎火鏡正燒空。避暑苦無從。客言安得匡廬瀑。還移取、華井秦松。玉女盆邊吸露。水仙祠畔餐風。答言計總未爲工。不若在軍中。平驅十萬橫磨劍。濤聲怒、硬箭強弓。惡浪千堆蹙黑。戰旗一片搖紅。

又 納涼

當年結夏映層潭。脫帽卸輕衫。柳絲斜颺陰篷捲。釣檻外、碧色微添。橋背嫩涼瑟瑟，村頭老樹毵毵。水天閒話對誰談。城市我何堪。采菱放鴨江鄉伴，無人問、老子溪南。浮世飛鴻雪爪，故山亂葉茅庵。

又 寒鴉

欹斜嬾漫徧燕關。僵冷甚袁安。誰將水墨濛濛畫，做邊城、一抹荒寒。小日曾藏柳葉，前身慣上釵鬢。無端誤點早朝班。髣髴認龍顏。六宮怕有人爭妬，帶昭陽、日影飛還。惆悵舊遊何處，孤村流水之間。

婆羅門引 題露筋祠

露筋祠下，寒篷淼淼去何之。停橈一問靈旗。怱悵十年古廟，陳蹟幾人悲。只風前燕子，雨後棠梨。俯仰歔歔憑弔處，更憐誰。惟有淮陰漂母，一樣蛾眉。估船爭泊，問何人，拂蘇一題詩。依稀見玉佩珠衣。

又 香櫟

晚風千顆纍纍。纔與畫簷平。綻來剛趁秋晴。怪底勻圓如許。青女手搓成。乍迴廊小摘。冷韻旋生。冰瑩翠巒。壓疊在小紅檠。弄影夕陽黃處。檀暈偏明。空香如雨。最宜人。昨夜恰微醒。何須數。西窗霜橙。

荔枝香 早春校香嚴詞竟寄孫無言於揚州

雨後春梅初浣。開篋衍。試取紅杏尙書。小令閒編纂。幾番拍徧新詞。絕調千秋罕。翻惹簌簌輕塵。畫梁滿。書寫竟。正江上。楚山晚。鴨綠粼粼。笑倩雙魚寄遠。到及廣陵。明月橋頭夜簫暖。早付竹西歌管。

拍闋干 過蝶庵書事

沈吟檻外。分明有個人兒在。隔著軟簾聞細款。轉過屏間。做就生疏態。夜來曾否春醒害。底事無言。只撚筵篔簹帶。曉寒伴脫紅綿耐。檢出香詞。細覓檀奴解。嗔人暗把風情賣。嚼爛花箋。碎向粉牆拋灑。

祝英臺近 詠橘

水漾漾。烟嫋嫋。紅遍江南樹。小陸懷中。數顆偏憐汝。笑他梅子心酸。蓮兒心苦。都讓爾。甘芳如許。憎淒楚。記得解襦春織。指冷偎人處。一別吳娘。往事渾無據。自從那日傳柑。幾番元夜。總則是。淚珠如雨。

又 元夕後一日同雪持京少飲雲臣齋頭

軟簾垂。孤館悄。燈燼穗還纏。纔過元宵。便有嫩陰做。幸值俊侶嬉春。狂朋選夜。拚擋得。心情較妥。斟紅糯。醉後多恐塵寰。無計容留我。小海傳聞。種露桃千顆。與君擲笛宮牆。掃花洞府。翦幾闌。霓裳偷和。

又 善權寺相傳爲祝英臺舊宅寺後一臺云其讀書處也壁間舊有谷令君

一詞春日與雲臣遠公披蘇讀之共和其韻

傍東風。尋舊事。愁臉界紅筋。任是年深。也有繫人處。可憐黃土苔封。綠羅裙壞。只一縷。春魂拋與。爲他慮。還慮化蝶歸來。應同鶴能語。贏得無聊。呆把斷垣覷。那堪古寺鶯啼亂。山花落。惆悵煞。臺空人去。

又 舟夜聞簫

水烟昏。塘月午。欸乃亂更鼓。颯沓空橋。浪急打楓樹。恰逢羈客停船。誰家樓上。忽飄墮。簫聲一縷。淚如雨。對此萬里清光。舊家在何處。人世何聲。更似此淒苦。依稀記宿江州。蘆汀蓼渚。有十萬。夜猿齊語。

又 題季柔木小影兼誌別懷

紅韎韜。紫羅囊。小縛黃皮袴。快馬健兒。裝急憑君作。更聞歷落嗽。交游然諾。依稀是君家之布。歲行暮。可憐雪浪煙帆。來朝趁人渡。呵手敲冰。爲君一題句。他年展軸哦詩。懷人顧影。好頻寄。江東魚素。

又 糊窗

研光箋。白地錦。糊就幾楞雪。玉淨珠融。不怕沍寒冽。虧他貯旭娛冬。留香伴夜。惹月練。和煙縈纈。寸心折。那得蜂咂鶯穿。漏個針尖缺。歸夢徜徉。免被瑣窗截。翻思故國茅簷。殘缸擁背。聽敗紙。戰乾風葉。



又 春游偶憩靜山禪院

隔溪村。臨水店。行處誤偏好。趁寺尋鐘。鐘響冷於瀑。粉梅纔綻些兒。被誰烘坼。算晴色。朝來逾峭。亂帆杳。一半消入煙中。空潭劇幽窅。小憩經房。無言只微笑。此時正定吟魂。浦禽多事。又踏折一枝煙篠。

又 維摩天女恰同參爲閣牛叟賦

牛叟兌閣遺徵曰。妻屢勸予參訪耆宿。

究向上一著。而以鈍根未果。近慚龐媪遠負萊妻。

水精簾。翡翠鎖。不許俗塵浣。繡罷參摩。窗畔茜絨唾。分明薔蔔林香。楞伽寺靜。只多了。阿奴旁坐。歸去可。好趁水月潮音。早上雪山座。怪煞蕭郎。彈指景光錯。請伊試看人間。閒花浪朵。總一霎。笛聲吹破。

又 送陸雲士之任郟縣

雁頭箏。龍尾撥。曾記帶儂處。轉眼畫旗。嫋嫋引君去。遙知小陸風流。來春縣裏。種紫豔。紅香無數。郟縣路。淼淼晚渡秋山。我昔作行旅。一髮中原。風起濁河怒。君經洛

水平橋。陸渾小店。定和我蘇牆題句。

又 杞梁妻祠下

在齊河縣長城鋪

畫旗飄。靈幟捲。彩翠斜如雨。玉貌明妝。隱隱怨蛾眉。聚可憐。枳殼花開。凝丹點絳。盡千載。啼斑偷注。黯凝佇。滿壁水墨全昏。猶把斷腸譜。繡帔尼師。指點向廊柱。怪他哭後長城。崩餘粉堞。忒畫得。周遭如許。壁上畫祀梁遺事。一帶長城歷歷如見。

四園竹

題西陵陸蓋思繞屋梅花圖像

西陵高士。小隱段橋東。十年酒聖。半世詩顛。千古文雄。銅將軍。麴道士。楮先生。者三君蹤跡時同。屋如蜂。屋頭無數冷香。籬門都浸其中。鎮日和煙和雨。點點欹斜。片片朦朧。杯在手。長側帽。林間一笛風。

又

龔節孫臥疾東郊秋日過訪用片玉詞韻

山光水態。濃淡上烟扉。菊搖暗壁。蛩語壞廊。人臥蕭幃。停碧簫。歇翠管。檀奴懶況。小窗風月應知。漫淒其。牀頭尚有龍泉。從君且訂交期。戲作燕名豔體。閒檢方書。寫

上香辭。臨欲去。日影燼。茶烟颺漸稀。

撲蝴蝶 詠蝶

一生蹤跡。總在花深處。幾番消受。小院紅樓午。黏來珠幌如癡。落上繡裙成雨。有人記。曾暗結同心苧。如今重到。依稀不認他門戶。滿園野菜。領游蜂三五。惹殘流水難憑。舞徧微風莫主。賺人一天花絮。

側犯 奚蘇嶺先生書來訊我近況詞以奉柬

罷官不樂。畫簾暮卷空江雨。無緒。憶罨畫溪頭有人住。階前灌莽合。屋後虬梅古。傳語。問彊飯。還能著書否。使君足下。別後難行路。嗟帶甲滿乾坤。只有儒生誤。昨已廢書。行將學賈。市上屠牛。山中射虎。

又 百花洲訪南水上人

閒尋茂苑。摘船碾徧琉璃滑。明滅。望半畝精廬隱林樾。空香黏茗粥。野翠連巾拂。幽絕。想夜夜。經臺浸秋月。吳宮似夢。往事和誰說。舊時節。記盈盈。水面蓮歌徹。幾陣

西風繁華吹歇。滿江紅蓼。一園黃蝶。

送入我門來。同龔仲震小飲高汝敬紅梅花下

高係忠憲公孫所居卽忠

憲祠

松漱微波。山鋪暝翠。軟風吹得帆斜。柴門將掩。步履詣君家。靈均祠畔多香草。總變做孤山樹樹花。小縷紅糟雞跣。選花陰碧磴。弄酒拈茶。況有良朋。憑醉作生涯。明朝搖櫓入城去。約仍過山窗聽暮鴉。

又 寄書

香茗才情。簪花模樣。斜舒蜜色箋兒。霜毫纔吮。早已淚如絲。楚天樓上湘娥倚。奈湘雨湘煙十二時。說與天涯游子。近日懨懨春病。生怕難支。爲趁雙魚。無物寄相思。眞珠滴向紅綃滿。怕綃滑珠圓難寄伊。

一叢花 詠白丁香同遠公天石和原白韻

一枝低亞晚妝臺。吸露沁蘭胎。李花柳絮都難似。染梨雲、一色新裁。白粉牆邊。水明

樓上動竊玉情懷。纍纍銀粟費安排。爭趁月中開。曾經打就心頭結。相看處。脈脈疑猜。記得重門。和他小摘。此事十年來。

又 楊梅

江城初泊洞庭船。顆顆販勻圓。朱櫻素柰都相遜。家鄉在、消夏灣前。兩崦蒙茸。半湖鸞屐。籠重一帆偏。買來恰趁晚涼天。冰井小亭軒。妝餘浴罷春纖溼。粉裙上、幾點紅鮮。莫是明朝。有人低問。羞暈轉嫣然。

又 閏三月三日竹逸齋頭看紫牡丹記前月修禊虞山故前半闋及之

琴川前月記幽探。艇子漾柔藍。冶游恰值人修禊。風光在、碧嶂紅潭。街上錫簫。山邊薺菜。春色上春衫。今朝魏紫放晴簷。麗景十分添。一年最好惟三月。誰頻見、兩度重三。花好逢王。春濃遇閏。樂事豔江南。

玉女度千秋 壽吳母任孺人

八十稱觴。齊仰裙笄尊宿。如雲子姓。捧鈿車歷碌。春暉縈寸草。巨室森喬木。思往事。

青陵臺上歌黃鶴。歌罷瘳寒。母績還催兒讀。兒已成名。孫又饒蘭玉。真妃來洞府。天姥掛醺醪。願百歲。滿裙常趁晴波綠。母以上巳日設帳。

過澗歇 暨陽秋城晚眺

壞堞頽闌暮烟積。悄乎無人。祇聞江聲千尺。混茫礧。恍見水仙海妾。採月金鰲脊。吾長嘯泉底。恐驚織綃客。春申遺壘在。古戍吹笳。亂洲伐荻。碎把闌干拍。沙草無情。不管興亡。朝朝暮暮。西風只送巴船笛。

又 顯德寺前看楓葉

嵐翠濃於草鞋夾。繞坡細流。濛濛暗通茗雪。谷聲逕。下落亂泉聲裏。愀悄如相答。此間景。純得關仝巨然法。寺松三百本。雨溜蒼皮。霜彫黛甲。秃榦爭欹壓。笑語同遊。黃葉鳴簷。丹楓裹寺。如何不荷埋身鋪。

又 自蜀山至李墅一帶居民皆背山距河以陶爲業沙鳥清曠墟落邈然紀之以詞

夾岸斜橋界山側。雲延陌阡。人家柴門俱仄。翠螺織。奇者獅蹲象跛。欲起還愁踣。崖門破。總被老苔壽藤蝕。居民燃楚竹。散誕陶漁。巖棲澗食。帶雨閒搏埴。陶侃甕前。畢卓甕頭。窳烟四起。陣雲一朵壓城黑。

側犯第二體

真娘墓和扶荔詞韻

碧闌干外。小墳一點。衰桃斲。淒咽。剩綵袂。飛灰化蝴蝶。靈旂飄復偃。社火明還滅。芳骨約西子。吳天訴潭月。三生事。五吏風。陣陣觴簫歇。耳邊怯。怕枝頭又到啼紅鳩。昨夜聽歌。石場如雪。夜臺猶卸玉簪偷節。

紅林擒近

詠佛手柑

芳樹來甌越。名同吳下柑。風調軼橙橘。芳華擅閨襪。玉人夜涼酒醒。怪底薰透紅衫。此際寶鴨休添。香氣十分霑。月底偏濯濯。枕畔故摻摻。佳人笑說。雪山花瓣曾拈。自塵情未斷。佛猶如此。合掌長思伴玉纖。

又 人日雪中作

千斛玉塵暗。萬家冰館開。海素障窗榻。絕霜凍妝臺。扶將銀人上勝。染取白燕搖釵。獻歲七日剛纔。偏砌就瑤街。阻絕挑菜侶。愁極踏青鞋。何時出郭。春晴好散春懷。待傳柑過了。賣錫節近。湔裙准傍溪水涯。

又 大鴻有西河之感作此代唁 大鴻次子無逸沒於嶺南幕中

黃蛤沈香浦。綠犀惶恐灘。山郡荔枝葉。驛樓鷓鴣斑。鬱孤臺高一去。瓊島水闊難還。金齒細屐花間。茜血灑紅蠻。黎女雙袖淚。梅嶠百重關。檳榔椰子。枉勞贈自珠官。悵花田草滿。海天月出。小籠失卻金尾鷗。

小鎮西 臬署夜坐聽前庭演劇似是邯鄲巡河一齣追憶東臬舊事感賦此

詞

小颺夜笛風。碎珠十斛。歌絲裊。檻花輕籟。此何曲。翠陰陰。尋去如塵。想處疑烟。一庭幽瀑。滿場哀玉。逗紗麴。漸循聲細認。是邯鄲曲。年時景。暗中潛觸。瘦蛾蹙。悵零簫。剩管。耳邊又續。算來人世。偏有黃梁難熟。



皂羅特髻 憩慶雲庵方丈後小軒

山風幾斛。吹萬笏晴螺。寺前堆積。陰陰竹院。與塵寰都隔。斜川外。幾姓漁蠻。攜綠簫。醉臥菱湖柵。雨添溼翠。怕晚來偏劇。小豎僧寮茗粥。助玉川茶癖。禪榻後。三間茅閣。恰面對。九龍峯脊。推窗驚叫。怪龍鱗都裂。

有有令 詠畫眉鳥

風柔日媚。一盞小金籠。繡簾深處墜。紅萱同心結。緊綰在。東風裏。最愁他。點徑蜻蜓。銜泥燕子。往來容易。嬌影閒臨淥水。倩小玉。摘相思子。好把鴝兒打去。休攪春宵睡。隔花悄喚名字。遠山卓氏。錯認做。畫眉郎至。

最高樓 登原白齋中露臺

闌干外。淼淼暮雲平。疊疊亂峯生。六街燈火烟中沒。萬家簾幕雪中晴。好樓居。吟不就。畫難成。弄一會。桓伊天際笛。蠟一會。嵇康林下屐。憐故國。笑浮名。興酣便擬驂鸞去。酒狂乍可御風行。俯塵寰。青一點。月三更。

幕山溪 感舊

碧雲薄暮。畫角誰家奏。深院火熒熒。好風輕。翠幃微皺。冰輪徐上。無語掩屏山。金鉤瘦。鮫綃透。人在銀燈後。年時小苑。良夜曾攜手。低掃淡黃蛾。漫垂垂。玉人紅袖。如今人去。門巷也依然。紅橋口。香街右。一帶青青柳。

又 天穿節次葛魯卿韻

曉寒惻惻。繡戶涼如水。燈市火初收。不十日。春暄北里。都城士女。結隊踏天穿。珠絡鼓。畫樓旗。漾在東風裏。江南詞客。生長煙花地。可惜是穠春。最難忘。夢華遺事。倚闌悵悵。暗裏憶當年。新雨後。板橋西。那處人家醉。

又 東溪雨中修禊

蝸廬蟻國。不醉公何補。脫帽放狂歌。自古說。英雄無主。攜朋命酒。船泊畫溪東。挑薺菜。焙新茶。飽看浪花舞。小村背郭。蘸綠楊千縷。春事漸飄零。總付與。數聲柔櫓。今朝天氣。何必定鮮新。三月雨。一湖風。翻樣蘭亭譜。

又 惠山泉亭看月

亂崖杏嶂。肯放籃輿倦。嗚咽夜泉吟。石欄邊。冷雲鋪滿。攬將一卷。陸羽鬥茶經。煎雪乳。碾龍團。幘向松風岸。碧天叫雁。街鼓三更斷。矯首盼冰輪。心已共。輾轡爭轉。今宵桂影。休墮纖綃宮。人更悄。夜無聲。恐惹魚龍怨。

又 禊日感舊悼遠公也

去年上巳。正值春陰候。千古豔蘭亭。況歲是。重逢癸丑。濛濛烟艇。小泊畫溪東。林花溜。溪花皺。雨溼春衫袖。今年上巳。滿眼花如繡。又到去年春。只少個。人兒攜手。雖然無雨。難道是晴天。淋漓久。非關酒。依舊春衫透。

又 虎邱送春夜同顧伊人天石留宿山中次伊人韻

風濤掀舞。蟬鞞何曾住。曠黑斷人行。便箬帽。櫻鞋難去。堂堂春盡。含淚唱淋鈴。鶯花數。長亭路。註定今宵雨。夜方踰午。投宿支公宇。禪榻不成眠。聽牆外。曉鐘將度。飄紅墜粉。何限寺門情。挑燈句。凭闌語。各有關心處。

又 南澗山房作

朱扉碧檻。壘石支牆罅。曾記鎖東風。誰輕到、小簾櫺下。如今世換。松鬢枉拏雲。人去久。小樓空。園裏梅俱嫁。支頤太息。此意誰知者。眼底足悲歡。休聘望。秦臺漢瓦。梅風醒夢。何必訴興衰。閒酌酒。細捶琴。自把高懷寫。

新荷葉 采蓮

水郭開奩。釀成一片湖光。翠蓋亭亭。扶他幾隊紅妝。誰家女伴。采蓮歌、競下橫塘。吹來笑語。竟川霧鬢風裳。日暮歸來。畫船猶剩餘香。此際冰輪。天邊又送新涼。覓蓮得藕。心兒苦、隱隱商量。今宵蓮子。劈來生怕空房。

又 本意

綠纈成帷。江妃織手初紉。疊徧錢錢。較花饒有清芬。蓮舟出浦。水雲寬、碧到無痕。嬌擎翠蓋。彩鴛穩護腰身。風起青蘋。纔低旋舉。繽紛戲灑泉珠。側盤瀉玉傾銀。摘時須早。怕秋來、最不宜人。後湖衰柳。同他一樣消魂。

又 新霽郊外紀游

日麗風柔。水邊天氣鮮新。閒坐斜橋。數完幾折溪痕。酒旗戲鼓。怯餘寒、未滿前村。小紅乍乳。鶯聲一巷纔勻。節過收燈。風光尙未踰旬。粉糝疏籬。誰家香玉粼粼。雖晴嫩霽。似垂髫、好女盈盈。江南烟景。帶人尤在初春。

又 踰天長郭門里許修隄被渚高榆蔭街隔水一亭曰放生池菱荷沙鳥頗極幽映歇馬徘徊賦詞寄興

席帽炎途。長征事與心違。歇馬溪橋。拍波水鳥斜飛。林泉幽邃。涼如雨、亂點人衣。曲潭脩坂。新荷短芰成圍。白板雙扉。茶烟輕颺漁磯。小店雛鶯。江南景未全非。被他重喚。揚州夢、往事依稀。蜀岡凝黛。迢迢送我難歸。天長爲初發揚州第一程

早梅芳近 詠玉蝶梅

整偏佳。斜更好。風格那能到。粉箋欲賦。除是多才李清照。亭亭情意厚。嫋嫋腰肢小。正入春陰重。白處妝樓曉。夢無憑。愁不了。從古江南道。天寒日暮。此意惟花堪共。

表。文犀慵再掠。金鴨羞輕抱。撚梅花。今年驛使杏。

柳腰輕 贈妓和柳屯田韻

白家蠻柳絲絲軟。織不盡。鶯和燕。釀雪輕陰。填詞狎讖。況遇曲中高選。泥金襪。醺雨  
逾鮮。墨花襦。無風猶顫。誰耐鈿箏袞遍。小立在。紅橋窄板。文鴛薄倖。青娥憔悴。鵲  
信沈吟都變。偏今夜。不肯留儂。聽門前。暮鴉啼斷。未數語。調鬪次兒也。

千秋歲引 壽蘧庵先生七十

松作龍形。棗如瓜大。游戲神通復何礙。當初搖鞭過韋杜。而今泛宅來吳會。鳳凰池。  
麒麟閣。抽身快。且喜墨離山潑黛。且喜元宵燈尙賽。萬事難消風月債。茶鐺沸來。  
同字煮。酒旗挑處和愁賣。四時花。三弄笛。身長在。

拂霓裳 冬夜觀劇

釀寒天。六街皓月盪成烟。腰鼓鬧。騰騰雨點打來圓。銀燈籠暮靄。鐵撥迸秋泉。映嬋  
娟。想後堂笑語總羣仙。教坊絕藝。一隊懷智龜年。君不醉。風光孤負十分妍。醉餘

偏惹恨。歸去不成眠。忽淒然。悵桐花、一樹翠簾前。

爪茉莉 月夜渡揚子江

森森江天。聽中流笛響。推篷看、一川淒爽。六朝遺蹟。問風景、幾曾無恙。只隔岸、建業城邊。有商女、深夜唱。一輪團月。與船頭、正相向。越顯出、萬層銀浪。十年作客。算將來、祇悲愴。且渡江、溯跡騎奴廝養。學販舂兼鬻醬。

又 茉莉

暑院追涼。憶炎荒軼事。蠻娘圃、瓊天粉地。任他開落。極望與、籬花相似。更帶暝、紉雪成團。沿坊叫喧夜市。贛州船下。到吳天、伴羅綺。相寵愛、夜堂空翠。而今離散。判分攜、幾千里。料幽花、也怨月明如水。海天冷、那易睡。

滿路花 荷珠

紅綃水面妝。碧玉波間柄。低迷扶翠蓋。西風勁。玉人搖櫓。隔浦蓮歌競。花面交相映。戲取春纖。掬他潭水芳冷。灑來錯落。盡向錢錢迸。鮫珠圓又碎。難持贈。低鬟凝想。

總似檀郎性。蕩漾何時定。惆悵迴船。碧天早挂明鏡。

又 贈梵公師住雲門工書畫時以選詩來荆溪

荷錢貼野塘。竹粉黏晴砌。師從何處到。雲門寺零箋爛本。點筆聊軒輊。試將小語戲。高岑王孟。關卿定復何事。平山堂下。鴻爪依稀記。北邙王與宋。曾同醉。謂西樵茲

裳兩先生。重逢瓶拂。頓下山陽淚。更欲游何地。他時念我。巨然小幅須寄。

又 詠禹門寺前一帶頽崖峭石

嵌空撐戶牖。繫翠支堂奧。淙淙巖溜響。喧銀瀑。礲确豁訝。鐵色黏青嶠。石筍攢丹竈。積雪層冰。玲瓏原隰俱縞。或爲怪鵲。或作千年豹。或似秋江岸。晴龜曝。林青日黑。山畔歸樵少。野火連天燒。虎腥如雨。瘦石此時更峭。

洞仙歌 詠慈仁寺古松壽紀伯紫

摩空翠鬣。萬古知難老。色作青銅雪霜飽。似杜甫驚人馬。卿慢世。二子者。可以狀君兀冪。託根燕市側。遊戲支離。一笑風塵此鴻爪。任絲管喧闐。貂蟬赫奕。更七姓。鞭



絲醉裊。只西風、吼處作濤聲。對鳳闕龍墀。吾存吾傲。

又 過汜水縣虎牢關作

積鐵蒼然。關勢臨崖。嶄絕東京好門戶。挽藤蘿月黑。誰恐行人。落葉捲聲似牢中哮虎。無情惟洛水。日夜東流。不爲愁人帶愁去。寂寞北邙山。苦對西風。排一派。唐陵漢墓。任弔古傷今已無人。只霜打棠梨。暗啼紅雨。

又 偶過帖雲上人蘭若見其庭下紅梅盛開漫詠

傷春病酒。日三竿貪睡。睡起閒行巷南寺。老僧烹活火。碾罷龍團。七椀後。門外爛柯誰記。驀看花朵上。頰臉微烘。似帶三分午前醉。索笑漫沈吟。莫是東鄰。茜釵上火珠初施。只認做、空門本無愁。又誰信、枝枝盡彈紅淚。

又 善權洞

天風忽下。劈破青紅繭。夸父愚公費裁翦。看千螺倒矗。萬笏斜垂。鋪碧蘚。一屋閒雲自鍵。玲瓏光上下。一串銀房。偏借虛空縈層巖。洞底洞還生。下有泉鳴。聲聲亂雲

中雞犬。只石怕春寒。悄無人。卻走入牆陰。化成雷篆。善權寺內有雷書火篆。

又 澹心園次梁汾問波靈本偶集寄暢園聽小奚度曲坐有話水榭姬人近  
事者因并及

嫩晴天氣。坐水明樓畔。三疊泉聲訴幽怨。霎然閒。山半冷翠飛來。君莫去。且棹銀船  
消遣。玉鱗微動處。紅綬雙銜。隱隱歌絲逗簾幔。半闋小秦王。入破方纔。珠千顆。撒  
來成串。又誰話。當年杜秋娘。覺雁柱添愁。聲聲都換。

又 西瓜

嫩瓢涼瓠。正紅冰凝結。紺唾霞膏鬪芳潔。傍銀牀。牽動百尺寒泉。縹色映。恍昉玉壺  
寒徹。夜深呼碧玉。同倚闌干。月色荷香兩清絕。笑問破瓜無。此夜瓊漿。須憐取。寸  
心長熱。見手攬。金刀細沈吟。悄不覺紅潮。早堆肌雪。

又 乞巧同蘧庵先生賦

碧雲耿耿。見銀河低瀉。人在針樓曝衣罷。告天孫。臣本屠釣江東。疏拙甚。願以蛛絲

巧借。天孫含笑答。見事卿遲。大抵聰明讓聾啞。試看古今來。劉項孫曹都留做。殘編閒話。只賜汝。狂騃倍當年。好爛醉高歌。花天月夜。

又 從楞伽上方塔後覓徑下坡過前村觀劇

晴峯亂矗。似叢鸞春筍。貼向吳天翠無盡。映澄湖。幾幅純綠柔藍。紛織處。烟際漁榔隱隱。斷崖橫塔後。捫葛攀蘿。私路縈紆細如蚓。村鼓正喧闐。賽火成圍。雖伶唱。消魂院本。訝蕙地。飄飄綠楊絲。乍小露牆頭。一羣紅粉。

又 題採芝圖爲顧卓侯賦

蒼皮黛鬢。滴金膏丹溜。下結千齡赤芝秀。有先生。杖挂長柄蒹蘆。籃子內。百本木華紅繡。嗒然雲水興。瓢笠隨身。煉朮餐霞老巖竇。戲刷茯苓歸。封寄軒轅。雷文篆。形如鳥獸。笑多事。商顏四先生。同溺過儒冠。一般皓首。

又 途次曹縣

河流浩淼。去黏天無岸。白草黃沙古曹縣。問居人。誰是僖負羈妻。誰惜我。十載蓬科

未轉。一鞭官渡口。颯颯西風。落照昏鴉。太零亂。歎息舊繁華。往事還非。智井畔、兔葵開徧。訪昔日、東平故侯家。恨繡戟牙幢。一時都換。前朝東平侯劉澤清故曹人。

又 上巳後五日游吳門觀音山

紅船綠浪。雁翅排將徧。早有香車俟春岸。內家妝。誰要小鳳簾垂。和弱柳。鬪取腰身纖軟。麝裙飄碧磴。豔粉羣羣。盡倚晴巒譜幽怨。脈脈祝空王。擲眼兒郎。願歲歲、幃前長見。又語悄。風微怕鶯知。早杏臉潮生。碎掇花瓣。

又 龍理侯納姬秦淮詞以贈之

銀牀滑簾。碧陰陰秋水。昨夜簪頭喜蛛縈。算青溪、紅板豔粉濃蛾。娘尤小。第一南朝殊麗。江潮輕打槳。船近樅陽。恰恰喬公舊鄉里。匿笑語檀奴。斗帳櫻桃。祝蜥蜴。早添懷裏。也不枉。人間喚乘龍。看紫貝霞綃。海天無二。

又 題喬石林舍人桃源圖小照

漫郎單舸。壓半溪寒玉。流向秦人洞邊宿。漸前村、竹外一兩三枝。斜冪歷。流水板橋

茅屋。忽然奇絕處。極望花枝。盡亞東風。騁肌肉。萬樹滌胭脂。下映平坡。都不許。蘼蕪成綠也。莫問。花紅種田人。只雞犬桑麻。迴離塵俗。

又 證前生爲閩牛叟賦

牛叟兌閣遺徵曰予生於閩故生平癖嗜尤在楓

亭荔枝妻屢辦裝助予入閩啖荔以遠道逡巡未果也

海山奇處。綴品九千顆。老客炎鄉儘還可。恍瑤京、仙子絳縠中單。西風起。一笑迴身欲墮。前因圖再訪。爲帶雙栖。欲上烟橋。未曾果。彈指繡屏空。碧落離鸞。先已在翠蓬山左。拚不見、今生荔枝香。怕見了、添思玉人梳裹。

又 催妝詞爲宋念功賦念功彭氏婿

中朝樞府。蠶紅牆翠瓦。年少郎君況淹雅。看今宵、井絡不見天彭。剛一笑。已向人間下嫁。銅輿聲漸近。百盞晶籠。映得天街。不會夜。尙有好心情。欄角沈吟。故意看、西山嬌冶。也不是、蕭疏愛看山。要選個遙峯。小眉邊畫。

又 夏夜愴園隔水聞笛

燈青鳳脰。正參差齊點。屈戌玲瓏帶愁掩。恰濛濛、天水浸赤闌橋。人不寐。夢到空園偏斲。笛聲何處響。乍有還無。似在荷深那邊檻。隔水倍清蒼。竹脆絃輕。更潭子、鴨頭新染。纔募得、風前不多聲。又攬入伊州。小秦王犯。

又 戊申上元陰雨示楨百雲臣青際

春陰春雨。把碧天偷換。贏得情思凍雲嬾。料高樓、小市火樹銀花。都不見。有也無人尋玩。狂朋應似我。手撚玉梅。低歎心頭舊愁滿。早寧騰孤睡。笑逐鈿車。人影亂。拾得遺釵一半。更燈地、雞鳴夢回來。空斜壓衾窩。孜孜細看。

黃鶴引 詠半繭園雙鶴

榴紅乍吐。下有胎仙暗來去。悠然映水梳翎。琴心對舞。珠衣雪舉。凝想水天深處。逢山洞府。曾記得清涼無暑。一自謫塵凡。幾徧傷羈旅。幸逢水冽泉香。此身有主。鶯啼燕乳。啄破綺窗花午。人間愁苦。輕別了吹笙儔侶。

秋夜月 蛟橋望月

月兒圓也。趁金風、舒皓彩。碧空斜挂。浸著兩溪玉浪。一城霜瓦。水樓上、招紅袖、許多妖冶。閒話都笑。蟾孤兔寡。橋頭月下。記當年、周子隱、曾將虎射。千百靈旗颯颯。英姿堪畫。到而今、嗟滿目、漁村蟹舍。壽聲偏只共更聲打。

蕙蘭芳引 詠木瓜花

綠水人家。有一樹、垂垂紅雪。瘦影亞雕闌。啼盡春禽百舌。玉娥睡醒。問何處、麝蘭偷泄。恰侍兒、報道枝上名花纔結。記得良人。曾經漬粉。去秋時節。歎雖有好香不比。此香清絕。那知花朵。一般芳冽。愛清芬、莫對傍人輕說。

又 詠蘭

溪店寺橋。映一帶、銅峯蛾簇。有黛葉離披。露萼烟條齊蠹。參差鹿柴。晉嵒日給與、幽芬千斛。似佳人絕代。零落今依草木。數朵微含。一枝乍秀。淡淡如菊。笑禮李天桃。祇解尋常妝束。無言一笑。嫣然空谷。想采時、無數裙腰都綠。

又 洗鉢池中有贈

客裏無慆。瞥見處、繡簾斜軸。恰暮雨瀟瀟。低唱傷心人曲。相逢卻扇。板橋西、數枝春竹。正籠中鸚鵡。叫醒一窩紅玉。攜上吳裝。一聲欸乃。碧天如沐。愛香藕花輕。偏打向船窗。簸簸。嬌歌妙舞。明眸曼睩。記昨宵、水色半城都綠。

簇水 春雪

有影無聲。小樓一夜堆瓊稷。撒鹽縈絮。舞遍天涯六出。最愛輕鬆纖軟。雅稱紅闥客。遮不住、空青簾翼。春陰積。怪此際、曉寒何重。圍紅獸。假窗隙。樓前莫管。一任騰騰瑟瑟。且淪鮑家香茗。雪水傾來白。紅日照。消入一池深碧。

又 見古寺放生馬而歎之

回憶當年。霜蹄刷盡幽并夜。草頭一點。猛氣削、驚駘凡馬。羸病誰歟。牧養羈勒從寬假。摩背癢、秋陰牆罅。血淚灑。歎日暮、羣烏啄肉。伏棧櫪。成悲咤。西風夜響。重叙起沙場話。俛首沈吟烙印。驀聽僧鐘打。餘生也託象王臺下。

又 舟過梁溪不及泊舟遙望龍峯有作



百幅晴漪。漁舟個個能輕妙。幾村紅樹。將郭外、人家縈抱。歷歷葦花明處。是水仙之廟。正蘸上、一縷殘照。隔水嶠。喜幾日、金風弄霽。做晚翠、十分峭。蒲帆似鳥。翹競向秋空。矯姑待伍塘游倦。重與停吟。權茶鑿沸。錯認山園瀑。

華胥引 詠走馬燈

烟中鎧仗。影裏弓刀。往來似織。一片空明。夾紗水墨。描蝸翼。笑問何代兵爭。更何朝方國。滾徧街樓。有人喧笑簾隙。些子光陰。恰一般、星馳飄激。寸人豆馬。依然旛幢。戛擊。料想灰飛燭盡。戰場方息。頃刻收燈。紅毬悶靠牆壁。

促拍滿路花 秋日同南耕衣白魯望弟偶憩城南放生池

崢泓寂歷甚。杳靄有無間。城南多古寺。得秋閒。風廊石瀨。竹篠更檀欒。游鱗翻碧浪。雪鬣銀鬢。此中大可投竿。仗西風、寄語南山。窈窕好烟鬢。如何偏不厭。老僧看南山覆我。君自喜塵寰。倘肯經過密。秀黛三升。日應給與君餐。

鶴冲天 題鄒生巽含小像 像坐萬山梅花中一童子煮茶於側

寒崖綠染石竇低於甌。極目繚蕭林、堆蒼豔。更梅花作海、綻香雪、飄千點。幽人巾自墊。跌坐苔陰。杳靄水明山店。瑤翻碧豔。磧底泉澄滿。童子撥茶光。連幽篔。翠花蕤注茗。花沸乳珠成紺。風情何澹澹。乍展吳綾。迴味略如橄欖。

又 題錢牒翻莼紋小像次原韻

吾鄉畫洛。有個英雄處。長想射蛟人。空吟句。如君饒逸氣。偏不屑。塵埃住。沿溪尋釣侶。罨曬江村。一色壓銀欺苧。君年未暮。詎遂鴟夷去。宵半躍蘋盤。滄波煮。踞船頭弄笛。快劈作。闌江雨。涼颿添幾許。響入蛟宮。吹亂織綃機緒。

步月 本意

小市門東。板橋巷北。暗中瞥見芳姿。明眸膩臉。夜靜漾簾衣。碧柳映。幾層衫子。紅蕖露。一輛鞋兒。斜靠著。江梅一樹。剛到半開時。銅甌街又敞。奈珠屏似水。此恨誰知。弄春纖。香橙代解。迴秋水。羅帕親攜。歸去也。一鉤春月。水仙祠。

玉人歌 楊枝今歲二十爲於齊紈上作小詞

常日事。記陌上青絲。垂垂蹴地。拖烟蘸雨。已解藏鴉未。眞珠簾額香毳墜。做盡輕狂意。影濛濛、紅日三竿。白花十里。水驛飄零子。謝青眼相看。綰人征騎。露葉如啼。直得消魂死。如今漸長黃金穗。不在長街裏。羨畫樓、有主舞腰同倚。

八六子 楓隱寺感舊

弄絲楊。重過廢館。閒池頓起思量。正髣髴紙鴛舊處。依稀竹馬兒時。巡簷繞牆。當年無限風光。月照千山裙幄。鶯啼一院糟牀。漸舞榭成墳。歌臺作寺。松雖已老。梅妻都嫁。祇剩亂澗。閒騰颺。矮坡斜下牛羊。太蒼茫。疏林一坏夕陽。

勸金船 茶花

綠紗窗底幽姿噴。鞞白花盈寸。玉娥小翦明羅暈。遞顧渚佳信。檀心暗蹙。悄向膽瓶安頓。最喜妝樓小撚。偏解春困。茶娘家與春山近。雨過香成陣。不知名處花尤俊。好傍人蟬鬢。懊惱滇茶。長把紅芳相混。誰似伊行素雅。並沒脂粉。

惜紅衣 苦熱兼懷村居水木之勝

悶欲憑虛。狂思拔宅。人間何窄。朵朵奇雲。殷紅盪深黑。溪西故隱。三萬頃、湖天一色。猶憶。菱角蓮鬚。滿塘西舍北。蕭蕭陂澤。舊日漁船。橋邊甚人摘。年來鬧市。永隔水雲國。安得陽烏斂絳。早喚夜蟾堆碧。更試攀華頂。翦取古堯時雪。

石湖仙 題放庵上人紅豆詞卷

春愁天樣。將紅豆詞吟。愁歸天上。紅板橋西。帘颺。最關情處。板橋西。楊柳岸。青帘颺。紅豆詞中佳句也。綠窗有人爭唱。吟紅叫紫。儘舞絮。沾泥無恙。梅放。把一樽、簷際相賞。南朝許多烟景。被啼鶯、梳乾柳浪。千古興亡。只抵斜陽片晌。且趁疏狂。朝眠碧嶂。暮敲烏榜。閒騁望。一生著屐幾兩。

魚遊春水 春陰閨思

盡日香閨悄。纔緜額東風料峭。可惜紅芳。如此匆匆過了。做暝遙天。渾似墨。妝陰野水。愁難曉。獨對菱花。橫波淼淼。惆悵更誰知道。漫消受綠篝烟裊。何日翦破層陰。依然春好。料得藁砧愁遠泊。也無燈火來相照。怪底今宵。黃昏偏早。

又 秋日過金魚池

韋曲光顏澹。有半畝金塘。潏灩。一般紅鯉。襯著綠波搖颺。色分鳳闕。丹初滴。光映銀牆。紅欲淡。芳餌輕投。縠紋微蘸。尚隔金溝紫纜。難望見宮娥阿監。輸他百子池中。天香親染。廢館何來簫鼓到。空潭只被菰蒲糝。獨對西風。幾番傷感。

又 萬紅友書來云適金沙周東會暨叙彝上人在舍可過郭外同看水色余以他事未赴作此柬之

君家春磯嘴。一點炊烟蘆荻裏。落花飛處。綠到河邊樓子。細雨賣魚聲掠村。斜日焙茗人歸市。嗒爾捶琴兀然隱几。報道今朝閒未。好向晴川弄芳芷。況來高士羊裘。名僧塵尾。那知有約長孤負。自分無緣供驅使。茫茫此愁。略如溪水。

又 詠金魚

飛紅盈盈起。跌下銅溝深半指。一湖茜乳。染就鯉魚猩尾。淺貯空明翡翠瓶。小啜淺潯桃花水。蹙錦裁斑。將霞漾綺。妝閣臨流徙倚。笑語紛紛垂楊淚。來往破藻穿蘋。

披蘭拂芷似分醉。靨素鱗上。誤睡紅絨銀塘裏。微風差差。綠波瀾瀾。

雪獅兒 新正五日雨窗東雲臣用程正伯韻

蘭啼未醒。梅妝易困。愁裏簾幕。曾記年時。春向玉釵頭落。淺斟低語。正斜凭、香肩瘦削。紅篝暖。任他小院。獨兒吠惡。今歲雨梳風掠。更寒膠、鈿盒塵封。箠索欲壞。上元勝裏。春人早覺。脂慵粉弱。此意倩、東皇憐著。箋懇託。須把層陰浣卻。

愁春未醒 春曉

鶯窺燕壘。蝶上犀釘。綃帳縈香雪。夜珠和淚。尙熒熒。梳洗誰忤。懶扶殘夢倚圍屏。依稀記得。宵來微雨。曾撼金鈴。綠水全昏。紅閨半掩。春困難醒。風弄處。釭花半朵。小似晨星。理夢窗前。生憎鸚鵡隔簾聽。畫樓深巷。賣花聲到。纔響還停。

又 元夕後三日飲曹蓋臣宅遇微雪

落燈風定。舞絮天成。聽沙沙雜雜。簷聲滴亂。酒牀聲。聞說南山。小隊輕裘競射生。是日聞諸公有南嶽之遊。吾儕無事。且扶老懶。共博春醒。起望尊前。林泉頓皓軒檻。

將盈。恰蕭然、四垂陰重。六出花輕。多少征人。琵琶風雪醉龍庭。問他何似。疏狂老子。詩酒埋名。

又 竹逸招同雲臣南耕雨中看梅余舟中既作離亭燕一詞紀事歸見雲臣

南耕竹逸詞復次韻一首

蝶魂欲栩。鶯啼猶含。尙是淺春候。未容紅紫十分酣。卻喜君家。玉娥笑倚兩三三。判攜側帽。徑乘短屐。來過街南。滿院橫斜。一池清淺。正壓雕簷。儘消受。一生花癖。半世吟餞。祇惜溪干。畫橈斜閣。面烟嵐。花知欲別。暗彈粉淚。故泥征衫。時予將往梁溪

又 牆外丁香花盛開感賦索京少叢山和

攀來尙隔。望處偏清。算開到此花。闌珊春已在長亭。滴粉搓酥。小紅牆角倍分明。年年此際。籠歸馬上。遞徧春城。昨歲看花。有人禿袖。擘阮捱箏。悵新來。梁間燕去。往事星星。只有鄰花。依依不作路旁情。夜深難睡。繽紛花影。篩滿空庭。

謝池春慢 乙卯三月三日作

烘桃染杏。春到愁。思量處。弱蕙試新萸。嫩蝶翻綿羽。林際鶯纔滿。梁畔燕將乳。颺歌旗。喧戲鼓。三三兩兩。挑薺誰家女。鴨頭搓足。勻徧了。城南浦。半引前溪影。碧上垂楊縷。半取烟汀色。綠蘸盈樽醋。斟一斗。思千古。蘭亭洛水。淼淼波流去。

鵲踏花翻

春夜聽客彈琵琶作隋唐平話

雨滴梅梢。雪消蕙葉。入春難得今宵暇。倩他銀甲淒清。鐵撥縱橫。聲聲迸碎鴛鴦。依稀長樂夜。烏啼。分明溢浦鄰船話。腕下多少。孤城戰馬。一時都作哀湍瀉。今日黑闥營空。尉遲杯冷。落葉浮清灞。百年青史不勝愁。兩行銀燭空如畫。

又 花朝行玉峯道中用蝶庵詞韻

柔浪如酥。遙峯欲笑。檣烏陣陣迎人話。說道今日花朝。此去包山。歌臺砌滿苔錢罅。玉簫金管勸東風。嫣紅豔紫須遲卸。頻訝往事。酒邊燈下。銅屏記隔鞦韆榭。每到丁字簾前。羣芳生日。昵語何曾罷。如今好個奈何天。一船花月春江夜。

又 健兒吹笛



十上燉煌。三過代郡。翩翩繡袷黃金勒。曾在僕射營門。寒女如花。偷譜李謩銀雁笛。  
長城夜月一輪孤。沙場戰馬千羣黑。今日鬢點霜花。誰識故國何年歸始得。幾徧  
閒尋舊曲。纔當入破。又犯龜茲急。邵陽城外遇鄉人。一聲紅豆春衫溼。

宣清 春夜聞雁

春夜紅蕤枕。怪賓鴻月底。哀鳴如昨。惹青衫淚甚時乾。引紅閨睡。何曾著。記得當初。  
楚天烟水。碧湘樓閣。攙玉軫。和金徽。自分西風冷落。一霎年光。又逢春社。萬里鄉  
心作。憶森森蕭關。茫茫沙漠。故園歸歟行樂。花柳江南。儘讓他。鶯啼燕掠。

又 或以鵝炙啖我飽後填詞

亦食糠覈耳。只屠門大嚼。差強人意。笑當年哇說於陵。問何人嗜。同劉毅。東郭長貧。  
左車漸脫。仰天直視。秋社日。恰分將。紅掌鵝羣淨美。據案爬搔。臨餐跳躍。鋪歡真  
佳計。似海客刳龍。壯夫斫彘。飄飄凌雲之氣。放箸盤空。借君家。籠中閒戲。

薄媚摘徧 偶感

舊家門。閒院落。有個人兒在。最玲嬾。偏鬢髻。濃蛾秀鬢無賴。輕紅架底。青粉牆邊。一樹睡香開。玉鴉又打來斜戴。晚風大。低颺茜花裙帶。小做懨懨態。疑有恨。不勝嬌。和烟早。簇上眉黛。一九涼玉。挂向簾鉤。逋髮未全撩。記得瀕行。送人欄外。

淒涼犯

哭雲問友人金蓬山和錢莚鮫韻

秦淮水閣微茫景。迴船使酒如昨。笛牀茗椀。煙帆雨幔。麝盟粉約。江濤噴薄。短詠長吟。間作戲呼余。長鬣者。燭下恣譔。重過酒壚。縱歌譜猶存。翠凋珠鑠。玉京伴侶。似人間。也愁離索。促返蓬山。果然去。驂鸞跨鶴。研香箋。漫寫沈吟。怎睡著。

又 寒柝

一星星火紅猶在。更闌空館纔覺。甚地勾欄。那條京瓦。暗鳴膈脯。牆根市角。風遞到。一城郭。索終不然。啼帖弔月。或是夜絲絡。此際無衣子。冷巷閒坊。睡何曾著。敲時和夢。似徐拋。零星珠雹。陡觸霜威。愁殺是。此身寒薄。善崩騰。柝聲四起。山月落。

雪獅兒 本意

雕霜捏粉。作西域、萬里狻猊。攬拏爪距。側腦平蕪。猛氣驍騰何怒。奔犀駭虎。更何論  
田間狡兔。似鮑老、裝成假面。筵前決勝。道上兒童戲汝。算冰漸雪盡。愁伊無據。恰  
遇獅王。微笑擲花而語。明駝洛下。費幾許、銅山纔鑄。今何處。一樣荒煙細雨。

又 戊午秋西域獻黃獅子至一時待詔集闕下者不下百人皆作詩歌揄揚

盛事崧亦填詞一首

大句臚唱。問幾日、林邑船來。九賓列俎。異獸來庭。不羨雕題碧罽軒。然爪距。色灑上  
銅盤仙露。綵仗內、鬪裝蠻帶。形模似否。卻笑偏陬叢土。記孫郎舊日。小名同汝。蠢  
爾黃奴。詎識真龍有主。銅繚難掣。軹道上、降王嬰組。堯階舞。赭幄瞳矐日午。

轆轤金井 詠閨人汲水浣花

落燈風定。粉牆東、梅英一點紅小。景物融和。愛春光恁好。鸚哥哢巧。喚簾內、浣花須  
早。況有階前。東風露井一泓清曉。行來碎珠自舀。倚銀牀百尺。輕漾素綆。卻訝琅  
然。觸銅瓶聲悄。多年玉導。看依舊、鳳蟠龍擾。手撫遺釵。裙扶花影。歸房微笑。

法曲獻仙音 寄嚴覽民錢寶汾顧華峯三舍人

蜀肆先生漢家夫子。新謁帝承明殿。最喜金閨。璧人聯轡。吳郡顧榮揮扇。更驚聞三株樹。錢起湘靈怨。人傳徧。思往日。江東婉孌。紅燭下。挾瑟鳴箏。公讌詎料鳳凰池。三子者。一時妙選。十里朱簾。爭看煞。黑頭王椽。只凌雲一賦。楊意何時方薦。

又 詠鐵馬同雲臣賦

赤兔無成。烏騅不逝。屈作小樓簷馬。碎珮琮琤。叢鈴戛珞。依稀客窗閒話。更烏雀。時相觸。霜欺兼雨打。幾悲咤。想多年。戰場猛氣。矜蹴踏。萬馬一時都啞。流落到而今。隴霜歸。寄人籬下。潦倒餘生。儘閒身。蛛絲同挂。又西風喚起。仍舊酸嘶中夜。

塞翁吟 秋日過竹枝庵訪靈機上人。不遇與寒松上人茗談。

出郭秋光好。黃葉颯。杳霜空。篠徑織。石泉通。漱碎玉淙淙。三生堂後名僧至。乘興杖筇過。從擬問取。寺門松。可仍舊如龍。橋東。誰延佇。虎溪三笑。逢舊識。廬山遠公。說曉起。秋山有信。趣昨夜。出岫閒雲。仍返山中。姑留軟語。飽看禪窗。瘦榭枯楓。

東風齊著力 花朝

春困初濃。春愁難妥。又是花朝。蝦鬚半軸。蛾綠不曾描。記得去年玉勒相逢在。絲雨長橋。鞦韆社。繡旗不定。畫鼓頻敲。流水淥迢迢。人不見。妝成知爲誰嬌。穠春病酒。雙臉印紅潮。欲借鴛鴦機論恨。回文字。帶淚斜挑。腸斷也。百花生日。只是無聊。

又 田家

綠水灣頭。青山疊處。有個人家。藤梢橘刺。秃幹蠹槎枒。爛熳田莊風味。籬穿筍。砌吐鮮花。誰相餉。隔牆濁酒。過雨新茶。溪口路三叉。門半掩。小橋流水栖鴉。芋區籬柵。零亂向風斜。處處村簫社鼓。叢祠畔。絲管咿啞。君休去。鰲魚大上。園韭纔芽。

絳都春第一體 詠蛺蝶

誰家佛助想。一縷裙花。做成紅雨。青草如煙。淥水如羅。被陣陣東風吹向晴空舞。又傍平蕪來去。桃花門巷。菜花天氣。輕狂無數。嬌嬈留他不住。更砌畔濛濛。牆頭楊柳。飄零蕩漾。一春夢裏。曾如許。料伊也爲多情誤。只愁撲蝶園中。癡憨兒女。

滿江紅 悵悵詞五首

咄汝青衫。奚不去、白楊荒漠。歎是處、病蘭不笑，瘦琴空削。艸酒紅來心久死。越娘紫去懷長惡。猛耳酣、追憶玉箋河。驚流落。東簫屐，西紈芍。北金谷，南銅雀。只詞流騷豔。供伊談噓。百不憐人游獵賦。一生誤我靈光作。向婁離、塚上以呼余。余曰諾。日夕此間。以眼淚、洗胭脂面。誰復惜、松螺脚短。不堪君薦。幾帙罵人鸚鵡著。半牀詛世芙蓉譏。笑嶽崎、俠骨縛青衫。奚其便。曷不向、清河戰。曷不向、青樓宴。問何爲潦倒。青藜筆硯。老大怕逢裘馬輩。顛狂合入烟花院。誓從今、傅粉上鬢眉。簪歌釧。腰綵脣朱。渾妝就。腐儒花鑿。堪噴飯、騷腸賦骨也來帖括。兒輩不關詩酒事。乃公偶墮文章劫。看他年、百隊鬪如霞。夔州獵。細千卷。澆元蝶。螺千縛。漂丹蛙。也扶風歌彈。陳留花鑿。梔子街前捐粉盜。鳳凰橋下薰香俠。更偏軍、夜繞甌山城。帥常捷。一畝書齋。白楊樹、今番滿矣。想十載、墨池滋味。不過如此。芍藥風流可賜緋。丁香年少宜衣紫。問奚爲、蹀躞鸛鷄橋。無聊子。簫欲哭。紅冰璽。琴欲笑。元霜蕊。歎騷茵墨

寶命儕歌婢。硯締半車蘭葉鬼。詩斟一斛茶花髓。也紅顏。絕代可憐人。因誰死。  
白柳黃羊。宛繪出。傷心片幅。酸切處。短霜供爨。古烟供讀。觴弄於君何必怒。飄浮似  
我原堪。聽黃陵。磯畔夜深船。淒涼曲。梨園內。絲憎肉。田園內。花欺粟。更泉麻謗  
錦。養施譏菊。白隊錢刀爭作橫。一身風雅單爲僕。倚酒悲。亂擊紫珊瑚。鳴如筑。

又 詠雪疊韻八首

雪灑彤墀。看帝里。風光不惡。恰喜是。銀裝絳灌。瓊雕衛霍。粉椽班中年尙少。玉兒宮  
裏腰初約。更太平。天子坐當中。簾垂著。御溝畔。爭寒雀。寶鼎外。山呼卻。喜臣心似  
雪。朕之良藥。瑟瑟六花籠翠幄。泠泠萬點敲金鑰。問鶴行。誰擅郢中才。從頭索。宮闈  
連日微陰。梅花外。數聲姑惡。憔悴是。淨持小女。兒家姓霍。春夢晝寒偏易醒。鬢絲指  
冷。應難約。思沈沈。獨自抱銀箏。人猜著。釵梁燕。鞋幫雀。簪處顫。移來卻。看糝平鴛  
瓦。鋪明紅藥。沾溼怕汚郎白馬。玲瓏不辨奴青鑰。問何時。乾鵲噪香奩。從天索。閨閣  
萬里茫茫。穹廬畔。風狂雪惡。歎當日。漢家蘇武。功高衛霍。迢遞南天鴻雁信。淒涼北

海羝羊約。縱饑來。朔雪亦堪吞。無衣著。傳書犬。銜環雀。忠孝事。難忘卻。看詩誇同澤。史譏嘗藥。夢到龍樓。飄瑞雪。六宮夜宴黃金鑰。正醒時。蘆笛起邊愁。風蕭索。塞外六出花飛。側耳聽。金鈴犬惡。正滕六。撒鹽飛絮。瀾漫揮霍。絳罷額黃簾四捲。妝成蛾綠鉤雙約。任樓頭。倚遍玉闌干。難安著。歌竹子。彈翎雀。舊時曲。都拋卻。悔姮娥清冷。多因偷藥。燒盡深閨紅獸炭。闔殘別院文鱗鑰。只雪沙。浙瀝打空階。秋千索。樓中四世三公。袁高士。人身不惡。也不羨。東朝田寶。西京金霍。大雪不知秦與漢。平生詎習從衡約。笑本初。公路亦家駒。爭殘著。穿花蝶。銜梅雀。土鏗冷。高軒卻。縱蒲輪東帛。誤人之藥。暖足那須東閣被。安心自守空山鑰。任門前。白盡漢江山。休相索。袁宅大獵城南。此年少。王家鎮惡。何況是。姿容比玠。從奴勝霍。帶雪能騎千里馬。殺人不受三章約。正射鵰。時候暮雲平。弓弦著。能逐兔。能探雀。揮杯飲。休辭卻。向諸君笑語。此非鳩藥。且日醉從屠狗博。昨宵怒奪城門鑰。看腕騶。玉色雪中馳。難追索。馬上舉舉師師。正春病。心情小惡。蚤則是。雪飛寶篆。寒生錦霍。無力渾如儂樣性。難憑恰



似郎邊約。倚銀箏、小語罵輕狂，偏偎著。縈簾蒜，騰釵雀，斜復整，行還卻。好搗殘玉杵，和他面藥。睡眠初，潤驚六出，曲中小響，倉琅鑰。又平康，狎客喚銀瓶，褰簾索。曲中大雪江天，笑萬里，北風作惡。揆只向，屠門大嚼，磨刀零霍。季布田中亡命客，盧家堂後消魂約。正雪深，兀坐酒樓中，思量著。車中婦，山頭雀，恨不了，愁難卻。總無如一醉，勝他行藥。小婦且擎紅玉椀，金吾漫鎖春城鑰。拍糟牀，極愛酒家郎，頻呼索。酒家

又

陳郎以扇索書爲賦一闋父名陳九曲中老教師

鐵笛鈿箏，還記得，白頭陳九。曾消受，妓堂絲管，毬場花酒。籍福無雙，丞相客，善才第一琵琶手。歎今朝，寒食草青青，人何有。弱息在佳兒，又玉山皎，瓊枝秀。喜門風不墜，家聲依舊。生子何須李亞子，少年當學王曇首。對君家，兩世溼青衫，吾衰醜。

又

江村夏詠十首

百頃風潭，鎮日展，風漪八尺。向此處，未妨飲噉，且須琴弈。籬笥細醃紅縷鼓，吳鹽小下銀絲鮓。待體中，脫復有佳時，哦周易。北垞外，寒雲白。西崦畔，蒼烟積。更水湄將

子縱橫飛拍。老子難拋白玉塵。少年喜拓黃金戟。總風情。輸與牧牛兒。斜陽笛。  
 野水濛濛。掩映處。煙扉三兩。羨門外。黃雲穰穰。麥場如掌。叱叱村頭驅犢返。瀾瀾江  
 口。叉魚往。喜田園。四月不曾閒。人勞攘。嫩晴後。桑陰敞。老屋下。田歌漾。更芋區新  
 灌。鵝羣初放。婆餅焦啼秧馬活。社公雨過。縑車響。笑吳儂。原住五湖邊。曾呼長  
 略。約東頭。有蟹舍。斜連荻市。追涼處。田夫說餅。風情靡靡。樽飭溜匙薑韭滑。餛飩膠  
 口椒橙美。更傳聞。櫻筍賤如泥。今年裏。叉手舞。揜拳起。缸面酒。長腰米。想大官廚  
 味。不過如此。老我田園。河射角。笑他宦仕。車生耳。瀟湖風。剛趁此時來。欣然喜。  
 碧浪初圓。凭水閣。脫巾獨立。誰作伴。數竿籬竹。一甌茗汁。似有聲來茶磴轉。斷無人  
 處。村舂急。正日長。撥悶枕書眠。斜川集。槿花上。珠堪吸。荳花底。涼堪裊。看瀾茫一  
 派。雨窸煙笠。搏黍烏啼。勤又嬾。鱗魚風起。吹還澀。恰衝泥。鄰叟墊巾來。芒鞋溼。  
 雨欲成時。聽村北。村南鷓鴣。行樂處。崖門藤束。溪腰樹夾。水翦越羅吳縠樣。山臨范  
 緩倪迂法。任科頭。箕踞受松風。新涼霎。何必學。呼名鴨。且自荷。隨身鍤。儘一邱一

壑此生寧乏。雲起怒排臨陣馬。澗鳴冷試搗箏甲。更歸來。滴滴玉蚪聲。糟牀壓。  
丁字畦邊。見一帶、陰陰夏木。扶疏甚、釣絲斜漾。菱絲大熟。鶯暖鮠魚新上市。草香蠶  
子齊登簇。喜炊煙、一縷裊江邊。燃湘竹。菱雞唱。溪流足。姑惡叫。山光綠。聽樵歌正  
斷。漁歌又續。泥滑婦愁微雨。簷村深兒趁朝涼讀。更柳塘、吹起特牛風。波如縠。  
罨畫銅官。都繚繞、吾廬左右。論生計、蹲鴟一頃。菰蒲百畝。矮屋村扉多蘸水。澄潭釣  
艇斜依柳。恰月明、漁網截江來。歌銅斗。煙漸斂。籠鴉舅。雨又作。鳴鳩婦。正湖風側  
帽。林花墮酒。戲就攤錢。淮估語。悶思斫鱸吳娘手。待明朝、重榨甕頭醬。呼溪友。  
澤國人家。門以外、水田渺渺。無過是、明潭淺瀨。煙蒲風篠。雪浪江帆喧晝夜。雞頭菱  
角知多少。泊數行、荅箸忒玲瓏。漁蠻遶。新暑退。蘆塘窅。殘月映。溪堂皎。且榜他碧  
石。沾來清醪。一雨平湖涼思滿。數聲林笛離情悄。正水雲、空闊晚冥冥。沙鷗矯。  
天水空濛。蘆花內、茆庵一個。長夏裏、溪干乘興。短篷掀簸。十里煙波鷗世界。半盂茗  
汁僧功課。更寺門、竹翠劇憐人。如何睡。洗鉢罷。苔陰坐。捶琴歇。花關臥。愛栗留聲

脆枇杷葉大。便住隨師聽浴鼓。再來何日開煙柁。約搓橙。剖橘好時光。還重過。時過浣花禪師

三伏炎熇。吳牛喘。老顛欲裂。詎便少。池荷半畝。山松百尺。赤日紅塵那可耐。哀梨并剪無從覓。且臨風。快讀劍南詩。傾一石。堂堂處。裝何急。咄咄處。人都逼。算功名馬稍。關山梁益。綠鬢雙螯。寒夜擘。白頭猛虎。霜天射。漸卷終。不覺海風生。冰車去。

又 歲暮渡江用宋荔裳觀察曹顧庵太史王西樵考功倡和原韻

六幅蒲帆。掠江下。玻璃綠漲。中流處。舉杯遙賀。焦先無恙。一片鄉愁殘壘下。五更僧語空。舫上喜網來。白小不論錢。漁蠻餉。看蟹舍。沙頭漾。聽銅斗。船頭唱。喝岷江水。速成醇釀。估客使船都似馬。吳兒踏浪何須杖。翦燭花。醉眼看魚龍。離奇狀。

又 舟次潤城訪程崑崙別駕仍用前韻

此地孫劉。想萬馬。川騰谷漲。公到日。雄關鐵鎖。東流無恙。上黨地爲天下脊。使君文在先秦上。更縱橫。羽檄氣偏豪。籌兵餉。天上月。波心漾。隔江笛。樓頭唱。歎江山如

此可消官釀。側帽高張臨水宴。掀髯勇策登山杖。踞寒崖、拂蘚剔殘碑。猿猱狀。

又 懷阮亭疊前韻

隋帝宮門。楊柳岸、春濃花漲。曾密報、杜家書記。平安無恙。相賞每多松石意。此情原在錢刀上。記紅橋、風月六年游。皆君餉。瓜果讌。離旌漾。禪智寺。驪歌唱。任吳霜鬢裏。漸爲君釀。漫說休文圍帶減。吾年四十還須杖。夜闌時、夢汝帽簷斜。論詩狀。

又 聞阮亭罷官之信并寄西樵再疊前韻

鼎鼎朱門。滿眼是、膨脝腹漲。誰得似、心情半懶。風情微恙。阿堵考君材最下。孔方阻爾書難上。算人間、只有芰荷裳。堪相餉。華不注。樵風漾。轅固里。蠶娘唱。使漸離和曲。杜康佐釀。才子爲官休亦好。弟應荷篠兄攜杖。記相人、原說使君非。癡肥狀。

又 乙巳除夕立春仍用前韻二首

爆竹一聲。吾廬外、千門煙漲。喜今夜、新春殘臘。田園無恙。南國舊游稀眼底。西京遺事來心上。記黏雞、彩燕廿年前。攔街餉。滄桑換。都拋漾。頭顱老。休歌唱。且左燒紅

燭。右傾家釀。鬱壘欹斜頭上帽。神荼脫落腰間杖。笑人憐。桃偶偶憐人同斯狀。  
父念兒耶。珠淚迸。溪流同漲。屈指算。四時作客。三秋抱恙。山左未尋周櫟下。廣陵且  
覓王貽上。乍榴花。時節載愁還。堪誰餉。弱女嫁。羅衣漾。諸弟隔。羈鴻唱。又匆匆去  
買。高郵雪釀。寒夜纔歸陽羨棹。燈前擬試金焦杖。向泉臺。泣數一年間。飄零狀。

又 將爲鄧尉看梅之行先寄吳中諸子疊前韻

二陸三張。曾轟飲。劍池春漲。吾語女。千年花草。至今無恙。柳絮微風胥渡口。梨花細  
雨皋橋上。自別來。僕病負諸君。尊鱸餉。俛偃甚。游絲漾。芒芒極。雛鶯唱。漸欲寒欲  
暖。暗將梅釀。我意巾車還躍馬。君其挈榼兼扶杖。待月明。飽玩萬山巔。橫斜狀。

又 贈朱亦巖先生再疊前韻 先生楚人

湘入瀟波。極望處。楚天碧漲。來領袖。五湖詞賦。齊盟無恙。蕭帝宅。荒葭菱。外昭君村  
在秣歸上。羨風騷。兩地仗斯人。從天餉。珠玉走。龍蛇漾。白雪和。幽蘭唱。看江花狼  
籍。班香醞釀。他日定爲公子繡。此時敬撰先生杖。謝君侯。未面已憐余。疏狂狀。

又 何明瑞先生筵上作 辛巳歲先生在陽羨令幕中拔予童子第一

陽羨書生記年少。劇於健馬。公一顧。風鬢霧鬣。盡居其下。兩院黃驄。佳子弟。三條紅燭。喬聲價。恰思量。已是廿年前。淒涼話。鐵笛叫。南徐夜。玉山倒。西窗下。且撈捕六博。彈箏行炙。被酒我思張子布。臨江不見甘興霸。只春潮。濺雪白。人頭。堪悲咤。

又 題尤悔庵小影次韻二首

快馬健兒。記當日。先生自許。誰信道。驕驄一蹶。長鳴憶主。淒切新詞。楊柳月。悲涼雜劇。梧桐雨。更北平。回首暮雲低。呼鷹處。悔庵司李北平。朝共市。難容與。山共水。聊延佇。且岑牟單絞。搔頭箕踞。千石硬弓。千日酒。三條樺燭。三搗鼓。正男兒。失路述生平。躊閭語。

天語琳瑯。曾比汝。殿前之柳。今老矣。漫云才子。居然顰叟。三弄笛吹桓子野。雙丸髻。挽玉曇首。儘數來。作達昔人多。如君否。脚有鬼。還叉手。舌尙在。終開口。肯車中閉置。學他新婦。麴道士爲盤內舞。銅將軍侑花前酒。對董龍。半醉語喃喃。何雞狗。

又 過邯鄲道上呂仙祠示曼殊曼殊工演邯鄲夢劇

絲竹揚州曾聽汝。臨川數種。明月夜黃梁一曲。綠醅千甕。枕裏功名雞鹿塞。刀頭富貴麒麟塚。只機房唱罷酒都寒。梁塵動。久已判綠難共。經幾度。愁相送。幸燕南趙北。金鞭雙控。萬事關河人欲老。一生花月情偏重。算兩人。今日到邯鄲。寧非夢。

又 自封邱北岸渡河至汴梁

澆澆河聲振柁處。怒濤千尺。絕壁下魚龍悲嘯。水波欲立。一派灰飛官渡火。五更霜灑中原血。問成皋京索事如何。都陳蹟。蟲牢外風蕭瑟。廩延畔沙堆積。試中流騁望。百憂橫集。混混且拚流日夜。芒芒不辨天南北。但望中似見有人烟。陳橋驛。

又 汴京懷古十首

壞堞崩沙。人說道古夷門也。我到日一番憑弔。淚同鉛瀉。流水空祠牛弄笛。斜陽廢館風吹瓦。買道旁濁酒醉先生。班荆話。攝衣坐神閒暇。北向到魂悲咤。行年七十矣。翁何求者。四十斤椎真可用。三千食客都堪罵。使非公萬騎壓邯鄲。城幾下。夷門



鉛筑無成。不信道、英雄竟死。猶有客、棄家破產、東求力士。太息已看秦帝矣。悲歌只念韓亡耳。道旁觀、誰道祖龍耶。妄男子。狙擊處、悲風起。大索罷、浮雲逝。歎事雖不就。波騰海沸。嬴政關河空宿草。劉郎宮寢成荒壘。只千年、還響子房椎。奸雄悻。博浪城。

汜水敖倉。是楚漢、提戈邊界。想昔日、名姬駿馬、英雄梗概。滎澤波痕寒疊雪。成臯山色愁凝黛。歎從來、豎子易成名。今安在。俎上肉、何無賴。鴻門斗、真難耐。算野花斷鏃。幾更年代。秦鹿詎爲劉季死。楚猴甘受周苛賣。笑紛紛、青史論都訛。因成敗。廣武山

太息韶華。想繁吹、憑空千尺。其中貯、邯鄲歌舞、燕齊技擊。宮女也行神峽雨。詞人會賦名園雪。羨天家、愛弟本輕華。通賓客。梁獄具、宮車出。漢詔下、高臺坼。歎山川依舊。綺羅非昔。世事幾番飛鐵鳳。人生轉眼悲銅狄。著輕衫、半醉落霜雕。弓絃素。吹臺野渡盤渦。中牟界、濤翻浪走。勒馬看、殘山剩水。一番回首。斜日亂碑森怪蝟。危岡怒

石蹲奇獸。笑中原、從古戰場多。陰風吼。炎劉鼎。嗟淪覆。袁曹輩。工爭鬪。看金戈塞馬喧。逐馳驟。浪打前朝黃葉盡。霜封斷壁青苔厚。又幾行、雁影落沙洲。多於豆。官渡宋室宣和。看艮嶽、堆瓊砌璐。也費過、幾番錘鑿。兩朝丹堊。花石綱催朱太尉。寶津樓俯京東路。晉銅駝、洛下笑人忙。曾迴顧。花千朵。雕闌護。峯萬狀。長廊互。使神搬鬼運。無朝無暮。一自燕山亭去早。故宮有夢何由作。歎此間、風物劇催人。成南渡。艮嶽曲水金塘。流不盡、汴京遺事。記當日、昆明水戰。都亭百戲。相國寺前燈似晝。南薰門外天如水。恰政和、天子趙官家。多才藝。火仗轉。星球墜。水幄捲。雲房蔽。正扇分雉羽。橋排雁齒。此夜只憐明月好。當時那曉金人至。記居民、拂曉撥菰蒲。尋珠翠。金明池

北宋樊樓。縹緲見、彤窗繡柱。有多少、州橋夜市。汴河遊女。一統京華饒節物。兩班又武排簫鼓。又墮釵、鬪起流花風。飄紅雨。西務裏猩唇煮。南瓦內、鸞笙語。數新妝。炫服。師師舉舉。風月不須愁變換。江山到處堪歌舞。恰西湖、甲第又連天。申王府。樊樓

古玉津園。斜陽照滿坡。蘆荻渾不見。銅街鐵市層樓列戟。陰慘慘。分門自鎖。冷清清。地船誰摘。繚垣邊。覓個不愁人。如何得。白玉杳。黃金橋。園芳樂。樓青漆。任淒風苦雨。籠窗動壁。春去鳥啼樊重里。月明花落王根宅。壞廊斜。石獸趁行人。行人嚇。玉津園。

汴水分藩。憶帝子。金牀玉冊。人都羨。憲王才調。孝王儔匹。椒殿丁年。宣鼓吹。桂宮甲帳。繙圖籍。唱誠齋。樂府夜深時。箏琶急。蔡河漲。蘭橈織。雁池汎。龍舟疾。記牡丹時節。排當宿直。一夜黃河瓠子決。滿城紅袖梨花溼。痛波飄。菰米入宮牆。沈雲黑。

又 寫近況酬寄曹顧庵學士即用學士來韻

黃雀銀魚。羨秋後。攔街塞術。屬屢耳。神仙難學。底須煉朮。萬事絆人。園客繭。百年戲我。狙公栗。倚秋城。下瞰暮濤紅。煎斜日。風乍滿。喧杉漆。霜漸老。催機匹。看雁排人字。瓊瓏幾筆。詩怕殺。青刊復毀。鬢憎鑷。白芟逾密。只酒悲。苦憶婦。姑城。呼鷹出。

又 月之初六余將有廣陵之行前一夕行囊襍被俱被偷兒負去戲作二詞

示里中諸子仍用前韻

酒盡天寒。彈短鋏。半生無術。擬還向、廣陵賣藥。荷苓挑朮。秋雨好攜。邛竹杖。荒原莫管。周人粟。束殘書。准趁半江晴。期來日。蝙蝠暗。空如漆。絡緯叫。難成匹。正籬搖書帶。庭欹木筆。計畫總嗟吾輩拙。安排儘讓天公密。笑青氈。一夜羽毛生。飛而出。盜語主人。驪駒唱。留行無術。堪歎息。井叢熠燿。白荒松朮。冥隄關高。驢齧薦。王官谷險。猿偷栗。算一年。作客縱歸來。無多日。何不販山中漆。何不織機頭匹。只年年懷刺。幾時投筆。胠篋愁看君笥儉。緘滕喜遜鄰家密。請先生。晨起檢空箱。如何出。

又 贈史遠公五十卽用學士原韻

畫苑詞場。數儕輩。君才橫出。論戈法。韭花蠶尾。盡推適密。九殿爭傳鸚鵡賦。戊戌會試。遠公已擬第一人。重瞳親獎龍蛇筆。遠公署書爲天語。所獎更岐王。含笑看揮完。綾千匹。熬不熟。仙家漆。黏不住。天邊日。歎籬還采菊。里仍呼栗。醉斫月中一片桂。閒收雨後三峯朮。儘清狂。舍此問成仙。無他術。

又 賀曹掌公秋捷仍用前韻

老盡詩人吳與越。惟君傑出。人都羨。家風華貴。文瀾綺密。三世金蓮學士燭。一門銀管。湘東筆。看來春駿馬。蹴長楸。千千匹。僕老矣。身空漆。卿健者。懷吞日。記酒行以往。玉溫而栗。記與掌公吳趨高會時學圃條豐君掇杏。硯田殖落余鋤。尤擬蔗竿。變技學曹公穿楊術。

又 贈大西洋人魯君仍用前韻

怪怪奇奇。咄咄甚。喜喜出出。經過處。暹羅瘴惡。荷蘭烟密。鶴語定知何代事。鱗經不省何人筆。駕崩濤。九萬里而來。鼉鼉匹。海外海。光如漆。外國天無日。話僬僥。龍伯。魂搖股栗。善弈慣藏仙叟橘。能醫卻笑神農朮。更誦完。一卷咒人經。驚奇術。

又 贈吳白涵回用前韻白涵工詩善琴吾邑中高士

轟隱家門。捉鼻免。問君何術。適志耳。和烟種樹。帶雲春朮。杜老堂前鄰撲棗。陶公酒後兒呼栗。更風潭。夾宅月當門。消閒日。詩酒外。誰膠漆。猿鶴侶。吾儔匹。任客誇裘

馬。人矜才筆。書到成時松竟老。徑當僻處蘿偏密。叩苔扉、半晌不逢人。琴聲出。

又 憶舊游寄金沙王弓銘張杜若徐岐雖史兼三諸子仍用學士來韻

會記中原。與數子、揮鞭競出。同憑弔、園空石尉。城荒李密。洛下金墉城李密城也夜臥戍樓風咽鼓。晨題敗驛霜膠筆。更月中、帶雪上轡轅。奇無匹。戰場內、碑填漆。叢祠外、燈搖日。憶並鞍舞蔗。分籌賭粟。往事鏟來如削草。新愁製就同煎朮。算倩他、白日繫長繩。嗟無術。

又 丹陽賀天山寄詞二闕屬和其韻

枯樹衰楊。三歎息、物猶如此。白眼看、塵埃野馬。子虛亡是。四壁豈無窮可送。九天只有愁難寄。放狂歌、金鐵一時鳴。吾衰矣。拜特進、官承旨。僮列鼎、奴衣紫。更屏間窈窕。階前阿唯。若有人兮寧足慕。彼何爲者殊堪恥。曾幾回、策馬樂游原。荒烟耳。速壘糟邱。卿莫惜、壚邊酒價。能幾日。秦關月小。漢宮花謝。萬里秋從西極到。千年淚向南樓灑。婦人裝、胡粉且搔頭。無人者。風刮燭、窗多罅。雨淋壁、簾須下。溷南鄰北

戶詩場歌社。白晝遽遽身化蝶。青天夢夢程生馬。約練湖、鴉舅十分紅。余來也。日內將至丹陽故云。

又 舟次丹陽感懷二首仍用天山韻

水面絃生。郭索響。誰能遣此。問白傅、潯陽江上。可曾如是。天外雨隨帆共落。洲邊雁與船同寄。人奴之。笞罵此生無應足矣。河蟹賤肥而旨。秋山暮紅兼紫。但酒酣以後。呼牛亦唯鑄鐵。竟成千古錯。讀書翻受羣兒恥。笑道旁石馬亦何爲。風吹耳且食蛤蜊。管婢價何如奴價。君不見棠梨一樹。昨開今謝。形狀何勞麟閣畫。淚痕不上牛山灑。願他年青史好爲之。傳來者。月射隙。霜尋罅。騎篷背眠檣下。笑長貧陳孺。肉難分社。張祐宅荒碑竄鼠。呂蒙城闊帆如馬。問半生。何物誤人歟。殘編也。

又 過京口復用前韻二首

剩壘殘崖。有多少。英雄經此。也則爲。風吹浪打。趨成如是。北顧髻鬢晴欲笑。南朝君相生同寄。歎齊梁。一片好江山。都非矣。茶沸乳。簾泉旨。楓繡癭。醜顏紫。倘鶴猿招

我欣然曰唯。夔縱憐蚊何所益。信偏伍噲徒增恥。踞篷艙。吹火騁雄談。臧三耳。  
瓜步船來。亟爲問。淮南米價。念欲索。陶胡奴米。何如詣謝。肝膽儘從鄰媪露。毫毛拊  
向沙場灑。歎臣精。今日已銷亡。誰容者。栗半熟。經霜罅。豚對舞。浮波下。聽寺鐘隱  
隱。隔江蓮社。快意且騎隋苑鶴。失時休使瞿塘馬。怪一軍。銀鎧海門來。潮頭也。

又 渡江後車上作二首仍用前韻

磨鏡來耶。怪范叔。一寒至此。古所謂。弔喪借面。將毋同是。十載江河淮泗客。一身南  
北東西寄。問車中。閉置婦人乎。真窮矣。村釀薄。寒加旨。斜日淡。風添紫。有輿騶拉  
飲。從而唯唯。謁彼金張吾已過。厄於陳蔡誰之恥。任兒童。拍手笑勞人。車生耳。  
亦復何傷。終不掩。文章光價。曾抵突。不知屈宋。何論沈謝。一曲楚聲愁筑破。半生情  
淚如鉛灑。儘腹中。容得百千人。如卿者。好覓個。西村罅。竟須在。南山下。結斬蛟射  
虎。疏狂之社。夢裏悲歡槐國蟻。世間得喪鄰翁馬。語前驕。叱馭且從容。余歸也。

又 看牡丹感舊



芍藥啼烟。倚晴晝。枝枝欲顫。恰又是、送春天氣。夾衣庭院。香逕露濃圍繡幄。軟簾風細。低歌扇。將去年、情事倚闌干。思量徧。花與月。曾留戀。朝共夕。閒游衍。在睢陽古郡。商邱舊縣。記得濃香籠兩袖。醉餘馬上。攜歸便。下小樓。紅袖那人迎。人微倦。

又 壽武林徐世臣賢配邵孺人六十

曾在西泠。徐穉下。陳蕃之榻。記當日、湖山濃淡。賓徒雜沓。夜雨對眠靈隱寺。春帆競掠雷峯塔。幾何時。雲水竟飄然。攜瓢衲。室有婦。機聲匝。塾有子。書聲答。喜鴻妻操作。龍駒蹙踏。設帙九天。喧管籥。稱觴七郡。傾壺榼。正中秋。月照浙江潮。銀光合。

又 余澹心吳園次周子俶顧梁汾秦對巖諸公共飲集生家適余在山中未與此雅游也園次作詞見示余亦次韻

醉帽欹斜。訝何處、玳筵留客。卻誇我、鱸魚桑落。席門置食。滿眼紅牆愁裏過。千場錦瑟閒中憶。只君家、數過酒杯寬。真難得。也不羨、鷗絃擘。又何用、鸞鏡摘。但茶香雙好。居然雅集。笑我凍栖梅一樹。輸他醉把螯千隻。問酒謀之婦。尚能乎。期來夕。

又 將發梁溪酒後與吳園次

臣醒而狂。問何處、再尋荆萑。但相見、金樽休放。玉簫須擲。舊事漫誇冠蓋里。新愁合付昆明劫。幸名園、一月共聯牀。歌聲接。老鳳叫、才何捷。雛鳳語、吟都慙。奈匆匆欲唱。渭城三疊。歸去道場山下路。也應瘦了丹楓葉。只郵亭、醉尉夜偏多。休輕獵。

又 園次拏舟相訪與予訂布衣昆弟之歡而去賦此紀事

雨覆雲翻。論交道、令人冷齒。告家廟、甲爲乙友。從今日始。官笑一麾君竟罷。病驚百日余剛起。問乾坤、弟畜灌夫誰。惟卿耳。嗟墨突、殊堪恥。憐范釜、還私喜。且樵蘇不爨。清談而已。開口會能求相印。吾生詎向溝中死。終不然、鬻舂華山陰。尋吾子。

又 同雲臣和天玉元夜泊舟溪口感舊之作

峭冷尖寒。也算做、一番元夕。還記憶、清歌妙舞。梅魂雪魄。向日微聞年少事。狂夫曾到岐王宅。把玉簫、吹起落梅風。成今昔。水驛底、孤眠客。月榭口、寒波積。正沈吟何限。斂痕綦跡。早信今宵鮫帕溼。悔教那夜屏風隔。載一船、離恨壓西溪。溪流碧。

又 郝元公署中食餅忽有茂陵之憶賦詞誌感

落拓無家。歎三匝、曾栖汝穎。記那日、綠窗閒與、姬人說餅。溲粉宛同春絮薄、映空絕。似杭羅淨。笑鸚哥、偏愛啄香梳。吳兒性。纔半載、歸鄉并。拚兩地、悲萍梗。算不因烽火。幾成薄倖。聞說衰師年尚幼、夏羹解向廚娘競。只今宵、入手恰輸他、團圓影。

又 秋日幾士兄姬人生子詞以志喜

人種追來。喜阮曲、又生遙集。兄生子、姬人係得之姑母家。是月裏、風飄桂子、夜來親拾。旦日驚看佳氣滿、經年怪底吟聲澀。兄素勤詞翰、年來竟不作詩。果息機、結得蚌胎成。珠光溼。嫂已慶、螽斯緝。孫漸解、勝衣揖。笑阿兄、此事得毋非急。小弟今冬方五十、飄零一綫河之北。待來春、挈取小獅兒、還鄉邑。

又 再疊前韻酬幾士兄

阿大中郎、論家世、人人有集。吾老矣、沅湘香草、童蒙聊拾。破屋霜紅蘿薜暗、空齋雨黑。倉琅澀。歎青衫、原不爲琵琶。年年溼。誰耐把、殘編緝。久嬾向、侯門揖。算曹劉沈

謝。非今所急。一片月懸關塞上。五更笛落闌干北。正匣中、刀作老龍吟。聲於邑。

又 三用回韻與幾士兄言懷并示珍百雲臣竹逸諸同志

蹶盡霜蹄。休再問、龍城馬邑。計決矣、我寧作我。北山之北。焉用文之身。既隱。未嘗聞  
仕如斯急。見長沮、桀溺耦而耕。趨而揖。蕪與苧。連宵緝。松共桂。和雲溼。任園官賣  
苦。霜畦莧澀。米號長腰春。確煮。子名蒼耳。揮鋤拾。問挂來。牛角是何書。淵明集。

又 四用回韻賀幾士兄納姬

桃葉桃根。把雙槳、親迎鄰邑。記住在、香街直下。畫橋斜北。扶下銅輿雅髻妥。貯來綃  
檻鶯啼急。暈桃痕、注靨道勝常。羞郎揖。繡架鞦。鴛鍼緝。紅浪皺。鸞衾溼。學夫人舉  
止。漫嫌生澀。春嬾一牀和月捧。新嬌半榻從天拾。怪新詞、豔粉恰盈箱。閒情集。

又 懷翼仲震臥疾梁谿

貫菊賒螯。記共醉、梁谿客夜。風不定、軟簾輕漾。一燈高下。白髮放顛長。忍餓。朱門慳  
酒偏遭罵。曉雞號。猶欲挽銀河。枳中瀉。書散誕。蕭思話。聲嚶嚶。甘興霸。每廁身鎗

杓。袒而行。炙。老興郎當烏啄肉。秋懷浩蕩。鷹隼架。怪新來。痠疾偃霜簷。酸風射。

又 余有懷仲震詞南耕昔在南昌亦與仲震同作老客遂次余韻亦成一首  
斐然見示仍疊前韻用東南耕并令仲震他日讀之一軒渠也

五老匡廬。挂冷瀑。長晴不夜。秋瑟瑟。兩賢相見。琵琶亭下。閱盡江山真欲舞。算來人物誰堪罵。倚滕王。傑閣瞰章門。銀濤瀉。羈旅恨。鄉關話。拉龔勝。呼曹霸。儘雄心耗與冷杯殘。炙。一朵菊花人伏枕。半庭荳葉秋除架。只幾年。蹤跡最難忘。同游射。

又 擁爐記與書臣南耕分賦冬詞有圍爐一題今者栖遲省幕縱有紅爐獨

擁而已何言圍也賦此以誌予慨

炙盡烏金。銷不了。鬢絲微雪。依稀聽。一城巷杵。半樓簷鐵。撥盡寒灰人語悄。跋完官燭雞聲咽。笑西廊。鸚鵡也愁寒。頻頻說。小窗底。屏風折。微酣處。爐薰爇。但得人圍繞。心情頓別。記得常年喧笑語。笛牀茶臼參差列。只候門。獸炭枉堆盤。增寒冽。

又 風雪行丹陽道中

秃樹僵杉。趁玉舞、離披作勢。經多少、斷橋人礪。破樓枯寺。氈笠裏風嗟鬢發。筓輿兀雪愁顛躓。謝郵亭、湯社點紅薑。招行騎。鑿不破。琉璃水。凍不了。魚龍市。笑吳兒長鬣。有船難使。凍雀迎人籬角噪。村翁傲我牆根睡。撒晶鹽、迷卻呂蒙城。心如醉。

又 玉峯沈天羽先生詞場耆宿也。選有草堂四集行世。不幸早逝。乏嗣。歲月不居。距今已四十餘年矣。賢配鈕夫人。今年舉七十觴。有從甥鈕君南六代。

爲乞言詞以寄慨

偶爾相關。小樓上、畫闌凭徧。記當日、東吳瘦沈。才名堪羨。豔句和愁淋舞帕。香詞蘸酒塗歌扇。只金盞、身後竟無人爲收管。綰不得。垂楊線。禁不住。飛花片。剩嬌閨寡鵠。雨淒風怨。轉眼桑田朝市改。打頭茅屋裙笄健。遠雕梁、誰替話呢喃。鄰巢燕。

又 贈家小阮次山。余所賃城中居。卽先殿元故宅也。階前紅杏一株。最繁盛。

次山殿元後人故云

羣從凋零。悵家世、空餘雙戟。算惟汝、過都歷塊。龍文虎脊。我別西溪剛十載。數椽聊

賃街東宅。有壓欄、先世一枝紅。君堪摘。林下酒、牀頭易。吾與汝、交相惜。笑我今衰矣。子應努力。王謝門風終自在。紛紛程李錢寧直。向渭陽、詩裏說鄒陽。悲疇昔。次山係故友鄒程村宅相

又 訪葉九來園居不遇愛其花木明綺池館崢泓小憩移時流連不去因憶九來向與余邑某氏歌姬有目成之約曾爲作花信詩今某家歌舞久散此姬亦入道多年矣詞以示葉用稼軒韻

易識君家不須向。長街夾轂。閒相過。主人不在。滿園空綠。蝴蝶輕狂。金井畔。櫻桃開落。銀屏曲。隴山鸚。不省客來游。春眠熟。淪落恨。飛紅浴。繁華夢。郵亭宿。記筵開太守。一羣香玉。今日鍊師新入道。當時才子曾貽墨。雨濛濛。燕子上空梁。將泥蹴。

又 贈婁東周逸園兼懷毛亦史

舞袖成圍。正袞徧、箏琶阮笛。有一客、衆中索我。諱聲甚急。坐上兩行紅粉笑。亭邊一夜青衫溼。歎雄文、老將本幽燕。纔相識。風裂燭。喧豗黑。星絡角。晶熒白。倘明朝分

手。後期難的。第令男兒存意氣。休論世事多離別。博徒中歸及見毛公言相憶。

又 春光甚冶。健庵挈我魚墩精舍。小憇同潘次耕弟緯雲賦。

半里春田。漸踏到、蘼蕪叢裏。疏籬外、紅橋畫板。臥於烟水。柳線飄時寒食近。梨雲凍處東風起。把滿欄、紫豔嗅移時。忻然喜。穎士僕。康成婢。營小築。饒名理。精舍乃先生紀綱所構。有玉山彩翠。光浮髻几。鬪草心情忙似蝶。築毬士女多於蟻。算春來、何限斷腸天。無踰此。

又 贈溧陽王參戎。王名嘉善。餘姚人。新建後裔。有儒將風。

小隊城南來踏徧。平陵春色。迤邐望、秣陵鍾阜。鬱蒼何極。一片南朝簫鼓地。千年北府侯王宅。到如今、草綠錦衣倉。成今昔。帳下縛黃皮褶。座上拓黃金戟。論男兒須學。萬人之敵。家世故侯看射虎。江山儒將聞吹笛。笑軍中、緩帶慣繙書。當陽癖。

又 同恭士叔岱牧仲飲介子西湄草堂次公賦壁間韻

水榭清幽。宿雨罷、奔渾齊漲。憑眺處、孤城剩壘。礮痕無恙。波靜細延簾閣底。草香亂



撲紗窗上。碧陰陰、一陣嫩涼來。沙禽餉。篷六扇、烟中漾。簫一縷、潭邊唱。況主人、還有吳羹法釀。但醉且尋茶、叟竈欲歸、徑借溪翁杖。想此時、纖月挂西湄、難於狀。

又 秋日登單父城外春秋閣

單父城東堆徧了、萬層秋色。憑闌望、齊疆魯甸。一泓晴碧。此去漸通霄漢路。吾生只少翺翔翼。繚欄斜、百尺俯中原、空蒼極。銅鼓賽、松杉直。陰雨吼、精靈急。看蘚衣泥馬、曉行無迹。日落漫添羈旅恨。時危專藉匡扶力。讀春秋、武帳燭花紅、髯如戟。

又 秋日經信陵君祠

席帽聊蕭、偶經過、信陵祠下。正滿目、荒臺敗葉、東京客舍。九月驚風將落帽、半廊細雨時飄瓦。柏初紅、偏向壞牆邊、離披打。今古事、堪悲詫。身世恨、從牽惹。倘君而尙在、定憐余也。我詎不如毛薛輩、君寧甘與原嘗亞。歎侯嬴、老淚苦無多、如鉛瀉。

又 梁溪顧梁汾舍人過訪賦此以贈兼題其小像

二十年前曾見汝、寶釵樓下。春二月、銅街十里、杏衫籠馬。行處偏遭嬌鳥喚、看時誰

讓珠簾挂。只沈腰、今也不宜秋。驚堪把。且給個、金門假。好長就。旗亭價。記爐烟扇影。朝衣曾惹。芍藥纔填。妃子曲。琵琶又聽商船話。笑落花、和淚一般多。淋羅帕。

又 故友周文夏侍御沒已及十年矣。幼女在閣尙未字。人少司馬山左孫。作庭先生興懷宿草。特爲令子議姻荆溪人士。高其誼。爭作詩歌以詠之。鄙人太息亦填此詞。

江左周瑜。年少日、雄姿歷落。記十載、霜飛獬豸。風生臺閣。宦蹟遽如春夢短。人情劇似秋雲薄。舊平泉、早付綠苔生。都非昨。問鮑子、今難作。憐弱女、憑誰託。賴同官偏念。曩時花萼。高誼漫言齊偶大。華堂定讓韓居樂。翟公門、一曲鼓求凰。驚羅雀。

又 萬脩承五十用呂居仁韻

北郭先生。門恰對、峯迴澗曲。且小隱、漁莊蟹舍。長廊矮屋。雨過拍茶香作雪。日高煨芋酥於玉。向紅塵、不到處、逍遙襟衫綠。林灑灑、烘楓菊。濤瑟瑟。鱗梧竹。問貂蟬囊笠。誰榮誰辱。豆架瓜棚三徑在。黃雞白酒千場足。便水田、今歲不曾收。來年熟。

又 秋杪同南耕魯望弟過東郊外殿元叔祖廢園感賦

醉袖籠鞭。正杏苑、一枝新奪。歸臥處、溪山窈窕。亭臺層疊。松籟梧烟縈客夢。溪茶澗  
筍醒人渴。羨昇平、江左玉堂仙。風光別。繁華事。行人說。淒涼債。今生結。又蝸黃蘚  
綠。斷碑殘碣。細雨零星漁榜火。亂鴉颯。杳僧龕。月記小樓。一片伎衣紅。年時節。

又

琴弈雙清爲閣牛叟賦

牛叟兌閣遺徵曰妻善弈花下與諸女劇必招予

予笑謝於琴不由師授以意成譜巧合自然

綠齒擣菹。愁狂煞、他家兒女。笑此是、牧豬奴戲。何心共賭。懶凭繡牀抽蛺蝶。愛拈紅  
子爭龍虎。恰偏逢、郎手劣於儂。降幡舉。奩乍斂。牆陰午。香半爐。燈花吐。逗琴心忽  
入。海天寒處。時世幾多箏笛耳。蛾眉也解英雄苦。羞崩騰、只把漢宮秋。臨風鼓。

又 壽海寧家始升六十

風景清佳。天氣是、梅前菊後。弧懸處、高軒列戟。軟簾堆繡。龍笛鵝笙喧午夜。衙香宮  
錦圍晴晝。笑吾宗、今日又重逢。圖南叟。搖鐵鳳。蟠金獸。相府畔。沙堤右。算家門華

貴於公何有。坊曲漫勞誇韋杜。文章要使羅星宿。看佳兒、新醞桂香濃。爲春耐。

又 送葉桐初還東阿卽次其與曹雪樵倡和原韻

若且歌乎。急配以、哀絲豪竹。念來夜、故人一去。月明人獨。風吼軍都山忽紫。雨收督亢天全綠。笑好官、幾個讀書來。休耽讀。吟復寫。螭蟠幅。富與貴。蛇添足。但逢花便插。有泉須掬。建業雲山通地肺。姑蘇烟水連天目。算穀城、雖好不如歸。眠鄉曲。

又 壽寶坻杜相國

恆岳生申。恰黍谷、陽回時候。沙堤上、弧懸相府。光騰寶瑩。萬國河山平似掌。九天花鳥紛如繡。正黃扉、暫闔袞衣閒。娛清晝。房與杜。齊台斗。李與杜。豪詩酒。算文章勳業。公俱不朽。八餅茶分龍鳳碾。萬釘帶壓蛟螭鈕。看無邊、紅燭下朝來。爲公壽。

又 聞往歲帝城烟火之盛甲於天下今年元夜作客都門適逢新禁淒然獨

坐詞以遣懷

夜火春宵。說此地、上元尤勝。烟焰裏、烘桃炙柳。飄梅炮杏。繡羽花冠筒內放。細苞翠

蔓竿梢映。紫葡萄。十丈滿池蓮。絲絲凝。瑪瑙寺。鞦韆競。琉璃廠。箏琶盛。更鈿車。麝帕嬉遊不定。今夜鳳城偏寂寂。一燈微耿。人初病。只角殘。吹到第三聲。何心聽。

梅子黃時雨 本意

天水空濛。只將暝織愁。催雨添恙。乍過了東風。楊花一桁。彈指還驚仲夏。蕭蕭簷瓦跳珠響。葡萄漲。鳩婦喚晴。鳧母眠浪。惆悵。他鄉誰傍。算爐薰藥裏。聊自屏當。料故國樓頭。茶烟新颺。豆綠缸中。梅水滿。何時小啜龍團餉。苔衣長。膩得苧衫難爽。

雪梅香 和竹逸再遊石亭看落梅原韻同雲臣賦

梅將謝。臨風招手喚重游。恰瀾瀾照浪。愁情懶比眠鷗。低撲村莊。紈扇巧。亂飄溪閣粉茵稠。糝綿弄雪。送清芬。與夢俱幽。再來增悵望。滿逕瓊姿。零落誰收。拾取殘英。注來花乳磁甌。縱使暗香埋隴畔。勝於飛絮舞街頭。休回首。幾枝含淚。正倚山樓。

掃花游 早秋同雲臣詣竹枝庵訪寒松上人時上人將往龍眠用片玉詞韻

留贈兼志別懷

問秋何在。在郭外陂塘。欄邊林楚。野香幾縷。向衫痕暗撲。帽絲亂舞。暑退涼生一派。嫩陰閣雨。繞村去。遙見支公。微笑迎處。相別彈指許。又竹翠沾塵。荷風凝路。茗鐘筍俎。悵來朝愁聽。江船擣素。任是空王也。稔離情。淒苦漫延竚。怕催歸。花宮浴鼓。

紅情 詠半吐紅梅

一枝凝曉。似絳蕊浮釭。錦鱗拍沼。搓透猩絨。賣弄憨嗔。許誰拗。莫是羅浮人困。珊瑚枕上。小鬟新覺。正睡暈初圓。偷倚繡奩照。料峭年猶少。更酒入潮生。春來靨笑。嬌香趁早。休賺天桃見時惱。幾顆朱櫻綻口。甚日茜花壓帽。倩紅淚。將綃裏。灑他開了。

滿庭芳 紀夢

黃入東風。綠來南內。夢中春水玲瓏。箇儂香粉。髣髴也曾經。還是簸錢堂上。當年事。有影無形。高樓外。珠圓鶯脆。隔院已聞聲。衷情。渾欲訴。新愁點點。舊恨星星。奈一場春夢。不甚分明。此際銀燈耿耿。羅衾溼。紅淚如冰。難分手。滿街細雨。愁煞夢回程。

又 談長益攜具招游八公巖

水寺拖烟。山樓嵌雨。日長經院無人。茶香竹翠。也算是前因。獸窟山前精舍。參差處。欲斷還勻。依稀似。鳧雛雁子。零亂不成羣。逡巡。思昔日。戴公故隱。往蹟沈淪。漸櫻桃熟後。梅又生仁。憔悴鬢絲禪榻。十年事。更與誰論。空歸去。數聲暝磬。行過米顛墳。

又 過遼后梳妝樓同洪昉思賦

細馬輕衫。西風南苑。偶然人過金溝。道旁指點。遼后舊妝樓。想像迴心宮院。鈿箏歇。含淚梳頭。青史上。武靈皇后。一樣擅風流。堪愁。成往蹟。繚垣敗甃。滿目殘秋。便脂田粉。零落誰收。莫問完顏耶律。興亡恨。總是荒邱。紅牆外。誰拋金彈。年小富平侯。

又 題顧梁汾舍人扈駕詩後

萬乘旌旗。千官羽獵。翠華絕塞重經。珠鞭玉靶。日黑虎風腥。羨爾金閨年少。陪游幸。鳳輦龍庭。霜天曉。柘黃袍出。一騎按秋鷹。至尊。親講武。火城漸杳。交網猶局。更北平城外。嶺斷雲橫。飛鞚傳宣七校。黃羊酒。前隊教停。琵琶歇。碧天氈帳。一曲海東青。

又 過虎牢

汜水東來。滎陽西去。傷心斜日哀湍。橫鞭顧盼。又過虎牢關。歎息提兵血戰。西風響。一片刀環。英雄淚。亂山楓葉。不待曉霜丹。追攀。當日事。炎精未造。遺恨靈桓。又許昌遷駕。不肯回轡。今古興亡轉換。誰相問。剩水殘山。憑高望。漢陵魏殿。一樣土花斑。

又 距汝州四十里山有溫泉相傳爲唐武后幸洛時浴處

武媚東巡。金輪春幸。洛川自古神州。風光溢目。綵仗簇星球。聞道香山山下。湯泉沸。玉豔瓊流。傳駐蹕。石榴裙溼。激水奉宸游。六郎宣詔入。蓮花一朵。相映嬌柔。趁晚涼閒話。水殿雲幃。千載朱顏難待。傷心似。太液池頭。淒然也。驪山浴館。一樣野花稠。

又 詠臘梅和京少韻

仙淚流銅。蜂脾釀蜜。聖檀初傅新妝。冰簷雪竇。帶暝亂斜陽。自是羅浮別種。依稀賸。金粟餘香。王孫彈。枝頭萬顆。偏惹畫簾長。繞廊。應錯認。宛如梅子。熟後輕颺。想宮人入道。繩幘都黃。一段冷魂幽緒。扶疏態。誰與擎將。春來也。紅紅白白。讓爾冠羣芳。

又 玉簪花



築粉偏溫。鏤脂卻暖。一枝顫影難休。涼軒滑簟。常傍晚妝樓。幾度枕邊輕墜。聽不出、  
釵響悠悠。尋覓取。依然未墜。重上玉人頭。開時剛淺夏。曉來笑折。人意先秋。正睡  
餘夢遠。翠幌空幽。每被鬢絲籠住。香風動。蜂蝶先偷。玲瓏極。鄰姬誤認。卸取節秦謳。  
又 暮秋梁溪南郊看菊紀游

雨坼池蓮。霜彫巖桂。愁餞臨去秋光。城南漫興。步履趁林塘。歎息人家兵後。莓苔徧、  
廢井頽牆。溪橋畔。柴門半掩。籬落未全荒。烟莊。經幾處。嬌紅淡粉。壓疊成行。恨花  
繁境窄。姿態難詳。最後一園差勝。軒櫺外。亂石疏廊。西風勁。催將菊瘦。餘力裊衰楊。

又 丁巳元夕後三日謁別駕林天友於長洲官署賦贈

淼淼長洲。離離茂苑。無邊草色連空。兩番借治。歡笑滿吳宮。一自睽離絳帳。相思切、  
早理烟篷。平波遠。誰吹五兩。幾陣落燈風。忡忡。憐別後。鸞飄鳳泊。竹嬾絲慵。擬酒  
酣訴與。慷慨從公。憶昨探梅摘蕙。銅官下。曾傍游筇。經年矣。春來鄧尉。香雪又濛濛。  
又 今春梅候余適買棹吳門乃因循羈絆不及爲鄧尉之游正深悵惋及過

里門而枝頭香雪已零落。略盡矣。會放公以梅下見懷詞并雲臣和章相示。  
漫次原韻

二月新晴。東風作陣。吳天梅訊頻催。伍塘飛棹。恰過浪花堆。聞說疏香冷粉。銅坑畔、  
萬樹齊開。真孤負。闔閭城下。容易放船回。沿洄。歸罨畫。閒廢綺韻。觸緒增哀。想一  
枝瘦玉。曾綴經臺。我是湖州杜牧。成陰候。側帽纔來。明年事。相期花下。莫放淺深杯。

又 詠西府海棠

滿院紅綃。半樓絳雪。幾叢豔冶成圍。倚欄無力。嫩柳鬪腰肢。粉壁銀牆淡雅。明妝坐、  
人是瓊枝。東風動。花光映肉。桃暈入冰肌。胭脂。剛蘸雨。一番梳裹。別樣芳菲。似六  
宮晝暖。睡重楊妃。贏得三郎一笑。花前鬧。急管繁絲。豪華甚。千堆蜀錦。那用杜陵詩。

又 五日玉峯競渡用梅村詞韻

鶯歌芳筵。葵榴綺節。一雨涼透重湖。繡旗畫鼓。蘭槳劃菰蒲。多少唐陵漢寢。千年恨、  
遠近楸梧。休憑弔。玉山將倒。翠袖可相扶。狂夫。狂更劇。花顛酒惱。脫帽喧呼。喚湘

累與汝。美醞同沽。收拾金簫玉管。崑峯好。晚髻新梳。家鄉憶。層層水榭。紅縷漾。釵符。  
又 贈表兄萬大士 舊臨漳令

少日情親。兩家中表。羊車競戲階前。雕蟲薄技。里塾又隨肩。彈指涓陽凋謝。烏衣巷、  
蔓草平田。誰能料。童時伴侶。相對兩華顛。中年。拋艾綬。柴門罨畫。三徑蕭然。憶相  
州鄴下。宦蹟流傳。購得銅臺繡瓦。歸吟寫。夜雨朝烟。殘生事。酒鎗旗局。此外總由天。  
又 詠宣德窰青花脂粉箱爲萊陽姜學在賦

龍德殿邊。月華門內。萬枝鳳蠟熒煌。六宮半夜。齊起試新妝。詔賜口脂面藥。花枝曩、  
笑謝君王。燒甕翠。調鉛貯粉。描畫兩鴛鴦。當初溫室樹。宮中事祕。世上難詳。但銅  
溝漲膩。流出宮牆。今日天家故物。門攤賣。冷市閒坊。摩挲怯。內人紅袖。慟哭話昭陽。  
又 蜀山謁東坡書院

水拍晴橋。山銜春店。飛花落絮悠颺。打魚放鴨。四月好年光。此地林巒絕勝。家家足、  
碧澗幽篁。斜坡上。碎甌敗甃。零亂補圍牆。鳴榔。思往事。峨眉仙客。曾駐吾鄉。惹溪

山千載。姓氏猶香。今日紫姑聖女。喧村賽。畫鼓明妝。殘碑在。獨憐野草。漸沒古祠堂。  
山上俗有所謂娘娘廟。是日香火最盛。居民奔走如鶩。而書院滅沒。荒烟淡靄。間  
無有過而問者。詞以志慨。

又 吾邑茶具俱出蜀山暮春泊舟山下漫賦此詞

白甄生涯。紅泥作活。亂烟細裊孤村。春山脚下。流水浴柴門。紫筍碧鱸時候。溪橋上、  
市販爭喧。推篷望。高吟杜句。旭日散雞豚。田園。淳樸處。牽車鬻畚。壘石支垣。看鷗  
夷撲滿。磊磊邱樊。而我偏憐茗器。溫而栗。溼翠難捫。掀髯笑。盈崖綠雪。茶事正堪論。

又 汴梁客舍同馮蓼庵夜坐蓼庵出梁溪閨秀永愁人詩稿示余淒然賦此  
馮衍長愁。陳思不樂。相逢同客東京。烏啼落葉。惆悵可憐生。無忌館今何處。河聲怒、  
攙著砧聲。秋宵永。幾楞粉月。曬得綠窗晴。鶯鶯。聞尙在。詩人老去。一倍含情。且開  
箱驗取。錦字縱橫。料爾銀鈎未寫。檀箋上。珠淚先盈。休腸斷。青衫紅粉。一樣是飄零。

又 丙辰元夕

戰馬千羣。戍旗一片。江東月又剛圓。凝妝豔粉。何異太平年。樓上冰簾絳蠟。參差弄。鳳管鶻絃。樓兒下。金蛾玉繭。風景倍嫣然。碧天何限事。一生能得幾度燈前。況春城不禁。拾翠尋鈿。忍負衫紅釵紫。生生博圖畫。凌烟歸來晚。闌珊夜火。人立小門邊。

又 林天友別駕招飲同雲臣賦贈

荔浦樓臺。榕城甲第。相門羣羨賢甥。詩篇宦蹟。雙鬪早梅清。幾度桃花浪暖。賢勞最。轉餉神京。纔歸也。楚天在望。又聽夜猿鳴。山城父老說。孝侯一去。蛟虎縱橫。憶使君前事。千載齊名。昨夜張筵。召我行春暇。綠酒紅笙。剛過雨。新鶯語滑。喚起月盈盈。

又 花朝後一日林天友邀同雲臣爲南嶽之遊詞以紀事

翠榜欵烟。紅船委浪。水簾低捲晴暉。曉山欲笑。迎我在春磯。歇馬誰家園子。游絲靜。嬾上人衣。憑欄望。樓臺易主。金粉未全非。霏微。小雨過。花籠寺閣。瀑濺僧扉。正使君愛士。野客忘機。斜日仍搖畫艇。紗窗掩。玉腕頻揮。城頭望。半溪燈火。爭認醉翁歸。

又 清明前一日同雲臣溪干觀劇

近水人家。弄晴天氣。清明恰是來朝。曉鶯無賴。喚我驛邊橋。多少歸寧溪女。花枝颯、  
香粉輕飄。疏籬畔。蘭芽杏蕊。開到十分嬌。垂髻。剛十五。新聲解唱。淥水紅么。憶少  
年同學。半插華貂。我向江村潦倒。新年恨。比舊還饒。鞦韆社。東風攪碎。戲鼓賽神簫。  
又 毫村舊宅之東有屋一區名開遠堂堂頗宏敞乃先農部伯父別業也堂  
久已不存門內且賃爲酒肆矣賦此志感

宅列光延。門齊通德。君恩曾賜山莊。勝衣膝下。粉署半含香。白晳華貂插鬢。東頭屋、  
綠野名堂。依稀記。畫簷鴟吻。燒作紫鴛鴦。滄桑。今已換。葦花楓葉。一片蒼茫。剩戟  
門未圯。酒旆新颺。土鏗誰人競唱。邊州調。白草黃塵。綠垣外。西風吹到。憔悴舊家郎。  
又 壽王敬哉先生用棠村詞韻

菊尙拖黃。梅將凝粉。安排晴日開筵。錦笙畫鼓。譜出鷓鴣天。兩世尙書門第。朝回後、  
繡轂紛然。華堂上。昇平保傅。矍鑠地行仙。名園。飛霞後。銀燈火樹。雪月光聯。要妝  
成瑤圃。映上紅箋。海畔羣真介壽。驂鸞渡。弱水三千。馳封賜。汪汪綠蟻。猶裏鳳樓烟。

又 壽大司農梁蒼巖先生

黃閣勳名。黑頭卿相。瑤池第一神仙。蕉林書屋。烟景勝平泉。珠島花洋萬里。牙樯送、南海歸船。還朝後。錦袍茜袖。長侍紫宸前。華筵。羣獻。昇平法曲。象管鷓絃。有尙書紅杏。麗句親填。歲歲鳳城今夜。陽回處。暖在春先。緗梅綻。風光正好。次第到鞦韆。

又 山陰沈躬範婦陳夫人好讀書年二十三夭卒卒之日囑以平日所誦書

籍殉冢中一時皆作詩以哀之余亦爲賦此闕

人偶言愁。僕原多恨。說來也替神傷。越溪有女。十五嫁王昌。人在水晶簾底。簪花格、日做千行。纔梳裏。溼蟬未斂。便自理鉛黃。梅妝。容易謝。皇墳汲冢。雪魄同藏。抱夜臺吟誦。月冷楓香。何必玉魚金盃。遺編在。還累蕭郎。羅裙壞。草生書帶。不化紫鴛鴦。

又 送顧尼備南歸爲太夫人壽

梅子生仁。柳綿著水。翠陰淦淦遮牆。新裁綵袖。愛趁日初長。立馬都亭送客。鞭絲颭、帽影低颺。凝情處。暮雲堆碧。妬爾作輕裝。霞觴。歸捧候。黛添艾葉。紅入榴房。有江

鱸鱸筍足膳高堂。路次毗陵水驛。應相見。陽羨山光。憑君說。倚闌游子。脈脈只思鄉。

又 吳門管烈婦夫亡殉節詞以紀事

鏡掩離鸞。絃摧別鶴。千秋彤史留芬。機中錦字。長恨與誰論。一自磨笄人杳。成灰後、蝶化羅裙。人間事。依然花月。空館總無春。夫君。憐彩筆。土埋玉樹。雨打黃昏。痛梨花一樹。同散朝雲。贏得巫簫社鼓。胥江畔。歲歲迎神。憑誰畫。啼斑滿竹。別樣管夫人。

又 送吳初明南還秣陵

颯沓寒鴉。聊蕭凍葉。西風壓雪將低。蘆溝南下。立馬惜分攜。此去雞籠山館。江梅瘦、恰與簷齊。都門事。牆頭過酒。爛醉嬾重提。當時。臨發日。王郎作畫。送別青谿。看無多幾筆。不數迂倪。勿論風流二老。相關甚。正有鄰奚。長鬚到。歡迎隔浦。仍是杜家稽。

初明北發時王安節圖畫相送畫上作兩人臨風揮手一童荷擔將行一童子牽擔立爲摒擋琴劍諸器具戀戀殊甚故篇中及之阿段阿稽杜甫家童奴名也

又 中元節途次蒙陰追悼亡女



庾氏苟娘。左家嬌女。恩情誰道非男。銘椒頌菊。略涉也粗語。每歲因爺作客。恆歸伴。阿母香奩。天涯信。燈花蟻子。頻向紫姑占。江淹。何限恨。半生婚嫁。怨極愁添。只今朝五岳。敢詡幽探。惆悵中元令節。家山事。梵唄莊嚴。蒙陰畔。兩行紅淚。寄不到江南。

又 題徐武貽小像

武貽文貞後人椒峯張仲母舅舊許爲題像今翁已沒

始追補成之

碧篠千竿。紅蘭一架。松濤韻雜笙竽。科頭箕踞。旁置小風爐。回首文貞舊業。淒涼絕。綠野荒蕪。牢之好。家傳宅相。名已動京都。躊躇。當日事。記曾撫掌。爲我披圖。擬閒題數語。貌爾清癯。詎料山邱華屋。重來處。此諾還逋。徐君墓。未成挂劍。聊報秣陵書。

徵招 送宋性存歸吳門

一燈分做還鄉夢。君今果然歸矣。殘月曉風天。暫挽君雙袂。柳條今賸幾。待折贈。沈吟無計。君到江南。定逢梅放。也應相寄。來夜白溝河。雞聲店。料爾早寒人起。誰念鳳城邊。有倚闌心事。暮雲千萬里。留我作。天涯游子。我亦有。茅屋三間。六朝斜照裏。

又 爲王瑁湖編修悼亡

柿葉翻時人病起。淒然悼亡新賦。畫篋儘伊搜。奈蕙叢先去。元和才子恨。拚細研。鳳箋零譜。不分西山。風前還鬪舊年眉嫵。故國水雲多。曾側帽。共聽半船疏雨。粉腕斫鱸香。更翠尊凝筍。如今秋夜笛。只遞入。客窗偏苦。縋蛛絲。丁字簾西。記有人行處。

又 爲尤悔庵悼亡

蕙叢去後微之怨。當時韋娘年小。別後鏡鸞分。悵天涯人老。小屏歸路悄。怕重疊。吳山清曉。此夜遙憐。水哉軒畔。月明多少。侍史慢薰衣。金門啓。愁聽穿花漏早。剔燭鼓冰絃。又犯些商調。彩毫憑起草。錯認畫。遠山眉稿。不信是。白玉爲堂。頓玉臺人杳。

水調歌頭 被酒與客語

老子半生事。慷慨喜交游。過江王謝子弟。填巷哄華騶。曾記獸肥草淺。正值風毛雨。血大獵北岡頭。日暮不歸去。霜色冷吳鉤。今老大。嗟落拓。轉沈浮。疇昔博徒酒侶。一半葬荒邱。閉置車中新婦。羞縮嚴家餓隸。說著亦堪愁。我爲若起舞。若定解此不。

又 題余氏女子繡西施浣紗圖爲阮亭賦

婀娜針神女。春晝繡西家。聞道若耶溪上。淥水漾明沙。爲憶吳宮情事。驀地養娘來。至。羞臉暈朝霞。忙向屏山畔。背過鬢邊鴉。一春愁。三月雨。滿欄花。西施未嫁。當初情緒。記些些。靠著繡牀。又想。拈著鴛針。又放。幽思渺無涯。一幅鮫綃也。錯認越溪紗。

又 宋荔裳曹顧庵王西樵招集劉峻度葭園卽席限韻

鈿犢朱扉外。寶鴨畫堂中。重逢把酒飛蓋。倍覺旅愁空。人有庾徐潘陸。坐有樓臺絲竹。那減晉人風。慎莫賦悵悵。亟爲拉紅紅。吾醉矣。拓金戟。倚長弓。不改狂奴故態。耳語有羣公。官是金閨貴客。身是畫溪愁客。客自不相同。起覓鐵綽板。高唱大江東。

又 送宋荔裳觀察入都并寄蓼天司業同顧庵西樵賦

酒冷天寒日。人去客愁中。數行鈿蟬柱雁。祖餞出城東。衣上青天明月。馬上黃河飛雪。雁背染霜紅。如此作裝急。磊砢相桓公。千斤椎。七寶轡。百石弓。從奴賓客。所過棧馬嚙殘通。定過淮陰祠下。更到望諸墓上。懷古颯悲風。若見蘇司業。言我鬢成翁。

又 留別阿雲

眞作如此別。直是可憐蟲。鴛鴦裯麝薰正暖。別思已匆匆。昨夜金尊檀板。今夜曉風殘月。蹤跡太飄蓬。莫以衫痕碧。偷搵臉波紅。分手處。秋雨底。雁聲中。迴軀攬持。重抱宵箭。悵將終。安得常歸藥。缺更使大刀環折。萍梗共西東。絮語未及已。帆勢破晴空。

又 舍南庭前牡丹將放詞以催之

峭冷侵金鴨。乍暖熨銅龍。東皇好景何限。相別苦匆匆。二十四番花信。一百五朝寒食。幾陣酒旗風。豆吐鴛婆綠。花綻鼠姑紅。畫欄西。綺窗北。錦城中。姚黃何事。羞澀媚臉未全融。速辦慈恩車騎。并倩華清鈿笛。邀取謫仙翁。早放木芍藥。慢舞玉瓏璁。

又 詠美人鞦韆

昨夜滿裙罷。今日意錢回。粉牆正亞朱戶。其外有銅街。百丈同心線。索一寸雙文畫板。風颭繡旗開。低約腰間素。小摘鬢邊牌。翩然上。掠綠草。拂蒼苔。粉裙欲起未起。弄影惜身材。忽趁臨風回鶻。快作點波新燕。糝落一庭梅。向晚半輪玉。隱隱照遺釵。

又 夜飲季端木齋中歸忽爾飛雪填詞奉東并懷尊甫孚公

昨夜醉君酒。歸路雪飛花。淋衣那更裂燭。袖禿不禁遮。妝徧瓊樓萬瓦。凝透綃宮千幕。凍殺冷蝦蟆。紙破苦拉雜。柱朽怕槎枒。吾笑我。寒至此。獨何耶。愁時恨不倩汝。爲我喚箏琶。忽憶哦松尊甫。時孚公作錢塘丞今夜斷橋晴雪。吟興定然佳。客睡幾曾著。城上咽悲笳。

又 雪夜再贈季希韓疊前韻

海上玉龍舞。糝作滿空花。城中十萬朱戶。瓊粉亂周遮。愁對一天飛雪。不見昨宵明月。桂影蝕金蟆。短鬢颯秋葉。僵指蠹枯枒。當日事。須細憶。詎忘耶。記築球場。擲笛卻手復爲琵琶。縱不神仙將相。但遇江山風月。流落亦爲佳。豈意有今日。側帽數哀笳。

又 立秋前一日述懷柬許豈凡

將相寧有種。豎子半成名。虬螭切莫撼樹。聽我短歌行。薄俗人奴笞罵。末路婦人醉酒。一笑萬緣輕。夫子知我者。試與說生平。斫豪豬。炙走兔。掣長鯨。羣儒齷齪可笑。

我自習縱橫。明發西風削草。且約博徒會獵。小趁一秋晴。鬚作蝟毛磔。箭作餓鴟鳴。  
又 題友人詞并示方艷大匡

脫帽卽擲笛。輟洗便彈箏。千金教得樂部。坐此得狂名。每歎英雄作事。萬象雪中鴻  
爪。一過已忘情。倏忽謝歌舞。寂寞掩柴荆。新詞句。真磊落。太縱橫。我作致師樂伯。  
摩壘更摩旌。爽若并州快翦。又若短兵狹巷。殺賊不聞聲。舉以示二子。大笑絕冠纓。

又 送惲南田之錢塘并柬毛稚黃

躡屩上靈隱。吹笛下吳淞。送君恰值新爽。纖月印船篷。猶憶冷泉亭上。百道跳珠噴  
雪。飛瀑挂杉松。一別十八載。吾老漸成翁。故人去。攜筆墨。寫空濛。不知老已將至。  
揮灑醉偏工。爲訊鹽橋毛子。果否別來無恙。底事斷詩筒。人世作達耳。長邑鬱焉窮。

又 贈西陵周勿庵 勿庵精日者家言任俠滑稽多金丸綠幘之游行微僕

拍手唱銅斗。踢地舞迴波。世間窮達有命。擾擾若之何。收罷百錢簾下。雨後一街人  
少。客有獵纓過。僕病坐磨蝸。君醜類雞窠。如箕舌。蟠其腹。口懸河。眼中只愛綠幘。

誰解愛青娥。頗怪丈人痴。儂卻恐舍人尻。晷戲語莫相呵。絕倒黃幡綽。撫掌敬新磨。

又 題遠公畫洞山圖送天石北上

何以贈行卷。而作洞山圖。旁人拍手大笑。畫者復誰歟。此去燕姬馬。湏足金莖仙。漉茗椀。酷非須。卿復攜來否。長柄有葫蘆。掀髯語。畫此者。定非迂。敗盡朱門酒肉。只此味清腴。縱挾綾文三百。日給龍團鳳餅。曾似故園無。十丈紅塵裏。一幅冷秋菰。

又 送原白北上

莫作戀豆馬。直學脫鞵鷹。送君秣魏刷。趙萬里。愜飛騰。頗怪今人離別。出戶定然復入。刺刺實堪憎。似爾最颯爽。物態直憑陵。公子去。臣宜從。病未能。行也勉旃努力。勿復憚炎蒸。爲我慈仁閣下。寄訊支離老叟。短髮定鬢髻。待我上元候。同看鳳城燈。

又 留別澹心卽用來韻

離別亦常事。惆悵慎毋然。歸舟一路弄笛。吹裂水中天。猶記吳趨坊後。再到蕙山松畔。兩地酒如泉。不久聚花下。小別向風前。白翎雀。雞叫子。想夫憐。岐王空宅。舊日

法曲散如烟。君有龍文百軸。近作小詞一卷。千載定流傳。早覓賀懷智。亟付李延年。

又 橄欖

造物有本性。此味最高嚴。清芬卻帶酸澀。品格壓黃柑。多少橘官軟美。無數荔奴甘滑。側目看新參。諫議爾之職。羶我何堪。析煩熱。開結轆。滌塵凡。頗聞人語。輸與崖蜜十分甜。長揖水晶人退。不詣內黃侯謝。徑自返漳南。獨醒頗相憶。搖落在江潭。

又

萊陽姜如農先生前朝以建言予杖遣戍宣州會遴甲申之變不克往戊所僦居吳門者幾三十年癸丑夏先生疾革遺命家人曰必葬我敬亭之麓其子勉仲學在從之聞者悲其志重其節私諡之曰貞毅先生維崧填詞以

代迎神送神之曲焉

東海黃門老。疾革話悲酸。呼兒吾骨累汝。霜翦一燈寒。休返出橫島上。何用要離冢側。莫恤道途艱。憶奉重華命。遣往敬亭山。三十載。憐弱水。幾回乾。鐵衣生既未著。鬼亦戍其間。此地層崖沓嶂。正接蔣陵鍾阜。紫翠湧千盤。若有人兮在。竦劍守重關。



又 早秋託興

秋色一天雪。林壑映新暘。皎如三尺新水。出匣漾干將。亟敝杉窗竹院。要使金風玉露。灑灑我軒廊。颯爽上眉宇。皎潔到衣裳。小樓上。望極浦。太微茫。估船夜笛。江上併作十分涼。安得中原豁處。飽看出。橈蒼狗。大獵一千場。浙罷刀頭米。射殺鹿邊麀。

又 平遠堂雨中卽事林天友使君席上同曹顧庵丁藥園胡存人吳園次六

益余澹心尤悔庵宋旣庭錢宮聲顧云美伊人天石趙旦兮毛行九分賦共

用烟字

千古鶯花窟。四月雨晴天。闌干一望平遠。濃淡石湖烟。催取茶鎗酒幔。喚得箏師篴伎。來做餞春筵。且起舞回鶻。休去聽啼鶻。觴未半。風乍起。雨鏗然。嵯峨古塔將壓。挾屋勢斜穿。萬斛鈴音鐸語。四壁鯨呿鼉擲。劈裂幾條絃。脫帽叫奇絕。此景倩誰傳。

又 讀董舜民蒼梧詞題後

老屋數間耳。世事不關渠。堆牆牛腰困蠹。巨束筳般竊。中有奇文兀冪。每夜必騰光

怪。鼉擲與鯨吐。力壓古聲叟。氣懾萬獠奴。珠零亂玉天。矯翠糲糊。我行以手捫摸。作此定誰歟。既似苔紋瓦篆。又似碑殘鼓鑿。字裏吼於菟。乃是蘭陵董。詞集曰蒼梧。

又 畫樓詩爲西陵吳子璵賦

有客向余說。昨又到湖頭。湖中翠奩未斂。湖畔水明樓。萬本澄心堂紙。千頁大觀樓帖。百幅李營邱。盤礴此樓上。縹緲紫綈裘。風弄麝波漾。縠浩悠悠。湧金門外新月。聽足采菱謳。分付危欄飛檻。莫遣于祠岳墓。烟景觸簾鉤。貯酒兼貯茗。不貯古今愁。

又 渡長蕩湖望三茅峯

我住太湖口。四面匝烟鬢。周迴縈青繚。黛中託白銀盤。且縱龍宮一葦。耕破瓊田萬畝。笑傲水雲寬。篷背唱銅斗。沙尾辨金壇。雪浪吼大魚出。蠹如山。茅家兄弟笑我。前路足風湍。君自驂鸞翳鶴。我自騎鯨跨鯉。各自不相關。揮手謝之去。吹笛弄潺湲。

又 睢陽寓館感舊題壁

惆悵復惆悵。直視草茫茫。風搖葵子蕢。葉螻蠅上空牆。滿目西州門內。轉眼黃公壚。

畔前事惹思量。搖膝并負手，遶柱更循廊。天欲黑，燈半綠，月微黃。中年哀樂，何況人又在他鄉。飄去嬌絲脆板，留下殘香剩茗，狼藉小紗窗。撥置不足道，念此斷人腸。

又 送侯叔岱之彭城

酒罷忽不樂。結束挽強弓。彭城此去，蒼莽水蓼滿陂紅。戲馬臺邊騁望，下有河流似弩。混混盡魚龍。吾意欲起舞，屈指幾英雄。斜陽恨，關山影，一杯中。袁曹劉項，付與烟草沒孤鴻。莫管千秋閒事，休誤一生作達，笳吹競西風。盼盼去已久，明月小樓空。

又 夏五大雨浹月南畝半成澤國而梁溪人尙有畫舫游湖者詞以寄慨

翠釜一朝裂，銅狄盡流鉛。江南五月天漏，煉石補仍穿。驟若淫龍噴沫，狂比長鯨跋浪。廬舍沒長川。菱蔓繞牀下，釣艇繫門前。今何日，民已困，況無年。家家秧馬，閒坐墟井斷炊烟。何處玉簫金管，猶唱雨絲風片。烟水泊游船。此曲縱嬌好，聽者似啼猿。

又 憶商邱宋介子西涓草堂

雪苑女牆外，水色綠於苔。郭南潭子尤勝，森森浸樓臺。長記昇平舊事，彌望風亭雨

榭盪槩百壺來。誰向亂前說。說罷使人哀。西湄好憶客夏。寄高齋。南烹爲余細糝。棐几淨纖埃。君笑熱由卿至。僕笑羹應還我。戲語類優俳。搖櫓沒烟去。背指野棠開。

又 新秋寄驥沙徐仲宣

秋色潔於雪。澄湛到簾鉤。憑軒憶爾更劇。君亦念余不。記客泉亭草寺。閒弄吟篷釣。笛相與狎沙鷗。一笑別君去。四節忽如流。大江邊。殘照裏。仲宣樓。烟波蝦菜。料爾生計儘優游。此地孤城絕島。長被蛟涎兔汁。鍊足一天秋。橫竹吹阿濫。叫醒古今愁。

又 溪泛

誰送半城綠。恰是兩溪風。茫茫銀濤雪浪。天水有無中。每到簾紋平處。不覺水香肥極。一色玉玲瓏。最惱閒鷗鷺。偏解占空濛。駕一葦。凌萬頃。浩無窮。今宵圓月定好。寄語織綃宮。脫帽五湖風景。捲幔半生心事。杏靄縱吟篷。一笛中流發。乃是綠篔翁。

又 題毛會侯戴笠垂竿小像

水色綠如鴨。又似乍磨銅。韉紋細浪忽起。颯颯夾溪風。數里江村茆屋。一帶蘆汀蟹

舍下徧釣魚筒。雲作蔚藍。灑灑。襯以晚霞紅。燃楚竹。炊香糯。五湖東。新來溪友堪訝。乃是。大毛公。贏得眾帥拍手。汝有金貂玉佩。詎是綠簑翁。笑起唱銅斗。餘響落蛟宮。

又 汾西侯仲輅示我九日紀夢詞二闋依韻奉和

月落邊牆黑。幾扇雁門開。蒼然西極風雨。都向二陵來。聞說胭脂小伎。能唱橫汾舊曲。家傍古輪臺。我欲與之語。紅粉最憐才。飲醇酒。近婦女。莫疑猜。世間餘子何限。兩手底須推。安得飛狐峪口。借汝吹簫擊筑。一日笑千迴。綠酒不曉事。有悶未能排。一笑老松下。握手亦前緣。昨宵黃花節候。妬汝小游仙。推道巫雲入夢。誰料玳筵真個。事已徧流傳。我在銀笙底。偷譜鷓鴣天。追代馬。挾趙瑟。是何年。兵家女有殊色。可許阮公眠。詎少朱門絲管。那抵青樓簾檻。如鏡復如烟。天上兔華滿。只照別家圓。

又 毛會侯席上限詠鹿脯詩詞以代之同王惟夏方雪眠毛大可允大諸君

賦

那曉魯公帖。有手且飛觴。觴行更催擘脯。此樂甚堂堂。笑寄鹿皮翁語。乃有神仙上

界欲以汝爲糧。玉饌莫深恨。底事不潛藏。呼畢卓。牽阮籍。熊羆唐。百年所得有限。不若醒而狂。熱洛河須痛飲。明日北風大作。結束上平岡。箭作餓鴟叫。袒裼獵黃麇。

又

初夏吳門舟次董樗亭錢葆翻留飲顧梁汾適至卽席分賦

往事細如雨。新水滑於羅。十年纔一會面。不飲欲如何。雪抑松江銀鮓。黃鑄洞庭盧橘。酌以小紅螺。僕素不勝酒。醉態亦傜俄。相樂也。復相泣。起婆婆。眼中之人老矣。春後落花多。休管誰家龍鳳。不若狗兒吹笛。伴取膽娘歌。小別數日耳。榴月復經過。酒間樗亭偶語。董龍事葆翻云。君家有龍猶寒宗。有鳳也。一座大笑元微之詩云。狗兒吹笛膽娘歌。

又

酬別沈鳳于卽用來韻

君住馬溪上。我住瀟湖中。平生酒顛花惱。此事那輸公。自逐鷓鴣班。鷺隊。回憶練裙檀板。甚日恰重逢。也料秋江畔。開到粉芙蓉。人世事。枝向背。絮西東。青山見人分袂。替作別時容。縱使錦袍入直。詎抵綠簑聽雨。釣艇漾晴空。他日訪君處。烟水定留儂。

又 庚申五日

又是女兒節。何處貫香膠。艾裝碧虎閃爍。與汝復相遭。回憶家鄉此際。不少癡兒駭女。綵鷁繡旗搖。蹙起一川雪。崩落半空濤。渚宮遠。澧水闊。恐難招。古來陳事何限。細數總今朝。楚國湘纍自苦。齊國辟君自樂。一笑等鴻毛。我自飲我酒。卿自讀卿騷。又 紀恨爲魏里張太君賦

越國燕鶯地。春日綺羅年。張星本連天上。朱戶隱嬾娟。誰料羅窗繡閣。吹到零風冷霧。飄散亦前緣。舊日畫眉事。追紀那能全。織錦曲。緘情淚。寄誰邊。漳河獨火小店。徹夜雨綿綿。請看古來青史。何限傷心紅粉。唱煞隔江船。且盡一杯酒。莫撥四條絃。又 元夕前董樗亭至都下樗亭昨歲射陂遇盜身被重創患不克來今之來

也詞以志喜卽用樗亭見贈原韻

月黑淮南縣。卸馱正關門。門前聲息洶洶。勢若雨傾盆。斫臂霜刀攢蠟。燎瓦狐燈掣電。駭絕洞心魂。詎復有活理。遑暇顧琴尊。重握手。驚往事。翦燈論。追思胥江酒伴。

只我與君存。三客弱來一個。謂葆飭公又幾爲異物。軟語翦難分。抹眇細相認。老眼日來昏。

又 趙北口作

忽復出門去。萬事總由天。難忘只有烟水。永不能相憐。此地燕南趙北。盡日黃塵白草。那抵舊溪山。詎料故鄉景。陡落筇輿前。鄭州鎮。大沾口。水雲寬。空明浩淼。碧篠紅蓼滿汀灣。也有魚羹蓮米。安得笛牀茶臼。水閣兩三間。臥聽吳娘櫓。帶暝唱歌還。鳳凰樓上憶吹簫。閏六月七日爲牛女作懊惱詞

翠鵲橋虛。珠匏路杳。懊儂情思無繆。奈粉河一望。靈匹難招。寄語天邊織室。雙鴛杵。纖指休拋。停梭怨。金徒箭永。青女妝遙。迢迢。常時此夜。正微褰麝幃。小駕龍輅。記衣香鬢影。髻髩。今宵。屈指經年離別。依然又。淚滴紅綃。差喜是。涼秋不遠。准備魂消。

又 和漱玉詞

蘸水垂楊。漫天絲柳。千條萬緒樓頭。正圓冰清淺。斜靠簾鉤。擬把玉容重整。纔勻面。



惘悵還休。懨懨甚。今春三月。忒似深秋。堪羞韶華縱好。奈舊情已換。往事難留。只梁間玉翦。勸我登樓。簾押朦朧未捲。青山外。不忍凝眸。無過是。瀟瀟春雨。點點離愁。

又 廣陵送孫介夫之石城

紅板橋頭。方山柵口。中流冷撥吳裝。正螢飛冰簟。蟬咽銀牀。經過邨僧施宅。青溪曲。曲似迴腸。雲水外。千年陳蹟。一片新涼。堂堂過江人物。記疇昔獅兒。亦號孫郎。奈殘山剩壘。極浦斜陽。持底寄愁天上。君須問。舊日平康。還則怕。菖蒲花老。燕子樓荒。

又 湯陰城外十里絲楊夾堤互引額以柳廊名極冷雋詞以紀之

淇水潺湲。爵臺駁逕。中原潑火年光。漸湯陰城下。陳蹟荒涼。一帶絲楊蘸馬。晴漪皺。宛轉長廊。縈人處。輕陰輕暝。審就鵝黃。思量。添些蟬韻。便一襟秋思。那讓吾鄉。記離離水驛。小小蟲娘。白苧新裁春雪。憑肩處。柳外貪涼。中年也。情隨飛絮。一樣微茫。

又 秣陵懷古

紅板橋南。錦衣倉北。金陵從古皇州。記離宮牆外。年少潛遊。忽聽九重仙樂。東風細。

聲度龍樓。依稀認寧王玉笛。賀老箏篴。悠悠南朝風景。看幾遍桃紅。白了人頭。算劉郎易老。嬴女難留。三十六宮何在。斜陽外。隱隱離愁。傷心極。後湖菱蔓。一片漁舟。

又 本意

貴主亭臺。眞妃環珮。月中鳳吹悠悠。占人間天上。兩處風流。一自彩鸞齊跨。雙攜手。玉宇瓊樓。咸陽樹。宮娥悵望。仙馭難留。回眸。人民都換。望渭水秦川。頓惹閒愁。歎重關百二。廢苑成秋。千載鮑魚孫子。沙邱路。大藥難求。迢然嘯。青天碧海。夜夜清謳。

又 題宋楚鴻倚樓詞卷

百萬呼盧。十千買醉。世間何策驅愁。惹銅仙多事。鉛淚長流。一片唐陵漢寢。遺基在。舞罷歌休。何況是。敗荷衰柳。總不宜秋。凝眸。金荃一卷。問宋玉家鄉。陸瑁湖頭。悵頻年蹤跡。只客皇州。欲覓燕昭舊事。高臺畔。野水悠悠。無聊甚。閒吟閒寫。滿幅銀鈎。

蕪揚州 蘧庵先生久客維揚詞以寄懷

蜀岡頭。記狂夫。舊日曾遊。薄倖樊川。贏得一夢青樓。紅橋上。藕絲菱蔓。當時費盡凝

眸。平陳業。烟花記。可憐逝水悠悠。老矣先生何求也。兩檝烟帆。北謁諸侯。鶴髮開元。老淚銅仙爭流。紅衣落盡西風起。怕隋堤。最不宜秋。隱隱見一江燈火。人隔揚州。

塞孤 早春寄周伯衡先生并訊倪子闇公先生從征楚幕近客梁溪

問湘天。滴黛何時歇。曾記周郎英發。坐擁油幢臨大別。軍笳奏。鄉心截。舳艫溢浦如麻。鎧甲庾樓成雪。嚴巖破磧。古樹都裂。孤蓬暫入吳。老鬢終懷闕。第二泉聲嗚咽。瀑走銀虬三四疊。衝動防身劍篋。料此際。共兒寬。看水上。粉英結。定吟殘。亂山白月。

又 宣武城外書所見

北風如。箭吼城門啓。不斷香車流水。側卷綃簾拖燕尾。巫鼓唱。蠻簫賽。烏孫別。紫臺人。黃鶴寡。青溪妹。粉襟兒畔。多少紅淚。誰唱勅勒歌。訴盡消魂事。繡鏃殘骸攢蝟。樹腹崖根潛老魅。招蜀魄。呼湘鬼。鶻已叫。洛陽城。鶴未返。遼西市。總春閨。夢中夫婿。

金浮圖 夜宿翁村時方刈稻苦雨不絕詞紀田家語

爲君訴。今年東作。滿目西疇。盡成北渚。雨翻盆。勢欲浮村去。香稻波飄。都做沈湘角。

黍。咽淚頻呼兒女。甕頭剩粒。爲客殷勤煮。話難住。茅簷點滴。短檠青燄。牀上無乾處。雨聲乍續啼聲斷。又被啼聲。翦了半村雨。搖手亟謝田翁。一曲淋鈴。不抵卿言苦。

八節長歡 乙巳元日

淑景驚催。畫梁日影。蚤漾妝臺。曛曛金母帳。漱灑玉人杯。宜春帖子簪花格。漸闌中。珠網爭開。多少屏搖翠柏。勝颭紅梅。長安車騎朝正。青絲轡。火城影裏初回。宮闕暖祥雲。嬉遊罷。誰憐江左鄒枚。休怊悵。喜吳娘。已醺春醅。屈指又。試燈挑菜。且拾遺釵。

又 元日後二日積雨新晴偕大鴻雲臣散步城南望銅官一帶翠色眷戀久之不克游南嶽而返

竟欲成村。似曾著雨。第五橋邊。盈盈臨水寺。脈脈弄晴天。溪痕入畫年光惹。醉繞城。荻市茶船。最好雛春乍霽。帽側襟偏。羣峯一笑嫣然。高低影。數行秀鬢堪憐。揚袂倚風前。凝薄恚。迎人卻又遷延。惱何事。未斜陽。客子將還。終有日。櫻鞋笏屐。細續前

綠。

卓牌兒 夏日詠閨人鬪葉子

遙窺兩重門。羣掩映、凝烟碧幌。玉字榻底。憑肩語笑。冰紋廊後。鞦韆沈想。風流小南唐。金葉子、描鸞小樣。斑几滑笏玲瓏。蠟箋纖脆輕盈。打來偏響。七紅四賞。更花鬪、京城新創。蘭閨似掌。儼楚漢情狀。贏得簾西。紅鸚鵡也。隔屏山。注望私講。笑粉裝劉項。

又 聯吟爲閨牛叟賦

牛叟兌開遺徽日。余填詞成妻恆爲解頤。偶製杏花天

三闋妻素書素帕出入懷袖中

誰填杏花天。卻滿幅、春愁無賴。鳳紙正疊。狸毫乍弄。籠鸚報道。娘來簾外。新詞訝輕狂。一半是、狂奴故態。幾徧繞柱循廊。一回暗想胡猜。蹙他蛾黛。頰容旋解。畢竟是、清新堪愛。烏絲小楷。要麝墨親灑。今日營齋。營葬訖。石竹羅裙早壞。裙帶字斜行還在。

天香 中元感舊

夾路旛竿盈城梵唄。分明元夜燈市。露溼巫簫。秋生賽鼓。頭上月輪初霽。金波瀲灩。還瀉做、萬家紅淚。天與玉容爭淡。烟飄粉裙偏麗。許多流鶯聲細。似啼猿、楚峽嘹唳。只有小墳新塚。誰修薄祭。空伴唐陵漢寢。都一樣、淒涼野田裏。黃土鴉鳴。白楊風起。

又 詠桂

靈隱門前。番禺城裏。秋花一種清絕。碧海泠泠。金風陣陣。壓下數堆黃雪。山齋湖舫。說不盡、幽芬清冽。金粟一番開謝。冰輪幾回圓缺。曾經託根瑤闕。幾曾羨、人間風月。相伴蟾孤兔冷。羿犯偷折。自與廣寒輕別。記不起、霓裳舊時闕。帶恨纔開。和愁細結。

又 龍涎香

萬斛蛟虀。千堆蜃沫。沈沈碧海今夜。湘蛾倚殿。貴主還宮。新擣都梁無價。金盆煎處。

趁月裏。桂華初謝。濃染鮫人茜淚。小襯馮夷冰帕。天風彩鸞斜跨。杜蘭香、水邊閒話。幾徧龍堂遊戲。蓬萊乾也。多少望陵愁夢。空剩得、分香雀臺瓦。散與人間。鬪他檀麝。

漢宮春

送郝元公先生之任宛陵

先生梁溪廣文視篆吾邑今陞寧國府教授

秋色佳哉。翦綠帆半幅。與雁同飛。船頭新暘似雪。津樹霏微。後堂絲竹。記頻年、屢解談圍。真豪邁。傳經劉向。肯言心事終違。此去雲山萬疊。近天門牛渚。采石螻磯。今朝臨風釀酒。往事都非。江聲千尺。推篷望、吟遍斜暉。偏相羨、敬亭山色。朝朝得上君衣。

又

送子萬弟入都次梁棠村先生送舍弟南歸原韻

此際東吳。正黃菊離披。紫蟹郭索。作裝底急。使我傷於哀樂。西堂夜話。算曾經、幾番晦朔。又來朝。河橋判袂。匆匆弟酬兄酢。昔日揚烏項橐。須臾吾已老。鳳飄鸞泊。烏衣門巷。變做荳花籬落。半生牧豕。問何年。離蔬釋屨。喜余季來春花暖。休恨一官祿。

薄。

又 贈梁蒼巖先生次先生贈子萬舍弟原韻

綠鬢勳名響上相。鞞刀風生鈴索。籌邊多暇。細馬潛游平樂。神仙富貴。總兼之笑他。飢朔。擘詞頭錦箋十樣。朝朝翠酬紅酢。前歲粵裝陸橐。正花洋珠海。樓船停泊。蠻天紅豆。爭向句中飛落。先生粵東集詩詞最工獨憐愁客老泥塗蹉跎芒屨幸當世有公知我。莫管五陵輕薄。

又 立春後一日雨雪從友人齋頭醉歸紀事

婉婉熙春。有比鄰藥玉。計日安排。昨朝新做綵勝。綠翦紅裁。幾絲酥雨。釀濃陰。膩透銅街。今朝又。騰騰微雪。輕盈撲上人釵。便擬放顛衝酒。要粉搖歌袖。玉澌吟髻。最喜銀裝世界。自佔樓臺。春泥沒屐。怪枯筇。難穩芒鞋。高樓上。雛鶯笑我。劉伶醉倒須埋。

又 春夜聽盲女彈琵琶詞



滿院梅風。攪一鉤纖月。糝上簾鬢。檀槽有人慢撚。盤瀉珍珠。瑟瑟畫鼓。似開元妙手花奴。奇哉技。飛揚感激。勝於讀史遷書。太息東籬實甫。有無窮塊壘。墨染烟驅。一聲通仙鐵笛。碧海雲孤。青衫溼透。問伊憐。旁有人無。還相調。輕雲蔽月。今宵渺渺愁余。

雨中花慢

雨中過蘧庵先生宅看紅梅

白傅堂前。裴相庭中。一株濃豔垂垂。恰拖將輕雨。鞦韆腰肢。絨索猩唇唾後。淚珠鵲舌凝時。似懨懨宿酒。慣趁朝妝。來暈春肌。嫣然一笑。悄無人處。倚欄心事誰知。亟倩茜衫籠著。絳袖盛之。帶雪三分粉綻。愁陰一朵紅欹。還須囑付。小樓鈿笛。莫漫頻吹。

燭影搖紅

丁未元夜

第一良宵。雨絲攪得愁心碎。六街鋪遍是春陰。火樹無人賽。年少俊遊不再。剩懨懨、夜情私耐。爛提簫局。慵整衾窩。有些寒在。憶昔歡娛。墮釵小拾春城背。自從圓月

打頭來。照見狂奴態。直到收燈挑菜。歎如今、事隨年退。藕花裙子。紅漆車兒。拋人十載。

又 丁巳上元夜泊河橋

露驛烟莊。一般簫鼓千門沸。銀毯綵幔四圍紅。漾徧斜橋裏。曼衍魚龍百戲。鬧蛾兒。遊童成隊。非無粉帕。亦有檀釵。暗中潛墜。回首春城。上元風景依稀記。今宵一棹。纜煙汀。懶打看燈謎。且引村醪自醉。枕漁簑。和愁早睡。迢迢往緒。歷歷前情。付之流水。

帝臺春 五月南徐懷周翼微在都門卽用其江上留別原韻

紅瘦成碧。鮒魚堆網白。悵殺年光。回首春前。旗亭餞客。公路浦君爲遠別。呂蒙城。我無相識。記曹家園上看花。疏狂那夕。余別翼微於江上曹頌嘉園 高齒屐。黃金戟。行不得。愁何益。歎命不如人。雄姿俊侶。此日一齊拋擲。試詠洛生誰解作。擬邀麴部何從索。悶坐憶周郎。聽江聲千尺。

暗香 柬竹逸訊蔭綠軒前梅花消息

曉寒正側。悵今春天氣。連朝如墨。郭外小橋。幾樹紅香受寒勒。況是風前水畔。有多少。明妝傾國。也伴著、細雨輕烟。零亂翠簾隙。悽寂。正小極。似十五玉娥。舞困無力。僧樓伎席。記得常年暗香積。誰料誤他花信。偏則惹、粉腮輕溼。問甚日、含笑覷、素英狼籍。

又 梔子花下有感

夜窗全黑。被一株梔子。凝來通白。拂水著烟。輕裊風枝送香雪。三十年前往事。曾記在、康崇坊宅。見小玉、羅袂亭亭。含笑趁涼摘。今夕。重露滴。總一任好花。滿院狼籍。暗巡花側。不見裙痕并鞋迹。提起同心兩字。人正隔、銀牆千尺。花在手、誰戴也。碎按花擲。

又 吳靜安姑丈臨風閣上賞梅

玉堂人物。況階前瓊樹。一枝先發。近手花欹。小倚晴樓汎香雪。料理茶鐺棋局。更乍

破蛟冰芳冽。恰糝入、片片繁英。和取索郎啜。幽絕。恁時節。又脆管嬌絲。隔垣低揭。紅絨半拆。脈脈相看倍親切。若待盈枝爛熳。怕誤了、人生作達。薄醉也。壓帽是一堆粉月。

八聲甘州 月夜守風江店

對清光、一碧倚江城。獨立怨飄蓬。最惱人懷抱。危檣匝地。殘堞當空。遙想故園妝閣。擁袖側金蟲。歎息蘂砧去。烟水濛濛。一派銀濤雪浪。瀉青銅鏡底。白雁聲中。料嫦娥清冷。此際與人同。且消停三更茅店。任隔垣紫馬夜嘶風。消魂也。江愁衛玠。月想王恭。

又 南耕齋中食鱒魚作

汝魚乎。汝旣弄潮來。何如趁潮歸。卻波濤堆裏。橙蠶香處。自許輕肥。千古斷磯黃鶴。不了是和非。貪聽漁翁笛。誤觸危機。謝汝崎嶇萬里。把浪花舞破。來慰晨饑。問途經西塞。果否颺旌旗。幸團團故園兄弟。況小窗雨後漾晴暉。浮生樂。無如斫鱸安用。

呼豨。

又 寄宛陵沈方鄴兼懷梅耦長

記西風握手秣陵隈。苦語勸君歸。歎尉佗城下，小姑山口，風景全非。方鄴久客西江，東粵何事年年作客。牢落寸心違。且與王章婦，對泣牛衣。謝爾吾言竟用，果幡然歸。葺雲壑烟扉。更梅郎健在，酬和未應稀。只伶仃畫溪野老，況今年，烽火雁難飛。關情甚，敬亭栗罈，石曰魚肥。

又 客有言西江近事者感而賦此

說西江，近事最消魂。啼斷竹林猿。歎灌嬰城下，章江門外，玉碎珠殘。爭擁紅妝北去，何日遂生還。寂寞詞人句，南浦西山。誰向長生宮殿，對君王試鼓，別鶴離鸞。怕未終此曲，先已慘天顏。只小姑端然未去，伴彭郎，烟水月明間。終古是，銀濤雪浪，霧鬢風鬟。

又 丙辰夏月蘧庵先生游廣陵諸同人以先生昨歲七秩補作詩畫奉贈初

秋歸里持以示余遂於卷尾亦題一章

恰秋江、嫋嫋碧於烟。先生峭帆歸，有錦罽、麝燈芙蓉養紙，豈蔻緘題。更愛寫生妙手，烘染自蛾眉。花月揚州路，猶未全非。曾唱千秋歲引，向春燈、挂處滿汎玻瓈。羨銅仙鶴髮，今古似公稀。偶重經玉人橋上，惹羣真、爭譜鷓鴣詞。閒披賞、蓴絲正熟，菰米剛肥。

夏初臨 本意

麥浪按晴。槐陰攔雨。小樓無限思量。九十韶華，誰憐歸去堂堂。屏山做盡瀟湘。漸凌波、玉翦飛忙。此時天氣，今年情緒，大抵佺偲。天涯羈旅，煞甚淒涼。慣推中酒，怕說思鄉。江東故苑，正逢櫻筍時光。何日吳裝。傍柳綿、小泊斜陽。倚蟲娘，一春愁病，說與端詳。

又 本意 癸丑三月十九日用明楊孟徵韻

中酒心情，拆綿時節，鶯騰剛送春歸。一畝池塘，綠陰濃觸簾衣。柳花攪亂晴暉，更畫

梁、玉翦交飛。販茶船重挑笏人忙。山市成圍。驀然卻想三十年前。銅駝恨積金谷人稀。劃殘竹粉。舊愁寫響闌西。惆悵移時。鎮無聊。搯損薔薇。許誰知。細柳新蒲。都付鶻啼。

又 杜鵑花同雲臣賦

昨夜枝頭。問誰啼血。灑來併入花叢。縱使春歸。也須偷注殷紅。爲伊細數行蹤。記鄉關、棧閣千重。曾隨花蕊。葭萌驛前。一路飄蓬。淡烟粉水。斜月綿州。華陽士女。蜀國絲桐。使爲花鳥。魂猶戀此安窮。欲拜低頭。最憐他。姓氏相同。莫愁濃。溪山此間。不異新豐。杜鵑爲川中花而吾邑亦有蜀山故云

又 雨泊泮練

柳盡籠橋。罨多界浦。片帆閃碎波光。鷄浪堆中。笛聲散入微茫。落花時候鳴榔。笑泮來、雪練何長。沙禽野鴨。啼晴喚陰。飛觸船窗。颯焉颯作。倏爾溪昏。盤渦滯汨。紫鳳騰驤。濤奔萬馬。依稀屋瓦昆陽。且泊輕航。貫香醪。暫澣愁腸。漸昏黃。烟潭水樓。盡點

銀缸。

又 立夏日雨中作

乍過花時。纔逢笏候。碧窗春去無蹤。似別情人。河橋愁盼征篷。打梅摘豆俱慵。正漫天。絲雨濛濛。夢迴酒醒。巡簷倚闌。離緒重重。一場惆悵。半榻薺騰。暫攜溪老。閒訊漁翁。落花天氣。從君脫帽江東。綠滿長空。笑幾番。漢苑秦宮。暗簾櫳。玫瑰成陰。漸逗薰風。

夢芙蓉 寒月

倍覺嫦娥寡。奈金波早凍。素光空瀉。此時帝里。六館并三瓦。擁爐圍粉帕。疇憐夜景如畫。讓碧空中。只一丸獨自。冷向鳳樓挂。除是賀蘭山下。老將營門。看得分明也。清輝縱好。此外誰知者。長宵更鼓打。兔華莫也生怕。且待新春。點紅燈萬盞。照著闌蛾耍。

月邊嬌 己未長安元夕



元夜年時記水榭狂游。驛橋閒趁。梅梢月上。樓籬燈挂。媚蝶鬧蛾成陣。春泥鬆軟。鏤十里鳳城鞋印。小門殘火。見多少澹妝輕粉。如今獨客京華。料還怪我歸期難准。金錢浪擲。紫姑羞卜。長自盼人書信。晚寒偏嫩。悄地向冰蟾低問。清輝何苦照一宵潘鬢。

醉蓬萊 積雪爲橋和雲臣作

借連宵積雪。戲作銀橋。橫眠街路。卻也玲瓏。現雕闌繡柱。駕此何爲。從來官道。有罌塘灑瀝。笑倒春城。往來車馬。紛紜士女。追想當年。秦皇漢帝。鞭石爲梁。霓旌西去。萬里鼇嶼。歎紅顏難駐。老子神通。偶然遊戲。學填河鵲羽。今夜橋成。着余矯首。共安期語。

又 感遇二首

向斜陽紅處。長歌斫地。忽然悲嘯。纔爛樵柯。又塵生瑤島。一片江山。千村蘆荻。剩幾人屠釣。擬抱冰絃。夜深彈向黃陵古廟。且約酒徒。閒過伎館。擲帽狂呼。繞牀大叫。

坐上何人識袁家彥道。歷歷神州。茫茫澗宇。問誰爲劉表。感慨登臨。月明烏鵲南枝絕少。

把數行青史。讀向牀頭。仰天孤嘯。可惜桃花。又落來瓊島。誰是誰非。磻溪巖瀨。千古同垂釣。准放狂顛。行歌亂家。醉眠叢廟。曠野蒼茫。曉山重疊。紅日將生。海天雞叫。殘夢驚回。悵華胥古道。一片旌旗。三更鼓角。怕吹來江表。且向壚邊。問他春甕。酒存多少。

又 碧山莊看杜鵑秦以新太翁留飲花下有懷對巖檢討

折一枝笑問。也把鵑呼。爾何愁苦。綠暗園林。點深紅千樹。但到花間。休論身外。有酒何妨住。況是今朝。絃管鶯啼。池亭燕乳。停杯忽憶。故人千里。鄂渚牙幢。武昌樓櫓。萬一思鄉。寫斷腸佳句。那得憑闌。將花做鳥。向楚天低處。黃鶴樓前。殷勤爲我。叫他歸去。

又 虎邱月夜見有貴官呵止游人者戲填此詞

正歌場匝地。舞榭臨風。碧天如畫。官自何來。拖麟衫。艾綬。從事喧歷。郎君貴倨。禁遊童趨走。千載吳山。一場秋興。月儼花憇。黃鶴飛仙。玉清謫吏。偶趁風光。閒來林藪。見此塵容。展軒渠笑口。七貴貂蟬。五湖烟水。問誰堪長久。且掣青萍。化爲鐵笛。作狂龍吼。

又 戊午人日爲曹曹溪廣文壽

喜新年七日。蕙雪微融。梅風纔轉。百福釵旛。做蓬萊家宴。碧柰花前。絳桃樹底。簇舞衫歌扇。節候黏雞。門風繡虎。六街傳徧。回憶生平。當時講舍。滬濱雲遮。泖湖天遠。一笑抽簪。趁閒身猶健。蘭茁階墀。鯉趨庭砌。縱封侯誰換。勝裏春人。玉缸遙指。向先生勸。

玉簾涼 夏景

杉驛烟鄉。正屏掩楚峯。簾滑吳江。得風篁欲笑。就食烏相忘。鱸魚美似北固。四十九。入手先香。晚飯罷。覓閒僧話暑。老樹賒涼。吳裝。白蓮著粉。紅藕放花。野鴨暗觸船。

窗風燈零亂極。漸暝色微茫。波上已逗素月。問賣酒、甚處陽昌。吾醉矣。擬夜游、瓊島雲廂。

又 己未長安七夕

太液荷香。悵良夜今秋。仍臥他鄉。輸他天上景。又填鵲成梁。一從上苑入直。金魚珮。誰放疏狂。瓜果讌。奈庾樓高處。風露偏涼。秋光。舊家節物。往日心情。贏得無限思量。一鉤眉樣月。記曾照幽窗。粉雲此夜千里。盼不到、小院疏廊。銀漢底。料有人、和淚凝妝。

黃鸝遶碧樹 冬夜觀劇感舊

燠館風簾軟。紅槽榨酒。冬宵溫煦。箏琶狎讌。是延秋雜爨。華清全部。一聲入破。乍催醒。庭花無數。驀提起。年少疏狂蹤跡。許多情緒。記得江南燕乳。杏花村。綠楊纔絮。恁時節。慣量珠買笑。釀錦酬舞。落拓半生好夢。風和雨。都吹去。可憐白髮重經。酒旗戲鼓。

慶清朝慢 憺園卽景園係玉峯徐篔庵太史新築

正復淡漣。居然蕭遠。此中位置殊難。主人略施煙墨。已就林巒。幾尺紅泥牆子。被風吹亂。月同彎。花深處。玲瓏金粉。一半纔乾。碧一隊。黃一隊。皴染得亭榭。在水雲間。朱欄綠莎廳好。映帶滌浚。盡日暖波花鴨。參差睡破簾紋閒。登樓望。斜陽士女。又滿春山。

西子妝慢 四月朔日同吳天篆過通真觀王鍊師道院看牡丹卽用天篆昨

歲雨中看花韻

紫府玲瓏。丹房窈窕。長就枝頭嬌嬈。看花人逐蝶蜂忙。隔花試尋遊侶。醮壇側去。露幾朵。檀痕淺注。羨盈盈。比人間金谷。更饒幽趣。花如語。低撼金鈴。小向暮春訴。紅顏最怕落花風。乞鍊師。爲花重鑄。師還念取。劉郎鬢。已經如許。待來春。元都觀又成前度。

長亭怨慢 春雨

小樓外、絲絲縷縷也似樓頭。個儂情緒。攪幙縈簾，惹人愁恨甚時住。夜香籠袖。妝纔罷、天還暮。擬細炙鵝笙。笙亦爲春寒。鳳嘴偏努。小屏風幾疊。瞥見重重南浦。因思江上。算今夜、有人羈旅。縱有日、賒到春晴。晴不得、腮邊紅雨。怎能勾、梨花門掩。雙雙笑語。

又 春晴和京少回用前韻

正帶夢、流鶯碎語。似訴簾間。已收宿雨。此日牆頭。花枝定是招行旅。風光何處。總在斜橋極浦。看纔過收燈。卻又是林邊。春筍將努。倚簾曾暗許。錦鱗來太遲暮。連朝春困。渾欲倩、東風扶住。便從此、炙杏烘桃。怕難熨、兩眉愁緒。憑闌久、斜陽紅斂。漸沈霞縷。

又 送曹二隱還郡

記昨日、西風吹汝。送到荆南。斜橋極浦。船泊家門。水窗開在晚涼處。與君兄弟。連夜作、銷魂語。語罷起而歌。一曲小秦王。爲回鶻舞。歎人生易散。記囑分攜休遽。如何

人說竟私買小舟歸去。吟不盡故國秋光。聽不得天涯戰鼓。怕來夕。郡樓高望。閒愁無數。

又 夏日吳門道中寄內

記睡醒。紗巾輕墮。又促移牀。樹陰中臥。院悄人稀。舉頭閒數碧星顆。井華絡簾。漸月映中門鎖。喚綠茗盈盈。恰一縷紅生。廊火幾朵。是纔開茉莉。小傍苧衫斜。抽書賭背。總排定。夜分幽課。弄不了。菱粉菱絲。寫難盡。偷聲入破。惹萬種思量。憑人煙曉風舸。

又 途次潤州水澀舟膠東何雍南

自買符。霜篷風舸。准辦乘潮。秋衾夢妥。詎信連朝。水窗還泊蒜山左。愁多於水。水卻似真珠顆。縱使似真珠。儘也有啼珠。添上些個。故人江閣望。城外層層煙鎖。千帆載恨。誰料是。此間有我。知甚日。丁卯橋西。隨江鳥。片時飛過。枉費盡。千搗柁鼓。一行檣火。

瑤臺第一層 秦園月夜聽泉聲用藝香詞韻

月影水痕都化碧。如游不夜城。恰驚飛澗。陡然劈峽。濺沫難平。陰森鱗鬣。還似玉龍、怒吼峻嶒。真幽絕。添幾聲鐵笛。一點茅亭。憑陵。狂歌一曲。夜深難得此空青。嫦娥未睡。馮夷欲舞。宮殿俱晴。乘風吾欲去。但神仙、何必東瀛。洗銀觥。笑醉看瀑布。認作霜藤。

黃河清慢 清江浦渡黃河

蒼茫河聲衝古驛。黃沙濁浪同色。斜日誰來問渡。江南狂客。醉倚柁樓吹笛。初入破、魚龍悲咽。古今多少英豪。最堪笑、南奔袁術。幾時瓠子功成。歎薪楫空勞。宣房難塞。長嘯憂時。自把寶刀閒拍。且任短篷掀舞。不須怨、中原蕭瑟。城名下相。極望處、暮煙殘荻。

倦尋芳 早春偶過農部伯父廢園感賦

敗屋東頭。偶然行散。十分情重。滿地苔錢。雨榭煙廊。都空。蘸水燕雛晴故掠。蔭街絲



柳風偏弄。傷情處是舊家年少。登山一慟。記當日。孝標姊妹。僧綽兒郎。嬉遊曾共。多少春衫。斜著金鞭閒控。一自攀髯人去。早江南。鶯燕成何用。換此生。繡戶珠簾。付之一夢。

又 竹逸堂紫牡丹一樹。戊申年曾見之。纔一二朵耳。今年花放。竹逸復邀同人過賞。而濃香紫豔已滿畫闌矣。感而賦之。

畫堂左側繡檻東偏。朵朵輕俊。歐碧姚黃。總是讓他風韻。紫府家鄉原不遠。紅樓伴侶休相混。記當時。恰一枝初顫。便曾廝認。詎料是六年一別。今日人歸。倍添春暈。滿院濃香砌。就閒愁成陣。雨後喜看嬌態足。朝來怕見殘妝褪。這情懷。沈醉醒時。細將花問。

月下笛 本意

今夕何年。滿天皓魄。一輪圓碧。露橋水驛。誰向風前噴笛。趁關山河漢夜涼。故將鳳竹。悽倦客。正寒潭峭岸。離鄉年少。憑江船側。當初曾記。趁寒食梨花。醉平陽宅。念

奴瑤管。碎把畫梁塵劈。到如今、漂流路岐。西風落葉無相識。月生煙。生怕鐵龍歸海。何處覓。

孤鸞 賦得石亭梅花落如雪

昨來時節。記花倚晴闌。牽衣話別。生怕重逢。未必有花堪折。如今小樓仍上。果隔林、盡情飄瞥。亂捲一天晴絮。映水半明滅。正春陰暗把碧空蹀。似愁覩粉娥。臨去淒咽。誰唱陽關曲。仗數聲啼鴉。日斜游蹤欲散。倩春衫、蘸些香雪。圖得盈盈歸晚。有惜花人說。

三部樂 題王瑁湖新詩卷首次田翳淵韻

滿幅清新。好譜上香絃。恨無纖手。珊瑚七尺。石尉筵前儘有憶。天上幾度花開。悔玉清輕別。鳳儕鸞偶。短拍長謠。迸碎蛟盤珠走。御河連宵秋雨。換十畝殘荷。一灣疏柳。潛來擲笛宮牆。月明感舊。墨蹟離奇似斗。半倒薤。半成急就。餘興淋漓。拚浣徧、舞巾歌袖。

長亭怨 送徐鄴伯還西泠倚玉田詞韻同桐初京少巖山次山賦

有牆外紫丁香樹。簌影鉤簾。牽留數數。可記年時。鳳城燈市。夜遊否。黃金臺古。招手喚。燕昭共語。霎地秋來。便去也。匆匆如許。雖去。暫盟鷗狎鷺。奈肝膽酒邊還露。烹羔酌苦。歸及見。江潮堆絮。看萬陣。犀弩張時。正百丈。銀瀧喧處。意氣儘昂藏。肯只鳴榔漁浦。

應天長 紅友約余輩重游石亭以陰雨辭之不允復偕雲臣竹逸放庵上人

飲高士吳其茨墓下落梅盈把游情甚適詞以紀之

寺橋閣雨。山館弄陰。重游向時陂澤。聯袂行歌。依舊名僧與詞客。花妨帽。泥印屐。便溼了。春衫奚惜。疏圃外。映水一枝。舊曾相識。對景且疏狂。莫負紅餅。漱瀼傾春碧。不見樽前。無數飢鴉作寒食。庾家墓。王氏宅。具茨就宅爲墓故云。糝一片。落英堆積。怕來歲。載酒城南。又是陳蹟。

揚州慢 送蘧庵先生之廣陵并示宗定九孫無言汪蛟門舟次諸子

十里珠簾半城畫艇。百年花月維揚。有君家丞相。梅嶺舊祠堂。每年到、清明賽社。傾  
城士女。愁弄絲簧。只無情堤柳。舞腰還鬪宮妝。扁舟上冢。聽鄰船、重話興亡。奈石  
馬嘶風。銀蠶弔月。往蹟全荒。我亦當年薄倖。曾吹過、一帽紅香。問桃花認否。風前前  
度劉郎。

珍珠簾 詠雪珠

瑤妃爭取明珠揀。誤觸金盤傾瀉。萬顆玉勻圓。向小墀拋打。浙浙泠泠敲不了。似閨  
苑。梨花都謝。寒乍迸零釵碎珮。跳徧鴛瓦。漸覺暗入瓊肌。做紅酥細粟。不禁春夜  
鄰女。慣嬌憨。戲掬來盈把。萬斛鮫啼。盛不定。只逗入玉娥簾下。輕灑。怕一色難尋。粉  
裙綃杖。

又 題宋牧仲楓香詞次曹實庵韻

當時紅杏尙書句。宋玉今朝風賦。螢火柳綿詞。鬪陽阿激楚。牧仲詩。螢詠絮。二詞尤  
爲絕調。五色蠻箋螺子墨。渲染殼微雲。疏雨淒苦。滿歌坊粉壁。舞巾紈素。一曲減

字偷聲。聽小屏風後。玉簫潛度。低囀隔林鶯。碎一庭花露。鷓鴣又弄關山調。似萬馬。憑秋而怒。相訴。我中年以後。冰弦怕鼓。

月華清

讀芙蓉齋集有懷宗子梅岑并憶廣陵舊游

漠漠閒愁。濛濛往事。勝似柳絲盈把。記解春衣。曾宿揚州城下。粉牆畔。謝女紅衫。菱塘上。蕭郎白馬。月夜。正游船爭取。綠紗窗挂。如今光景難尋。似晴絲偏脆。水烟終化。碧浪朱欄。愁殺隔江如畫。將半帙。南國香詞。做一夕。西窗閒話。吟寫。被淚痕占滿。銀箋桃帕。

又 十三夜舟泊望亭對月有作

寂歷烟汀。微茫水驛。尙隔吳山半舍。懶慢長年。何不使船如馬。搗香蠶。紅糯微斟。靠錦樹。綠帆初卸。吟寫聽吳娘水調。舊愁重惹。惆悵歡娛難借。似漂泊江天。客舟閒話。冰彩無情。偏向愁邊亂瀉。想連天。楓葉蘆花。問何處。蟬鈿羅帕。今夜。料王珣宅畔。風光如畫。

又 爲蔣元膚催妝

犀盒偷春。鵝笙沸夜。曲欄花睡初醒。苟鴨微紅。不許晚寒猶賸。看門外、絳燭雙籠。正樓上、麝山低凭。紅定算全然不似。舊時三徑。寄語酒徒蔣濟。總北釀清芬。休教酩酊。漸覺帝城玉漏。隔花催暝。怪何處、北阮疏狂。約來朝、西山尋勝。誰應只推言且待。雪殘冰淨。時京少約日內游西山故戲及之

又 病榻閒情爲閻牛叟賦

牛叟兌閣遺徵曰妻一生鮮惰容雖疾疾亦淡

妝讀史余調之提學未至女秀才砒砒何爲每憇耳天閣日課童奴蕩濯余以丈夫當掃除天下爲言妻笑曰請從一室始

畫尺吟瓢。笛牀茗椀。屏當娟楚如昨。記得前秋。滿院西風斜削。綻三朶、五朶疏花。映一層、兩層簾閣。牆角課獠奴。櫻帚桐陰閒縛。慣翦殘燈讀史。惹清狂夫婿。聊蕭相謔。今古干卿底事。祇須燒卻。便塵世小住爲佳。奈心情年來偏惡。黃鶴竟騎他奔入月中偷藥。

玉蝴蝶 山游席上書所見

十載鬢絲禪板東風又起。吹到閒情。誰遣枇杷花下。驀遇卿卿。綠水曉、滿眶嬌瀉。垂楊軟、一捻身輕。鬪傾城。金九綠幘。分外盈盈。回程。蘭舟同上。如規月白。似篔簹波平。羞暈微紅。半腮香玉。臉潮生。燕聲鬆、解調閩語。鶯喉脆、宛弄秦箏。酒微醒。小樓今夜。春夢難成。

垂楊 上巳萬柳堂雨中卽事用竹山詞韻

花間微雨。響蘇蘇幾點。乍聽還小。徑冷泥香。鳳城佳節。游蹤悄。記曾騎馬橫門道。有夾路、紅深翠窈。甚前番、社鼓錫簫。到今來偏少。拚把春光溼了。枉青粉牆西。酒旗斜裊。撲蝶湔裙。夢華遺事。何人曉。落紅旋被東風掃。掃不去、閒愁纏繞。縱然晴也。奈濃春漸老。

無悶 益都馮相國夫子飲我以太和春賦此奉謝

履道坊西。獨樂園中。朝散沙堤似水。擁絳帳生徒。青州從事。喚取鷓鴣杓到。付侍立。清清小童洗。咬春說餅。滿船藥玉。幾甌冰蟻。風味倩誰擬。似梅瘦春湖。茶香官焙。

儘濡甲。邨筒遜伊清綺。麴部休嘲戶小也。浮白卷波如渴驥。看瀉向粉盞霜蕤。一色白泱泱地。

閨怨無悶 春日見城上游女甚盛戲作此詞

綺陌芊眠。上日妖冶。彌望玉樓金埒。正挑菜年光。湔裙時節。陣陣內家車子。漾綃幃。吹亂千堆雪。無人處。悄把春纖小揭。都無分別。絡繹碾香塵。鋪玉席。總向子城斜處。女牆鬢裏。惹人憐惜。此際春心愁絕。愁九十。春光如過隙。那堪輕暝。輕寒朝來想作寒食。

又 醉後排悶作

長此安窮。定復不急。世事紛紛虎鼠。笑狐盡帶鈴。荷偏成柱。終日屋梁仰面。便著書。萬卷誰憐汝。休自喜。當日馬中赤兔。人中呂布。無補莫相疑。徒自苦。今日一錢不值。李蔡下中。曾何足數。且作槃中快舞。更單絃。岑牟禰生鼓。戲問君得哀梨。定當蒸食與否。



燕山亭 和韻送魏禹平同京少叢山次山賦

爲送人行。馬上遠山。也把晴蛾淡掃。惜別情。中酒心期。自己殊難分曉。一路相隨。總輸與、道旁春草。來早。怕夢裏花多。意中人少。計日迤邐吳關。和燕子楊花。一羣齊到。翠篷推處。白舫搖時。兩岸露桃紅小。半幅蒲帆。渾疑是、掠波沙鳥。尤好。京口驛。鯨魚上了。

催雪 秋日過城南顯親寺

潭北新秋。城南古寺。亂壑喧豗激瀨。愛虎落三間。林際紺殿銀牆。繡經幡。風定天花灑。時來樵語。遙黏僧磬。暗添幽籟。門外。愁如海。有野蔓荒榛。叢祠破冢。閃石竹羅裙。多年色壞。砌就蒼涼景色。到路黑。燈青啼百怪。只靜侶。掩住禪關。日看國山螺黛。

大有 春閨和片玉詞

亞字牆邊。棟花風大。小樓中。簾捲人瘦。滿園林。參差綠草誰鬪。屏山水鳥背人數也。

何曾愛單嫌偶。惱恨柳色空濛。和烟鎖畫欄口。燈前懺。花底咒。小鴨戀紅衾。清清坐守。好夢瞢騰。愁到醒時依舊。自謝了丁香後。受無限。蜂僂蝶儂。十年事。凝想如無。閒思恰有。

新雁過妝樓 虎邱感舊

紺殿雕軒。千人石、夜深曾記同遊。一天皓月。和烟卷住長洲。誰奏定風波一曲。玉簪輕卸。節秦謳。蘸霜毫。題名偏向青粉牆頭。重來莓苔蝕遍。更風吹雨打。往事都休。迴廊圻盡。數行難覓銀鈎。池邊重窺絕壑。只老樹斜眠。壓酒樓。迴船好。趁笛聲未緊。歸伴沙鷗。

又 再詠糊窗

幾扇疏櫺。玲瓏處。檀箋粉繭糊成。夜來微雪。掩映更覺晶瑩。做就貯愁函。夢地生疏。踏月拗花情。憑遮藏。偏被嚴飈。送到殘更。生平蠶鹽并白。記欣然同聽。敗紙齊鳴。今番煨館。無奈一倍淒清。無聊拈毫弄墨。倩小字斜行。奉蛭螿。閒題詠。把雪窗澆徧。

何用通明。

又 圍爐 金陵臬署作

昨夢偷歸。闌干外。雪花吹滿簾衣。門庭蕭寂。綠窗景未全非。滑柑乍紅。茶半熟。山妻繞膝小牢之。謂闌甥劇喧闐。競詢狂客。江畔歸期。檻前小梅映水。被誰彈香粉。淺著橫枝。佛燈。鼙鼓。想應歲序旋移。景陽鐘聲暗動。又官燭更深欲滅時。遽然醒。笑紅爐縱好。卻不成圍。

丁香結

詠竹菇

竹菇竹間覃也。小如錢。色如胭脂。雨後叢生。離離可愛。惟

陽羨山中有之。他處所無。

碎錦成斑。餘雪弄點。小圓胭脂隱隱。正菱篔搖粉。桃花靨。偷把烟梢扶襯。竹郎門第好。姑年小。卯酒添暈。瀟湘二女去遠。積下啼紅盈寸。淹潤。被雨後鶯啼。喚出滿林芳嫩。櫻筍年光。餽簫節候。做他輕俊。小巷筠籃提入。帶笑爭相認。似開元錢樣。一縷嬌痕巧印。

瑣窗寒 昔年樓上

此地當年。蕭娘妝閣。綠窗幽靚。傷春情思。正日暖人微病。撚花枝、悄近羅衣。眉峯送語。烟難定。掩屏風六幅。看他縷額。安黃端正。那更。人別後。冷落舊妝樓。溫家玉鏡。無端又上。銀蒜零星還剩。只從前、簫局桃笙。看來不似今朝景。便化爲、玉翦重來。還認紅香徑。

又 初春和雲臣韻

雪灑紅窗。雨敲碧瓦。曉寒偏緊。鶯簧生澀。不似舊時淹潤。記前春、城南水邊。內家車子。綃成陣。只新年節候。連陰做暝。誤他花信。點盡。安仁鬢。拚滿幅春詞。秦灰同燼。縱然墨淡。還有啼紅堪認。況如今、苔花小箋。誓成烏鰂猶隱隱。最難忘、梅月朦朧。不耐施脂粉。

又 乙卯元夕柬雲臣竹逸竹虛

今歲元宵。禁晴架雨。裝陰做靄。嫦娥何處。盼斷一天冰彩。徧春城、街泥未消。薰花梅

夢徒瀟灑。算六街寂靜。火蛾罷鬧。紫姑停賽。窗外閒愁大。笑冷淡光陰。歲華虛賣。悵悵坊曲。殘雪懨懨還在。記當初。小市夜橋。月明笑語春如海。歎如今。只有東風。乍小吹燈帶。

又 本意閨情

蠻字牆兒。冰紋榻子。謝娘三徑。烏龍怕睡。吠煞翠梧桐影。蔚藍天。一派雁程。年年耽誤。蕭關信。又棲鴉鬧過。誰家玉笛。叫西樓暝。愁聽商飆勁。便黑了一燈。喚人誰應。銀鴨嬌愁。還泥薰籠。偎並卸蜜簪。劃月闌干。峭寒陡覺。秋夜丙。伴黃花。且熨紅綿。冬釘應倍冷。

又 雪金陵作

瑟瑟泠泠。漫天攪地。灑窗淋戶。旅情難妥。理煞也無頭緒。拚和他。瓊瑤亂拋。風前都學梨花舞。算候門戚里。駝酥獸炭。幾家笑語。知否。此間路。是金粉關河。最消魂處。幾多舊事。總被六花飄去。想外邊。白徧長干。依然玉做南朝樹。惹江船。商婦琵琶。水

上訴愁苦。

金菊對芙蓉 禹州使院作

雍氏亭空。大駟山老。一鞭裊盡斜暉。正荒城苔繡。古驛花欹。行人說是王孫第。悵金牀。玉几都非。巡簷背手。誰人憐我。情緒如絲。此意枕簟應知。共殘釭青穗。伴我題詩。歎星移物換。種種淒其。不如且向東風外。好悲歌、聶政墳西。明當竟去。頻斟濁酒。細拂橫碑。禹州城東門外三里有聶政墓

又 姜學在自宛陵掃墓歸停舟過訪卽送其返吳門

語響潭烟。櫓鳴溪翠。他鄉上冢人歸。恰停橈杆叩。竹下雙扉。相逢暗惹平生恨。西州路、事與心違。羊曇已老。數行情淚。彈上君衣。追感尊公如農先生也。此去帆影霏霏。正茂苑蓮紅。笠澤魚肥。歎吳中今歲。刈穫全稀。賃春薄俗防人面。梁木萎、門戶凋微。憐君歸去。乳魚軒下。悵煞斜暉。

又 送楊亭玉學博之任江浦和梁棠村先生

棠邑名城秣陵劇縣。鱣堂坐對晴秋。正人家夾岸雲物常樓。扶風絳帳生徒盛。環講舍。錦瑟紅篝。圖書四部。才華六代。冠冕南州。罨畫暫爾淹留。恰曲唱樽前。纜繫沙頭。盼離亭霜葉。黃重丹稠。之官一水攜家使。喜烟江乍穩陽侯。別來錦字。好尋雙鯉。頻泝中流。

又

訪單縣琴臺。邑爲宓子賤。巫馬期舊治臺。有二賢祠。

古樹雲平。荒臺湍激。兩賢留下祠堂。見蛛絲網院。馬莧圍牆。承塵畫壁昏於夢。千年事。陳蹟蒼涼。江南游子。無聊側帽。有恨循廊。迤邐漸下牛羊。響落木西風。颯沓層岡。悵琴聲未杳。蘋藻誰將。擬尋北地韓陵石。呼來語。相伴他鄉。那堪斷碣。摩挲已徧。一笑斜陽。

又

九日牧仲招同山蔚振衣樓登高填詞惜別卽次來韻奉酬

楚客有言。悲哉氣也。君家原不宜秋。況帆停江上。人倚樓頭。菊英亦管人離別。賽柳綿。打塊成毬。那堪筵畔。輕敲檀板。緩節秦謳。歎昔幕府風流。羨落帽中原。戲馬高

邱更一時參佐千載英游。吾衰詎有風雲想。算不如巖岫清幽。從茲歸去。筆牀茶竈。到處淹留。

又 次前韻酬別山蔚

鬱鬱中原蕭蕭老鬢。不如歸弄晴秋。記數間茅屋。罨畫東頭。每當月吐長溪口。水明夜。雪鏡冰毬。幾村風葉。半灣烟渚。牧唱樵謳。好趁淄淄寒流。去窈窕崎嶇。歷壑經邱。只離情還戀。梁苑朋游。他鄉老輩如君少。新詩句。兀稟空幽。一樽尙暖。片帆聊卸。暫爲君留。

又 舟行遇大風仍用前韻

雪浪翻吟。布帆鳴叫。西風削碎晴秋。看綠平楚尾。翠入吳頭。盤渦急洑孤光陷。鑄一點。陽谷金毬。柁樓長嘯。汜人侑舞。海若供謳。十載萍梗飄流。只賃廡皋橋。賣餅安邱。喜今朝尻馬。彷彿天游。水雲混混黏無極。真欲犯。碧落空幽。只憐今夜。瓊宮高處。清冷難留。



又 舟中有示仍用前韻

泛泛清娛。迢迢樊素。相隨單舸高秋。學水雲一色。浮渲梳頭。包山此去。千峯橋。高低  
綴。耀日霜毳。三更水面。吳娘櫓響。一片清謳。聊復映月乘流。休袖倚滄江。回望商  
邱。認烟篷雨翳。故國清游。簾紋雙穩。鷓鴣睡。君莫管。夜色幽幽。祇愁商婦。隔船低唱。  
玉樹鸕留。

又 過侯敷文村居留贈仍用前韻

紫豔牽裾。紅香撲帽。手編花鳥陽秋。有佳兒膝下。少婦樓頭。紅欄粉壁。吳船樣。明櫺  
外。蜂蝶成毳。有時月上。前墟送到。牧笛樵謳。一任金犢如流。笑昔日金張。一半荒  
邱。且芒鞋野服。散誕優游。栽花曬藥。攤書外。無剝啄。人境雙幽。但逢酒熟。恰當花放。  
我到還留。

又 舟次漸近江南仍用前韻

或把琴書。或攜粉鏡。平分畫舫清秋。過女兒浦口。新婦磯頭。秋光澄湛。明於雪。映水

上、茜帳銀毬。敲針稚子，臨風把釣，學唱吳謳。依舊滾滾江流，還半下吳門，半繞巴邱。只江東麋鹿，幾度來游。遲歸沙鳥，應相笑，他鄉景，有甚清幽。黃花開過，紫螿賣過，誰把君留。

又 南歸前一日侯氏堂中觀演西廂記七年前余初至梁園仲衡爲我張筵

合樂卽此地也撫今追昔不禁人琴之感詞以寄懷兼呈叔岱仍用前韻

繡轂鈿車，酒旗戲鼓，月明初浸。延秋喚教坊全部，雜爨高頭。一聲南內消魂曲，風乍定，燈裊紅毬。幾層簾幙，一羣鶯燕，妙舞嬌謳。可惜四節如流。背畫檻低吟，華屋山邱。悵朱門舊宅，紅粉前游。光陰負我堂堂去，空遺下，庭砌清幽。闌干醉拍，鴻飛雪爪，往事難留。

又 惠山夜飲坐有姬人同園次賦仍用前韻姬姓趙嚴州人

人比花嬌，姓堪絲繡，問名云杜家秋。且餅煎寒具，鱸切槎頭。相逢滿酌梨花凍，歡場鬧，馬拋毬。忘髮館後，水明樓上，妙囀輕謳。酒罷暗訴飄流。說家本嚴灘，門枕丹

邱奈兵來雁蕩，烽接龍游。琵琶彈人思歸調，助空山、落葉聲幽。江山如許，英雄難覓，舊日婆留。

花犯

詠浩然堂後池上白山茶用周美成梅花韻

對西風、亭亭一樹，個儂好風味。和烟和月也無人憐惜，不勝清麗。水晶簾額深深倚。天寒私自喜。似小玉、夜長無伴，上牀鋪粉被。珠窗一層障，疏花似無，還似有，共人憔悴。愁殺是青霜輕墜。記一種、紅顏窈窕，曾開在三春臺榭裏。只薄命、年年流落，秋天涼著水。

三姝媚

寄遠用梅溪詞韻

柳線吹碧丸。記纔傾別酒，淚同鉛灑。低拍蕭娘，等吳楓紅了，再來簾下。詎料而今，折挫煞、游梁司馬。孤負伊家，蟾上瓊簪，麝湮綃衩。況是關河旅夜。數長短更聲，甚時方罷。斜壓紅綃，曾化爲蝴蝶。此歡無價。恰又平明，好夢與、釭花都謝。擬倩錦箋論恨，慙慙難寫。

又 紀半塘所見同緯雲弟次山姪用湘瑟詞韻

重來偏寂寂。算疏闌輕塵。粉纖曾拭。兩兩雛鬟。記茜衫小露。水邊門側。弄影凝妝。誰耐理、繡牀刀尺。閒盼山塘。細犢金輿。往來得得。再向橋陰繫席。只半艇烟昏。千簷雨滴。此際蘭闈。定雙擁金鳧。換吹鈿笛。眼底吳娃。枉自詡嬌紅膩白。其奈又經過處。斷無消息。

萬年懽 贈宋子猶先生七十次朱致一原韻

碧海青天歎橫江下瀨。樓櫓非昨。貝闕龍堂。彈指綃宮乾卻。槍臥綠沈休拓。任半世、鳳飄鸞泊。閒排纂。世史長編。朱黃細界疆索。菰蘆景略誰知。向窗前諷唄。肆上丸藥。老興淋漓。一笑人間輕薄。身亦北山猿鶴。只一語、臨風相託。囑渭水。好把綸竿。藏舟且付春壑。

又 壽毛卓人

猿鶴相聞。說先生今歲。正滿花甲。又值秋晴。門外金風颯颯。鶴背朝元薄醉。笑人世、

滄桑一霎。游仙倦。暫溷紅塵。何妨傭保相雜。當初竹林贈答。記分攜。阮屐爭荷。伶  
鍤。詎料栖烏。別後繞枝三匝。誰識開元舊事。只除是。碧簫紅蠟。君須醉。莫負黃花。精  
牀琥珀新壓。

解語花

詠美人捧茶和王元美韻

蕃馬屏風。雛鶯庭院。竹下茶聲細。妝樓小倚。闌干外。汲取春流淺試。乳花銀蕊。烟裊  
上。綠鬢千縷。溜橫波。爐火初紅。儘帶嬌憨意。捧處輕搖。蟬髻。問阿誰年少。消受纖  
指。珠鮮玉脆。語笑處。故惹檀郎驚起。沈香亭婢。只領略。凝酥佳麗。怎如伊。生小江南。  
偏解麝槍味。

又 詠美人捧觴和王元美韻

楚天卯色。吳地鶯聲。惹得愁千斛。春衣慢贖。且泥他。粉白斟來蟻綠。蓮鉤小蹙。行過  
了。銀屏六曲。鞦韆烟鬢。縹色杯輕。帳裏圍頰玉。笑顫流蘇影簇。怪佯醒不醒。罰依金  
谷。玉郎低囑。沈醉也。休作難人題目。芳心暗逐。羨杯底。鴛鴦同宿。趁花酣。雙抱紅箒。

圖取春眠足。

又 吳靜安姑丈堂中閩蘭盛開約同人過賞時有二校書在座

玉堂窈窕珍簾虛無。細壓眞珠榨。蘿陰石罅。隨風皺。一帶迴廊曲榭。暗中香瀉。列翠  
盞。輕扶紅架。羨高情、楚畹湘潭。助幽人消夏。萬朵珠承雪。亞更花邊淺立。人比姑  
射。鬢蟬低卸。微嗅處、不數海天冰麝。裏來盈把。總罨住、竹房茶舍。倩繁絃、併鼓猗蘭。  
將晚涼亂惹。

又 鳴高弟昔年曾與一年少爲狎游昨偶遇市上而此年少已不復相識歸  
而悵然因記昔年都下緯雲弟曾宿一北里某家明日拉余暨魯望跡之而  
此伎驚問誰何亦漫不相記憶與此事絕相類因作此詞用調鳴高他日緯  
雲見此定復一軒渠也

柳花似夢。鶯語初圓。人遇章臺下。舊愁縈惹。記曾與、宛轉風軒水榭。金丸拋灑。佯不  
認。隔年司馬。恨無情、惆悵歸來。擬碎揉花打。因記杜陵元夜。有春衣醉宿。肌沾冰

麝重來繫馬。誰提起、昨夜月中私話。揚州夢假。煩寄語、嬉游小謝。任盈盈、露井倡桃。向粉箋休寫。

渡江雲 江南憶同雲臣和蘧庵先生韻

江豚翻碧浪。憑高極望。折戟半沈沙。雞籠山下路。記得鳳城。數十萬人家。貂蟬掩映。鍾山翠、臺鼓鳴笳。更參差、青溪紅板。從古說繁華。堪嗟。齊臺梁苑。殘月微風。剡顏牆敗瓦。祇蒼涼、半林楓榭。四壁龍蛇。幾番夜向寒潮泊。空城下、浪打兼葭。青衫溼。隔船同訴天涯。

又 揚州感舊追悼西樵荔裳伯籲介夫諸先生并懷阮亭豹人穆倩定九舟次無言諸公

揚州何限好。無情江水。送去渺天涯。風流推宋玉。更有烏衣。門第舊瑯琊。珠簾璧月。賓徒盛、多少繁華。記當年、水樓烟郭。滿地采蓮娃。傷嗟。一城畫鼓。兩岸紅燈。共萬家鴛瓦。都付與、風彫菰米。浪打蘋花。牧之已老青樓換。重經過、帽側簷斜。風定處。隔

江隱隱琵琶。

又 送葉道子之任臨清守府

一鞭飛錦繖。鳳城南去。紅杏著花初。建牙男子事。千騎東方。送爾上頭居。碧油幢捲。碾輕車。小獵平蕪。風流甚。茸茸綠草。淺映繡螯弧。愁余。庾郎善賦。江令工文。任憑陵。今古總輸與。軍中陶侃。江上周瑜。何時玉靶元戎隊。劈黃獐。爛醉駝酥。毛錐子。問伊直一錢無。

又 送蔣京少下第游楚次儲廣期原韻

向長安市上。仰天長嘯。悔殺彩爲毫。月明無賴極。又照征南。萬將赤霜袍。掉頭仍向瀟湘去。去採離騷。算襄樊。幾般往事。一半屬孫曹。舟搖天低滴竹。瘦黛凝斑。任崖傾峽倒。恨茫茫。一軍鐵甲。九派銀濤。潯陽夜火黃州雪。應爲我。徒倚無聊。吾衰矣。漫勞送上雲霄。

又 寒夜登城頭吹笛有感作



孤城橫一片，千家樓閣都在雁聲中。關河牢落甚，身世飄零，烟水太濛濛。舊時赤壁周郎少，正領艤艫。有許多、銀濤雪練，相映戰旗紅。江東我攜長笛，斜倚危欄，作霜林數弄。總則把平生遺恨，訴與長空。一聲纔入梁州破，天風下，掣入蛟宮。嗟橫竹，愼毋滅沒爲龍。

又 欲雪

碧翁將試手，趁春未到，要放一城花。關河都凍紫，風慘雲昏，冷色走龍沙。籠窗撥火，料寒威、來早還加。簾櫳外，未曾飄瞥，吟興已無涯。山家當年此日，枯柳疏鴉，小柴門入畫。恰又是、梅邊渡暝，雁底航斜。玉塵休擬廉纖舞，念有人、新在京華。凝盼處，預愁綠蟻難賒。

絳都春第二體 乙巳元夜

春宵三五，正碧雲合處，冰輪斜挂。暗省年光，漫數韶華，偏沾惹。平生舊事都忘也。難忘是、鳳城鴛瓦。無燈無火，有花有月，偶然吟寫。此夜追歡買笑，有天街似水，暗塵

隨馬。詎料而今。幾陣東風。譙樓下。吹去了香車羅帕。春衣卸。思量如乍。且尋故老開元。月明閒話。

念奴嬌 雲間陳徵君有題余家遠閣一闋秋日登樓不勝蔓草零烟之感因倚聲和之

得憐堂後。有丹樓飛起。當年爭羨。陽夏門庭能詠絮。那更溪山葱蒨。帶雨房櫺。和烟簾幕。零亂東湖面。碧闌干裏。有人斜映瓊扇。可惜人去匆匆。而今樓下。秋水帆如箭。老我三吳好男子。綠鬢忽然衰賤。蔓草霜濃。叢祠露悄。白晝颺颺現。舍南舍北。亂飛王謝家燕。

又 與任青際飲

乾坤颯颯。且沽將楓葉。細評今昔。笑問幽州今夜雪。可似鷓裘寒色。市上吹簫。橋頭賣醬。淚灑吳楓赤。蘇貂空黑。謝郎今已破賊。不如冶葉倡條。青樓白社。磨滅八年。月。瀝盡并刀悲壯血。看有何人憐惜。白草關河。黃沙唐宋。只對孤鴻說。醉澆三國。周

郎江岸千尺。

又 題顧螺舟小影

如此佳人是王家養炬。謝家過末。三世貂蟬連北闕。年少東華釋褐。傅粉宮前。薰香殿側。顧盼真英發。臨春結綺。舊游似有瓜葛。而今零落堪憐。文園多病。羸得相如渴。滿目關河愁恨極。衰草濃烟塗抹。醉矣堪呵。灰兮可溺。田也供人奪。茫茫哀樂。四條絃子空撥。

又 緯雲弟三十作此詞因和其韻同半雪賦

醉拍闌干。歎去者苦多。光陰倏忽。知我平生悲憤事。惟有當頭明月。准擬騎鯨。不然射虎。一吐胸中鬱。吳鉤負汝。好將衫袖頻拂。追想紅燭呼盧。青樓賭酒。往事推華閱。小季已稱三十歲。何況暮年黃歇。斜閣秦箏。橫攤越絕。燒盡爐中榘。憑高遠望。江流一線如髮。

又 送子萬弟攜五弟之睢陽并令二弟三弟四弟同和他日一展齊執便成

聚首也

悲哉秋也。況登山臨水，黯然欲別。千里長江流夜月，萬里長城空闊。白板船開，青楓樹老，極目徒悲切。君歸梁苑，漢家何限陵闕。疇昔讓棗推梨，謝家兄弟，才氣人爭說。一夜西風吹蒼莽，吹散封胡過末。兄作楚囚，弟成秦贅。枕上鶻啼血。阿龍超甚，教他長誦明發。阿龍五弟小名時同四弟在睢陽

又 龍眠公坐上看諸客大合樂記丁酉中秋曾於合肥公青谿宅見此今又將十年矣援筆填詞呈龍眠公并示樓岡太史邵村侍御與三孝廉

醉來闌入正司筵上，一羣腰鼓。老子婆娑牀上坐，矍鑠聽歌似虎。一片西風，千堆畫燭，月好清輝苦。回頭往事，青溪舊夢重作。謝公笑問兒郎，此閒何處，略記隋堤路。老矣廉頗猶健飯，莫負紅么翠羽。人在當場，曲逢入破，白髮休予侮。新磨礮綽，世惟公等堪語。

又 次夜韓樓燈火甚盛仍聽諸君絃管復填一闋疊前韻

紅燭如山。請四筵滿座，聽儂搗鼓。此日天涯謀作達，事更難於縛虎。僕本恨人，公皆健卒，不醉卿何苦。金元院本，月明今夜重作。總是狎客南朝，佳人北里，占斷蕪城路。好景也知容易散。一別沈鱗羈羽。狂受人憎，醉供人罵。老任雛姬侮。揚州燈火，明朝人定傳語。

又 乙巳中秋用東坡韻寄廣陵諸舊游

月明如此，問江山今古，幾多陳迹。誰把桂輪今夜裏，碾破楚天新碧。玉白無聲，銀河有影，一片清虛國。醉餘莫笑，舊游吾尙歷歷。記得杜牧司勳，江湖落拓，曾作揚州客。愛殺打頭天上月，管甚中秋七夕。一別淒然，吾生可惜。場盡鷗鵬翼。夜云深矣，依稀樓外吹笛。

又 酬歸德侯仲衡

天陰歲暮，正情如中酒，人初賦別。忽接繁臺書一紙，飛下梁園白雪。悼遠傷離，撫今追昔，字字皆辛切。狂歌數闋，唾壺之口都闕。每欲窄袖輕衫，礪礪道上，小犯寒風。

列。耳後弓弦聲霹靂。一片風毛雨血。雅願終違。壯遊未果。世事多枝節。中宵輾轉。布衾今夜難熱。

又 尤展成招飲草堂。同丁飛濤彭雲客。宋旣庭御之卽席。分賦同用飛濤韻。別來何久。喜今朝坐上。五君二仲。時坐客共七人齊作鎮西鷓鴣舞。舞罷持杯高誦。蹴踏齊梁。憑陵晉魏。白眼看唐宋。脾雖生肉。公然意氣豪縱。最是月落參橫。主人留客。不放歸鞭控。能得幾場花下醉。況是吳宮如夢。錦瑟憐誰。青萍負我。快作臨風弄。唾壺闕盡。狂歌亂擊春甕。

又 詠玫瑰花

陡驚春去。算風光此際。又逢櫻筍。拂曉謝娘簾閣畔。忽逗賣花聲韻。籃底氤氳。擔頭狼籍。紫豔濃香噴。佳人競撚。看來和露尤俊。最愛別樣心情。天然梳掠。偏厭紅英襯。揉得花魂。魂盡碎。另作一番安頓。焙入衾窩。薰歸裙縫。細細調紅粉。玉郎不覺。錯疑戴向雲鬢。

又 八月初七夜對月呈李湖北太史

帝城今夜正萬家齊看。一鉤新月。照過龍樓和鳳苑。來照盈顛華髮。冷露初零。清輝未滿。玉宇都清切。六街香霧也知絲管難歇。最是太液詞臣。金閨才子。對景偏軒豁。退直玉鞭搖闕下。鴛瓦一時堆雪白。可騎鯨。廣能射虎。醉擊珊瑚折。料應相念。有人孤館愁絕。

又 初八夜對月飲紀伯紫處士寓仍用前韻

揮杯一笑恰舉頭。又見昨宵明月。如此清光兼老伴。遺恨真無毫髮。蓮子輕拋。蘋婆細劈。慢取橙蠶切。風前倚幌。滿城曉角初歇。可惜萬事蹉跎。半生偏側。難得胸懷豁。誰把銀河階下瀉。快作西山積雪。感極關河。愁深砧杵。一寸心俱折。爲渾脫舞。乃公直是奇絕。

又 初九夜對月飲吳默巖太史寓齋三疊前韻

中宵狂叫憶曹公有語。明明如月。更記謫仙當日句。明鏡三千白髮。入洛年非。游燕

才盡幸舍歌辛切。空牆老驥。歎霜猛氣難歇。詎料宣武門前。長椿寺側。竟見秋堂豁。更借一尊桑落酒。光汎素瓷飄雪。一片鄉心。三更雁叫。拚把刀環折。角鷹刷羽。脫鞴固是橫絕。

又 初十夜對月同山右吳天章中州彭中郎吳門周子倬章素文飲汪鈍庵戶部寓廬四疊前韻

虎邱石上。記曾經。看過幾場秋月。錦隊花城。渾不夜。一縷歌喉如髮。此際他鄉。故人對酒。一倍關情切。爲歡休晚。中原軍鼓初歇。漸覺帝闕寒生。天街露悄。醉把雙眸豁。地界袁曹多戰鬼。危語頭鬚成雪。上句彭中郎詩。蕭瑟西風。淒涼北里。雁柱箏都折。霜螯飽噉。不知前路愁絕。

又 十一夜黑窰廠對月龔芝麓先生招陪諸公送董玉虬侍御之任秦中五

疊前韻

董公健者。到秦川。正看秦時明月。立馬灞陵橋上望。極目應添白髮。馳道雲埋。重關



日落金鐵爭摩切。慷慨懷古。西風颯颯難歇。今夜客餞青門馬嘶珠絡。好遣離愁豁。高處憑闌飛火樹。光映鳳城如雪。暫領河湟。旋朝京闕。丹檻看重折。木皮嶺上。雁書休使稀絕。

又 十二夜對月戲柬劉公猷吏部時吏部新納姬六疊前韻

今宵閒想問誰家。畫閣一雙人月。細把朝衫薰菝。徐綰八盤元髮。人有琴心。家居穎尾。風調偏親切。紅窗爾汝。夜闌一倍難歇。爲語十二樓中。金風初厲。莫任瓊扉豁。遙憶掃眉驅使處。茉莉萬枝香雪。天與貂蟬地多金粉。笑揀名花折。獨憐銀漢。有人擣藥愁絕。時公猷舊姬方臥疾

又 十三夜大宗伯王敬哉先生招飲是夜無月七疊前韻

先生語我。正一生消受。帝城烟月。紅燭短時橫。笛噉夜雨。開元白髮。霜咽遺弓。風悽內苑。畫角聲酸切。先生時述世祖遺事銅盤承露。淚如鉛水不歇。曾記樗杜笙簫。長楊刀箭。從獵霜林豁。父子一時連上相。印紐銀螭臥雪。別墅初成。淮淝已捷。屐齒

何曾折。談深酒冷。琴琴街鼓將絕。

又 十四夜對月同王阮亭員外八疊前韻

三更以後。碧天剛碾上一輪圓月。嬌女故園應學母。宛轉畫眉梳髮。古巷蛩吟。小窗雁語。觸景成悲切。南飛烏鵲。繞枝何處棲歇。我欲吹裂玉簫。拓殘金戟。小把愁腸豁。生不神仙兼將相。負此秋光堆雪。燈下吳鉤。腰間寶玦。拉雜都摧折。明當竟去。終南聞道奇絕。

又 十五夜宋蓼天太史招飲以雨不克赴少頃月出同緯雲魯望兩弟暨曼

殊小飲寺寓九疊前韻

吾生萬事。沈思遍。都似今宵之月。只到圓時期便左。揉得愁成亂髮。此夜西園。故人東閣。遲我情偏切。衝泥無計。車輪腹轉難歇。少頃皓魄東升。海天一碧。世界都軒豁。燕市且須謀一醉。難得銅街潑雪。絲竹顛狂。弟兄歌叱。碎拗金鞭折。知他何處。笛聲縷縷淒絕。

又 十六夜對月呈孫北海先生十疊前韻

浩歌被酒喜舉頭。仍見昨宵圓月。遙憶高齋歌猛虎。劍氣綠人毛髮。老子龍頭細書。蠶尾玉試昆吾切。隗囂舊物。土花千載難歇。更有粉壁波濤。牙籤蝌蚪。攤几供披豁。吟健左車能決肉。日搗黃州快雪。餘子紛紛。是翁矍鑠。有角真堪折。南樓高興。依稀清嘯將絕。

又 看山如讀畫讀畫似看山爲周櫟園先生賦用曹顧庵韻二首

青天粉本。是五丁所鑿。自然圖畫。我識天公矜慎極。吮筆幾曾輕下。晴際添螺。昏時使墨。茜向朝霞借。烟絲雨髮。直教染岱烘華。我欲地縮千山。袖攜五岳。點綴閒亭榭。一幅橫披供眺望。便可於中耕稼。非畫非山。是看是讀。饒舌都教罷。一身冷翠。此間三伏無夏。看山如讀畫

平生癖愛。是荆關老手。最紛披處。狂叫墨花都發響。認作畫師奇句。比以漢書。挂來牛角。讀入前村去。千迴不厭。直疑聲振毫素。回想老子籃輿。好天筍屐。曾到層山

路。今日明窗懸幅幅。一樣晴鬢堪數。峽角將崩。雲根欲活。邱壑胸中具。更憐著色崖邊。碎點紅樹。讀畫似看山。

又 鉅鹿道中作

雄關上郡。看城根削鐵。土花埋鏃。十月悲風如箭叫。此地曾稱鉅鹿。白浪轟豕。黃沙蒼莽。霜蝕田夫屋。車中新婦。任嘲髀裏生肉。太息張耳陳餘。當年刎頸。末路相傾覆。長笑何須論舊事。泚水依然微綠。欲倩燕姬。低彈趙瑟。一醉生平足。井陘日暮。亂鴉啼入枯木。

又 鄴中懷古

滏陽南去。望鄴城一帶。逼人愁思。記得羣雄爭割據。健者曹家吉利。公子綵毫。佳人繡瓦。快意常如是。漳河嗚咽。至今猶染紅淚。猶憶秋夏讀書。春冬射獵。泥水護南地。轉眼寒烟縈戰壘。耿耿還留霸氣。賀六渾來。韓擒虎去。苑樹都如薺。論人成敗。世閒何限餘子。

又 題季端木小影

丹青一幅。是西湖好手。戴蒼之筆。年少者誰真秀絕。不讓王家摩詰。繡虎清才。食牛奇氣。刷羽霜空失。科頭箕踞。襟情一往。蕭瑟。寄語莫賂羅囊。人身似爾。頭地終須出。安得畫師乘快墨。并寫驂騮十匹。歷塊過都。莖燕秣越。此事爲君必。若翁大笑。看君長繞吟膝。

又 紅橋園亭讌集同限一屋韻時有魚校書在座

霜紅露白。借城南佳處。一餐秋菊。更值羣公聯袂到。夾巷雕鞍繡軸。一抹紅霞。三分明月。此景揚州獨。揮杯自笑。吾生長是碌碌。且喜絕代娥媼。元機娣姒。風致偏妍淑。惱亂雲鬢多。刺史。何況閒愁似僕。小逗琴心。輕翻簾額。一任顛毛禿。倚闌吟眺。雲鱗墳起如屋。

又 讀顧庵先生新詞兼酬贈什卽次原韻

老顛欲裂。看盤空硬句。蒼然十幅。誰拍袁絢鐵綽板。洗淨琵琶場屋。擊物無聲。殺人

如草。筆掃魏毫禿。較量詞品。椽軒白石山谷。記得戲馬長楊。割鮮下杜。天笑温堪掬。玉靶角弓雲外響。捎動離宮花木。銀海烏飛。銅池鯨舞。月照孤臣獨。江潭遺老。一聲寒噴霜竹。

又 送朱近修還海昌并懷丁飛濤之白下宋旣庭返吳門仍用顧庵韻

住爲佳耳。問先生何事。急裝趨肅。曾在竹西園子裏。狼籍斂徵釧逐。別酒紅擎。離帆綠飽。人上蘭舟宿。君行烟際。吳山螺髮新沐。可惜世事匆匆。陡然方寸。起岡巒陵麓。誰倩石尤吹鷁轉。并轉丁儀宋玉。無數狂奴。一羣蕩子。屯守倡家屋。此情莫遂。悄然熟視楓菊。

又 被酒呈荔裳顧庵西樵三公并示豹人孝威梅岑舟次方艤希韓汝受散

木諸子仍用原韻

僕何爲者。是東吳愁客。最能擊筑。記得阿奴年少日。曾直高人品目。甚矣吾衰。時乎不再。二語那堪讀。朱門列戟。此中何限梁肉。幸遇袞袞羣公。憐而召我。共看東籬。

菊我意亦思歸去耳。聊葺溪干破屋。行乞歌場爲傭屠肆也。覓三餐粥安能豁刻。矯廉長效孤竹。

又紅橋倡和集成索李研齋序孫介夫記作詞奉東并呈冒巢民先生仍用

顧庵韻

夔門蜀棧是史家粉本。先生所獨。更有孫樵雄且健。暗裏漢書能覆。二老縱橫兩篇記序。並逐中原鹿。古文奇字。他人恐不能讀。直可抵突。曾王激昂韓柳。揖歐陽永叔。我與浯溪曾有約。采人文抄篇幅。細寫千行。高吟百遍。音響崩崖屋。遇當佳處。澆之苦茗芳菊。

又贈阿秀并呈西樵

晚風迴處。忽簾開影露。鬢烟微綠。驀地見人猶掩斂。裙與闌干爭曲。縈損紅巾。撥殘錦瑟。頓惹愁千斛。客來休入。請看門外金犢。漸覺瓊內鱗皴。篝邊鴨瘦。觥事卿須錄。生世諧逢王吏部。繡佛還工惜玉。愛爾嬌憨。嗔人拘管。按碎釵兒菊。晚攜素手。碧

天雨過初沐。

又 曹顧庵王西樵鄧孝威沈方艱汪舟次季希韓李雲田兄散木皆有送予

歸陽羨詞作此留別

此諸公者。乃狂歌未已。離歌又促。僕本恨人。臣已老。怕聽將歸絲竹。捩柁秋空。發船月夜。濁浪堆銀屋。我行去作。荆南山下樵牧。被酒膝席相呼。人生長聚。那得同麋鹿。歡伯卻輸愁鬼厚。只是與人追逐。天若有情。地如埋恨。此會何難續。他時念我。杜陵男子蕭育。

又 送沈方艱還宣城兼懷唐耕隴施愚山梅子長同西樵用孝威韻

歸兮何暮。歎風塵經歲。迷陽卻曲。憶我同君。爲狎讌。夜夜彈絲吹竹。弟畜余髯。人呼沈瘦。側帽談公穀。方艱美須髯業。春秋人身似此。安能仰面看屋。故里才子都官。舍人唐老。英妙兼耆宿。更有肩吾能愛我。客舍綈袍情篤。歸見三君。雪深一尺。定理尋詩鬪尺書。好寄江船。不乏千斛。



又 延令季滄葦席上送周子儼計偕京師

長途迫歲。正黃河飛雪。馬都沒腹。袴縛黃皮。雄舞狛。那顧從奴。蠟縮。斫彘屠門。射雕塞上。生啖黃獐肉。看君意氣。真成勇過。賁育。況是歷落盤龍。風流公瑾。海內標名目。此去長安聲價重。定壓庾徐潘陸。愧我牢騷。借人杯炙。送汝登華軸。慈恩題罷。歸鞭春晝須速。

又 廣陵客夜卻憶吳門同吳梅村先生暨葉訥庵盛珍示王維夏崔不雕李

西淵范龍仙王升吉飲錢宮聲宅時有新鳳賴鳳二校書在座

月之十八。記諸公。共飲錢郎書屋。祭酒能爲解散髻。下語千人都伏。東觀名卿。南朝才子。爭舉觴相屬。莫愁更鼓。任他燒短紅燭。何意尊合杯闌。一雙么鳳。齊注橫波目。假使客中皆此夜。詎羨八州之督。上客如風。佳人似雨。薄命余同鞠。鞠兮惜汝。一生長被人蹴。

又 季滄葦宅夜看歌姬演劇卽席成詞并示張天任五丹九儀戴宏度季孚

公希韓李三友朱石鐘諸子

吾生詎料也曾經。親聽諸姨法曲。非月非烟非霧雨。非肉非絲非竹。不易描摹。最難  
忘記。耿耿縈心目。依稀梁畔。暗塵飛墮千斛。昨者我渡江來。正沙深月冷。浪花堆  
簇。飢蜃饑蛟。渾不怕。我有聽歌奇福。拍到殘時。人將散處。樂往傷幽獨。重逢難必。岸  
巾且吸船玉。

又 重過廣陵同王西樵孫介夫夜話卽宿西樵寓中

登車一歎歎羊裘已破。朔風如鏃。枉道那辭三百里。爲與瑯琊情熟。卻遇興公。鏗然  
屐響也。過東頭屋。三人相對。寒燈淡暈生綠。少頃客去余留。王公呼我。大被從君  
宿。睡說三冬歧路事。起坐何煩頻蹴。綿定奇溫。居殊不易。握粟憑誰卜。車中霜滿。夜  
寒私語童僕。

又 寄董玉虬侍御秦中

黑窰秋夜。記臨風痛飲。黯然言別。我去汴城君繡嶺。一樣前朝陵闕。麥積山高。木皮

嶺滑度隴何須怯。漢家節使。天邊鏡吹不絕。且自擲帽狂呼。繞牀大叫。盧采翰誰喝。莫聽涓橋鳴咽水。殘了秦時明月。鑿空音孔。張騫。縶兵鄧艾。此事真人物。驪山下。料應紅樹如血。

又 汝南七夕病中排悶

誰家砧杵。攪中原。秋夜碧來如此。何況今宵逢七夕。天上鵲橋成矣。人說黃姑。貫錢營室。捱盡愁滋味。可憐阿堵。神仙亦被驅使。我笑此語荒唐。古今稗史。誰是誰非。是。翻怪頻年瓜果鬧。溷我婦人女子。僕病未能。吾衰詎億。曬腹爲佳耳。汝南城下。月明何限殘壘。

又 半雪弟四十詞以贈之卽次其自壽原韻

推梨讓棗。記弟兄幼小。講堂嬉戲。暇則讀書兼擊劍。不識世間程李。捫蝨雄談。屠龍絕技。豁達饒奇計。旁人嘖嘖。陳家郎差足矣。詎料輶轅半生。蹉跎萬事。不稱男兒志。從古多才人失路。蕩子酒徒而已。白髮無根。青衫有鬼。兀坐愁城裏。遠勝飲否飲。

時蓋與重洗。

又 鄴城感懷寄緯雲都下

漳河南下。被浪花、打散鄴宮遺事。總是英雄兒女恨。釀就千年霸氣。馮淑妃來。慕容  
廐去。誰問他曹魏。銅臺繡瓦。至今換作殘壘。白頭來到中原。吳鉤醉舞。不耐濤聲  
沸。春雁成行都北往。謂緯雲子萬只剩離鴻一對。一滯吳關。謂牛雪一留趙郡。自謂  
也。夜冷那能睡。闌干拍遍。淒然長念阿緯。

又 宋景炎席上贈柘城李蓼墅

中年以後。早傷於哀樂。頓成頭白。適過章華爲劇飲。倏遇中原詞伯。劍氣縱橫。酒腸  
跳盪。老筆蒼無敵。霜寒月苦。爲君細吐胸臆。今夜玳瑁斑斕。紅絃郭索。搗鼓催行  
炙。難得他鄉歡笑極。況有吳兒似雪。君欲歸邪。住爲佳耳。底事搖鞭急。回聽筵上歌  
珠一串堪拾。

又 用前韻酬柘城李子金

雪飛千里步睢陽市上。忽逢李白。笑顧羣公摩腹語。空洞容卿什伯。嚼蕊吹花。馬稍名理。豪蕩真難敵。轟厖拉雜。酒酣披瀝衷臆。聽說滄浦鮫人。鞋山龍女。嗜古如牛炙。曾挾奇文過灌口。浪打片颿堆雪。豪奪何傷。書淫不悔。那畏波濤急。擲書楯底。百靈任爾爭拾。

又 用前韻酬鹿邑張子武

昇仙臺上說當年風景。縈青繚白。曠望層湖窗撲水。雁子鳧雛千百。物換星移。海枯石爛。劫手棋逢敵。至今廢館。野花叢草沾臆。久矣仙不如頑。哀多於樂。且把鵝笙炙。漢武秦皇今縱在。也飽炎風朔雪。飲酒千場。讀書萬卷。此外非吾急。醉人須恕。懷中幘墮難拾。老子鹿邑人邑有昇仙臺

又 用前韻酬柘城王叔平

丈人安坐看三更。簾外明星初白。壯不如人。今已老。臣是江東亭伯。萬事都非。一年將盡。才命交相敵。悲歌何益。且須美酒澆臆。幸遇梁宋諸公。焚香梯几。曲室紅爐。

炙。千載鄒枚今尙在。暫緩顛毛成雪。袞袞祥鸞。栖栖窮鳥。來日翻飛急。長鑱短柄。空山橡栗能拾。

又 睢州田子益。唐昕林孫。嘯史徐次微。袁信庵。褚宸宣。吳子純。侯長六。諸子。邱中沽酒飲我別來數日。荒村風雪有懷。昨游用前韻寄之。

三間老屋。糝六花。千里籬門都白。伏枕窮村。鑿折脚。誰是巨卿元伯。憶昨諸公。惠而好我。酒把奇寒敵。自君之去。離思萬種填臆。當日說劍談天。吹簫刻燭。穀蹠憑君炙。幾日分攜人總老。況值打頭風雪。才退貧居。心灰老至。只有朋情急。來春睢渙。汀蘭期爾同拾。

又 梁紫有和予百字令詞。因用前韻酬之。送其暫返錦池。兼促卽來梁苑。

朝來急霰似千層。浴鐵一軍都白。何事嚴裝偏早發。鞭指荒臺闕伯。萬籟悲號。六花狂舞。歸騎疑衝敵。離杯當盡。人生有限肝臆。感爾學富侯鯖。才同禁巒。偏嗜秦人炙。也擬寒天牽老伴。消過殘冬臘雪。上冢龐公。移居杜老。別處來須急。犂車沙穩。好

將家具收拾。

又 送錢礎日歸錫山同雲臣和曹顧庵韻

憐吾與汝。只年將五十。尙然棲逸。槩上功名難辦取。且自弄他文筆。借面弔喪。送人作郡。歲歲饑驅出。傍人大笑。嵇康身嬾多蝨。回憶舊日酒徒。凋零略盡。愁殺松楸密。恰似枝頭花欲謝。祇剩十分之一。歸聽鶯聲。好攜芒屨。野服須遮膝。九龍山下。仙糧何限芝朮。

又 冬夜聽梧軒題王右丞初冬欲雪圖填詞社第三題

炎天看此。便陰陰。也覺滿林飛雪。何況今宵風正吼。絕塞膠弓都折。冰裂龍堂。淩鋪貝闕。萬里關河結。長空黯澹。乾坤景色真別。安得盡做瓊樓。早催滕六。一夜看親切。玉戲定知應不遠。料也無過來月。水墨纔皴。同雲暗釀。人意先清絕。只愁僵臥。怕他近恁時節。

又 留別錢礎日卽用其見贈原韻

昔年作客記美人劍士逢場都有燭淚堆槃。舞雪薇帳輕紅垂斗。劇孟家邊。莫愁村外。恰對銅街口。爲歡并日。底須寒食重九。今日騎省飄零。蘭成憔悴。孤負箏琶手。拍徧闌干人事換。贏得一場搔首。歸去雙溪。重尋三徑。麋鹿真吾友。愁來易醉。慎毋多與之酒。

又 春日讀京少梧月新詞寄題一闕并呈尊甫慎齋給諫

斜風細雨算心情。一往柔如春水。梧月新詞剛入手。脫帽忽然狂喜。鸚鵡雕籠。螻蟻古廟。字字俱精綺。時讀京少詠鸚鵡過孫夫人廟二詞高才妙作定摩秦柳牆壘。寄語尊甫先生。陳生別後。憔悴吾衰矣。舊日酒徒零落盡。相隔雲泥朝市。棘鑿孤城。夜郎遠宦。歸況今何似。傳柑家讌。道余問訊如此。

又 和于皇梅花片茶詞卽次原韻

梅精近日嫁茶星。于皇自署茶村又曰茶星合併相呼也得拾取粉英煎雪乳光映翠磁都白便趁春陰亟修水遞消遣天如墨。故山茗事正應近恁時節。常笑龍鳳



高名旗槍偷父，不稱瓊瑤液。只借隴頭千百本，隱隱吹歸橫笛。點染天香，芟除俗豔。小泛真珠色。花情水味，融成一片無迹。

又 葵花

東君罷繡，剩猩絨一束，亂拋牆角。迸出戎葵娛永晝，遠徧閒庭綽約。蝶凝檀心，蜂黏紫靨，爛比朱霞駁。翠簾如水，襯他榴火燃灼。別有小小錢般，離離錦樣，曾向川江濯。謂蜀錦葵也。誰道房櫳春去久，依舊紅芳似昨。苦被陰濃，遮他紅日，愁殺傾陽藿。金烏早醒，海天雞正啣喔。

又 戲題終葵畫 鍾馗一名終葵

誰將醉墨，潑長箋，寫作十分奇詭。羈鼻魁肩形狀，寢風刮鬢毛攢蝟。空驛啼杉，頽崖嘯葛，目欲營天地。三閭呵壁，荒唐情態如是。休只破宅蹣跚，荒江狼狽，幽宵尋魘魅。鼎鼎試看朝市上，何限擲揄之子。臥者爲尸，坐而成冢，擇肉須來此。笑渠筌伯，翻愁鬼以公戲。

又 讀屈翁山詩有作

靈均苗裔，羨十年學道，匡廬山下。忽聽簾泉，冷瀑豪氣軼於生馬。亟跳三邊，橫穿九塞，開口談王霸。軍中毬獵，醉從諸將游射。提罷匕首入秦，不禁忍俊，縹緲思登華。白帝祠邊三尺雪，正值玉姜思嫁。笑把嶽蓮，亂拋博箭，調弄如花者。歸而偕隱，白羊瑤島同跨。

又 夏日看荷花作

後湖長蕩，見烟鬟霧鬢，紅妝無數。葉暗荷深，三萬頃，一片嫩涼成雨。映水逾鮮，倚風欲笑，月又明南浦。隔江試采，有人一樣心苦。曾在太士臺前，文人舌本，幻出花如許。一自污泥淪謫久，悵望瑤池懸圃。漢苑飄香，吳宮墮粉，幾遍閒簫鼓。何時華頂，與君攜手歸去。

又 月夜看桂花

淒清庭院，乍金飈壓下，一天黃雪。恰值爛銀盤，又上冷浸水晶宮闕。陣陣天香，蕭蕭

夜色花影扶疏絕。誰家牆外洞簫不住嗚咽。記得玉兔金蟆團圓白。畝碧落分枝葉。自遇吳剛修桂斧。浪被人間攀折。萬里空明一尊灑。豈肯負當頭月。姮娥莫笑老顛狂興如鶻。

又 甲寅九日追感京洛舊游悵然成詠

無枝烏鵲記前年。此日翻飛京闕。曾預羣公奠酒讌。玉佩珠袍齊列。白月千門。青天萬帳。笳蓋真軒豁。彭城南郡。坐中多少人物。今夜故國荒原。長江怒浪。悲嘯魚龍發。生怕西風吹破帽。我有鬢絲新雪。何處登高。無人送酒。俗煞重陽節。縱然高望。戰旗一片明滅。

又 臨津懷古

笛聲緊處向霜空。削下一天秋氣。我買蜻蛉剛六尺。紅樹之中斜繫。聞說當年。從來此處。劇號繁華市。如今只有古祠閒。映流水。歷數漢苑唐陵。滄桑轉瞬。大抵皆如此。繡嶺金墉都換了。何況彈丸黑子。賽鼓前村。巫歌極浦。斷碣刳羊豕。滿陂紅葉。老

上晴壘。

又 西泠舟行遇颶風同南耕賦

天吳作劇。鼓洪濤。湧洞雷轟雪沸。怒鬣淫漉。掀宇宙。頃刻半湖純晦。白浪懸崖。黑雲壓櫓。人命同於蟻。太湖倒拔。喧逐那許龍睡。我見天水奔騰。帆檣飛動。騎上霜篷背。醉作壁窠書斷岸。字蹟淋漓怪偉。亂石將崩。孤城欲沒。老樹森奇鬼。一羣野鴨。帶啼觸響叢葦。

又 途經溧水是宋周美成作令地慨焉賦此

詞推北宋。有周郎香弱。集名片玉。未向大晟填樂府。此地先留芳躅。隔浦蓮嬌。滿庭芳麗。唱盡相思曲。隔浦蓮。滿庭芳。詞俱美成。在溧水署中作。小亭姑射。當初何限花竹。美成令溧水時署中構一亭名曰姑射。彈指六百餘年。詞人重過。此閒愁根觸。一自汴京時世換。絕調幾人能續。冷店騎驢。野航聽雁。客睡何曾熟。蔣山在望。可憐依舊凝綠。

又 炙硯

當年雪夜記貪歌嗜酒。衝泥拖屐。三十六簧寒不起。醉把紅鵝笙炙。脫帽顛狂。解衣盤礴。碎裂黃皮褶。詩書何用。任他堆老牆壁。今日冷淡生涯。忍寒呵凍。苦伴端溪石。熾盡朱門紅獸炭。翻惹蟾蜍淚滴。銅雀臺荒。中書君禿。況是磨人墨。直須焚卻。吾今老惰無匹。

又 送韓聞西之吳門

虎邱鶴澗問狂奴。綦跡綠苔偏熟。前月中秋停片舸。特地來聽絲竹。爛醉高歌。墊巾側帽。飽看晶輪沐。平生疏放。幾曾甘受羈束。今日帳後髯參。車中新婦。舉止何羞縮。咫尺青溪難寄興。何況雲山斷續。君過橫塘。船窗凝望。定見寒崖綠。爲余傳語。比來離恨千斛。

又 將發金陵前一夕大雪挑燈不寐悶填此詞擬歸示蘧庵楨伯雲臣竹逸諸先生暨大士表兄南耕表弟

瓊窩粉窖。儘六花、一夜天公兒戲。鑪火微紅，官燭冷，那不寸心如碎。北渚田荒，西疇租少，枉說豐年瑞。停杯大笑，伯符志業難遂。遙憶故苑風光，釣徒詞客，多少顛狂意。好箇雙溪真畫本，小閣於中位置。萬玉編篋，千銀綴網，漸理探梅事。曲阿道上，定憐風雪歸騎。

又 春日玉峯葉九來招飲半繭園時梅花正開酒間話舊有感九來向與吾

邑某氏歌姬有目成之約今此姬已屬他人故及之

賣陽天氣，恰春光、嬌到九分時節。城下小園圍綠水，無數畫廊周折。蝶翅愁紅，蜂鬚簸暖，滿院繁英纈。君如不醉，花時枉詡豪傑。記否二十年前，襄王筵上，衆裏香曾竊。金縷衫邊桃葉淚，多少細憐輕閱。柳絮簾櫳，花枝年紀，事去和誰說。憑闌一夢，簷糝徧晴雪。

又 范龍仙齋頭喜遇婁東許九日賦贈

六千三萬算老顛，此後終當樂死。十載詩名成底用，何限東西衛尉。一語驚魂，杜陵

曾說。主將奴才子。問他奴僧。而今果否如婢。君已鬢點吳鹽。憐余種種。亦復肩隨矣。浮世幾場開口笑。盜跖也知如是。燕子年光。蟲娘庭院。且住爲佳耳。楊花如夢。滿城日暮飛起。

又 祖園與玉峯徐孚若話舊回用前韻

立談數語。似項王帳後。楚歌齊起。又似鄰船商婦泣。一夜琵琶聒耳。紅粉辭鄉。青袍失路。從古原如是。子規頻喚。明朝春又歸矣。拚取僧院聽鐘。歌樓持鉢。老作吹簫婢。萬事灰頽吾不恨。只負柔奴車子。滿幅花箋。半牀珊管。怕殺藍田尉。單衾空館。鴨爐紅瘦香死。

又 讀孚若長歌卽席奉贈仍用孚若原韻

霆轟電掣。算君才。真似怒濤千斛。百感淋漓風驟起。劈裂滿堂樺燭。公醒而狂。人憎欲殺。抵鵠何須玉。春衫老淚。鮫珠瓣瓣堪掬。不記三十年前。灌夫使氣。嚙嗜驚鄰屋。彈指蓬萊今又淺。短髮可能長綠。詩酒前緣。鶯花小劫。世事彈棋局。關山笛破。欲

吹吹不成曲。

又 徐孚若招同諸子過飲。余以怯酒先歸。賦此言謝。

華堂鯨吸看羣公。轟飲投瓊博籠。髣髴昆陽軍馬沸。屋瓦一時都壞。畫鼓千搗。銀鬢百罰。促數籌如蠹。人間堪唾。紛紛會擲天外。我已閣走窮賓。關通逋客。逸出糟邱界。愁極逢歡偏易感。莫笑邇來胡憊。遙憶杯前。此時月下。滿座傀俄態。朝來早過。一簾酒氣還在。

又 丁巳仲秋廣陵寓中病瘡不獲爲紅橋平山之游。悵然有作奉柬金觀察長真先生并示豹人穆倩孝威定九蛟門叔定女受無言諸君。

最無聊賴。又西風吹到隋皇宮闕。明月橋邊烟景換。依舊玉簫淒咽。綠水全昏。黃花早瘦。往事憑誰說。江山如畫。恰逢愁臥時節。安得桓石虔來。爲驅瘴鬼。放我眉梢絕。更把杜陵奇險句。高詠子璋熱血。僕病何妨。人言可憎。笑汝挪揄物。曼聲狂嘯。碧雲片片都裂。



又 丁巳中秋玉峯徐季重葉九來招飲三友園同集爲宋旣庭劉震修潘次耕徐立齋顧恪如宋南金卽席分賦

插天峭壁。被風吹月浪。洗來逾綠。嵌壑蒼崖。鱗鬣動。萬隊熊蹲獅伏。碧海青天年年今夜。長見金波浴。姮娥耐冷。一輪細碾圓玉。況復地有名園。人逢上客。消盡愁千斛。瘦石小橋苔逕悄。掩映疏花秀竹。更上山巔。龍川墓上。爲我澆醺醪。醉歸夜靜。滿身零亂金粟。山上有宋劉過墓

又 題劉震修小像卽次原韻

平生謾罵笑紛紛。眼底汝曹何物。醉後擘窠盤硬句。澆徧倡樓粉壁。柳絮縈鞭。花枝低帽。狂煞何曾歇。側身攫翅。角鷹颯爽毛骨。誰料同學少年。半封侯去。剩我漁舸隻。擊碎唾壺顛欲死。往事明明如月。君賦離鸞。僕歌老驥。一樣關情切。中秋近矣。人間萬頃晴雪。

又 賦得朝雲墳在落花中爲黃天濤悼亡姬陸羽嬉作 南陽鄧孝威有絕句

云休啓疏簾。遠望朝雲。墳在落花中天濤。有一扇扇上并圖此景。

南陽詞客。慣多愁善感。最能吟寫。近爲黃郎題恨句。淒咽如聞夜話。說道江鄉。每年寒食。細雨啼山鷓。落紅萬斛。朝雲墳在其下。更被水墨輕描。丹青澹抹。倍把愁腸惹。短短墓門花似血。點入倪迂小畫。蝴蝶成團。靡蕪滿路。鬧殺前村社。倚樓人在。爲他淚灑銀帕。

又 壽蘧庵先生七十乙卯元夕後九日

元符過了。喜華筵重照。銀花火樹。南極老人星獻瑞。恰接春燈三五。族壓溫邢。才雄管樂。伯仲齊伊呂。昇平盛事。堯年老鶴能語。今日鬢髮蕭蕭。關山歷歷也。長安何處。三見蓬萊清淺甚。一笑人間今古。鐵笛仙翁。錦袍學士。暫溷漁樵侶。隔江長嘯。月明何限更鼓。

又 送吳豈衍歸宣城兼寄沈方艱梅耦長並衍工詩善篆刻季野先生編君

也

淋漓頓挫。借杜陵長句。幻成波磔。兀稟蒼涼盤瘦硬。鬱若烟飄浪舶。嶮削虛無。瑤鑄形狀。萬壑蒼皮坼。李潮吾衍。古惟二子堪匹。歎息世態媿媿。人情澳忍。奇字誰曾識。只有敬亭山色好。鎮日相看亦得。歸臥煙霞。閒逢梅沈。定問余蹤跡。豪情冶興。爲言都不如昔。

又 小盎春蘭盛開與水仙相掩映。瓶梅暗香復爾清冽。雨窗無事婆娑其間。詞以詠之。

蘭滋梅粉。被宵來厭浥。嫣然新沐。曉色幽幽涼逼。硯冷翠遙連苔竹。更喜仙葩。纔離水國。也把幽芬撲。嬌痕媚靨。一時雨後開足。浪說天上瓊花。月中桂子。多少閒榮辱。只有疏枝和野卉。領殼一生閒福。散髮林端。支頤澗側。日取南華錄。素瓷凝雪。小廊又報茶熟。

又 緯雲弟八載京華。昨始旋里。尙憩西村。未遑握手。先寄此詞。用東坡赤壁詞韻。

湖帆浦笛。是吾家遠閣。闌干間物。下嵌老梅鋪鐵蘚。點綴池塘峭壁。八載難歸。百端橫集。往事成鴻雪。長安輦上。知他若箇豪傑。喜汝徑辦歸裝。買揚州小婦。趁春潮發。夜火羌村宵夢穩。笑問燭。因誰滅。我在街南。何時相對。訴盈顛華髮。更闌吟罷。明此意如月。

又 憶半雪懷緯雲南鄉子詞有云燕關三度梅花不共看之句今梅花開候緯雲南返而半雪之墓已宿草矣詞以志痛仍用前韻并示猶子履端

嗟乎余仲歎詩顛酒渴。化爲異物。記把一樽長憶弟。白晝吟聲撼壁。每到梅開。便啼鵲血。紅了千林雪。金臺可怪。是他羈絆英傑。今日菴畫溪橋。天涯人到也。梅花重發。只是題詩人去久。字蹟也應磨滅。故國茱萸。殘年棣萼。恨事多於髮。水明樓上窗楞界上纖月。

又 南耕堂前綠萼梅花下作仍用前韻

空庭何有。笑幽花以外。都無長物。一樹綠毛么鳳挂。零亂明窗粉壁。斜倚闌干。微拋

酒盞笑玩林間雪。春寒猶沍。凍禽驚起。傑傑。可惜花似當年。看花人漸老。悲歌空發。料得前村花更好。和了水雲明滅。欲折繁英。倩他壓帽。絕稱蕭蕭髮。角聲吹落。階前堆滿晴月。

又 春日同緯雲南耕徧歷南嶽諸園林仍用赤壁詞韻

春山勸我。只今朝。須盡此杯中物。莫把閒愁千萬斛。題溼酒家牆壁。石畔泉流。林間風起。颭數枝香雪。一樽酌取。千秋射虎人傑。況值北雁初歸。巖花隨飲興。共參差發。何限向來哀樂事。一笑浮漚生滅。日落帆輕。花欹帽重。暝翠侵毛髮。瀕行戀戀。空山定好明月。

又 玉峯闕若韓盛珍示王成博邱近夫諸子公讌余輩於南芝堂席上同書  
際竹逸緯雲紀事再疊前韻

玉峯高讌。看簪裾滿座。一時人物。況值杯中。山色好。吸取晴崖翠壁。金馬新知。銅龍舊識。只我頭成雪。烏絲題徧。羣公漫許詞傑。坐有舉舉師師。褰簾纔一笑。嬌歌先

發。若使主人知此意。應遣關雎滅。住。固爲佳。居。殊不易。種種余之髮。明朝歸去綠。簾長釣溪月。

又 山亳州至歸德途經木蘭故里有祠在焉感賦

苔垣蘚逕。見靈旗玉貌。娟然幽處。傳是木蘭遺廟在。多少神絃。賽鼓。繡袷蛾眉。紅妝猿臂。颯爽真軒舉。雌雄撲朔。世間何限兒女。今日滿目關山。極天士馬。殺氣連營。苦。安得月明飛錦繖。壓倒蕭娘呂姥。娘子軍容。女郎祠圯。俛仰悲今古。空牆壞壁。畫衣剝落如雨。

又 贈雪笠上人上人係石城僧時寓居睢陽

小長千里。記巖花嶺鳥。六朝僧窟。一自秣陵凋敝後。難穩故山瓶拂。蹙踏天龍。擘彈獅象。人境俱雙奪。衲衣手綻。曾經幾載飛雪。可惜梁孝園荒。侯嬴館廢。往蹟多磨滅。誰耐枯禪耽澹漠。隱隱眉間俠骨。古寺城根。破籬湖面。餓伴殘碑碣。秋行至矣。茅堂相對疏豁。

又 周弇山攜具八關齋同亦人恭士諸君子萬弟快飲風雨颯至炎熇盡解  
詞以紀事

狂飈挾雨恰冰車鐵騎一時碎擊。倒拔南湖高十丈。無數巨魚人立。飽噉哀梨橫驅陣馬。徒倚清涼國。臨風一笑。蠟毛鬚捲如磔。記否烟雨樓頭。舊游星散。多少南和北。二十餘年吾竟老。羸得暮雲堆碧。只有周郎。仍然年少。同作天涯客。無多酌我。爲君起弄長笛。

又 開元寺納涼聽客話闖賊破城舊事

夜涼水寺有白頭閒話。傍蠅牛屋。說起黃巾初入洛。正值中原百六。萬馬俱瘖。孤城欲沒。殺氣騰原陸。鬼謀人社。啾啾市上歌哭。語久嗚咽難勝。向戍樓借取。四條絃續。不見女牆純鐵色。恨血至今猶綠。落日黃河。老鴉白項。啄盡賢豪肉。休論往事。碧天今夜新沐。

又 游京口竹林寺

長江之上。看枝峯蔓壑。盡饒霸氣。獅子寄奴生長處。一片雄山莽水。怪石崩雲。亂岡淋雨。下有鼃鼃睡。層層都挾。飛而食肉之勢。只有鐵甕城南。羣山羸秀。畫出吳天翠。絕似小喬初嫁與。顧曲周郎佳婿。竹院盤陀。松寮峭舊。最愛林皋寺。徘徊難去。夕陽煙磬沈未。

又 毘陵道中有懷四五兩弟卽用四弟感舊原韻

麥仁店後。記斜陽分手。柔腸欲絕。從此南飛餘一雁。肅肅長征不歇。絮盡蘆汀。拍殘楓岸。風景增悲切。昨過江上。赭圻一片成血。今日貫酒蘭陵。銅官列岫。向水窗明滅。惡浪怒濤經過了。纔見故園秋月。短髻聊蕭。左車搖動。狗竇嘲余豁。夜長獨睡。布衾僵臥難熱。

又 秋夜攜姬人稚子借宿椒峯東園追憶與白生讓木叔氏虞掌讀書此閒

已十七年矣。今二子已亡。而余重復經此。不勝今昔之感。詞以愴舊。

枯荷敗柳。恰書郎再過。畫樓全圯。十七年前蕉鹿夢。斜倚風廊重記。白傅高人。竹林



賢阮談笑饒名理。飛觴覓句。琅玕刻盡空翠。今日擊筑筵空。絕纓會散。人去多年矣。我作驢鳴黃葉下。沈痛忽焉盡致。繡褙童烏。雲藍小妾。匿笑屏風地。癡兒駭女。那能了乃公事。

又 顧梁汾雨泊蛟橋填詞見寄得軟繡迷香二語狂喜跳踉失脚墮水書來語我以故不覺捧腹詞以調之亦用朱希真韻

空江采石。記錦袍醉墮。昔年李白。今日蛟橋傳故態。千載重來此客。擬探驪珠。海天此夜。休遣龍綃隔。翻身直下。驚濤跳起成雪。我作持履無方。君休一去。曉夢迷蝴蝶。乾後蓬萊。習井似。可有人間花月。喫翠蒸衫。鬧紅壓帽。狂殺何年歇。玉京桃放。待余折則同折。

又 游楞伽山上方寺是日微雨

石湖一幅似春羅。鋪在楞伽山下。上有叢祠。熒賽火。照徧盤門萬瓦。白馬三郎。青溪小妹。繡幔搖春夜。憑闌遙望。水雲蒼莽。難畫。來往招颭花枝。蘸些微雨。倍覺添妖。

冶。鬢縷柳絲都一樣。總受東風飄灑。亂石陂陀。羣峯峭蒨。滿徑沾蘭麝。半湖純黑。伍胥潮又來也。

又 贈陳嘉玉

萬家水市。被垂楊、映得酒旗都綠。細雨淋漓。春欲暝。愁煞蒲帆六幅。烟裏停橈。花間命屐。小叩幽人屋。素纒凝雪。果然人淡如菊。君自生長錢塘。移家喜看。罨畫紋鋪。穀說在東風。鶯舌裏。聽慣烏絲一曲。詞客生平。男兒意氣。何必曾相熟。掀髯長嘯。爲君盡此醺醪。

又 雨窗懷松之南水

絲絲點點。聽簷前、不住隔紗窗滴。一片濃雲。遮遠岫。那辨銅官離墨。寶鼎香焦。畫廊花瘦。阮又無心摘。茶烟颺起。細煎花乳。翻白。幾日梅子應黃。先將些雨。送箇愁消息。我在家鄉。愁欲死。何況異鄉羈客。窮帽停舟。衲衣持鉢。買酒還無直。知他何處。水邊拖盡吟屐。

又 雪灘釣叟爲松陵顧茂倫賦

翁家何在，在三高祠下。景尤奇絕。一派漁莊連蟹舍。百里水雲明滅。最怕閒鷗。生憎野鴨。占了涼波闊。釣竿斜漾。珊瑚樹上輕拂。昨夜凍合江天。糝綿舞絮。冷把龍宮掣。惱殺渭濱垂白叟。誤了蘋風柳月。菰米家鄉。清虛世界。萬事何須說。夜寒吹火。推篷起掃殘雪。

又 送徐松之還松陵兼訊宏人九臨聞瑋電發諸子松之亦名崧

生平慕蘭。笑人間。竟有兩相如者。解唱春城寒食句。卻是此韓翃也。廿以年前。記曾與汝。爛醉皋橋下。我髯君黑。路旁紅粉輕罵。今日髯已成絲。黔還似昔。重會荆南榭。篋裏雲山詩卷在。只被雨淋風打。擲笛旗亭。聽鐘禪院。總是淒涼話。垂虹橋畔。飄零多少同社。

又 淮陰閣再彭以破環詞索和爲綴此章

淮王城下。有扶疏叢桂。香分蟾窟。攜得團圞天上影。琢就鏡奩中物。立本清高。香闥

對綰紅莖同心結。紫金跳脫。讓他光鑒毫髮。詎料鳳去鸞孤。瓊枝一樹。忽被罡風裂。柳絮簾櫳無限好。堆作安仁鬢雪。畫篋閒搜。宵來失卻。一串玲瓏月。半規破鏡。算仍飛上瑤闕。

又 客有善絲竹者以箋索詞漫爲賦此

旗亭舊事。記曾經。見汝寶釵樓側。瓊樹兩行誰最少。第一屏間白晳。翠滑鸞鞞。紅香桃綬。絕藝千金直。襄王筵上。纏頭衆裏爭擲。今日白髮何哉。青衫司馬。仍會秋娘宅。能得幾迴渾脫舞。清淺蓬萊非昔。紅豆村莊。菊花天氣。淪落無人識。根根邏迤。不堪聽汝重摘。

又 聞雁

金風凜凜。將冷雁。糝下半天煩惱。拚逐征南諸將帥。飛透黃榆白草。萬里邊愁。一行兵氣。辛苦憑誰道。遏雲裂石。數聲橫度林表。我且緩把一樽。水明樓畔。側聽心如擣。響帶秋砧偏覺慘。更犯幾般曲調。南浦烟深。後湖陰重。月挂關門小。不如北去。蘇

卿雪窖將老

又 長安元夕和家山農倡和原韻

尋常隔歲預商量。賞玩來年元夕。燕未銜將泥便軟。糝徧蓮鉤。綦跡滿院燒紅。九衢漾碧。萬斛幽輝溼。東風幾陣。暗吹此事成昔。今夜瀲灩深杯。玲瓏低唱。難把愁兵敵。誤了玉梅花底約。只做鳳城羈客。歸路三千。春宵十五。誰遞他消息。舊家何處。月華人面同白。

又 贈吳門周履坦時以丹青供奉內庭

盤龍後代擅虎頭絕藝。風流淹雅。一旦聲名動人主。不數當年曹霸。架上奇鷹。宮前稚蝶。一一遭烘寫。布衣親見。鳳樓一片鴛瓦。可有褒鄂弓刀。金張袍綬。要上凌烟畫。月給俸錢愁不飽。只夢闔閭城下。滿眼京華錦衣玉貌。總是悠悠者。青燐燈火。飄零共作情話。

又 己未長安中秋時值京都地震是夜微雲掩月

西風帝苑。正停杯、爭盼一輪圓月。坐久涼蟾猶未吐。靄靄暮雲偏結。低鞞冰綃，深藏桂殿，不放姮娥出。也應愁見，有人千里華髮。今夜地軸頻翻，坤輿陡撼，怕被饞蛟掣。那有銀牆和碧井，留待金波堆雪。三市霆轟，九衢電駭，屋瓦昆陽裂。問誰無恙，天邊惟賸瑤闕。

又 送周求卓之任滎陽

滎陽京索。是當年、劉項舊爭雄處。薑紫蝸紅纏碎碣，略辨幾行秦楚。汜水重關，敖倉賸壘，蒼莽空今古。西風夕照，老鴉啼上枯樹。君到試問當初，鄭虔故宅，三絕猶存否。贏得兒童和笑說，文采周郎獨步。故國情親，新涼節物，送爾驅車去。休輕百里，此間鞏雒門戶。

又 送鈕書城之任項城

碧鱸錦稻。記君家、舊傍垂虹亭子。疏影暗香，姜白石，一旦起而爲吏。綬染紅桃，符分銅虎，差足云豪耳。欣然捧檄，當年毛義如是。極望地入銅陽，邑名南頓，樹短纒如

薺去約官僚。閒射獵。應認前朝戰壘。古驛熊啼。荒村虎叫。日落城牆紫。虛聲處。士此言專仗君洗。

又 詠陸雲士萬年冰扇墜

長安六月。玉河橋柳下。涼冰爭賣。銅椀擎來高十丈。只是炎熇難耐。忽見風前。水晶墜。子人意先瀟灑。颼颼滿院似聞何處清籟。傳道太華蓮西。堯年古雪。結此玲瓏塊。磨卻千場閒歲月。冷看人間成敗。桂窟蟾精。松根琥珀。凜冽還堪賽。更誰偷嵌。幾蕩藻荇橫黛。

又 棠村夫子席上詠米家燈

東風作陣。颼晶籠百盞。玲瓏低亞。淺倚紗屏和笑指。此是前朝擘畫。有蝶皆飛。無花不笑。翻覺丹青假。何須周昉。搓酥滴粉。描寫。聞說上國樓臺。東京士女。最重元宵夜。兩載傳柑。渾寂寞。孤負月明鴛瓦。詎意今年。尙書座上。人在春燈下。昇平遺事。廊邊鸚鵡能話。

又 庚申長安閏中秋

姮娥天上，恰晚妝添罷，更臨瑤闕。四十七年纔又見，閏了中秋佳節。中秋自甲戌閏  
後今歲始再閏再瀉金波，重懸晶餅，分外鋪晴雪。廣寒宮殿，依然翠鎖齊掣。可惜  
耿耿孤光，蕭蕭夜景，縱好成虛設。贏得冰輪圓兩度，多照一番華髮。萬里鄉愁，五更  
寒信，幽恨憑誰說。停杯南望，山中叢桂應發。

又 贈程令彰令彰新正五日爲四十初度

東風纔動，正萸開五葉，花飛六出。雪正晴時天倍好，越顯帝城春色。門挂桃符，釵搖  
綵勝，節又鄰人日。風光如此，拚他爛醉須直。愛爾句關蠶叢，詩驚鬼膽，餘子何當  
嚇。四十功名年未晚，且溷朱門杯炙。二陸才華，謂難兄繡章兩程家學，底處無人識。  
街燈漸鬧，爲君拚擋箏笛。

又 題徐晉遺表弟所畫牡丹圖并以誌悼時正是花大放

璧人年少，記臨風側帽，姿尤清絕。曾在沈香亭畔醉，偷譜清平三闋。更取名花，圖成



粉本惹殺狂蜂蝶。盈盈著紙。誤人幾度攀折。今日畫可羞花。花偏入畫。一樣無分別。可惜空山埋玉樹。此恨只和花說。縱有丹青也應塵土。拚了嬌紅色。花前一嘆。胭脂亂撲成雪。

無愁可解

題楨伯詩詞卷尾用黏影詞韻

記少日從君使健筆。如風蛟螭盤攫。更短衣破帽。橫穿欲度絕漠。蹴鞠彈箏豪士約。撫掌轟轟笑樂。似阿黑。一輩人。裂眦奮袖。神色甚惡。詎料淪落關河。將冶習狂名。一朝除卻。笑古今青史。細碎渾如螭脚。讓餘子纍纍若若。只佳句。清抵空山夜泉。剪燈讀。睡難著。

彩雲歸 簸錢

買花歸倚繡簾前。問侍兒。剩否金錢。邀隔垣女伴。消閒晝。還趁取。苔石幽鮮。輕輕簸。青蚨不定。怕撩人鬢蟬。競負閨中劉毅。喝雉喧闐。琅然滾歸牆罅。與柳綿。一樣勻圓。惱他鄰女嬌小。羸處慣倚輕僮。喚重來。頻呼不應。走弄牆畔鞦韆。無聊甚。閒擲五

錄。暗卜歸船。

春夏兩相期 王家營客店排悶

古黃河、嚼吮鞞鞞。千斤葦花颯颯。何事衝炎。愛把軟紅塵踏。舞衫歌扇總生疏。馬客  
餅。倉空拉雜。彈罷哀箏。傾來濁酒自相酬答。何門珠履堪跋。且燕秦齊趙。騎牛荷  
鍤。目笑平生。不慣縱橫。捭闔。悶來車轉腹中輪。狂時劍動親身匣。莫管今宵。茅店荒  
涼。雞聲鳴邑。

又 初夏同友人東郊外訪吳繩圃園居

有羅羅、水烟千頃。夜來初浣籬徑。紫豔紅芳。屋角牆頭相映。草香小巷入都迷。竹暗  
層扉。敲誰應。淺漾風簾。愛他草閣。居然舴艋。幽棲不似塵境。只閒驅菊蠹。小除松  
癭。溼翠難名。到此萬緣真冷。牙籤亂插。道書香板。橋對掩僧廬靚。惆悵曾分半榻鶯  
聲。一杯花影。

遶佛閣 初冬同友人小憩中隱禪院用片玉詞韻

早霞昨斂。行散郭外。盡歷溪館。塘宿蒲短。細沿磬響。來褰戒壇幔。境幽竹滿。閒豎拂子。小叩慧遠。妙譚微婉。更沾茗粥塵巾。忽焉岸。坐久漸忘卻。花影移楞。還幾線。更愛晴階砌成明鏡面。歎急景浮生。虛負漏箭。悶懷誰見。似殘菊無聊。倚簷零亂。再來期。甚時纔展。

又 寒夜登惠山草庵貫華閣

亂峯堆髻。夕景木末。殘雪崖際。一派空翠。瓢堂語悄。山窗落松子。小樓欲墜。斜嵌巖壑。蹲若奇鬼。暝色晴霽。鬢絲禪板。渾忘在塵世。開士暮歸晚。鉢向石橋深澗洗。坐客松寮鐘鳴。黃葉寺。喜今夜關河。一碧千里。感傷身世。看六代青山。月華如水。是千秋。倚闌人淚。

又 由劍池循石磴上至平遠堂側。覓徑復折而下。至小武當。有奇石縱橫。林立。佇眺久之。

嶺欹棧仄。循壁俯瞰。潭子深黑。風起濤湧。此身幾被包山老龍得。古苔繡蝕。騰擲直

上霜磴如拭。高處奇絕。曠望鄧尉支硎翠螺滴。暫息塔鈴側。又蹈虛空臨不測。蘇滑境危盤盤深曷極。見老樹槎牙三兩離立。雨淋風裂。似猱狻鬚髯。作爛銅色。忽頽唐化爲奇石。

又 爲李武曾題長齋繡佛圖小像

冷箋雪研。織膩滑笏。恰稱烘寫。偷翫閒把。有人認是年時瘦司馬。俊游都雅。帽影蘸粉衫縷沾麝。蠻雨啼鷓。略記小驛香醉題帕。舊事一彈指。可惜花開多易謝。此後鬢絲吳霜將暗惹。且料理心情。消向蓮社。茜竿低亞。捧一軸迦文。綃帶輕灑。傍風前。玲斲斜挂。

東風第一枝 詠綠萼梅和呂聖求韻

粉界檀腮。煙籠膩頸。玉奴素質輕約。風前乍坼紅鬚。月下低含綠萼。一枝水上。也不管鶯啼燕掠。最憐他。不甚分明。飛破瀟湘白鶴。隔蟬翼。層層都薄。打稷雪。泠泠又落。有情故亞樓頭。無聊自開屋角。日高慵起。慢搖動。綠紗簾箔。看苔錢。色上花枝。碧

透何郎官閣

又 試燈夕同雲臣京少賦

萬戶燒紅。千門照茜。春燈零亂如許。蓮釵綵燕還搖。蘭街火蛾纔吐。常時此際。只做弄。滿樓絲雨。喜打頭。新歲冰輪。將到十分圓處。影對著、翠窗私語。袖摺著、玉纖暗數。今宵且疊衫痕。後日定飄裙縷。經年盼望。容易近、鳳城三五。囑孟婆、霧鬢風鬟。莫把夜情吹去。是晚大風。

又 丁巳元日大雪是日迎春

雪壓新年風飄殘臘。瓊樓粉落如雨。桃符素鎧離披。神荼瑤簪濟楚。天公好事。總餽徧。山城麪糝。小闌邊。飄瞥紆迴。點綴辛盤椒俎。泥甌透、紅箋致語。寒勒住、鈿車游女。土牛紺輓犁霜。黏雞花冠縈絮。盈街彩仗。畫一片、慵情懶緒。白茫茫、凍合乾坤。不辨春來何處。

又 月杪自吳門歸追和南耕昆陵元夕之作

上水船遲。落燈風快。歸家黯淡如許。打門有客。謹呼衝泥。向人驕語。香詞滿幅。總故苑。狂朋俊侶。說郡城。前夜閒行。多少珠歌翠舞。乍髣髴。花間畫鼓。再想像。梅邊游女。毫端似落星橋。卷中疑。謳金縷。舊時情事。悵光景。拋人何處。但聽他。提起元宵。便有費思量處。

又 詠玉蘭花

細雨搏酥。好風搓粉。枝枝斜壓闌檻。牆邊無限玲瓏。樓頭許多掩冉。瓊姿簷外。總不受。蜂侵蝶犯。自生成。別樣心情。誰耐風光醜豔。隔著水。盈盈飄颻。籠著霧。亭亭雅淡。似憎杏把紅薰。微嫌桃將絳染。空濛皎潔。來相伴。空房小膽。罨玉樓。一片花光。逼得盤龍鏡暗。

又 踏青和蘧庵先生韻

簷溜纔停。街泥乍洗。花梢日影搖午。陌頭霽景增妍。水邊烟光添嫵。茜衫笑檢。憶春在。謝橋深處。正沿堤。叫燕吟鶯。吹滿一天風絮。籬杏糝。如塵鬢。縷溪柳。罨帶烟朱。

戶。畫完江左亭臺。釀成花朝節序。爲歡併日。況漸逼。韶光百五。約鈿車。來日重遊。又聽小樓宵雨。

玉燭新 詠燭

五更寒作陣。正繡幕重重。一枝斜隱。當時曾在。春宵底。照足美人春困。雲沈雨重。謝倦眼。看承逾俊。珊枕畔。翠袖輕遮。怕他隔簾風緊。如今長伴空牀。風也弄孤燈。閃成青暈。蘭心翦瘦。誰聽得。掉卻玉釵聲韻。金荷漸燼。結徧釭花無準。問紅蠟。今夜和愁。燒殘幾寸。

琵琶仙 閩門夜泊用白石詞韻

暝色官橋消盡了。帶雨綠帆千葉。驛口夜火微紅。瑤簫正淒絕。記醉惹銅街喚馬。更閒凭畫樓聽鳩。無數前情。許多往事。檣燕能說。只細數花草吳宮。除夢裏依稀舊時節。欲買韶光暫駐。待來春翠莢。縱尙有。鷗夷一舸。怕難禁。伍潮堆雪。悔殺麝帕鴛衾。那年輕別。

又 泥蓮庵夜宿同子萬弟與寺僧閒話庵外白蓮數畝

倦客心情。況遇著、秋院擣衣時節。惆悵側帽垂鞭。凝情佇寥泚。三間寺、水窗斜閉。一聲磬、林香暗結。且啜茶瓜。休論塵世。此景清絕。詢開士、杖錫何來。奈師亦江東舊。狂客惹起南朝零恨。與疏鐘鳴咽。有多少、西窗閒話。對禪牀、剪燭低說。漸漸風弄蓮衣。滿湖吹雪。

又 題汴京大相國寺寺相傳魏信陵故宅唐尉遲敬德監造

近婦飲醇。悵失路、英雄暮年無忌。轉盼魏寢全荒。朱門換蕭寺。賺人是、宣和舊譜。惹恨有、夢華遺事。傳說東京。當初燈火。遙映南內。休閒話、折戟沈沙。只此地曾經浪淘洗。剩得蠹痕蟲篆。蝕尉遲碑字。正罷酒、憑闌時候。遇西風、落葉盈砌。多少落拓心情。飄零身世。

四代好 泛艇春溪作

碧透雙溪尾。蒲桃浪、慣被暖風吹碎。琉璃正滑。簾紋小展。一川空翠。春衣篷艫慢倚。



十載事。從頭都記。算飄零、曾渡汶水。漳水沁水。泚水。汶水長繞孤城。漳水又抱銅臺廢址。可憐沁水。還灌太原殘壘。三關怒濤夜起。過泚水。重嗟餘耳。總不如、春水江南。柔藍千里。

雙頭蓮 留別集生

孺子長貧。記少日江東。隨余游射。重來客舍。但細數此地。舊游都謝。總被捲地西風。把燭花吹熄。成獨夜。只有君家。榻懸爲余仍下。憶昨食酒而悲。學王郎斫地。倚風悲咤。歌場舞榭。祇添了一夕。雨窗閒話。多少剩水殘山。付丹青曹霸。笑客至。泥拔金釵。妝臺輕罵。

又 夏日過叔岱水墅鋪同諸子觀荷用放翁詞韻

老樹空村。借風幔斜張。儘堪栖寄。飲如渴驥。碧筒勸領略。野香荷氣。詎料蒼莽中原。有黏天雲水。依稀似。葦脆鱸肥。風光故園還記。攜手散步林塘。羨無愁鷗鳥。向菱蘆睡。江南游子。誰憐我水上。倚闌心事。擬倩繫日長繩。奈斜陽貪逝。風颭處。十萬紅

衣乍眠旋起。

龍山會 暮秋蘧庵先生自吳中歸詞以訊之

颯沓梧宮葉。舞徧西風。又送人歸也。稻梁吳地儉。天外雁、揀盡寒汀空下。誰識故將軍。只亭尉、偏工醉罵。王和霸。銅仙月中。如鉛淚瀉。剡曲興盡王猷。嬾心情、最聊蕭難畫。買煙航、雨艇歸計穩。入手碧鱸紅鮓。我倚塾巾樓。見君蒲帆恰卸。隔水榭。一尺釣絲堪對把。

五福降中天 甲寅元旦

五更爆竹千門響。轟醒陽烏春睡。早湧彤輪。競開朱戶。恰對南山晴翠。桃符荔粉。喜街影、暄妍簾痕韶麗。多少輕煙嫩靄。做就好天氣。磨徹菱花雙蒂。繡匳爭早貼。宜春字。畫粉旛兒。銀泥勝子。笑上人頭髻。年光已在。牆外花鬢。橋邊蘭蕊。拜罷勝常。臉潮紅似醉。

又 丙辰元旦和蘧庵先生韻

翻何青帝姍姍也。將近江南。幾驛。婪尾深杯。換頭小令。冶習那能銷得。任他仙釋。算  
換了年光。也應沾臆。慵倚闌干。側帽。不忍弄煙色。差喜漸無人識。楞嚴纔註罷。門  
庭寂。三徑苔鋪。一籬梅綻。相與從無疏密。鶴窺草閣。雀啄柴門。宜春休帖。愛煞溪痕。  
斜橋成小立。

又 穀日和蘧庵先生仍用元旦韻

春田躑躅開將徧。紅透水橋煙驛。隔歲辛盤。昨宵金勝。又聽青鳩得得。沍寒都釋。正  
牆幄花冠。隴翻嬌臆。且把農經一卷。映午餘晴色。春意窗楞先識。雨工行雨罷。茅  
簷寂。茜人梅園。翠歸蘭圃。裙幄料應鋪密。歡生祈穀。兆叶占年。比閩安帖。閒看蜻蜓。  
釣竿絲上立。

燕歸慢 虎邱遇劉元玉因憶東皋舊事賦感

前事濛濛。對天邊。皓魄。場上晴空。僧窗秋夜話。霜磴故人逢。蘇臺原是綺羅叢。被牧  
笛吹來。幾陣風。揚州舊花月。也應與此間同。歌館閉。舞衣散。玲瓏老野孤窮。歲月

已非光景在。算常到夢魂中。蓮塘墜粉泣香紅。總綴就閒愁點客篷。杳靄棹歌響。又何處、度疏鐘。

又 松陵道上追感計甫草趙山子兩孝廉用湘瑟詞韻

醉欲騎篷。憶當年吾汝。意氣凌虹。交情千里外。心事一杯中。情人幕上雨濛濛。又水調吹波。夜起風。吳江落楓葉。只餘我、舊鵝籠。洛水戲山陽。笛淮陰釣。未央鐘。徐劉應阮俱凋謝。算此恨古今同。倦游蹤跡類臨邛。且度曲、吹簫倚小紅。來朝過鴛脰。好撥棹、破晴空。

夜合花 爲丁子硯催妝

人柳腰眠。聖檀額注。犢車催下屏風。勝常道罷。腮邊春暈微紅。呼燕燕。喚蟲蟲。桂堂西。小著輕容。問伊姓氏。父名鄭季。母號樊通。鶯聲夜半玲瓏。多少帳前細咳爾汝。歡儂今宵夜冷。勸郎文籍休攻。蘭缸細。鴨爐濃。卸花簪。早傍薰籠。羨他大婦。偏憐敬禮。代掩珠櫳。

又 廿二夜原白堂中觀劇卽事劇演精忠

青漆門邊碧油坊底。一庭霜月初濃。鄰家夜賽春燈社火攢空。傲越覲舞巴童。颯靈旗不滿微風。正無聊賴聽歌簾罅。衝酒闌東。神絃一曲纔終。更有梨園雜爨。院本絲桐。岳家遺恨夜堂一片刀弓。悲曼衍。嘯魚龍。惹當場。淚灑鵲紅。須行樂耳。何知底事。且釀金鍾。

慶春澤 春陰

已近花朝未過春社。小樓盡日沈吟。暝色連朝。江南倦客難禁。門前綠水昏如夢。粉雲遮。失卻遙岑。謝橋邊凍了梅魂。結了春陰。年時恰是鶯花候。正黃歸柳靨。紅入桃心。舞扇歌衫。參差十里園林。東風吹得韶光換。詎料人真箇如今。問何時。日上花梢。細啣鳴禽。

換巢鸞鳳 詠燭

暝色初臨。正金荷灼灼。鳳脰沈沈。燒殘終有淚。翦斷豈無心。饒脂注得十分深。光翻

金粟影動瓊林。春繁上看帶笑，花開似錦。瘦沈躊躇甚。曾記華堂半滅情難禁。金鑰傳時。玉堂薺處。對對紅酥翠沁。蓮燈緩導上元遊。蘭膏濃挽平康飲。如今絳蠟。照人長是孤寢。

又 春感

月暖絲柔。正花枝罨靄。鳥語鉤輶。斜橋雲似粉。合澗水如油。臨風卻憶少年游。閒蹤跡徧。旗亭酒樓。如今也只淺淡眉痕相鬪。知否。人感舊。滿砌蘼蕪。糝綠窗清晝。記得年時。暗曾經處。深巷紅欄弱柳。飄盡楊花雨。徧肥。摘來梅子春先瘦。悵風光更消人。幾徧回首。

又 雨中憶蔭綠軒前梅花正開詞以代訊

倦理紅綃。有如塵似夢。萬斛閒愁。濛濛沾繡幌。浼浼漲銅溝。帽簷小側撚花枝。倩鶯語替。簷前雨鳩。春山影恰幾日。都如中酒。低首東風後。記得君家。一樹徧嬌秀。每趁年光。慣將香雪。亂惹倚樓人手。開處斜憐綠波明。折來雅稱瓊肌瘦。雨窗問訊。只

今曾否依舊。

高陽臺 題余氏女子繡高唐神女圖爲阮亭賦

巫峽妖姬。章臺才子。賦成合斷人腸。繡閣停針。含情想像高唐。渚宮舊跡今何在。不分明。水殿雲房。禪蟬鬢。憶著行雲。恰費商量。蘅皋暮雨淒涼。只楚天一碧。與夢俱長。霧縠霓旌。幾時重得侍君王。小睡紅絨思好事。卻剪刀。聲出迴廊。更添些。紅杜青蘋。做出瀟湘。

又 繡佛

揚盡翎毛。刺完花卉。生憎滿幘春愁。一事縈懷。纔忘又到心頭。濟尼索繡鬢陀像。猛思量。此諾須酬。研繚綾。香要先熏。樣要親鉤。配勻五色長生縷。記鴛摩夙業。迦葉前游。繆線飛針。盈盈分外纖柔。狂夫悄問儂何願。暈春酥。忍笑凝眸。且添他。旛蓋飄颺。水月空幽。

壽樓春 爲白琅季節母吳孺人賦

蔻綃衣霓裳。配羿妃清冷。嬃女蒼涼。夜夜長歌寡鵠。短歌愁凰。摧短鬢。爲秋霜。染啼  
痕。眠芋幽篁。歎海碧天青。蟾孤兔老。六十載共姜。築柘館。連芸窗。更授經帳底。畫  
荻簾旁。機聲中。攙洛誦。書聲琳琅。翦玉樹。成佳郎。羨季心。詞壇擅場。俠哉女公孫。萱  
花柏舟千古香。

又 春日追昔游

尋春來劉郎。惹一生惆悵。千種思量。尙記風前秀鬢。月中凝妝。斑竹店。梅根坊。颺水  
花。晴絲悠颺。恰宛宛調鸚。盈盈喚馬。手語粉巾香。斜日下。東方狂。將十年前事。吹  
入微茫。贏得簌簌昔昔。琵琶根根。花壓帽。啼露裳。怕重逢。年時韶光。又酒旆斜挑。誰  
家小門青粉牆。

木蘭花慢 歌筵感舊

誰家搖步障。明月夜。賞花天。正壁帶紅稠。簾衣綠縐。夾路釵鈿。從前也曾聽處。漸如  
塵。似夢記難全。遮莫延秋門裏。不然道政坊邊。銅仙有淚瀉如鉛。攬鏡惱華顛。詎



飄零江海重歸故國。再上珠筵。龜年莫停歌拍。怕舉頭、皓魄不長圓。正月新蒲細柳。滿場橫竹么絃。

又 壽虞山張以韜四十應王石谷之請

虞山山拂水。風倒捲。吼簾泉。想紅豆村莊。絳雲樓閣。翰墨流傳。風流後來誰繼。有天都、逋客漢張騫。水檻斜欹。北晴軒。正面湖前。王維今日畫中禪。說爾最豪賢。羨坊號光。和里名通。德臺曰超。然行年。只今四十。已手摩。銅狄歎桑田。俠骨毬場酒舍。閒身茶竈漁船。

又 壽吳母黃夫人五十夫人余友園次賢配

紅雲飛一朵。鸞鶴下。叩真妃。是江夏無雙。吳公第一。兩好門楣。相逢瑤臺擘脯。說蓬萊、清淺事依稀。興慶池頭命婦。鹿門山下賢妻。恰依然。椎髻牛衣。四十九年非。趁茗。霄霜紅。洞庭水碧。茶庵漁扉。回頭莫論舊事。記滿湖、燈火醉翁歸。坐上麻姑天姥。膝前謝淪王微。

又 汴梁城內有李師師巷經過感賦

是東京舊蹟。愁漠漠。雨絲絲。悵趙宋繁華。樊樓語笑。總被風吹。淒其剩勾欄在。照綠窗。曾挂月如規。今日頽垣廢井。當年舞榭歌基。師師雪貌玉爲肌。玩月賞花時。惹君王夜幸。香橙暗擘。膩筍潛攜。誰知小屏風後。有周郎低唱斷腸詞。一代春嬌寂寞。半城夜火參差。

又 夜坐偶感

正三更打徧。小簾外。雪花飛。有魏博監奴。天雄內宅。袴褶黃皮。傲傲曠錢會食。燕兩行。紅燭霧成圍。銀甲崩騰碎摘。玉船狼籍爭揮。依稀。啁嘶更喧。詬諍旋潮談。笑賀公吳語。參軍蠻語。相視然疑。吳姬吟鶯叫燕。記綠窗細欵。抵游絲。惆悵新眠難穩。淒涼舊夢都非。

又 過故友周文夏園亭

東風昏似夢。又吹我。此間行。算有限歡娛。無多光景也。費經營。當初笑呼猿鶴。待功

成綠野始尋盟。空卻池塘睡鴨。留些欄檻穿鶯。盈盈殘月不勝情。依舊下簾旌。歎堤楊尙短。林花未滿。舞館先傾。清明滿園蝴蝶。只和烟帶雨。舞迴汀黃雪。廊邊舊事。水明樓畔。前生。

又 新霽過蝶庵訪雲臣不遇詞以柬之

杏花村賣酒。風弄處。一旗偏。且側帽微吟。閒攜步履。來趁斜川。風前暗添語笑。儘閒坊。小曲總暄妍。擬作鶴窺籬外。暫勾蝶出花間。闌干柳絮滾香綿。吹向繡簾邊。奈綠窗倚徧。鱸薰閨若茗椀。依然吟鞭。知他甚處。料狂僧小史與流連。鬥葉定迷深巷。衝歌准上游船。

又 戊午中秋同既庭賦昨歲中秋與既庭同在玉峯三友園

舉觴浮皓魄。何故向客中圓。只斫月吳剛。登樓王粲。一樣難眠。長安金波萬頃。儘六宮。三市浸其間。天上桂輪晶餅。人間玉臂雲鬟。年前曾在馬鞍山。半醉恰憑欄。對丹崖翠瀑。狂歌曼嘯。漏盡纔還。誰憐萍蹤無定。又天街攜手共君看。今夜鳳城雙闕。

素娥分外嬋娟。

翠樓吟 席上贈伎時伎三日後卽落樂籍

銀甲捭箏珠條絡鼓。清歌屈柘如縷。人到離筵裏。儘眉黛、愁將碧聚。縱橫玉筍似綠柳。縈烟紅蘭著露。歛雁柱。一場春夢沒些情緒。他日縱過侯門。只光延坊畔。櫻桃一樹。奈銅輿催上。更糝遍、一街絲雨。橫波重注。看斜側帽簷銷魂無語。紅蠟底。新官舊主一般胡覷。

又 惠山雲起樓作

萬斛空青。一天冷翠。和晴飛上簾押。老松三百本。山雨響、偏張鱗甲。崖傾峯沓。有客註茶經。僧編梵夾。泉鳴邑。恰逢深澗。樵吟相答。晚值蟾影初昇。似姮娥妝鏡。夜深離匣。碧雲千萬頃。被一點、玉纖偷搯。月明三匝。謝鶴許攜瓢。猿呼荷鍤。爲盟歆他年。傍此竹弓射鴨。

又 三月十五日虎邱卽景

桃花水絳。卵色天青。早烟著人如醉。風光日夜換。換不了。吳宮羅綺。千年霸氣。只鶯  
囀山房。鴉啼水寺。當年事。斷崖老樹。依稀能記。冶麗。簇隊成團。有釵蟲落磴。裙梅  
飄砌。劍池苔蘚黑。越顯得。明妝絕世。佛前私誓。怕亂水東流。夕陽西逝。憑闌望。五湖  
晴爽。碧空無際。

又 小院

小院蟲蟲。斜橋燕燕。悵悵觸起閒事。當初妝閣影。亂織在。濛濛秋水。餅金曾費。只趁  
月藏鉤。隔花傳謎。依稀記。遞香窗眼。浸嬌杯底。顛顛。此日重來。剩榆莢漫天。苔錢  
鋪地。心情何處寫。擬寫上。繚綾帕子。研來鬆膩。怕未便。緘愁。還難盛淚。斜行字。沈吟  
劃滿。竹肌空翠。

曲游春 花朝

穠春無限好。正雲翦春羅。水鋪明鏡。滿目紅芳。記淡烟斜日。江南時景。紅板橋西路。  
有萬縷。綠楊拖徑。更憐次第風光。巧鬥吳娘花勝。回首天桃露井。憶檀板銀罌。那

時儂並。人在花朝。有嬋娟姿格。玲瓏情性。自後堂分袂。長則是。如醒似病。可惜憔悴。蘭成。淒涼家令。

又 上已修承招同諸子修禊

昨夜風吹雨。恰晴光早繡。正好修禊。弄碧垂楊。倚斜橋招手。邀人水戲。洛浦風光麗。況滿座。安期千里。一樽故國心情。三月麗人天氣。小苑露桃開未。正紅萼猶含。枝上輕綴。幾度花前。趁閒身正健。祇須沈醉。莫管金鞭墜。酩酊也。斜陽歸騎。尙遇無數。羅裙。盈盈挑薺。

映山紅慢 竹菇用湘瑟詞詠石榴韻

三月廚娘。乍榨就。桃花茜醋。恰園後籬邊。幾叢新長。胭脂三五。湘娥竹下啼猩雨。灑鵝痕。映空山暮。算風味。世上。侯鯖禁樹。應妬。山館下。極望嫣然。早已向。幽窗催句。正此際。太常齋日。小摘珊瑚一樹。浣餘還怕。芳香損。倩筠籃把紅鮮護。傍闌干。住。誤飛下。銜花燕羽。

看花迴 南嶽寺大悲閣上看玉蘭花用清真詞韻

春山淡冶如笑。風光鮮潔。梵閣斜盤碧磴。恰千點瓊葩。瓏瓏纔結。花明玉淨。小門山窗鶯語滑。憐少室、珠樹輕分。天花無著。姿清絕。想只有、山間白月。還記省、鬘陀根節。誰伴深林清苦。只幽澗、蘭心亂崖石髮。孤情絕照。古寺誰曾經浪折。半簷花、千嶂瀑。看煞難分別。

月當廳 虎邱中秋柬蘧庵先生用梅溪詞韻 先生時寓皋橋

碧海此夜冰輪滿。龍堂老鐵。吹裂波心。斜倚廣寒一望。兔窟清深。照徹吳王宮殿。徧臨街、簾子漾綃金。更多少、伎船燈火。水寺謳吟。茶鑪正穩。皋橋畔。好風光、摘船試約閒尋。月底半塘譁笑。百沸潮音。檀板競從石場鬥。桂花都上帽簷簪。如覓我、聽歌處。在斟酌橋陰。

桂枝香 甲寅中秋

霜簷如洗。有碧落冰輪。今夜飛墜。月海霓裳。殘拍淒涼猶記。素娥休向吳宮照。有多

年、雕闌錦砌。金波萬頃。細看來是倚欄人淚。算世上、雲鬢玉臂。和老去英雄一般憔悴。落葉啼螿。只是夜長難睡。銀壺擬泝孤光倒。奈沈沈、悶懷先醉。水明樓畔。西風江上。有賓鴻唳。

又 石亭探桂和竹逸韻

晴秋滴黛。肯閉置車中。學婦人態。南郭先生。約我畫溪擊汰。石亭老桂槎桲甚。續前游。何妨今再。霜篷汎酒。僧廬鬥茗。談禪說怪。時有談鬼伯娶婦事。漸石壁、斜翻暮靄。照亂榭叢篁。薜痕纏蝥。忽放狂顛。老子生平無賴。西風斂卻英雄手。只頻年、持螯擘蟹。城陰歸晚。繽紛金粟。帽簷齊戴。

又 蟹

萋蒿淺渚。有郭索爬沙。攪亂村杵。溪斷霜紅。織滿夕陽鴉渡。漁人拂曉提筐喚。小門邊、陡驚羈旅。羹材誰算子魚通印。河鮪雪乳。記昨歲、秋窗鳴雨。見小插黃花。濕蟬拖處。笑說螯肥。雙陸桂堂曾賭。玉纖簾底。須親擘。況西風、釀寒如許。沈吟此事。何時



還又暗聽街鼓。

玲瓏四犯 月下聞笛

三五良宵。看雲月澄鮮。幽輝盈抱。羈旅無眠。愁思幾番縈繞。滿園春水空濛。映翠竹、  
枝枝斜裊。恰嘹唳、誰家入破。遙想小樓空悄。因思天寶梨園隊。有金雁、鈿蟬絕妙。  
更偷把寧王玉笛。吹徹誰知道。一自華清人散。繚垣外、閒花野草。歎此牛頭白。天涯  
再聽伊涼別調。

又 人日前一日雪中用梅溪詞韻

勝裏春人。和天上瓊葩。今夜雙翦。糝粉飄綿。舞困乍颺仍撻。低處纔滿銀塘。旋又上、  
鳳樓堆徧。問曉來、還積多少。定沒小窗雙扇。柳花尙早。梨花未。訝濛濛、恁時相見。  
拚將冷淡疏狂性。行盡天涯遠。祇怕火樹漸紅。燈市上、翠愁珠怨。料六花情重。留些  
元夜。印弓痕淺。

又 苦雨同雲臣用梅溪詞韻

屈注銀潢。問天畔、河流還剩多少。風雨爭馳。鐵騎金戈齊到。只有幾疊屏風。上畫著、吳天晴曉。歎年光、銷沈何處。都付汀煙水草。今年紈扇淒涼甚。未西風、早辭懷抱。簷端漫訝紅輪吐。卻是榴花照。無數詞客城南。久冷落、酒壚歡笑。怪天公也學銅仙流淚。向宮門道。

霓裳中序第一 詠水仙花次尹梅津詠茉莉韻

珠櫳寒粉靨。假罷銀篝紅獸熱。恰值青霜騷屑。有一種瑤芳。白花翠葉。海天皓月。羨玉娥、生長綃闕。斜春渚、竟川含綠。一笑嫣然絕。妙絕。頓成離別。長則伴、兒家妝篋。有時墜落簾莢。看盡人間、多少蜂蝶。五銖寒到骨。悵千里、洞庭飛雪。傷情也、舊家何處。悄對素梅說。

憶舊游 寄嘉禾俞右吉朱子葆子蓉

松陵東去路。記水程烟驛幾多般。鴛鴦湖裏泊。重城燈火。一派潺湲。船樓玉人行酒。碧浪瀉紅顏。更羣麗丹鱗。綿濛黛甲。上下哀湍。十年成間別。想怪侶狂朋。一樣啼

斑。縱玉清歸去。怕滿天風露。猶憶人間。只是南湖柳色。憔悴不堪攀。長望語兒亭。故人爲我且加餐。

水龍吟 江行望秣陵作

輕舟夜翦秋江。西風鱗甲生江面。瓦官閣下。方山亭外。驚濤雪片。一帶蔣州。千尋鐵鎖。等閒燒斷。只波間皓月。流光欲下。舊曾照金陵縣。何處迴颿。搥鼓更玉笛。數聲哀怨。回思舊事。永嘉南渡。流人何限。如此江山。幾人憐惜。斜陽斷岸。正江南烟水。濛濛飛盡。楚天新雁。

又 己酉元夕洛陽署寓對雪

一番宛雒元宵。紅燈閃得人心碎。孤身一箇。悶懷萬種。故鄉千里。舊恨淒然。春陰攙亂。漫天攪地。想當初此夜。風前酒後。有多少。輕狂意。記起閒遊舊事。小門邊。那家殊麗。星橋將斂。香車乍碾。相逢橋背。近日飄零。半生流落。料伊知未。伴銅駝。撲著街頭殘雪。冷清清睡。

又 春夜聽鄰閨擊鼓

玉羅窗亞紅牆。飄來腰鼓黃昏鬧。騰騰統統。慢如琢玉。驟如懸瀑。紅漆槌兒。銀塗架子。簾東斜靠。落燈風幾陣。催人揜袂。琅然響。斂應掉。漸覺點聲稀處。小樓前、雨聲隨到。擊損蠶皮。敲鬆犀釘。將愁都攪。滿耳箏琶。花奴何在。記他天寶。倩鄰娃暫歇。摻搥待我。作漁陽操

又 詠杜鵑花

小樓日日輕陰。花枝映得紗窗曙。恰推窗看。玉欄干外。紅香無數。櫻筍時光。鞦韆院落。襯他嬌嬈。只一枝怯雨。泫然卻想故鄉也。知何處。自別西川萬里。擬消受、江南歌舞。詎料年年。每當開日。便成春暮。甚日重逢。錦城絲管。華陽士女。待化爲蜀魄。枝頭喚道。不如歸去。

又 詠繡毬花

洞天雲海沈沈。瓊扉小闌銀毬墜。亂拋下界。細黏枝上。輕颺斜綴。刀剪無聲。裁縫滅

跡粉搓雪膩。笑牆頭柳絮成團。打塊學嬌樣。終難似。誰把一規圓月。破工夫。玲瓏割碎。玉欄干外。映來一色。亭亭常在。絕代瓊姿。明妝自好。胭脂都退。被佳人折下。紅尖戲蹴。向鞦韆背。

又 城上看桃花

花光撲上春城。瞳矐直把人衣染。家家百舌。年年三月。桃花滿店。誰釀梨雲。更攙柳浪。倍添伊豔。算那家映水開偏好。胭脂一院門長掩。城下綠蕪如毯。不禁風。酒旗輕颭。也應明日。再來尋處。落紅萬點。囑付花鈴。忍令一片。頓隨春減。恰牆頭幾朵。含情送客。暗頰嬌臉。

又 送春和雲臣韻

春光不像曾來。如何又說春將去。一尊別酒。兩行情淚。淒然無語。恰似明妃。紅顏遠嫁。玉關難駐。歎今年烽火。連天戰鼓。都攔截。春歸路。偏是魂銷此際。怕天涯。少人憐處。臨歧低囑。縱然去也。休忘尺素。忍見愁紅。將飛更怯。乍颺旋住。想溪橋來夜。飄

零有恨。與何人訴。

又 巷口見磨鏡者

琅然者是何聲。因風飄入深閨底。蝶蜂引處。賣花聲亂。倍添嬌脆。驀地誰家。獸環小響。輕搖梔子。見一雙小玉。盤龍暗捧。和羞映中門裏。出匣一輪新水。要秋宵涼蟾鬥美。紅綿揩罷。撲將紫粉。洗他空翠。此際菱花。宛如月樣。佳人心喜。只晚妝攏鬢。無端忽憶。嫁時情事。

又 秋日過飲蝶庵紀坐上人語

萬家砧杵秋城。重來何處尋門巷。三年一別。孤身作客。蠻江烟浪。綠幘榕城。金尊荔浦。慣陪牙將。自連天烽火。舞衫換了。亟爲買歸吳榜。屈指當年儔侶。舊梨園。蜂惆蝶悵。或伴侯王。或成駟僮。或淪廝養。縱剩柔條。也應不似灞橋模樣。趁啼鳥乍歇。霜天漸曉。撥箏琶唱。

又 秋城看西溪戰艦水閣

豁然老眼新晴。戍樓下俯秋江遠。嚴關金鼓。西風彩幟。盈川鵝鸕。狎水黃頭。凌風畫鷁。銀濤怒捲。笑喧闐錯認。龍舟蓮舸。惹士女傾城看。瀟碧微涵鏡面。有周侯廟臨溪岸。亂離重遇。英雄何在。登城長歎。昔日波平。今朝浪駭。魚龍蒸變。漸日斜人靜。盈盈蘋蓼。弄陂塘晚。

又 秋感

夜來幾陣西風。匆匆偷換人間世。淒涼不爲秦宮漢殿。被伊吹碎。祇恨人生。些些往事。也成流水。想桃花露井。桐英永巷。青驄馬曾經繫。光景如新苑記。記相逢。瑤臺殊麗。微烟淡月。回廊複館。許多情事。今日重游野。花亂蝶迷濛而已。願天公還我。那年一帶。玉樓銀砌。

又 送梁溪明府吳伯成先生新任閩中廉使

無諸城已銷烽。鷓鴣雙引熊幡舞。蛟宮浪偃。鯉湖波靜。歡騰榕浦。荔子搖丹。石華漲綠。海雲佳處。仗九龍仙令。二泉茂宰。洗兵馬。爲霖雨。只我離情萬縷。逐盈城。攀轅

士女摩空瘦鵲倚牆病驥飄零誰訴。落落禰衡。茫茫劉表。此身無主。送千秋鮑叔。紅旗掣電向閩天去。

又 壽尤悔庵六十用辛稼軒壽韓南澗原韻

曾經天語憐才。如今老卻凌雲手。開元鶴髮。茂陵鉛淚。海天非舊。長樂笙簫。連昌花竹。可堪回首。算軟裘快馬。呼鷹緹犬。當時事。還能否。摘盡瑤臺星斗。水哉軒。夜明如畫。離騷一曲。清平三調。小盤珠走。漢殿唐宮。能消幾度。花陰杯酒。鬧箏琵琶腰鼓。紅櫻紫筍。上先生壽。

又 壽朱致一五十再用前韻

花前日飲亡何。何須暫住捱箏手。蓮凋華頂。桑栽蓬島。月明如舊。歷歷神州。茫茫知己。幾場搔首。問王家阿黑。桓家靈寶。今尙有其人否。金印由他如斗。且逍遙。藥欄紅晝。莫愁螻伏。只須龍臥。任呼牛走。撥觸雄心。半牀冷劍。千杯熱酒。喚堯年老鶴。秦時毛女。捧卮來壽。



又 壽黃珍百七十仍用前韻

楚天解組歸來。顛狂肯放杯辭手。黃雞一曲。千場保社。百年親舊。起舞婆娑。好風吹帽。野花簪首。試酒酣重問。渚宮烟景。仍髣髴。從前否。君說崖欹峽斗。亂猿啼。絕無昏晝。岳陽樓閣。洞庭波浪。銀飛雪走。一笑浮生。杜陵花鳥。信陵醇酒。向彭錢驕語。爾曹還總讓才人壽。

又 上觀察金長真先生

當時懸瓠城頭。經過已切登龍願。一星忽到。三吳重地。藉公司憲。建業旌幢。廣陵笳鼓。歡聲騰徧。更庾樓鄭驛。錦袍銀燭。高會盡東南彥。伏謁敢辭疏賤。況盈盈鄂君舟。便時同健庵學士。渡江亂帆吼雨。西風跋浪。珠飛雪濺。聞說平山。歐陽舊蹟。畫堂重建。願從公之後。闌干醉拍。眺秋江遠。

又 乙卯暮春雲臣齋頭看牡丹

一年一度花前。舊年笑語鶯猶記。今年倍好。纔開使遇。養花天氣。料理銀罍。排當檀

板綠窗如水。喚游絲舞絮。遮圍繡幕。休輕放。閒愁至。多少倚闌心事。悵神州斜陽戰壘。沈香亭畔。慈恩寺後。靡蕪滿地。只有江南一枝如故。紅酥粉膩。任英雄老了。花還賺我。只逢花醉。

又 送蔣慎齋副視學江右

一川紅藕花開。樓船西上潯陽去。江涵翠榜。風吹絳帳。玲瓏無暑。鹿洞儒生。江州僚佐。歡迎溢浦。料匡廬九疊。凝妝染黛。向鷓首競縈舞。漫說關山金鼓。奏茄簫中流容與。滕王閣在。琵琶亭好。緬焉懷古。亂日才多。兵間士賤。青衫失路。仗先生獨掛一輪冰鏡。作斯文主。

又 安慶龍二爲舍人光能知夙生事自言蓋凌波池中老龍也魂夢往來時常髣髴又言生平每當淒風碎雨則奮躍欲狂一遇晴霽則吻燥神枯怏怏不樂睦州方進士某爲作傳傳最詳凌波池在西京終南山下

三生石上精靈依稀認得重來路。終南山下凌波池畔。紅泉綠樹水國前緣。綃宮閒

話冷風酸雨。記耕煙跋浪。揚鬢濺沫。夜碧落。朝懸圃。一自甘泉獻賦。謫紅塵。此閒殊誤。鐵笛滄洲。驪珠樓館。幾回驚寤。太液鯨紅。玉河蜃黑。舊游何處。正霜天萬斛。西風隱隱。有銀濤怒。

又 白蓮

水明樓下相看。涼荷一色。瓏鬆地。赤欄低壓。綠裳輕蘸。月明千里。小苑梨花。重門柳絮。算來相似。傍前汀。白鷺幾番飛下。尋不見。迷花底。無數弄珠人。戲小酥娘。水天閒倚。明妝束素。非關只愛。把穠華洗。爲怕秋來。滿湖紅粉。惹人憔悴。拚年年玉貌。江潭夜悄。凝如鉛淚。

又 春游卽目賦得侍兒堪感路旁人

花間一輛雕輪。繡幃裊盡。東風細。龍旛壓角。翠釵鬪葉。流蘇百琲。暗想其中。宮黃蕃錦。不過端麗。縱玉環豐豔。金堂嬌貴。瑤池侶。休凝睇。忽見花枝。徒倚。是誰家。穿簾燕子。忍當春冷。拋他慢後。坐他車尾。彩筆飄蓬。青衣淪賤。古來如此。料歸時。淺導銀

燈轉那箇屏風底。

慶春宮 秋曉

杳杳秋紅濛濛夜碧。戍樓乍歇疏更。宿鳥啁啾，遠雞咿喔，野烟繚繞初生。水明燭暗，聽天外南來雁聲。夢迴酒醒，人倚高樓，月在前楹。初暘澄澹堪驚。纔漾庭柯，旋映簾旌。楓栢山林，蓴鱸水郭，家家軒檻新晴。五湖堪長，總莫管、天涯戰爭。數村橫笛，一片西風，十載浮名。

氏州第一 秋日懷東臬諸子用周美成韻

千片菱荷零亂。簾捲西風，人倚樓小。橫竹泠泠，峭風歷歷，一碧遠天縹緲。非淡非濃，颭水國、村村斜照。中酒心情，欲寒天氣，暗催人老。三十六鱗江上少。奈無限、舊愁繚繞。沙鳥將雛，江鳧傍母，秋水柴門抱。正搓橙時候也。題糕近、龍山歡笑。寫盡吳箋，盼晴空、翠屏都曉。

又 詰鼠戲同雲臣作

秋夜燈青。窶率作響。先生拔劍而怒。鼠輩來前。復何敢爾。爾罪誠難悉數。蛇虺猶堪耐。不耐汝曹僂僂。每到更深。觸翻杯瀝。動搖屏柱。書籍縱橫。遭點污。擲擄到。五車六庫。穴內乘車。蜜中漬矢。變幻難憑據。飲河歸。休浪喜。高堂下。獄詞先具。速付歐刀。便幽風也。思熏汝。

又 鼠對

帶月啼梁。乘夜發屋。戴頭人立而語。顧謂主人。憎予太甚。芥蒂寧因細故。婁藪無長物。幸託坳堂沮洳。昔在倉中。李斯丞相。記曾相慕。今日深文何太苦。笑作事。乃公殊誤。俠不屠龍。仙難控鶴。僅磔張湯鼠。安能久居鬱鬱。化青蝠。凌空飛去。古洞長松。有甍颯。是吾伴侶。

拜星月慢 余不到玉峯三十餘年矣。乙卯清明與植齋竹逸重游。是間賦詞

感舊

花朵擎來。柳絲飄到。一陣卓金車子。百五韶光。襯賣餚天氣。半山上。多少蒼松翠櫬。

掩映舞裙歌袂。紺岫頽崖。有從風羅綺。捫頽巒、劃損苔成字。忽暗省、三十年前事。幾徧側帽思量。記不全頭尾。怪天桃、仍舊紅如此。劉郎鬢、不禁星星矣。問今夜、細雨棠梨、肯替人愁未。

花犯 又一體

詠鄴陵蠟梅花并寄梁曰緝侍御

一枝枝、未曾經謝。黃時早如子。霜簾捲處。較金縷衣痕、多些香味。面面聖檀風外綴。萼蹙微籠紫。似昨夜、侯門燭滅、銅盤堆蠟淚。傳聞鄴陵戰場多。問花何偏傍、荒城廢壘。拈花嗅。形容遍、幾番不似。多分安陵年少客。半醉後、金丸拋葉裏。想天上、故人鄉夢、惺惺長記此。

又 詠竹逸宅內薔薇

弄晴天紅。薔薇十丈。盈盈媚初夏。鬧花小架。恰倒影迴塘。綠水如畫。柔條亂舞銀牆罅。胭脂千斛瀉。籠繡榻、低枝近手。偏將鴛袂惹。老松擎雲吼濤聲。繁英爭蔓引、松身都化。似天半、作勢處。燭龍將下。看灼灼、猩肌萬點。照十二、樓前渾不夜。還則慮、晚來

風雨紅顏偏早嫁。

又 同雲臣暨南水上人過竹逸齋看芍藥

看君家。崢泓蕭瑟。門庭寂如水。雜花鋪綴。任紫豔紅英。圍繞籬次。年年步履隨蜂至。許多花下事。算只有、風前鈴索。知人吟賞意。今年東吳到詩僧。相逢何況又、落花天氣。禪板靜。相將鬪賦。才清綺。誰知道。百花謝後。還領略、粉香新月底。凝望久、爲伊凭暖。闌干紅梵字。

又 西山晴雪

徧嶽崑。玲瓏晃耀。瑤簪插千點。六花飄颻。照綺旭溫磨。光彩逾瀲。遙憐獨騎迷山店。禪扉又早掩。再好問、何村賒酒。吟情遮莫減。誰工畫圖論人間。除非倩妙手、迂倪寬范。潭柘寺。雀兒寺。粉裝銀蘸。羣峯只、東偏消早。依舊吐、一枝青齒蒼。憑欄望、吾狂甚矣。笛聲吹阿濫。

齊天樂 暮春風雨

小樓昨夜東風到。吹落滿園空翠。時有茶烟。絕無人影。好箇他鄉天氣。淒涼欲死。見燕翦平蕪。柳拖春水。暗省從前。如塵似夢。最難記。當年曲院寒食。餉香花更暖。許多情事。金斗猶溫。玉釵還響。已送愁人到此。也思寬慰。奈把酒聽歌。幾番不是。暮雨瀟瀟。記吳娘曲子。

又 驥沙旅店紀夢

坐來冷店思量遍。昨夢太無頭緒。燈影青熒。被痕紅皺。說也惹人悽楚。迴腸千縷。總些箇情懷。舊時言語。枕畔匆匆。三更人到消魂處。那人還未憔悴。松兒猶合數。怕兒親與。燕子悵悵。柳花拍拍。多分池臺易主。黯然無語。憶鏡裏朱顏。簾前白紵。一片空江。響數聲疏雨。

又 重游水繪園有感

園丁不認曾游客。嗔人繞廊尋覓。紅板橋傾。綠楊樓閉。譜出荒寒一段。看棋柯爛。算往事星星。酒旗歌館。深悔重來。不來也省鬢毛換。風前又成浩歎。說此間蘿屋。有



人羈絆恨極賣珠。緣慳搗藥。贏得啼鶻頻喚。扁舟故國。只浩月魂歸。清江目斷。今古劫灰。付日斜人散。吳門吳藹仙曾客此園歸死梁溪故後殿及之

又 端午陰雨和雲臣用片玉詞韻

紅榴淚點蘇蘇雨。正因此時重五。怨結湘纍。悲纏騷客。天也爲人酸楚。孤城蝦虎。吾邑名蝦虎。城颺幾陣茶烟。一絲鬢縷。觸緒沈吟。蒲樽懶賞小墀午。江南江北行徧。每逢看競渡。傷今弔古。俛仰隨人。飄蓬返里。蠹盡彩箋新句。流年空度。記麝粉釵符。舊關心處。鎮日空濛。戍樓將動鼓。

又 梅廬花下送潘原白之薊門友人之彭城

笛聲樓上飄來細。又了一年梅事。有客花前。作裝縛袴。遙羨五陵佳氣。昭王養士。築百尺金臺。憑空飛起。今日遊燕。問誰買駿有如此。彭城有人並舸。歎蕭條徐沛。沙淘浪洗。長短亭邊。淺深杯送。一樣故人千里。清明上巳。算總是來朝。住爲佳耳。欲浣離愁。倩半江春水。

又 早春壽魏塘柯素培先生

東風一夜漫天綠。搓勻柳湖烟水。幾樹橫斜。萬株香雪。絕稱小樓人倚。梅花天氣。正院貼宜春。釵搖燕子。纔過新年。六街已鬧夜蛾未。一輪卿月將滿。戟門羣獻壽。絲竹清脆。綠蟻難乾。碧桃旋放。此曲飛瓊能記。萱闈日麗。況膝下綵毫。承恩天際。簫鼓聲中。泥金齊送喜。

又 立春日東高謾園時謾園新納姬

御溝流水依然凍。東風已窺窗眼。韭摘新烟。餅堆弱絮。縱有咬春誰薦。沈思故苑。正萬點橫斜。半篙清淺。玉臂今宵。料他雙勝也慵翦。長安多少羈客。除非高渤海。此恨差免。喚馬簾間。鬧蛾橋上。夜景有人拘管。俊游灞滻。趁微雪金門。早鶯珠館。待去朝天。翠衾新贖嬾。

又 蟬

高柯一碧無情極。誰遞晚來秋信。雁塞琵琶。鳳城砧杵。髣髴一般音韻。悠揚不盡。待

隔水聽來。數聲偏俊。譜入哀絲。螳螂捕處倍淒緊。玉盤金掌雖好。餐霞還吸露。此事難準。帽插豐貂。機鳴素縠。幾度愁他相溷。悄然低問。可仍記當初。衛娘低髻。仙蛻寧遙。料丹霄有分。

又 題松萱圖爲姜西溟母夫人壽

憑誰細研吳綾滑。貞松皴來蒼窅。鬣可擎雲。濤偏沸雨。只伴疏梅衣縞。霜零雪嫺。兒著得書成。龍鱗暗老。十載飄蓬。枝頭飛去翠禽小。鄉關悄然回首。小橋新月下。茅屋偏好。肱被輕分。江魚遠致。長祝歲寒相保。清愁未了。再添筆紅萱。欄邊斜裊。擬答春暉。此心慚寸草。

又 遼后妝樓

洗妝樓下傷情路。西風又吹人到。一縷山鬟。半梳苔髮。想像新興鬧掃。塔鈴聲悄。說不盡當年。花明月曉。人在天邊。軸簾遙閃茜釵小。如今頓成往事。回心深院裏。也長秋草。上苑雲房。官家水殿。慣是蕭娘易老。紅顏懊惱。與建業蕭家。一般殘照。惹甚

閒愁。且歸斟翠醪。

又 綠水亭觀荷。同對巖蓀。友竹坵舟。次西溟飲容若處作。

分明一幅江南景。恰是鳳城深處。野翠羅羅。嫩晴歷歷。撲到空香萬縷。早村人語。是柳下溝塍。籬邊兒女。稻葉菱絲。隔紗長作打窗雨。蓮房箭鞞簇簇。西洲都蓋滿。睡鴨新乳。碧甃迴廊。黃泥小竈。幾斛冷泉親煮。倚闌凝佇。記罨畫東頭。舊尋詩路。招箇烟橋。飄濃溪畔去。

又 楓橋夜泊用湘瑟詞楓溪原韻

楓橋漁火星星處。鐘聲客航仍度。微昏簾幕。乍暝帆檣。夾岸多於津樹。船娘吳語。爲蘸水拖烟。脆來如許。不管人愁。棹歌杳靄掠波去。如眉月稜半吐。想當年曾鬪。館娃嬌嫵。夜市聽鶯。春衣撲蝶。夢到將圓頻誤。鳴珂舊路。問冶葉倡條。可能如故。撩亂心情。化茶烟一縷。

畫錦堂 述懷和蘧庵先生韻

我所思兮。旁無人者。長嘯離墨之陽。時復讀書萬卷。縱博千場。悲來直攜橫槊舞。興來還取素琴張。誰相識。只有當年。郭翁伯。邳君章。石梁瀑布下。神仙窟。中饒雁鰲餘糧。我願結廬註易。梯几焚香。身騎白鶴朝蓬苑。手斟丹液煉飛光。沈吟久。此意茫然未遂。斜日徒黃。

又 清明後一日同緯雲重上玉峯積陰乍霽春女甚盛詞以紀游

昨日濃陰。今朝新霽。戲鼓歌扇相宜。一路花搖綺憶。草暗金羈。空園鞦韆猶未拆。小樓香粉已全施。春山畔。遶澗縈巖。頓添無數斂筭。離離。城上寺。牆外店。和烟著水參差。翻借通明簾子。映出纖肌。堤邊絲柳飄成夢。橋頭新月鑒於眉。無情緒。獨對裙邊蝴蝶。細語移時。

石州慢 憶舊用高季迪韻

醉拍雕闌。思憶從前。淚珠頻灑。東陽倦沈。多愁多病。瘦軀堪把。水市津樓。奈他繡被濃香。舊時閒事。偏縈惹。顛倒覓烏絲。檢霜毫細寫。妖冶。此夜蟲蟲。曾囑監奴。葳蕤

慢下。且趁湘簾銀燈。邀人白打。摘盡銅籤。小婢故惱人行。任他嘶斷門前馬。懊惱後堂前。又年光換也。

又 夏閨

竹院臨池。蕉軒翳日。蕭然烟幌。送春留病。賒秋做惱。懶梳蟬樣。慳慳永晝。誰令幽夢驚迴。偏嫌多事茶爐響。侍女秉齊紈。隔紗幮低蕩。來往一湖水氣。滿院蘭風。撲歸裙上。悄覺涼釵委枕。簾紋鋪浪。起來慵繡。將泉戲瀉。團荷憐他葉嫩。纔如掌。珠滑不成圓。卻添人閒想。

又 題家別駕亦人孝感册并感舊游次蘧庵先生韻

昨客睢陽。古寺開元。水木妍雅。我方避暑。兄過挈榼。一樽同把。詎知別後。使君風木銜悽。書來雙袖鮫珠惹。擬補白華詩。倩廣徵烘寫。難畫。纏綿至性。恨抵啼猿。感深封鮮。太息鯉湖雁杳。遼城鶴化。飯僧香積。啁啾百鳥悲鳴。靈旗愴怳。爲馬。盛事徧流傳。得之余季也。于萬四弟自宋來宣述之甚詳

又 冬日舟過毫村舊居有感

黃葉村中綠水灣。頭帆影零亂。小橋夾浦。依稀認有。舊時庭院。小樓還在。記得人在樓中。而今凝望如天遠。烟裏歇吳舫。似迷巢林燕。淒戀閒敲畫榜。遙指紅牆。百端思徧。可惜滿園榭葉。半河菱蔓。負暄鄰叟。兩兩私語。茅簷料他也爲王孫歎。搖櫓過前汀。驚水禽飛散。

南浦 泊舟江口

吳橋晚眺。看隔江、螺髻碧離離。龍虎銷沈無據。往事不勝悲。憶昔曹公飲馬。對江流、橫槩賦新詩。羨三吳人物。伯符公瑾。年少更雄姿。今古茫茫天塹。捲神鴉、日暮舞空祠。多少南朝事業。斷岸蟲殘碑。月白估船銅斗。唱西風、雲水正瀾瀾。歎多愁洗馬。銷魂偏在渡江時。

又 秋景

戍樓孤眺。莽秋雲、一片畫難成。烟驛蕭蕭易響。錯認是風聲。卻被沈寥商氣。刮一天、

疏葉舞空城。歎釣臺水榭，千年剩址。菱蔓繞湖生。極望溪山明瑟。向楓汀、茶峴眼偏明。聞道樓船下瀨，十萬水犀橫。寄語魚龍休夜嘯。海門月上，定潮平。對碧梧紅蓼，暮烟殘照，不勝情。

宴清都

詠楊妃山茶花 在古香庵樓下

幾朵僧房吐。東風裏、胭脂淺淡偷注。空王齋院。豔陽天氣。紅香盈樹。鄰娃漫鬪輕盈。儘玉茗、明妝綺素。總輸伊、睡足春酥。臉潮分外嬌嫵。憑闌小字輕呼。花如解恨，暗垂紅筍。依稀記得。寧王玉笛花奴羯鼓。古佛堂西弄影。悵舊日、花容何處。又夜來、細雨霖鈴。黯然無語。

又 曝日

雪後同雲盡。遙村外、早霞一縷紅暈。柴扉纔啓。晨曦初赫。凍消霜畛。結茆恰傍陽坡。喜黃土、泥牆簇緊。有三兩、溪友山翁。窄籬矮屋鄰近。閒邀趁燠迎暄。藜羹芋糝。濁酒新醞。沙融澗暖。情親話軟。無愁無悶。路旁多少行客。笑馬首、冰花膠鬢。總不如、負



旭南榮風光較穩。

倒犯 秋日雲臣齋頭同大士展故友蔣瞻武遺墨感賦

觸眼見官奴數行。韭花遺蹟。零紈碎墨。秋光映碧天如拭。爐熏茗椀。幽卉疏花。晴窗側。盥手驗裝潢。梯几看波磔。惋斯人頓成昔。深悔舊時賞慣。鵝羣何曾知護惜。記半醉寫徧舞鬟帕。江樓壁。渴驥勢掀騰極。幾何時。鄰家吹夜笛。總香粉猶存。不受蝸涎蝕。應遭蛛網織。

莊椿歲 賀新城王太翁七十 阮亭先生尊人

王喬家世神仙。華顏那藉丹砂駐。飄然鶴髮。翛然鳩杖。臨風揮塵。恰值新晴。算來秋到十分濃處。看歷城雲物。惜湖烟水。偏瀟灑。真容與。況有僧彌法護。映庭階。琪花珠樹。七葉貂蟬。一門鸞鳳。兩行鷓鴣。最感深知。綵絲欲繡。黃金堪鑄。羨爐香親染。紫泥遙捧。作斑斕舞。

又 壽高陽李相國

千年仙李蟠根。一枝種在沙堤右。金波穆穆。卿雲縵縵。小春時候。綠鬢調羹。黑頭補袞。人間台斗。正宮門絡繹。駝封赭帕。頻飛送神仙耐。更值梅前菊後。喜堯天。風光鋪繡。君臣一德。夔龍共事。太平今又。銅柱烟消。玉關雪霽。河山明秀。願萬年歷上。一年一度。介先生壽。

瑞鶴仙 上元和康伯可韻

昔遊思後苑。記天上月圓。人間月半。六街笑聲滿。看火蛾金繭。春城飛遍。琳宮瓊觀。隨處掛。鼇山燈爛。最銷魂。深巷殘更。小顛門邊雙釧。休羨。無多勝景。有限芳辰。不堪追玩。紅篝熏暖。和衣臥。誰低喚。怪流光一去。鈿車羅帕。吹煞東風不轉。只玉梅。梢上冰輪。依然相見。

又 鄒程邨母夫人壽

千金今夜直。羨阿母白髮。珠袍一色。稱觴蓬閨側。有南路豪家。東朝貴客。華驕列戟。向尊前。筮篋醉擘。倩何人笑問君家。家本難忘易識。猶憶。曾陪董相。聞過鄒陽。讀

書騎射。賢哉湛母。截髭親爲置食。看懷清臺畔。夫人城上。無論功名赫奕。只膝前。有子談天生兒亦得。

又 詠百舌鳥同雲臣賦

綠楊庭院悄。正交網篩春。綺窗弄曉。紅蕤枕斜抱。蔦枝頭睨睨。信風吹到。如簧慢奏。遞耳畔。那人知道。把舊愁。向五更頭。說箇綿蠻不了。裊裊。咽時逾響。溜處偏圓。百般輕巧。詎知衰鬢。貪散誕。學莊老。入春來。猛被花枝招恨。又被禽聲喚惱。待來朝。索性連他。和花都拗。

又 慈仁寺松

爾頭童齒豁。又短如翁伯。小踰臧紇。年高尙存活。換一番兵馬。一番宮闕。雷轟電掣。早煨就。秦銅漢鐵。任噎歐。萬怪挪揄。閃爍百靈恫喝。奇崛。種於奚代。長自何朝。忘他始末。空餘獵碣。略記汝生年月。只新來廟市。喧豕蹙踏。闌入市場豪獵。趁天風。鱗鬣狂拏。舞場回鶻。

瑤花 秋雨新晴登遠閣眺望

青山如黛。綠水如羅。映真珠簾罅。金閨瑟瑟。正青砧、隔院擣衣纔罷。登樓遠望。見一帶、碧雲輕瀉。更蕭關、征雁濛濛。愁煞江南此夜。幾回搔首沈吟。歎今日深秋。前朝初夏。流光遞換。問何處、更覓鈿車羅帕。傷心故苑。依然似、天涯客舍。對秋風強舉金尊。又是夕陽西下。

又 竹逸邀同雲臣賞欄前粉芍藥用炊聞詞韻

無瑕鏡國。有恨明妃。一朵千金價。盈盈笑靨。倩廚中、櫻筍娛他新夏。牡丹剛謝了。檀板銀罍纔暇。又階前婢學夫人。一樣嬌姿瑩夜。芍藥爲牡丹婢。參差粉面齊呈。愛雪鞦韆欹。幽輝凝射。露華微綴。垂縞袂。淺向玉欄低亞。折來謔贈。覺洧水、風光堪借。記芳名似喚將離。斗頓沈吟花下。芍藥一名將離。

又 閩蘭

關心往事。纈眼閒窗。臥浪紋湘簟。幾番親記。有幽花、開足露條烟臉。紫莖頰甲。宜相

傍疏簾低檻。愛風情帶篠斜欹。花乳和茶細點。一朝箇嶠烽馳。任荔浦雲橫。鯉湖月慘。誰憐翠袖。空谷裏。也作炎荒竄貶。而今夏也。長想像。幽姿冷豔。思陰陰鼓入冰絃。指下餘香猶泛。

春從天上來 壬子元夕

梁宋飄零。臥鄼邑殘橋。下縣荒亭。聞道今夜海碧天青。人世幾度曾經。想半生蹤跡。歡娛短。愁緒星星。攪離腸。更翻階急雨。只是淋鈴。回思春橋夜市。對盞盞星毬。扇扇銀屏。喚馬前情。窺簾舊事。此際有影無形。算除非夢裏重相見。巫女湘靈。夢還醒。五更作響。半榻燈熒。

又 錢塘徐野君王丹麓來游陽羨余以浪跡梁溪闕焉未晤詞以寫懷

烟月杭州。記徐卓當年。詩酒風流。水市露井。桂槳蓮舟。老鐵吹裂龍湫。奈十年一夢。斷橋上。落葉颼颼。恨年來。只無情皓月。猶挂湖頭。王郎清歌絕妙。邀白髮詞人。同下長洲。瑟瑟丹楓。濛濛白雁。秣陵總不宜秋。歎龍峯歸後。人去遠。烟纜難留。漫登樓。

數枝殘菊。還替人愁。

又 壽玉峯徐太母同青際賦

林澗透迤。正翠陌纔晴。綠水微波。昨夜月裏。羣玉山頭。無數鳳舞鸞歌。恰霓裳入破。天風緊。音節柔和。簇華筵。更禽囀迦陵。花雨鬢陀。階前宮袍作隊。都不是尋常。獸錦龍梭。百歲紅萱。三枝瓊樹。天邊樂事誰過。向蓬萊西笑。碧海事。別後如何。問姮娥。蟠桃開處。依舊紅麼。

金盞子 詠燈

一盞紅缸豔玉膏。鴛綃皺處偏凝。春夜照梳頭。蓮籌杳。淒清牙蒜犀釘。便教煎盡銀荷。奈芳心耿耿。敲翠竹。悄喚綠翹簷前。蘭燈將暝。喚遍無人應。且獨自。纖手靠妝臺。挑鳳脰。宛轉處。重思省。當時風細人靜。曾偎壁帶流蘇。剔銀缸潛等。紅綈冷。空對並蒂燈花。怎生相稱。

安平樂慢 晴郊紀勝

春水如油。吳船似屋。較他亭館還多。燕翻油幕。鳥啄銀鈴。分棚占斷晴坡。花面梅妝。看帽縈竹粉。袂掠蘭莎。蜂蝶媚春羅。成團打塊婆娑。正春壓歌場。花擡酒價。半天戲鼓。嗟峨。曼衍魚龍徧。念奴悄試一聲歌。急拍將闌。豔旣畔。暝翠微波。春游晚。半城夜火。盈盈細馬雙馱。

雨淋鈴

秋過城南蔣氏園亭追憶瞻武并悼吳傅星又鄴許墳友諸子

斜陽城闕。晚秋行散。偶爾游歇。故人曾有池館。風簾零亂。鏡湖超越。花朵柳絲如畫。映秋水林樾。更三五知己流連。河沒參橫浩歌發。笛聲隱隱霜空闊。廿年餘往事。星明滅。如今園裏只有荒井畔。螻蛄悲咽。滿目山陽。催得盈顛種種華髮。最惱是綠水橋邊。尙挂當初月。

還京樂 送叙彝上人北游

綠楊外。瓢笠蕭蕭。喚渡春江尾。想此情猶戀。齋廚櫻筍。山園桃李。向津樓斜倚。隔花鞭影回頭指。隱隱見四百八十南朝烟寺。問師何意。將三春錦片年光。擲與江東。

野外沙際。況逢連歲關河滿。斜陽荒亭衰壘。怕他年、又紅鯉無書。金鴻少使。欲倩神僧咒。爲君禁住流水。

又 萬紅友養疴僧舍。暇日戲取南北曲牌名爲香奩詩三十首用填此闕寄

跋卷尾

碧苔紙。更用成都粉水桃浪研。鬪松綾織膩。韭花字格。閒吟閒寫。恰翠承朱亞。澄心紙鎮銅臺瓦。孝穆管爭願化作。珊瑚爲架。想僧廬暇。竹籬邊。行散閒招。仁甫酸齋。白仁甫貫酸齋。金元院本中高手也。水際月下。共取趁拍牌名。與三唐較量聲價。似續紛。簇蕃錦成紈。候鯖製鮓。歷亂紅么點。江村蠻豆盈把。紅友自署卍豆村山人。

春雲怨 泛舟過顯德寺逢友人同坐僧寮茶話

春山六幅。和山前春水。朝來齊綠。指點前村古寺。隔水經幡烟際。盡買蜻蜓。斜穿略約。搖皺溪梢一痕玉。隱隱鐘聲。迢迢僧語。風亞半牆竹。遙青媚。寺添幽獨。意中人恰到。吟情倍足。小院松濤。又將熟。笑向空王。十載塵襟。一時盡沐。斜日歸莊。落紅



成陣。依舊閒愁萬斛。

喜遷鶯 詠滇茶

胭脂繡纈。正千里江南。曉鶯時節。絳質酣春。紅香寵午。惟許茜裙親折。小印枕痕零亂。淺暈酒潮明滅。春園裏。較琪花玉茗。嬌姿更別。情切。想故國萬里日南。渺渺音塵絕。灰冷昆明。塵生洱海。此恨擬和誰說。空對異鄉烟景。驀記舊家根節。春去也。想蠻花。玃鳥。淚都成血。

又 雪後立春用梅溪詞體

絮飄綿糅。正六花罷舞。晴光初繡。凍解蛾融。雨收鴛潤。暖被笑聲烘就。儘紅情綠意。倩釵上。綵幡輕逗。春信淺。似纔青燕尾。欲黃鶯脰。俛首。空感舊暗省年時。有箇人。清秀。帕裏柑兒。衫籠松子。淺立黏雞屏後。別來情事改。懨懨也。渾如鑿酒。剩倦影。與野塘山寺。早梅爭瘦。

又 清明前一日陪史耳翁飲雪持齋頭

晴簾乍浣。被燕蹴紅英。遞香窗眼。漸漸溪橋。迢迢楊柳。一半黃輕綠淺。風弄鞦韆不定。日暖藤蕪何限。春醪熟。囑東陽愁緒。暫時分遣。早晚南陌上。繡幃雕輪。依約何時斷。千載魚燈。五侯蠟燭。贏得三春夢短。從古禁烟時候。祇博烏啼花怨。無聊賴。把粉箋細寫。傍人休管。

又 排悶和雲臣韻

憑高指顧。歎野水增波。故陵無樹。萬壘金笳。千尋鐵鎖。依舊大江東去。休管周郎安在。便覓桓溫何處。長嘯罷。怕永嘉草草。不成南渡。遲暮。縱有日採藥蓬萊。恐被神仙誤。姚女難歸。羿妻不返。歲歲亂紅迷路。悶把唾壺輕擊。愁對寶刀低訴。空城下。聽寒潮徹夜。魚龍聲怒。

又 華漢章招飲聽蘇崑生度曲

風簾霜院。有一派晴秋。暗縈窗練。酒辣侵唇。菊香撲鼻。黃雀紫螯初薦。正值客心悽處。那禁夜烏啼斷。絳蠟底。恰白頭賀老。江潭重見。離怨言不盡。水市燈昏。試取檀

槽按宛雒家鄉。武昌樓櫓。往事暮雲分散。蘇中州人又常客左。寧南暮愁似長空颺。絮淚比真珠脫線。君休唱。惹青衫溼了。再無人管。

又 石濂和尚自粵東來梁園爲余畫小像作天女散花圖詞以謝之

月明珠館。有帝釋鬢陀。身雲散滿。蛟國旌幢。鬣帆笳吹。萬疊雪傾銀濺。裝罷紅棉粵嶠。看足蒼楓梁苑。饒能事。儘微皴澹抹。黃深絳淺。篋衍有一卷。細膩凝脂三尺松陵絹。少不如人。師須爲我。畫出鬢絲禪板。旁侍湘娥窈窕。下立天魔塞產。人間苦悵。碧桃花謝。洞天歸晚。

又 立冬

西風忒峭。把似錦濃秋。霎時都掃。林影添黃。潭痕減翠。易損他鄉懷抱。甕頭索郎未熟。盆口獵徒還少。燕市畔。漸消寒九九。排當畫稿。那曉。人世事。月令歲華。慣是田家好。摘菜淹菘。燃糠煨芋。夜火村村打稻。惆悵年來殘夜。催著朝衫偏早。憑誰說。向茅簷曝背。溪南詩老。

探春慢 連朝大雪計桐初尙未達東阿也詞以憶之索京少戢山和

四野瓏鬆。一城飄警。滕六作黃塵舞。低閣憑闌。遙天策騎。人在最微茫處。曾對君家說。且看了、春燈方法。那知一夜離情。六花頓釀如許。雪沒中原無路。料尙隔東阿。幾程烟樹。冷驛搖鞭。亂山卸馱。酒向何村貰取。逼暝投山店。衾似鐵。一燈無語。夢入江南。小庭梅萼初乳。

又 新正四日東華門道上同徐電發並轡作

冰泮金塘。雪消碧瓦。已將春霽閒作畫。鼓敲時。繡旗颺處。輦道晴絲嬌惰。遼后妝樓在。記樓上、朝天梳裹。如今白玉欄杆。無數燕泥輕墮。詞客吟情無那。怕路近天家。鞭影微躡。一抹斜陽。幾朝禁苑。牆下臺臨閒臥。縱到花開日。問會否、連昌上鎖。多少新愁。恰被宮鶯啼破。

綺羅香 清明感舊

綠水樓臺。青春院落。又是韶華百五。餽粥榆錢。過了匆匆時序。怕今年、玉剪來時。是

去年鈿車停處最難憑。輕暖輕寒。天涯羈客甚情緒。少年此日嬉游。有窺簾綺態。常壇俊侶。一自飄流。冷落天桃門戶。西樓外。幾陣鶯花。北邙上一堆羊虎。向斜陽。斷碣殘碑。多少橫官路。

又 初夏連夜於許茹庸仲修席上看諸郎演牡丹亭有作

許椽多情清和佳節。連夕嬌歌妙舞。料得眉峯碧。到愁時都聚。記昨宵。銀瑟初停。又此夜。紅牙再補。看一羣燈下諸郎。依稀盡解此情苦。獨有江東詞客。爲家山路。遠倍增淒楚。回首朱門略。記蟲娘庭戶。好院本。全部笙簫。沒心情。半生羈旅。比年時。攜手聽歌。多了黃昏雨。

又 詠海棠

褪盡梅妝。飄殘杏靨。春事今年恁快。滿樹紅綃。已把小樓遮礙。三分醉。午酒嬌痕。一味懶。晝眠慵態。記箇儂。萬里家鄉。西川遠隔蠻江外。惜花燒盡銀燭。花亦相看熟。慼慼長在。著水啼烟。鎮向餘寒忍耐。纔深巷。帶雨斜開。又前街。提籠爭賣。惹人是。幾

陣春愁。撚一枝誰戴。

又 詠落梅

滿院濛濛。半園寂寂。萬隊銀鸞齊跨。壓帽籠鞭。無數檻邊廊下。驚夜靜、粉淚難乾。趁陰重、冰魂易化。更憐伊、漱雨梳風。樓東頽玉妝初卸。有人翦燭偷照。腸斷紅香侶。憶他嬌嬾。拾取盈盈和麝題封綃帕。記當日、冷淡交情。付他年、水天閒話。空遺下、瘦幹斜枝。向橫窗暗寫。

又 詠櫻桃

小摘勻圓。低擎嬌俊。萬顆輕紅同瀉。綠葉陰濃。正值江東初夏。茜裙溼、裏處如無。珀盤滑、盛時欲化。正小樓、樊素偷含。丹脣比似誰真假。熟時江岸野館。曾壓他低帽。籠他細馬。此際重拈。試與端詳嬌嬾。休還問、紫禁金盤。最難忘、紅窗綃帕。入手更和淚相看。鎮胭脂盈把。

又 春日詠蘭

離墨山前善權洞口。一逕紅蘭堪藉。露眼如啼。掩冉溪莊水榭。趁雨摘螺黛青分帶。烟采蝶裙碧化。妬歸樵、滿擔清芬。日斜纖手剛盈把。紫莖暗數漫翦。還取春泥壘。粉紅牆罅。午困妝餘。慣是向人沾惹。被玉軫、彈上銀蟬。向犀奩、和些冰麝。待閒裏、焙入龍團。小窗供夜話。

又 詠薔薇

樓外金墉。巷頭銀井。隱約非花非霧。一片胭脂。祇許鶯梭穿度。怯攀折、綠刺潛防。竊窈、紅情暗與。隔綃窗、背著鞦韆。朦朧最是竊香路。小拈螺子鈿盒。將露華傅體。殢他鴛侶。一架薔薇。重取殘春填補。看裊裊、風裏腰肢。是盈盈、夜來情緒。誰悄把、繡譜親描。惹牆花漫妬。

又 龔節孫錄余所選今詞賦此奉柬

浪打新亭。霜飛故國。誰許詞場稱霸。紅豆金荃。漫向夜深膽寫。半閒鈔、酒館銀牆。半偷傳、妝樓羅帕。到如今、粗比牛腰。叢殘卷軸蝸涎挂。太息韋莊牛嶠。問如何偏遇。

極天兵馬。珍重君家。重覓蠻箋細研。看殘秋、滿篋香詞。是老夫、半生愁話。囑宵闌、好護烏絲。莫使缸花燧。

又 題宋既庭小照 圖作長松竟幅

昔夢都非。舊游頻換。秋夜一燈吾汝。彩筆憑陵。壓盡曹滕。薌莒。曾見說、猿臂難封。又聞道、蛾眉工妬。任紛紛、項領兒郎。薰香刺面。畫衣袴。誰將東絹一匹。斲銅身鐵鬢。翠交蒼互。子落濤鳴。下有幽人箕踞。看幾簇、露葉烟條。經幾場、落花飄絮。鎮朝昏、吟雨啼風。慣爲渾脫舞。

眉嫵 壬子除夕

又殘更冉冉往事星星。短髻被霜染。夢入屏山路。黃昏近。金荷一盞慵點。濃陰微糝。任小樓、和雨輕掩。算今夜、笑語香街沸。有春勝雙颺。思念愁多類鬢。記簾窺秀黛。柱映嬌臉。詎意分飛後。相思苦。淚滴桃笙紅淡。長江天塹。況萬重、敗驛荒店。料此際有人。只爲我翠蛾斂。



花心動。二月八日微晴。同雲臣過北郭外訪寒松上人。不遇紀事。

薄靄新暘。翠禽啼。綃窗乍催人醒。弄袖風微。印屐泥乾。村館酒旗低映。相攜緩步迴塘上。尋春寺。聊添吟興。畫溪尾。葡萄初漲。遙川綠竟。叩罷禪扉誰應。剩花底經幡。烟中齋磬。竹院因循。水郭遲回。忍負雨餘妍景。春衫且把橋欄倚。閒數徧。碧紗官艇。前溪裏。一行社歸人影。

瀟湘逢故人慢 題余氏女子繡柳毅傳書圖爲阮亭賦

龍綃一幄。有靈芸針線。刺鳳描鸞。秋水漾波瀾。正洞庭歸客。憔悴思還。牧羊龍女。恰相逢。雨鬢風鬢。看多少。沙明水碧。一天愁緒漫漫。卻又早。來橘浦。見兒家。綃宮璇闕生寒。貴主下雲端。更箱開青玉。珀映紅盤。海天良夜。論恩情。可似人間。繡到此。料應長歎。眉峯斜蹙。湘山。

又 送王亦世歸漢陽兼寄懷人

西風湘楚。正湘竹如啼。湘禽如舞。湘岸飛湘雨。更淥水微波。青山可數。幾幅烟帆。採

不盡、白蘋紅杜。想此際、仙令歸艫。一派江山今古。女娥祠、巴子國、看歷歷、晴川萋萋芳樹。風外催津鼓。恰人在、洞庭秋盈橘浦。官舫瑤琴。總彈破、沙清月苦。倩楚塞、白雁同歸。并寄阿戎此語。

又 夏夜對月用王和甫韻同蘧庵先生賦

冰輪將滿。看光生兔白。冷透龍窩。水烟漾春羅。看今夜都浸。一片金波。流螢的的。趁月明、低坐庭柯。倚江閣、一聲橫笛。扁舟驚醒漁叢。閒回首、追往事、歎年華、盡從離亂經過。短鬢漫婆娑。怕明日秋池。又颭枯荷。江南風景。休孤負、且放狂歌。還尋取、東京故老。晚涼閒話宣和。

又 九日前一日竹逸約同雲臣雪持諸子石亭探桂

今秋吟艇。隨沙鷗浦鴨。仍泊前灣。桂香漱潺湲。訪樵徑乘醉。小叩禪關。藥欄菌閣。好排當、竹翠苔斑。喜今日、山靈貺我。秋晴竟不曾慳。晚妝好、銅峯髻、且迴舟、停橈細認烟鬢。沂落葉哀湍。喜碧鱸薦俎。紫蟹堆盤。狂歌脫帽。憑舷叫、奇絕溪山。殘年約、撈

蝦蟆豕終須置我其間

二郎神 春寒感懷

餽飮天氣。況是天涯羈旅。悵悵類、浮萍飄泊久。傷情處、黯然無語。且檢紅綿燈下看。瞥見了、深閨針縷。想當日、執手叮嚀。預料春寒如許。凝佇。沈吟欲著。幾番推去。任春衣、紅藤箱底閣。甘領受、疏風嬾雨。擬向春江傳此意。奈江上、雙魚無據。恨點點楊花。疊疊青山。遮人歸路。

又 玉蘭花餅

東風寂靜。幾樹珠明雪映。低亞玉羅窗。篩碎小鞦韆影。陰晴難定。粉樣衣裳休覽了。怕惹起、香閨春病。向花下、盈盈小摘。付與當壚說餅。嬌靚。薄抵蟬紗。圓踰月鏡。想廚娘、指螺紅一縷。牢丸上、纖痕猶凝。粉殘莫悵佳人命。相賞有、金尊綠茗。也省到、鶻啼萬片飛瓊。拋街填井。

月中桂 詠丹桂

月姊妝成。向銀河淺灣。自瀉脂盞。紅芳歛豔。早西風篩上。幾堆金粟。緋衣梳裏好。乍卸卻。厭禳妝束。偏罩秋籬外。望來絕似。雁背夕陽幅。纍纍絳綃微蹙。愛瓏璫細纈。相間黃玉。枝頭桂父。想夜來微醉。臉霞初足。仙翁顏渥赭。帶笑睨。孀娥幽獨。縹緲天香滿。銀蟾擣來丹臼熟。

永遇樂

京口渡江用辛稼軒韻

如此江山。幾人還記。舊爭雄處。北府軍兵。南徐壁壘。浪捲前朝去。驚帆蘸水。崩濤颭雪。不爲愁人少住。歎永嘉。流人無數。神傷只有衛虎。臨風太息。髯奴獅子。年少功名指顧。北拒曹丕。南連劉備。霸業開東路。而今何在。一江燈火。隱隱揚州更鼓。吾老矣。不知京口。酒堪飲否。

又 東溪雨中修禊

錦纈籠沙。紅欄委浪。一碧無際。催暝鳩啼。拖涼荇滑。隔浦春寒細。湔裙分節。偏將絲雨。添滿一川空翠。便教他。冥濛滴瀝。正應恁時修禊。年年此日。酒痕花淚。零亂俊

遊衫袂。水上麗人山陰修竹。往事都休記。莫停檀板。且假紅袖。此會後賢應繼。歸來也。明朝花下問他晴未。

又 題惠山松石

虎踞龍僵。獅蹲象偃。人立而僂。鐵幹盤擎。銅根倔強。勢欲排天去。老苔秋縛。怒濤夜吼。捲盡蒼茫。今古鎮支離。千圍古翠。祇容冷雲堆絮。誰眠其下。卻驚石丈。橫礙松根蟠處。鳥雀呼風。兒童敲火。碧匯千鐘乳。銅駝頭角。石鯨鱗甲。噲等何堪。信伍看月下。頽然二老。幻成翁媪。

又 送園次歸吳興和澹心韻

古渡西風。亂山落照。明日將雨。手內金樽。橋頭畫艇。漸到消魂處。踏巖狂歌。掉頭長嘯。萬事總隨花絮。歎英雄。古今無主。夜來酒邊曾訴。路出橫塘。船經夾浦。莫問師師舉。且減柔情。還憑老手。只種金城樹。學士山邊。醉翁亭在。多少名賢來去。喜到日。一湖碧浪。全家團聚。

又 馬殿聞太史招飲兼以軒中遺懷詞見示卽用來韻奉柬

碧浸籬門青黏屋角。風葉鳴路。山後池塘。水邊簾閣。色染瀟湘雨。鴨闌鹿柴。棕鞋桐帽。閒數花鬚微步。日長時。據梧捉麈。清談大有支許。金門賜澣。玉堂延客。過賞齋。齋烟樹。綠笳朱櫻。金蠶雪鱸。臨別重牽住。少焉瞑結。且隨漁唱。搖艇悠然而去。還相訂。頻將香茗。共消晨暮。

又 健庵立齋兩太史步過半繭園九來有詞紀事余亦次韻

映竹爲園。借花藏屋。壘石成路。綠水闌干。黃梅庭院。翠滴衫邊雨。蓬萊人物。峨眉兄弟。小覓池亭幽步。同誰將。荆關粉本。蕭齋畫得如許。徘徊徙倚。墊巾脫帽。隨意臨流。選樹啜茗。桐陰攤書。蘇磴。聊伴沙鷗住。斑斑雨點。陰陰麥浪。分付棕鞋歸去。柴扉掩。風燈颭夜。水鐘敲暮。

又 丁巳夏日壽吳靜安太史

此日佳哉。衆賓樂甚。爲鎮西舞。閨苑涼生。玉堂碧浸。瀟灑原無暑。詞臣賜澣。郎君掇

桂幼者還如衛虎。算從來、袁楊王謝。卿家古今誰伍。百年纔半。萬般休論。暫狎滄洲鷗鷺。荷漸成裳。篋將着粉。月又窺銀浦。楸枰茗椀。笛牀書幌。棐几閒摹歐褚。年年到、紫蘭開候。滿斟綠醕。

歸朝權 壽馬殿聞太史五十

幾載日華東畔住。吟盡上林盧橘樹。暫因休沐臥家園。舍傍別築鶯花圃。曉峯晴可數。玲峴小髻添嬌嫵。羨風光。鰲魚吹雪。紫燕畫梁乳。水榭潭香生一縷。閒課雛童煎日鑄。定瑩翠滑最憐渠。南華且了朝來註。掃花蓬島侶。羣驂鸞鶴階前舞。願年年。朱顏綠髮。雙向鏡中駐。

霜花映 蟹

雁行陣陣。帶夜來、西風觸響簾鉤。偏值新晴。且謀小飲。霜螯最是宜秋。晚軒更幽。點吳羹、玉腕纖柔。笑人間、萬事鴻毛。知他何物是監州。爾雅讀來須熟。莫移封彭越。作內黃侯。淺傅紅糟。低斟白墮。春醪灑灑光浮。菊花部頭。被絃聲、郭索輕偷。待徵酣。

半捲風簾。催人同倚樓。

送入我門來。釀酒金陵臬署作。

悶倚牙屏。慵拈兔管。家鄉瑣事縈懷。遙想霜簷。羈絡最難裁。村村燈火收紅糲。使小  
瓮鵝黃次第排。糟牀壓。夜悄眞珠碎滴。響亂蕭齋。今日憎騰早睡。料得釀王事業。  
不到吾儕。夢渡溪橋。短策破蒼苔。經過藥玉盈缸熟。併一路梅芬撲鼻來。算東風將  
軟。酒旗漸漾。映水沿街。

又 丙辰除夕雪用草堂原韻東里中數子

爆竹驅儼。縛船送鬼。飢腸鳴鬥春雷。楫拙爐紅。荆布漫相偃。一年陳事騰騰去。被玉  
兔金蟆曉夜催。山城內。多少釵幡翠翦。樓幔紅開。況是六花披拂。阻隔狂朋俊侶。  
吟笑誰偕。愁譜淋鈴。絃促柱全摧。情悰悽比商船婦。又略似飄零曹善才。幸東皇解  
送。梅魂雪魄。入我門來。

尉遲杯 別況



春江上見鷓鴣濛濛飛碧浪。草間珠露猶垂。岸左紅蘭纔長。東風斜日。小玉門前纜  
烏榜。正離人好夢初醒。雙擁紅篝凝想。因念十載漂零。長則在水驛。烟程來往。手  
把金尊和淚說。枉說是畫眉張敞。如今便。花開花謝。祇憑得紅襟梁上講。送郎行。獨  
凭小樓。櫓聲水面搖響。

又 遙和雲臣秋夜觀演雜劇之作

飄紅穗。正夜靜。蠟影昏如醉。想曾秋院聞箏。也向春城拾翠。如今惘惘。樓外雨。和愁  
小門閉。向空王禮淨名經。懺卻脂香粉膩。聞說今夜誰家。有年少羣羣。舞衫花似  
咫尺銀牆天樣遠。情緒嬾。懽騰思睡。正夢著。鬱金堂後。那年夜橫波。珍重意。又風吹。  
隔巷嬌歌。夢游驚醒難記。

又 許月度新自金陵歸以青溪集示我感賦

青溪路。記舊日。年少嬉遊處。覆舟山畔人家。麾扇渡頭士女。水花風片。有十萬。珠簾  
夾烟浦。泊畫船。柳下樓前。衣香暗落如雨。聞說近日臺城。剩黃蝶濛濛。和夢飛舞。

綠水青山渾似畫。只添了、幾行秋戍。三更後、盈盈皓月。見無數精靈含淚語。想胭脂、井底嬌魂。至今怕說擒虎。

合歡帶 爲吳陵宮掌雷賦催妝詞

羨緋羅、燭吐銀牆。燈影背、響鳴璫。夾路如花還似霧。戟門前、步步荀香。劇憐春夜。花融錦瑟。月亞金堂。況畫眉、夫婿清河小弟。杜曲諸郎。紗籠徐引。繡幕斜張。藍橋擣就元霜。瓊鳥仙花偏並蒂。珠簾畔、一朵笙囊。朝來更喜。五銖裙細。百子釵長。問傍人、宜稱何如。生憎喚作宮妝。

花發沁園春 月夜布席綠萼梅花下同友人小飲

借月爲花。將花做月。濛濛一樹皴玉。銀椀篩春。瓊簫暖夜。值得珍珠幾斛。冰肌睡足。更掩映、生綃六幅。念月姊、徹夜孤寒。梅妃自小幽獨。花影風搖簌簌。任春城夜闌。畫鼓頻續。金爐燼處。珠斗斜時。月與梅花微綠。清輝滿目。擗吹滅、枝枝銀燭。夜深沈、我醉休扶。和月和花同宿。

二郎神第二體 詠梅子

一株梅子。正纍纍、粉紅牆後。問葉底枝頭。爲誰酸楚。卻又爲誰消瘦。太息春歸誰來問。記不起、鶯花如繡。向杏香簾櫳。陰陰院落。伴人長晝。纖手幾番小摘。已醒殘酒。更撚向妝臺。玉娥低說。曾見依稀如豆。翠已漫空。黃偏做雨。又到傷心時候。算顆顆冷香。鬆脆想爾。料難勝口。

春霽 春寒撥悶作

三月吳天那肯碧帶暝。連陰做黑。簾閣空憑。角巾長墊。心事對誰人說。尋尋覓覓。城南行遍。還城北。向甚處問取。酒旗歌扇舊蹤跡。算是除卻社燕堂前。今朝更無一箇相識。悶無聊。豪情不禁。當街倚醉。拓金戟。一任酒狂喧巷陌。怎奈易醒。不如歸擁羅衾。慊慊睡過。一年寒食。

秋霽 本意

步屨欹斜。向黃葉村邊。閒眺晴綠。水映漁莊。霜明菜圃。陣陣寒鴉落木。遠空乍沐。好

峯數點修螺。更宵宵、極浦淡沲。帆影織千幅。憶昨素舸。汎汎長淮。水涼燈昏。和雁同宿。夢家鄉、西風菰米。炊烟晚。斫鱸腮玉。夢醒葦花聲簌簌。詎意此際。故園潑眼秋光。一杯雪蟻。幾枝風菊。

又 送江辰六之任益陽

綠染熊湘。正翼軫之旁。一點星小。鹿走晴巖。鷓啼斑竹。細雨黃陵古廟。江山未老。又逢仙令栽花到。官閣外、鄂渚昭邱。彌望總殘照。去去定遇。新月巴船。夜闌櫓聲。觸醒沙鳥。徧江鄉。白蘋紅杜。客愁應並楚天杳。此地西風知倍早。君更爲我。試問陶侃當年。空灘戰艦。尙餘多少。

西河 春日偶過亳村故居

前村裏。落梅陣陣風起。舊家池館。暫經過。玉欄漫倚。粉英也爲主人來。雨中和淚梳洗。畫簷損。月榭圯。蘼蕪蛺蝶盈砌。頽垣敗井。劇關心。那能遣此。賺人連夜卸烟帆。半篙埋怨春水。一天絲雨灑不止。總難尋。舊日鄰里。祇有點波燕子。上雕梁絮語。

墨花簾底似話王家當年事。

又 中秋前二日紅友有愛女之戚詞以慰之

西風下。幾聲冷雁如話。涼雲疊疊輕羅。淒清難畫。左家嬌女本盈盈。紅珠掌上無價。記學母將眉畫。金瓠蘭支其亞。簪花蠶尾字偏工。黛痕瀟灑。有時鶯上綠窗啼。風蘭烟柳偷寫。月娥小別閨苑夜。最難忘。冰館瓊榭。耿耿彩鸞思跨。趁秋宵海上。冰輪高挂。叢桂香飄人歸也。

又 西沈落暉

傷心事。碧雲黃葉天氣。漫登粉堞望溪山。戍樓悶倚。茫茫不覺百端來。暝烟暗結津市。銀濤吼。紅日墜。老楓烘得如醉。無情肯逐水東流。只貪西逝。臨風太息語陽烏。長繩縱有難繫。估檣競蠹野岸底。說胭脂。落照相似。明日大風定起。且移船泊入前汀蘆葦。臥看新蟾銜沙尾。諺云日落胭脂紅無雨定多風

解遠環 感遇和雲臣

槌牀抵几。看九州蕉鹿。千秋槐蟻。總若輩、炙手熏天。歎不殺袁劉。依然寒士。臣醒而狂。笑不值、一錢程李。問舊年朱戶。幾徧重經。都剩衰壘。何如沾沾自喜。只竹弓射鴨。芒屨驅豕。玉顏石髓難留。拚老去。瑯琊終爲情死。拍手狂歌。正天畔、暮山秋紫。近重陽、釐肥釀熟。醉爲佳耳。

又 暮秋看窗前杏花

碧秋澄澈。把江南染徧。是他黃葉。忽一朵。半朵春紅也。淺暈明妝。薄融酥頰。簸雨籠晴。笑依舊、茜裙微摺。只夜涼難禁。露重誰怏。蛩語淒咽。回思好春時節。正桃將露綬。蘭漸成緝。樓上人醉花天。有畫鼓銀鬪。寶馬翠埒。事去慈恩。枉立盡、西風閒說。伴空濛、驛橋一帽。葦花戰雪。

又 弈用片玉詞韻

瀟湖棲託。面荷塘香竊。柳陰綿邈。有一帶、海素籠窗。恰臨水倍明。比烟尤薄。畫困心慵。便絃上、懶調郭索。且呼朋坐隱。留客手談。聊代行藥。花陰半庭。閨若。漸局中爭。

劫。捩上侵角。靜覺一派蟬聲。將殘燠餘炎。耳畔銷卻爛了樵柯。怕又謝蓬萊桃萼。悄無人。萬松沸處。微聞子落。

又 再詠弈用雲臣原韻

荷香清燠。更松風滿院。簷鈴戛觸。有數客。清晝圍棋。儼地割袁曹。疆分楚蜀。布算凝思。漸鬆几。光連幽竹。笑都無下意。斂子收奩。只倚空局。須臾山飛海覆。惹旁觀爭看。枰際紛逐。料得橘叟功成。怕枕畔黃梁。定已炊熟。何似安眠。且輟戲。閒消三伏。任人猜。弈家劣手。阿奴碌碌。

又 送孫愷似孝廉南歸愷似陪使朝鮮曾輯採風一編載彼國士女詩詞略備故後半闕專及之和李武曾韻

渭城朝雨。怕聲繁拍促。淒如結楚。誰砌滿黃葉中原。恰暗捲歸人。渡滹沱去。萬里槎程。曾透過。龍荒小部。憶下句驪國。慕華樓下。醉呼鷹處。采風一編竣否。記斜行小字。驚鴻跳虎。中間一幅苔箋。是貴主婷婷。摩訶避暑。不信蠻姬也解唱。謝庭花絮。儻

書成釐正闕文。休刪夏五。采風集中有朝鮮婷婷公主詩。

望明河 丁巳七夕玉峯作明日立秋

冰輪尙缺。已耿耿流輝。盈階鋪雪。潭子空香。較蓮子清芬。兩般誰冽。荒唐稗史話。認  
做是鵲橋佳節。惹無數樓上穿針兒女。凭闌低說。風前老顛欲裂。問青海幾處。玉  
臺銀闕。明日西風怕點上許多。無情華髮。碧簫吹來破。又躍入龍堂變精鐵。喚他起。  
須伴狂奴。醉舞冷光潛掣。

飛雪滿羣山 本意次宋張榘韻

纔訝悠颺。俄驚飄瞥。明駝皓鶴齊還。銀房壓疊。瓊濤澹泐。失卻天半烟鬢。玉參差成  
頃。都釀做吳江暮寒。無聊又聽誰家畫角。吹入小屏山。記得潼關前歲發。一行騎  
阻。萬里程慳。雲靈楚棧。風饜漢壘。紅氈在混茫間。又故鄉雪滿。描難就。倪廷范寬。來  
朝定霽。一簑准擬江上看。

又 白門署館對雪



紅板橋南。錦衣倉口。粼綿舞絮漫漫。瓊沙浙瀝。吳鹽飄警。偏將屈戍敲彈。此中歌玉樹。想千載、瓊花未殘。獨憐對酒。無緣蠟屐。寂寞強憑欄。記起景陽宮舊事。玉兒縞素。憔悴辭鑾。詩顛不禁。酒狂陡發。茫茫哀樂無端。鍾陵消紫翠。捲毳幕。渾如白檀。來朝徑去。漁簑披了江上看。

又 雪霽

萬瓦銀皴。千門粉窰。六街簾幕疏疏。斷橋紅板。小帘黃布。一齊映入冰壺。幽人無箇事。閒屏當、吟軒釣車。桓家寒具。王郎水厄。活火沸風爐。女牆上、霞籠積素。藐姑仙子。春透肌膚。明妝酒暈。檀腮茜捻。江天此景難圖。詩顛兼酒惱。聽滴瀝。鄰家玉蛆。誰堪共飲。街南且拉諸狗屠。

清江裂石 人日送大鴻由平陵宛陵之皖桐

彩燕黏雞。鬥洒天。輕軟到釵鈿。准擬暗塵元夜。覓羅帕、月底燈前。訝舴艋來迎。何太早。綠帆拖雨。貪看水成烟。殷勤問姑溪瀨水。那似瀟湖妍。二月向龍眠。樅陽城下。

可還有士女鞦韆。西望是潯陽。琵琶亭下。見說道邊愁。已入新年。對東風。倚江樓。倘  
遇鯉魚紅尾。寄我碧桃箋。

泛清波摘遍 詠沼內紅魚

吳娘水閣。幾曲金塘。時聽紅魚跳波響。翳然花竹。日高舟尾浮菰蔣。妝臺上。傷春天  
氣。中酒心情。斜溜明矚。還細相照。水釵傾。投餌鬢偏。幾遍惆悵。朝霞漾。寄到啼槭  
染血。帶得落花鋪絳。愛爾絕代紅妝。水雲高曠。渾無恙。嬌鳥籠底去來。美人影中生  
長。莫管畫溪笠澤。黏天風浪。

又 萬大士表兄招賞白蓮賦此

軒如烟艇。盎作晴湖。一朵白荷簾外舉。梳風颭水。記在普陀巖下路。辭鸚鵡。誤落塵  
寰。空添枝節。受盡人間千斛暑。翠幕低張。冰井斜凭。憐爾嬌嫵。如相訴。墜粉曲塘  
有恨。回首花宮無語。贏得素質亭亭瘦影。踽踽。還凝佇。柳外又仄銀蟾。葉間猶跳宿  
雨。應惹弄珠人到。乘夜褰取。

又 芡

江妃水戲。龍女夜游。遺下蛟盤波面貯。勻圓鬆軟。顆顆枝頭綻。新雨。誰家女。粉裙一色。銀浦三更。船泝空明烟外語。爲愛鮮妍。爭向微茫。遵岸尋取。牽宿莽。苞作蝟毛暗磔。實愛雞頭初乳。剖罷萬斛晶丸。零亂川澗。添嬌嫋。那數雲子彫菰。偏宜玉織幽俎。祇怕如珠秋露。採時休誤。

又 立秋日憺園塔影軒作

稍聞茶響。似有蟬鳴。便作冷香空翠想。無聊無賴。淥水廊邊自來往。憑闌望。半房蓮子。幾筵蓴絲。誰信已將秋細釀。怪底樓前。今夜明雲分外淒爽。暗惆悵。蛩語乍親枕函。砧韻漸生門巷。怕是愁人此時。易添羈況。瀟湖上。差有月嶼風潭。非無釣船菱榜。何不五湖歸去。傲然呼長。

又 采菱爲閨牛叟賦

牛叟兌閣遺徵自序曰。妻種菱湖西。常攜諸女扁舟。

採摘當夕陽。下春翠袖紅妝。與清流碧藻相映。宛在畫圖。寅秋尙期踐此約。

而竟不逮矣

花窺鏡盒。蔓匝鞦韆紋。十里西風公路浦。憑將舴艋。小織烟潭。葦花舞。低拳取涼欺鴨脚。嫩壓雞頭。肯似碧房蓮蕙苦。淺泊前汀。並買秋鱸。吹火同煮。斜陽渡。晚來誰迎水橋。暝色隔村人語。詎意前游微茫。竟隨客歲。雁程去。瑟瑟板渚輕波。濛濛篷船疏雨。一自采菱歌斷。謝娘何處。

望梅 春城望紙鳶

夾衣初颺。漸梅鬚墜粉。桃腮堆絳。鴨頭波。倒浸春雲。風日美。一天紙鳶都放。隊隊兒童競喧笑。綠楊門巷。正偷將殘線。趁取新晴。恣情游賞。將扶乍低旋漾。把溪烟攪碎。晴空撲響。漫掠他。青粉牆西。惹翠袂遙凭。紅閨凝望。急景難淹。又天半。夜燈初上。見火蛾旋繞。飛下雪梨十丈。風箏每夜必絙燈火并於其上高放梨花雪炮

傾盃樂 善權寺火甲寅九月十九日事

玉寶瓊屏。琳宮紺宇。層崖染茜。嵌峭壁。三生堂後。梳妝臺左。李唐遺殿。黑摧禿柏蒼

皮偃雨淋浪。蘚崩剝。壞梁雷篆。昨春野寺。記著青鞋踏徧。陸渾火燒殘赤縣。焚玉石餘灰延鹿苑。歎一夜、猿狖悲號。千年龍鬼糜爛。化斷井、頽垣一片。剩落落、長松誰伴。想月夜古洞裏、仙靈浩歎。

又 正月十三夜預卜元宵月

絲雨如酥。小窗似夢。睡獨難穩。試燈夜、鳳脰慵點。香閨潛向。姮娥預懇。元宵可有冰輪分。奈瓊瑤舞。縈幌拂簾逾緊。安黃剔翠。都到眉峯砌恨。鄰院女、盈盈來問。說青鳥。廣寒原有信。要春城、一色鋪銀。夜市萬家堆粉。正雪後、玲瓏燈映。又陌上、軟鬆鴛潤。當此際、纔湧上、團圓玉鏡。

又 品茶

雨後新晴。林端小閣。疏簾窄地。正註罷、南華下卷。幾般綠雪。嶽僧新寄。澗邊杓取鳴泉試。借幽廊、支瓦銚。細商茶事。松風入、聽瑟瑟珠跳雪沸。綠鬢女、嬌拖燕尾。捧玉溼鈞州磁盞翠。羨幽韻、未瀉先傳。餘芬罷啜還滯。漸證入、茗柯至理。終不負、酪奴風

致。七椀後。玉川子。頽然竟醉。

望湘人 秋日過準提庵訪石公上人時上人初自都門歸攜有緯雲弟家訊見石蹲若獸樹老於猿誰家廢圃荒館。改作僧寮。恰臨野渡。花竹蒼然平遠。萬里烟塵。經年烽火。家書常斷。正兵間。透一僧歸。來作上林秋雁。把向晴簷細展。怪一椀侵蠹。八行纏繚。書到汝爲人笑。醫啼痕參半。歎世上只有西風嬾。不送征人回轉。更惱是。故國茱萸。眼底仍然開滿。

又 寓樓微雪詠隔垣所見

訝銅街轉處。銀井灣頭。聞盈盈霧髻烟鬢。又被斜風捲來微霰。越與明妝相襯。絮裊裙拖。雪沾妝閣。行來將近。想憐他。輕軟纖鬆。故把淩波偷印。誰念鄰家樓上。有他鄉狂客。闌干凭損。枉目斷瑤階難遞。飛瓊音信。料孤館只晚寒成陣。況是歸期無准。偏戲弄。牆外花梢。搖落一庭新粉。

又 贈南水上人上人住吳門百花洲

自鞦韆拆了。杜宇啼殘。粉箋怕寫新句。驀遇維摩。來游菴書。姿致訝如張緒。雨裏樓鞋。烟歛箬笠。隔花吳語。喜韶齡、更擅才情。解唱碧雲日暮。借問師家何處。在百花洲畔。近胥江渡。此地我曾游。千載最消魂路。昔日無限錦帆柔櫓。只剩綠波南浦。想月中、跌坐香臺。尚有精靈來去。

夜飛鵲

代妓贈別

爲金沙史耳翁作

官橋幾絲柳。綰住蘭舟。含淚暗上津樓。枇杷門掩。東風暮。曾拚睡暖鴛裯。流鶯替人傳恨。向風前絮語。百種難休。玉簪恩重。卸將來、嬾節離謳。既道有人拘管。何事到旗亭。慣惹閒愁。記否連宵蹤跡。雨天中。酒月地梳頭。落花城內。馬蹄紅。蹴滿銅溝。只瑣窗歸去。莫教輕漏。客館風流。

望海潮

題馬貴陽畫冊

極北龍歸。江東馬渡。君臣建業偏安。天上無愁。宮中有慶。聲聲玉樹金蓮。點綴太平年。更尙書豔曲。丞相蠻箋。月夕花朝。那知王濬下樓船。華清月照闌干。悵多時粉

本流落人間。可惜當初。丹青妙手。如何不畫淩烟。風景極淒然。寫一行衰柳。幾處哀蟬。展卷沈吟。昏鴉蔓草。故宮前。

又 胥門城樓卽伍相國祠春日同雲臣展謁有作

鼉吐鯨吼。龍騰犀踏。胥江萬壘驚濤。沿水敗牆。臨風壞驛。千秋尙祀人豪。英爽未全凋。正綠昏畫幔。紅斲霞旂。太息承塵。我來還爲拂蠹蝸。城樓徑蠹層霄。悵蘇臺碧蘚。相望峇嶢。西子笑時。包胥哭後。霸吳入郢徒勞。颯沓響弓刀。算稽山越榭。今也蓬蒿。社鼓神絃。依稀疑和市中簫。

擊梧桐 酒闌感賦

被酒陽狂。當歌慨慷。幾遍雄心。骯髒蘆中人。竈下養。市南屠狗。城東賣醬。更邀昔日知交。白擲劇飲。掀髯抵掌。擊碎唾壺。拍碎胡琴。舊事流波一往。想像衣香。沈吟手粉。十載後堂情狀。燈灺後。夢回時。曾否玉人無恙。醉後猛然思省。人生何必定多情。且潦倒。短衣射虎。學藍田李廣。



又 夏日同友人過竹逸齋頭小飲賦此紀事

毒熱鎔金。火雲焦釜。喘月吳牛無那。剝啄聲。誰拉我。過君高館。科頭而臥。只愁避暑何方。除是翦卻亂峯千朵。更上危樓。快劈么絃。彈得冰天都破。小飲深談。耳酣氣熱。不顧旁人而睡。算今古。幾賢愚。詎有斯人長餓。歸去先生爛醉。任他拍手羣兒罵。且踏著一街新月。把小詞閒做。

一萼紅 寒食紀事

玉津園記箇儂門巷。淥水漾罨。社燕低飛。鶻簫輕弄。東風隋柳如絲。正客裏、禁烟天氣。趁流鶯、啼處立多時。蒜押雙搖。藥欄九轉。瞥見師師。十五破瓜年紀。恰梳頭纔了。緜額偏遲。紅玉勾人。碧虛留客。篆烟半裊金猊。魂斷是、瓊閨有縫。迸他修竹兩三枝。料爾一春寒側。長倚腰肢。

又 癸丑除夕

響銅籤。許多年舊事。和恨壓眉尖。記得當初。後堂弟妹。團團圍定紅簾。飲盡了、屠蘇

千盞。擗畫鼓、憨笑賭黃柑。十里春城，金娥暗撲，火鳳交銜。自後也逢除夕，歎此生長是，弟北兄南。第宅俱非，顛毛都換，每因令節生嫌。只萬點、官橋夜火，風吹零亂，映疏簷。羨殺鄰家歲酒，隔巷春衫。

又 納涼梅廬 梅廬南耕齋名

屐初停。見亂杉深巷，門境已空幽。一派風廊，幾層釣檻，微茫人在滄洲。軒子外、蒼皮怒裂，更紅魚、碧鴨漾銅溝。屋小如幃，齋虛似舫，萬籟颼颼。到便捶琴啜茗，向水邊企脚林下，科頭。卿論殊佳，吾衰已甚，世間一笑浮漚。且盡日、談空說鬼，豈花棚上月如鉤，再噴數聲風笛，吹動新秋。

薄倖 賦得水晶簾下看梳頭

敲門春暖。紅日漾、圓冰清淺。算一帶、茱萸窗網，便是箇儂妝院。素領巾、半幅烟綃，行來剛被微風捲。更點點斜紅，溶溶泓黛，嬌面欲勻還嬾。恰十載、傷心事，憶釵響、衣光有限。只玉纖撩鬢，春葱蘸額，一番回想腸應斷。風流放誕。記千金豔質，妝成愛映

春流看別來香閣峭冷尖寒應滿

又 過閩門感懷用湘瑟詞韻

春波旬線把船檻和愁倚徧。記舊日、膽娘門巷。只在畫橋南轉。靠他家、一樹枇杷流鶯日日啼歌扇。向燕子樓邊。鵝兒酒內。生受花憐柳眷。到今日、思量處。空爇盡沈香火慢。被東風幾陣。晴絲一夜。吹將往事連天遠。鮫珠休濺。便玉京仙圃。也應風景年年換。閒愁莫惹。城下紅桃正綻。

又 舟次惠山再疊前韻

綠楊金線。記此地、經過百徧曾驀遇。水仙祠後。月裏游船初轉。凭幾楞、膩粉闌干。水晶簾子桃花扇。正一色衫紅。兩行蛾綠。何處鶯儔蝶眷。聽檀板、孜孜拍似唱到小秦王慢。恰水烟一派。衝開笑語。鼓兒搗了人兒遠。年光濤濺。也思量再覲。重來無奈。心情換尋春須早。莫待百花齊綻。

又 山下與顧景行話舊三疊前韻

風箏脫線。向水驛、山程繞徧。笑十載、求仙任俠。只有金丹難轉。又那知、舊侶重逢。淒涼似、閱秋風扇。論紅絹前情。青衫少日。曾訂厚盟深眷。且與作、開元話。聲漸緊。四條絃慢。算年來、爾我行藏略似。交情直比春山遠。酒槽珠濺。向當壚小語。香醪可許新詞換。惹他一笑。榴齒臨風微綻。

惜黃花慢 晴郊訪菊

郭外烟林。趁板橋夾浦。迤邐秋尋。溪翁隴口。半畦嫩蕊。園丁屋角。數畝濃陰。離披開坼。鋪如錦。縱藻耀。偏覺蕭森。選野岑。倚風藉草。隔澗垂琴。濁醪無伴。孤斟。漸林霏小結。巖翠將沈。家居罨畫。廚方膾玉。人懷彭澤。籬恰搖金。西風何事。頻吹帽。便短髮。菊也須簪。攪客心。前村碎杵零砧。

一寸金 夜泊金沙城外有懷潘子南村兼示于吉人虞我武潘子遯諸子

櫻筍江鄉。小艇濛濛枕烟郭。正棟花風緊。遠村寂寂。桃花浪決。斜塘漠漠。客睡何曾著。櫓聲歇。閒愁頓作。空潭上。水笛風燈。添取城頭戍樓角。暗省當年。溪南詩老。曾

經對牀酌。更憚齋一夕。紅亭絃管。梵川十里。綠楊池閣。風景何嘗換。歎滿目。酒壚非昨。如今只。雨打船窗。徹夜長索索。

又 距毫村不數里有古刹曰敬先庵。庵側有一高邱。或穴其下。乃得古冢。隧澗幽涼。明器怪詭。似是古侯王墓。詞以紀事。

古寺高邱。雨溜松毛。土花澀。有破空石甌。呀然如竇。懸崖鐵繡。窈然而黑。壞棧盤雲。仄鳥窺處。龍湫深極。誰人作。校尉摸金。千載畫衣化烟色。隱隱便房。迢迢夜壑。風吼魚燈逼。問珠襦玉匣。幾年耕破。金釵銀椀。誰人拾得。牧子頻吹笛。惹漢武。秦皇沾臆。歎多時。變大城荒。徐福歸何日。

幔卷紉 賦得秦女卷衣

長城西去。曉關一望。萬古消魂地。悵漢苑秦宮。隴樹洮雲。棧連梁益。閣通燕魏。繡嶺渾河。灞陵紅樹。烏鼠山如髻。有六郡良家。四姓小侯。盡隸都尉。金鴻嘹唳。蕭閨忽憶寒衣事。刀尺擬裁量。怕帶圍難記。砧響秋宵逾霽。搗瘦銀蟾。敲殘木葉。疊在紅箱。

裏。倘寄到軍前。驗取羸樓翠綃封淚。

八寶妝 詠荷錢

欲綻紅衣。將整翠蓋。先放錢錢葉大。已自成盤。休訴窄。百琲還能盛裹。水邊樓上誰家。嬌困憎騰。五銖閒向欄干簸。不料幽潭深處。偶然輕墮。幸值緩步江妃。將綃攬取。青蚨猶未曾破。又怕被土花偷澆。傍綠水。鋪來停妥。笑莢樣。苔般誰做。祇如鵝眼些兒箇。只未解遮藏。彩鴛莫便一雙臥。

疏影 憶鄧尉梅花

佳人空谷。有銅坑千樹。瀟湘一幅。暗記當年。纔過收燈。有人約探林屋。參差帽影。鞭絲裏。飯釘得。許多濃綠。便歸來。攜取冰魂。併入小窗橫竹。詎料今年病裏。東君又過去。九分之六。冷落看花。情性憎騰。且把道書閒讀。不緣修道緣。伊冷。恐孤負。樓東瘦玉。忍餘寒。夢到深山。細問一春幽獨。

又 詠瓶中蠟梅

簾。紅。盜。翠。襯。蜜。犀。花。朵。色。凝。髻。几。入。道。梅。妃。新。換。黃。紵。賽。他。林。下。風。致。分。得。壽。陽。妝。  
額。上。漸。啄。破。小。鵝。兒。嘴。愛。生。成。金。屋。故。園。長。憶。飄。零。姊。姒。側。正。端。相。都。好。儘。經。營。  
位。置。費。盡。纖。指。生。怕。冷。香。易。瀉。侍。兒。頻。汲。銅。溝。清。泚。十。分。春。意。三。分。漏。猜。不。出。蠟。丸。  
中。字。囑。檀。奴。守。口。如。瓶。莫。把。鸞。絨。漫。啓。

又 詠虞山毛氏汲古閣兼贈斧季

絳。雲。燼。後。有。隱。湖。小。閣。突。兀。晴。晝。錦。繡。團。窠。箋。剔。泥。金。珊。瑚。石。尉。休。鬪。墨。花。蝕。處。香。  
偏。冽。論。官。焙。何。須。荳。蔻。記。開。雕。北。宋。南。唐。漢。碣。秦。碑。同。壽。寒。具。慎。教。輕。觸。牙。籤。除。  
付。與。萸。玉。纖。手。灑。灑。油。窗。的。的。春。幣。靜。對。瓶。花。句。讀。縹。囊。便。是。劉。伶。鍤。縱。萬。戶。千。鍾。  
何。有。任。誇。他。帝。子。臨。春。此。閣。更。饒。妍。秀。

又 獨坐祖園聞顧庵藥園亦在吳門未及一晤詞以寄懷

軒。如。畫。舸。載。笛。牀。茗。椀。終。朝。閒。臥。鬪。酒。生。涯。挑。筍。年。光。恰。值。濃。春。剛。過。菖。蒲。箋。好。慵。  
吟。寫。說。不。盡。心。情。難。妥。似。綠。窗。一。種。嬌。憨。懶。對。盤。龍。梳。裹。聞。說。澗。中。老。輩。丁。儀。共。

曹植也客江左。小甕鵝黃。小袖雲藍。笑口思量同破。空園寂寂誰傳信。且悶倚、赤闌橋坐。正水邊、颺起微風。滿院繡毬花墮。

又 暮春新霽

流鶯無賴。將一天霽景。啼碎窗外。雨後帘青。橋上衫紅。盈盈定有人在。趁晴蛺蝶漫空舞。立不穩、泥金裙帶。水如塵、玉剪輕飛。莫點葡萄痕壞。幾日心情小極。爲黏花中酒。暗鎖眉黛。黯了歌紈。閣了鈿車。誰愛鬪茶挑菜。帽簷故傍鞦韆側。恰今日、風光如海。便春晴、人意誰忺。已報棟花風大。

又 黃梅

霜天殘臘。綻細梅滿樹。半開微合。嬾鬪春園。小白長紅。只愛新興蜜蠟。鬱金堂外。模糊見、貪耍學、厭禳妝法。惹綠窗、鎮日昏黃。錯認熏香睡鴨。曾有箇人雲鬢。摘盈盈半朵。和笑低插。戲罵花枝。何物檀奴。也上香蟬斜壓。如今人去。花何用。索性把、花枝齊搯。攪斜陽、別樣心情。且喚澆愁蠻榼。



風流子 除夕幾士大兄以新歷蠟炬餉我賦此奉酬因懷亡弟半雪并寄三弟緯雲於都下四弟子萬於宋中

白頭兄弟在。將進酒。且賦小秦王。歎世上雞蟲。笑人寂寂。天邊蝮兔。去我堂堂。誰相寄。一編書是鳳。千炬蠟成凰。檢處從頭。時乎已暮。燒時見跋。夜也何長。可憐惟一雁。東風催散去。永不成行。迴想去冬今夜。人正顛狂。算年去年來。楓根少歷。春陰春雨。燐火無光。知爾天涯二季。一樣沾裳。

又 感舊

幾摺枕屏斜。凝眸看蕃馬簇平沙。算故國樓臺。許多風物。當年歌管。何限韶華。曾記得。和煙羅幌展。映水粉牆遮。乍雨乍晴。賣錫天氣。半癡半黠。鬪酒生涯。也知別來事。渾嬌嬾難勝。蟬翼輕紗。多管逢春不語。對月長嗟。只芳草黏天。聲聲杜宇。畫簾垂地。陣陣楊花。贏得無聊。小樓數盡栖鴉。

又 南徐春暮程崑崙別駕招飲南郊外園亭同方爾止孫豹人談長益鄒程

邨何雍南程千一賦

來時寒食近。且近耳。詎料竟殘春。正僕本多愁。何妨作達。官如不醉。遮莫傷神。見此際。酒旗斜喚客。榆葉弱縈人。燕子風前。是何言語。柳條煙裏。別樣腰身。名園行樂處。追歡笑何限。寶馬香輪。況遇風流刺史。瀟灑遺民。奈東望蔣州。春潮拍拍。北來瓜渚。暮雨紛紛。還怕當歌對酒。忽又沾巾。

又

錫山慶雲庵感舊

時永如上人新逝

衆山排峭壁。西風吼。亂葉打茆庵。記竹外時逢。拈花迦葉。水邊曾值。洗鉢瞿曇。依稀是鳥啼幽澗北。僧送石橋南。萬壑松飈。王裴名埋。半牀蘿月。支許清談。重經春來地。人誰在。祇見霜信初酣。染就千圍楓榭。一路杉構。歎電光石火。佛猶如此。山邱華屋。人則何堪。隱隱前林。暝翠暗結精藍。

又

月夜感憶

冰蟾飛皓彩。今宵月。勝似昨宵圓。有一片角聲。淒清枕畔。三秋桂子。零亂樽前。人生

事千齡。運似夢。百計且求仙。鳳舞鸞歌。別來幾日。瓊樓玉宇。歸去何年。流霞須傾。盡金荷裏鯨飲。併吸嬋娟。遙憶庾樓今夜。多少英賢。想月明千里。戰袍不夜。西風萬馬。殺氣臨邊。我控雲中黃鵠。一笑茫然。

又 泊舟譙郡贈新安汪公言

桃花潭上水。深千尺。不抵似汪倫。正留客西園。紅燈翠幕。送余南浦。淡月微雲。依稀記。賞花敲畫鼓。糾酒喚羅裙。贈到葳蕤。休教鎖恨。貽來螺墨。莫便磨人。時公言有青瑣名墨之贈南譙繁華地。重經過一片。野渡斜曛。剩下紅橋舊巷。黃葉前村。想千年李樹。仙遊已邈三分吉利。霸業俱陳。老子曹瞞俱亳邑人且自佯狂作達。何事消魂。

又 董樗亭來始見錢蕘斂寄我新詞而蕘斂之墓已有宿草矣愴懷我友漬淚成詞卽用蕘斂來韻并求竹垞朱十亦一繼作

故人新化鶴。今宵月。含淚盼瑤京。念別我西園。朱曦翕絕。送君南浦。雪浪掀騰。誰曾

料人間瓊樹折。天上玉樓成。湘瑟纔彈，便驚絕調，粉箋剛到，遽隔前生。新詞沈吟，徧斜行字，銀鈎蠶尾縱橫。留向愁中細閱，醉後閒評。悵一帶新蒲，碧淒杜甫，千門御柳，綠怨韓翃。不待鄰家笛起，早悔浮名。

大聖樂 甲寅清明

糝雪梅嬌，弄煙杏暖，嫩楊初絲。正賣錫聲近，簾櫳店舍，恰逢百五。風颭斜旗，綠波畫橋門暗鎖。聽牆裏、誰家笑語微，知他定是，鞦韆纔下，慵換春衣。芳郊也擬讌賞，奈舊日、心情半已非。只一園蝴蝶，滿地燕子，亂撲晴暉。墓左麒麟，枝頭杜宇，不飲芳樽更待誰。梨花底，照明妝淡粉，上塚人歸。

高山流水 卽席別吳門諸子偕園次返梁溪并呈伯成先生

西風落拓闔閭城。有留儂、白蛤紅筍。細雨落簷花。吳王宮外雞鳴。屏當好、嫩橋鮮橙。甌如雪，眞珠藥玉齊傾。三兩狂夫，趁箏琶未歇，促拍調俱成。閒評相逢作達耳。人世事、落絮浮萍。楓橋下、幾船夜火，一派寒更。奈酒醒人又攢離程。早潮平、報道山泉

待我涼夢先縈。儘殘年漁簑茶竈寄浮生。

江南春 本意和倪雲林原韻

風光三月連櫻筍。美人躊躇白日靜。小屏空翠颭東風。不見其餘見衫影。無端料峭春閨冷。忽憶青驄別鄉井。長將妾淚斲紅巾。願作征夫車畔塵。人歸遲。春去急。雨絲滿院流光溼。錦書道遠嗟奚及。坐守吳山一春碧。何日功成還馬邑。雙倚枇杷花樹立。夕陽飛絮化爲萍。攬之不得徒營營。

霜葉飛 夜雨感舊柬史雲臣

西風雁壓涼雲破。趨成暝色如許。屏風幾疊擁瀟湘。正晚山碧聚。擬偷按、淒涼宮譜。小樓寒峭移箏柱。奈偏到此時。添幾陣瀟瀟淅淅。長夜難住。對此倍悵無慘。銀燈細炙。猶自顧影私語。一從西北倦游歸。只鬢催霜縷。總夢到、咸陽原去也。應紅盡驪山樹。算前情都付與一片青砧。三通畫鼓。

又 黃芽菜

輕鬆纖軟評春雪。此言殊耐尋玩。昔人句子巧形相。又入春趺贊。細擬議。兩般俱善。不如單詠霜蔬。每未到春盤。早賴甲嬌。擎雋永。那數禁樹。此際風雪豪家。點酥抑鮮。花壓羔兒紅淺。寒酸腹內。賸蔬畦。那有羊來踐。只千里。湖蕞路遠。鄉愁菜把權消遣。對稀疏。憑小摘。忽憶情親。躊躇未免。

過秦樓

松陵城外經疏香閣故址感賦。關係才媛葉瓊章讀書處。

烏啄雙環蝶黏交。此是阿誰門第。塾巾繞柱。背手循廊。直恁冷清清地。想爲草沒空園。總到春歸。也無人至。只櫻桃一樹。有時和雨。暗垂紅淚。料昔日。人在小樓窗兒。簾子定比今。不似望殘屋角。立盡街心。何處玉釵聲膩。惟有門前遠山。還學當年。眉峯空翠。憶香詞尚在。吟向東風斜倚。

五綵結同心

過惠山蔣氏酒樓感舊。余去年與雲耶曾宿此樓。

惠山山下。誰氏高樓。記曾借我酣眠。夜半喧山雨。龍峯頂。飛挂百幅簾泉。當時尙有玲瓏在。憑闌唱。落葉哀蟬。可惜是。聲聲紅豆。憶來大半難全。如今重經樓下。只水

聲幽咽。髣髴鳴絃。彈指匆匆。舊時燕子。換做萬里啼鴉。當壚莫喚樓前客。應怪我、淚  
裏紅綿。惆悵煞。一天明月。滿汀漁火商船。

又 乙卯冬杪與園次飲惠山蔣氏酒樓翠袖紅絃談諧甚劇酒半忽遇廣陵  
高生至記與山陰友人紅橋狎讌時匆匆已十三年矣故人萬里昔夢千端  
不勝白髮玲瓏之感詞以寄慨

簾風暗。梟檻雪新晴。小樓月又剛圓。有杜秋娘在。微酣候。催弄脆竹零絃。曲中驀聽  
羊車到。褰幃入。一座喧闐。驚疑甚。似曾相識。別來一十三年。重新移燈添酒。算夜  
長難睡。且話從前。記得當初揚州薄倖。有人同做樊川。玲瓏去後詩人老。湖湘客、飄  
泊誰憐。憑誰報。渡瀘諸葛。君家燕子依然。

又 賀馮躬暨納姬

隔街爭唱。相府蓮開。覆額香蟬初裹。紅漆車兒穩。繡簾動。壓角紅珠駢駢。只愁阮婦  
剛纔嫁。飄吳語。綠窗邊過。怕難免。粉防脂邏。安頓最宜詳妥。連晨書樓長鎖。料也

應推說。棟花風大。千騎今年事。雙雙去。笑上丹楸翠舸。郎君佳話人傳徧。怪底事。端然瞞我。倘相逢。春宵筵上。百罰深杯方可。

女冠子第四體

詠美人坐禪和彭羨門原韻

蕭蕭禪榻。百和旃檀薰透。花冠啼罷。烏龍睡熟。紫竹清幽。黃幘瘦。小袒袈羅袖。雙疊湘裙紅吐。花邊一綰。最憐他。跌坐桃笙。一派秋江綠皺。靈山參破風幡後。奈十年前事。終向心頭有。佳人不偶。記惜玉情懷。竊香時候。迦文消夙垢。正值鐘聲報午。苔陰移晷。問籠中白雪。衣娘一卷名經完否。

又 癸丑元夕用宋蔣竹山韻

上元晴也。盈盈霽景堪畫。夾城況有。瓊苞千斛。翠澱雙奩。冷輝交射。一輪圓玉掛。越顯人間天上。十分良夜。想誰家。年少此際。正逐暗塵嬉耍。六街春謎慵猜打。歎浮生故國。難把前歡借。蠟珠紅炮。總溼透。昔日傳柑雙帕。春羅愁細研。也料寫他不盡。十年前話。約束風選夢。惹人重到。舊樊樓下。



小梅花 感事括古語傲賀東山體

君莫喜。羊叔子。何如銅雀臺前伎。拍檀槽。橫寶刀。屠門大嚼。亦足以自豪。人生有情。淚沾臆。雖壽松喬。竟何益。捋黃鬚。眺五湖。如此江山。應出孫伯符。傷心史。可憐子。卿復何爲爾。大江東。一帆風。來往行人。閒坐說元宗。連昌宮中滿宮竹。白項老烏啼。上屋。穆提婆。蕭摩訶。且自吾爲楚舞若楚歌。

咸陽樹。驪山路。可憐當日作事誤。殷仲文。王衛軍。國家此輩。要是可惜人。憶君清淚。如鉛水。奴見大家心。亦死令壺醜。收中吾。聊且酒酣耳熱歌。嗚嗚。莫櫟釜。行學估。羞與噲等伍。金屈卮。楊叛兒。阿奴今日。不減向子期。生子當如李亞子。奴價今年大勝婢。穀朱丹。作高官。未若小樓吹徹玉笙寒。

蘇武慢 汴城晚眺

暮色傷心。重關極目。漭漭黃河之水。候羸館老。朱亥塋高。直得英雄心死。城頭戍火。馬上征笳。何苦愁人如是。最堪憐。千里蒹葭。空落方常盛齒。細數他趙宋繁華。宣

和節物。此事幾多年矣。宜春燈燭。延福笙簫。多少六街三市。有恨秋槐。無情社燕。換過幾番人世。只空留廣武滎陽。一片驚濤剩壘。

又 送孫郎賈汝寧 無言令嗣

胃肺擊鐘。馬醫連騎。閒者吾聞之矣。神仙無路。將相難爲。只有鬻財可耳。解人吾子。健者孫郎。遂作急裝而起。看翩然。衮服鳴鞭。矯若奔泉渴驥。又何須。西賈巴巫。南游滇楚。動足下牀萬里。天中上郡。汝水雄關。儘可持籌列肆。鮑革千箱。貂褸百襲。傲殺毛錐之子。只倡樓。莫擁如花。速辦腰纏歸計。

又 梁溪舟中對雪

淼淼蕭林。迢迢凍浦。颯沓亂帆成陣。忽飛駛雪。暗灑吳裝。極目空明相混。孤墩殘角。小寺疏鐘。今夜吟情難穩。望前村。水店溪橋。風裏青旗斜趁。也思量。一箋禪燈。半衾暖玉。長守南山故隱。詎期屢歲。每到年時。諳足旅愁羈恨。繡陌神儺。紅箋致語。一載又還將盡。小樓前。幾樹橫枝。想已漸堆香粉。

惜餘春慢 梁園春同侯仲衡叔岱徐恭士田梁紫弟子萬看牡丹作

節過滿裙人稀拋堦。又是一番初夏。春歸下浣。客到中原。隴首濃陰誰畫。多少濛濛柳綿。和了春陰。澹人簾下。正曉來、忽聽園丁。報道牡丹開也。相攜去、闕伯臺前。孝王園後。小試玉驄寶馬。梅風幾陣。鶯語多般。引出紫嬌紅姘。歌板欄邊競開。密幄圍花。娛他清夜。撚一枝、忽憶沈香。且作開元閒話。

又 立夏前一日竹逸招同雲臣修承紅友天石惠文補仲雲濤放庵二上人

賞紫牡丹用宋魯逸仲原韻

飛絮年光。脫綿時節。綠徧裙腰芳草。雒陽貴籍。紫府真妃。臉暈露華春曉。記得年前種時。一朵嬌柔。問年猶小。自畫堂養就。芳姿漸長。閒愁不少。 薰聽得、杜宇催歸。濃春將謝。先自替花煩惱。排當檀板。料理金樽。花徑夜來頻掃。追想開元舊游。玉笛寧王。琵琶賀老。只日斜客散。滿欄姘紫剩游蜂遶。

玉山枕 詠白鸚鵡

小院清麗。蜻蜓翼。空如水。楊花門戶。梨花院落。風漾金籠。踟躕不止。雪衣簷畔。誦迦文。恰生小。怕施朱翠。有玉奴。夢醒無慘。撚瓊枝。向月中調戲。尉佗臺上。當年事。心兒內。重提起。拋家離井。好風良夜。腸斷三年。魂消萬里。從來薄命玉容人。也只是。飄零如此。倩銀鴻。問訊珠娘。素馨花。想此時開矣。白鸚鵡來自嶺南故云

又 秋夜較亡友史遠公青堂詞卷竟淒然綴此

山館烟舍。記汗漫。同杯罌。飛騰峭壁。攀援絕澗。亂水奔渾。暮雲狼藉。夜深健句。怒盤空。看筆底。崖崩濤瀉。更興酣。蟻視羣兒。擲琵琶。踞酒壚而罵。如今。往事隨飄瓦。經幾陣。寒潮打。燈昏拍促。更闌絃急。月魄難圓。蓮衣易謝。淚和鉛水。汎鵲紅。都點上。殘縑剩帕。落梧聲。似伴吟魂。隔西窗。作秋宵閒話。

宣清 玉河冰

結定銀灣。凍合銅溝。裝成玉玲瓏。若到月明。轉覺嵯峨。便風吹。何曾澎湃。迴思客夏。翠椀涼斃。千家賂賣。只今朝堆滿。逕文園。縱渴誰愛。見宣武門邊。西河沿上。有冰

牀一帶。更紫鬪猩絨。穩墊嬌鋪。滑笏瑤京。若比風檣尤快。是誰家。茜裙斜載。逗香肌、冰前偷賽。還將四絃。猛彈破空潭。問吟龍安在。長安臘月玉河冰結時水面多設冰牀往來絡繹以洪行客其捷如飛較之坐騎乘車遠勝多矣

### 洞庭春色

甲辰除夕懷西樵司勳阮亭主客

歸去來兮。鬪雞走狗。閭巷沈浮。歎臣之壯也。如人何事。身將隱矣。於世焉求。四十男兒。悲老大。笑那便。車前少入驕。填胸事。看人奴。笞罵。一半封侯。回首風塵。萍梗。怪年來。長榜迷樓。記廣陵風景。青山綠水。瑯琊兄弟。長史司州。名士終朝。能妄語。更頭沒杯中。笑不休。紅燭夜。對故園椒酒。想爾風流。

### 又 蟬

御襖北窗。崢泓西礪。企脚披襟。正修梧翳日。數聲嘒嘒。幽篁戛水。一派愔愔。喚醒半牀蕉鹿夢。更月榭涼天。思不禁。流光駛。怕潛催落葉。暗換疏砧。終朝餐風吸露。算往事。惆悵難尋。記徹侯冠上。親陪貂尾。佳人箏畔。曾弄鸞吟。詎料半枝棲不穩。狂訴

盡淒涼。此夜心須蟬蛻。問茫茫塵世。誰愛清音。

沁園春

桐川楊竹如刺史招飲劇演黨人碑卽席有作

竹如係忠烈公家孫

黨人碑宋元祐紹聖事

屈指愍孫。惟我與君。今日相逢。歎家世膺滂。破巢剩壘。丹青褒鄂。硬箭強弓。忠烈公遺像存余家三十年矣。今始奉還。磊塊誰澆。飛揚不禁。願學當年曹景宗。銀燈底。恰清歌宛轉。妙伎玲瓏。燭花墳起如龍。又聞樂中山淚滿胸。任刺史筵前。嬌絲脆竹。黨人碑上。怪雨盲風。我已冥鴻。人方談虎。愁殺長安老石工。歌且止。思爾兩家舊事。此曲難終。

又 廣陵客邸送緯雲弟之歸德

客裏送行。蕭統樓頭。且盡一杯。正節近清明。柳絲漸長。時逢上巳。燕子將來。兄往淮陰。弟游河北。兩地翻飛。立馬催斜陽外。見各天鴻雁。顧影徘徊。市樓轟飲如雷。笑我輩豈常貧賤哉。奈花號將離。爾心欲碎。地名蕪苑。我賦偏哀。此去睢陽。也知懷古。

有日經過古吹臺。還應問。有兔園上客。狗肆奇才。

又 山東劉孔集招飲廣陵酒家係故郭石公宅

魯國劉生笑拉寶鞭。攜上糟邱。更一時意氣。徐陵袁紹。六朝才調。綠幘紅鞵。如此人生。奈何不樂。況值離鴻叫暮秋。憑欄望。見風廊水榭。丹漆雕鏤。當年此地風流。記畫戟門開。溝水頭。羨羊侃侍兒。彎弓貼地。李波小妹。走馬當樓。蔓草斜陽。空園絲雨。爭說汾陽郭細侯。還。嘯。只眼中花月。誰似揚州。

又 冒天季五十書贈

慷慨悲歌。旁若無人。進君一觴。更四絃入破。聲哀以思。三更被酒。臣醒而狂。末路崎嶇。舊游零落。哀樂縱橫不可當。生平事。曾短衣匹馬。錦瑟紅牆。歲華一去堂堂。又半百蹉跎。黯自傷歎。醉必沾襟。是兒可念。飛而食肉。此志難忘。人道買臣。今年富貴。路鬼挪揄笑一場。重酌酒。看玉山筵上。今夜頽唐。

又 泊舟惠山看六朝松并長嶽石

昔歲我來乘白羊車。著紫鼠裘。愛支離者叟。霜皮黛甲。玲瓏者丈。雁蕩龍湫。王謝家兒。宣和遺老。爾正愁時。我亦愁。曾經過。看累朝興廢。百代王侯。別來歲月如流。歎赴壑修蛇掣不休。又風吹雨溜。幾場兒戲。藤纏蘚蝕。一樣蜉蝣。石豈能言。樹猶如此。何怪書生竟白頭。重來到。吹一聲鐵笛。叫破孤秋。

又 爲泗州謝震生廣文題照兼送其之任山陽

我愛先生其冷者官。其熱者腸。羨康樂宣城。君之家世。蟻珠浮磬。此是家鄉。人道馬曹。我知魚樂。苜蓿堆盤。不妨吳綾。上問傳神阿堵。何物長康。纔成半闋淒涼。忽念爾將離黯自傷。記淡月微風。曾經批抹。好花新茗。相與平章。此去淮陰。古多惡少。我欲來游醉幾場。君求我。在韓侯臺下。漂母祠旁。

又 贈別芝麓先生卽用其題烏絲詞韻三首

四十諸生。落拓長安。公平念之。正戟門開日。呼余驚坐。燭花滅處。目我于思。古說感恩。不如知己。卮酒爲公安足辭。吾醉矣。纔一聲河滿。淚滴珠徽。昨來夜雨霏霏。歎



如此狂飈世所稀。恰山崩石裂。其窮已甚。獅騰象踏。此景尤奇。我賦將歸。公言小住。歸路銀濤百丈飛。氍毹暖。趁銅街似水。賡和無題。

雖則毋歸。對酒當歌。終難激揚。似孔家文舉。幼原了了。衛家叔寶。晚更茫茫。五劇金鞭。六街寶馬。誰數吾家老子昂。公真誤。歎臣今已老。髮短心長。御溝偶過毬場。笑塗轍都爲若輩妨。更內家髻樣。巧如馬墜。小侯舞勢。快作鸞翔。酒則數行。食而三歎。斷盡西風烈士腸。登城望。有千羣筆策。萬點牛羊。

歸去來兮。竟別公歸。輕帆早張。看秋方欲雨。詩爭人瘦。天其未老。身與名藏。禪榻吹簫。妓堂說劍。也算男兒意氣場。真愁絕。卻心憂似月。鬢禿成霜。新詞填罷蒼涼。更暫緩臨岐。入醉鄉。況僕本恨人。能無刻骨。公真長者。未免霑裳。此去荆溪。舊名罨畫。擬繞蕭齋種白楊。從今後。莫逢人許我。宋豔班香。

又 經邯鄲縣叢臺懷古

匹馬短衣。竟上叢臺。慨當以慷。看誰家戰壘。寒鴉落照。何年古戍。亂草平岡。十月疏

砧。一城冷雁。不許愁人不望鄉。徘徊久。只登高弔古。無限蒼茫。當年趙武靈王。正樹裏河流掛濁漳。更佳人跼履。妝臺對起。王孫袷服。舞袖相當。而我來游。幾番歷徧。不見邯鄲俠瑟倡。何須問。便才人斷養。總付斜陽。

又 夜宿衛輝府使院院係故藩舊府

白月明明。青火熒熒。憂來無方。有敗磚碎甃。當年碧瓦。殘煤冷燭。昔日紅牆。銅杏椒圖。綺錢交網。贏得行人歎一場。轆轤畔。憑風簫吹透。幾陣新涼。無端一夢荒唐。夢應教鄒枚綴末行。似朦朧簾外。宮娥阿監。依稀殿上。玉几金牀。忽聽雞鳴。旋催馬首。淇水東流。劃太行。回頭望。見驛樓飄渺。苑樹微茫。

又 送謝雲章之大名

結束翩翩。北去天雄。黃衫紫韁。有萬層鐵騎。軍懸重鎮。五更鈿雁。巷列名倡。魏滑分河。關山獨夜。感慨黎陽舊日倉。橫戈地。怕驚沙颯沓。亂水碎浪。昨朝並轡回翔。恰路出夷門。認大梁。記分題古驛。憑燕弔魏。同敲石火。嘯雨啼霜。君又翻飛。余其寥落。

試聽悲笳咽女牆。前游在莫孤。擎濁酒。重宿平陽。衛輝使院。係舊藩邸。余與謝君。曾各有辭。今去。天雄必重經。此故云。

又 詠雪獅

此物何來。猛氣咆哮。砍頭陷胸。見吞刀吐火。一般甜酸。鏤冰築玉。百種玲瓏。萬事東流。一身西極。隻手曾批上圈熊。真無敵。算涼州假面。難與爭功。滄州城外呼風。又戚畹獅兒臥草中。怪霜纏鐵獸。汝偏天矯。汁鎔瓘鳳。爾獨從容。頃刻天晴。須臾雪霽。贏得羣兒拍手同。啞然笑。歎原來刻鵠。詎是真龍。

又 大梁署寓對雪有感

凍角無聲。大旗自翻。長河怒號。正雪作花時。玉鱗狼籍。茶當乳處。珠眼蕭騷。烏鵲枝寒。羝羊窖冷。一片愁成八月濤。當年事。記昆陽城下。羣盜如毛。中原百戰人豪。經幾度風吹并浪淘。嘆河名官渡。袁曹安在地。連南頓。馮鄧徒勞。四節飄零。兩河蕭瑟。且捋黃鬚命濁醪。吾已醉。尋市中朱亥。共鼓屠刀。

又 客陳州使院花朝作

歸歟歸歟。我亦在陳。胡不歸兮。正伏羲陵畔。縠紋六幅。宛邱城外。柳線千絲。萬種溫  
磨。百般釘餛。嘗得愁心。早上眉。渾無計。只沈腰漸減。潘鬢都非。江南值此年時。記  
巷口花驄分外嘶。更舞衫歌扇。錫簫陣陣。倡條冶葉。裙幄離離。拋了濃春。陪人遠宦。  
俊侶相嘲甚意兒。真無賴。拚化爲飛絮。繞盡天涯。

又 三月三日尉氏道中作

登尉繚臺。上三垂岡。卽王稽候范睢處傷如之何。憶談兵說劍。才情磊落。投秦去魏。  
意氣嵯峨。我到中原。重尋舊蹟。牧笛吹風起夜波。誰相問。縱殘碑尙在。一半銷磨。  
短衣此日經過。歎禊日難逢。晉永和。正水邊柳眼。斜窺芳岸。風前燕尾。亂翦晴莎。異  
國韶光。中年意味。寫上烏絲。感慨多。休憑弔。喜湔裙挑菜。士女娑拖。

又 十月晦日懷慶使院望太行山積雪

雪滿太行。碧瀲瑤翻。紛然杳來。正黃河欲吼。六花籍籍。青山乍老。一夜皚皚。素女凌

空。眩師潑水。十萬瓊樓。面面開。深林外。更狐蹤半滅。獸窟全埋。萬鍾寧我加哉。且  
濡髮狂歌。乾百杯。看獵徒并代。霜鷹雪犬。神仙王屋。瑤殿瑤階。聶政祠荒。袁尼宅破。  
世上誰人識此懷。樽猶熱。儘天公顛倒。造化安排。

又 經朱仙鎮

古鎮朱仙。躍馬經過。令人暗驚。看黃塵撲面。閭閻櫛比。清波極目。舟楫充盈。南控陳  
橋。西通尉氏。彷彿當年古汴京。停鞭問。怕沙衝地坼。浪囓堤平。誰何繡栱雕甍。有  
廟貌巍峨。市口橫。是鄂王故事。丹青未老。趙家遺恨。金鐵爭鳴。三月錫簫。一天社鼓。  
走賽仍多舊日僧。摳衣拜。欲題詩未許。淚滿長纓。

又 叔岱先生雅有鶴鶉之癖友人田梁紫作書止之戲括書語爲詞

客語先生。嗜汝鶴鶉。才乎不才。縱遇敵爭能。差強燕雀。爲人穿鼻。終是鴛鴦。盡日啁  
啾。一身眇小。只合充庖佐酒杯。因何事。卻煩人把握。費爾安排。王褒僮約新裁。更  
每日奔馳一百回。要新魁就浴。甫令東去。故雄覓粒。旋遣西來。樊籠盈庭。屠沽入座。

恐累先生盛德哉。驅之便。算象龍非計。好鶴爲災。

又 戲代叔岱先生答

先生得書。再瀝餘杯。敬謝客言。嘆古往今來。幾場蟻鬪。山林朝市。到處蝸涎。卿論自佳。僕狂殊甚。枉費相如諫獵篇。吾衰也。只短衣射虎。便擬終焉。此雖驚愧鷹鷂。看猛氣雄心非偶然。正霜天袖手。試觀其怒。中原賭命。肯受人憐。藉爾驍騰。消余磊塊。長日浮沈里。閑閒公休矣。姑從吾所好。以待來年。

又 湯皆山以瑞梅告者屢矣。始則有枯梅復生之奇。繼則有重臺疊萼之異。

茲則深秋復吐葩焉。詞以紀之。

一種江梅。偏向君家。出奇無窮。看千年復活。喬柯蚴蟉。重臺並蹙。冷蕊空濛。人曰奇哉。梅云未也。要爲先生奪化工。休驚詫。請諸君安坐。洗眼秋風。須臾露濯梧桐。忽逗出羅浮別樣紅。正朦朧。一夜銀河影裏。稀疏數點。玉笛聲中。只恐東籬。有人斜睨。菊秀梅嬌。妬入宮。當筵上。倩泉明和靖。勸取和同。

又 題徐渭文鍾山梅花圖同雲臣南耕京少賦

十萬瓊枝。矯若銀虬。翩如玉鯨。正困不勝烟。香浮南內。嬌偏怯雨。影落西清。夾岸亭臺。接天歌板。十四樓中樂太平。誰爭賞。有珠璫貴戚。玉佩公卿。如今潮打孤城。只商女船頭月自明。歎一夜啼烏。落花有恨。五陵石馬。流水無聲。尋去疑無。看來似夢。一幅生綃淚寫成。攜此卷。伴水天閒話。江海餘生。

又 南耕新葺梅廬閉關學仙詞以紀之

半畝之宮。點綴纔經。林巒邈綿。見雪窗粉壁。皎如越紵。涼軒燠館。碎若吳箋。須種些蕉。再栽些竹。拍瓮文鱗戲翠漣。安排巧。有蒲團棕帚。茶臼舫船。勇過賁育其然。羨大志君真。竟學仙。向丹爐晨諷。黃庭一卷。元關夜誦。紫誥三篇。玉利虛無。文成怪誕。藥誤多人昔所傳。優游好。況新來小築。極似斜川。

又 題史蘧庵先生燈詠一卷後

字字喧豗。烈澤焚林。爲蛟爲螭。有火蛾結陣。晶瑩閃爍。燭龍對仗。照耀鬃鬚。漢隧千

年。秦京三月。做白毫光大總持。薪薪續。任盲兒捫籥。牧豎敲碑。從來禍首庖犧。笑匣劍何妨。燈在帷。既桂輪易蝕。底須搗兔。桑田善涸。焉用燃犀。膏以明煎。吾聞其語。綿上龍蛇。哭子推。真休矣。向燈王稽首。埋照奚疑。

又 同遠公和雲臣越生贈答之作

五十之年。細數生平。人間可哀。看白首相知。晨星寥落。朱門先達。覆雨喧豨。只此貧交。陶然永夕。蹴鞠彈棋。更舉杯。交驩甚。記看花並出。踏月偕回。千金散盡還來。算細故寧容芥蒂哉。況白雪連箱。讀之氣盡。紅牙一曲。聞者心灰。亟續曩游。競投新闕。從此蕭朱忍見猜。真嘉話。使詞場數子。笑口齊開。

又 題西溪釣者小像

彼君子兮。自序生平。西溪釣徒。有柴門臨水。一羣鵝鴨。松關負郭。四壁圖書。註易逍遙。彈琴廓落。屈指知非十載餘。時釣者年六十有九焚香坐。俯衣暉傑閣。飽瞰晴湖。多時興在乘桴。且一葦蒼茫。縱所如。看筆牀茶竈。沿流容與。漁莊蟹舍。夾浦縈紆。



乍叩閒舷或延新月。秋水長天碧似蘆。掀髯笑。笑人方夢鹿。我正觀魚。

又 秦對巖太史餉酒饌至詞以謝之

雨挾泉飛。風助杉吟。調調刁刁。正梅剛破臘。檀勻臉靨。山爭釀雪。粉翦翎毛。水坼龍鱗。樹窪蛇腹。蒼莽空山捲怒濤。吾衰也。恰閒思說餅。狂欲餽糟。故人相念何勞。遣銀鹿持箋訊老饕。更厨娘斫鱸。幾絲薑橘。索郎瀉玉。滿甕蒲桃。雞跖雙持。腹映偏勸。浮拍中山也自豪。吾醉也。向牀頭舞劍。席上歌騷。

又 爲高汝敬尊公季遠題像并贈汝敬季遠忠憲公季子

彼君子兮。朗若玉山。爛若朝霞。歎三閩香草。忠臣有後。七賢修竹。處士無家。畫癖書淫。酒鎗茶董。滿院桐陰。一帽斜。眞瀟灑。負薪而歌者。優孟誰邪。賢郎品更稱佳。只落日祠堂守暮鴉。向山頭荷鋤。追隨猿鶴。泉邊鍵戶。箋釋蟲蝦。北郭騷貧。東方朔餓。一片空庭扁豆花。軒渠也。任韋平父子。兩代宣麻。

又 留別伯成先生和澹心韻

憶數年間。爲汗漫遊。輕去其鄉。正城樓入夜。無邊草白。關河放溜。極目沙黃。廣武山雄。礪礪路隘。何必愁人始斷腸。風吹盡。是三河俠少。六郡名王。牛衣仍臥王章。笑病馬依然戀戰場。恰何來同調。金荃一卷。重逢高會。紅燭千行。風刮琵琶。霜枯筆筴。又惹歸帆帶雨張。頻回首。是難忘官閣。酒綠茶香。

又 聽梧軒夜集仍疊前韻

烏鵲驚飛。繞樹無枝。誰爲故鄉。歎十年失路。愁雲淪白。三秋伏枕。病葉刪黃。欲哭不能。欲歌不可。冷盡吳鉤一寸腸。繁華夢。夢華清全部。岐薛諸王。從頭細與平章。算紅燭。今番第幾場。正檀槽滾徧。嬌鶯碎語。碧空界破。歸雁分行。此夜筵前。明朝河上。擊唾壺兼作拍張。梧軒好。待來春重到。劈紙添香。

又 病中雲臣餽我藥貲賦此志謝

有嘯於梁。其來如風。公然叩門。是二豎挪揄。穴人焦府。五窮跳盪。絆我朝昏。鼠鬪庭前。蟻喧牀下。敗壁徒懸犢鼻褌。黔婁婦。空典釵訪卜。剪紙招魂。無錢藥裏休論。至

今日方知扁鵲尊。歎殘杯冷炙。誰遣野老。淒風碎雨。孰念王孫。只有貧交。偏承厚誼。管鮑分金古道存。前期在。待稍蘇肺氣。同問真源。

又 余臥病澄江。不能應試。主者頗難之。竹逸爲經營良苦。乃始得請歸來。作此自嘲。并以伸謝。

羅隱江東老。署秀才。不幸似之。怪自負上流。偏搜兔冊。曾稱男子。卻溷牛醫。壯不如人。老之將至。那更空牆病馬嘶。歸去爾。儘嚇人腐鼠。笑我醯雞。紛紛路鬼相疑。小敵當場。胡怯爲。謝主臣不敏。怯誠有是。明公垂諒。病亦非欺。顏子屢空。伯牛有疾。合受先生譴責詞。真窮矣。幸江城恰遇鮑叔於斯。

又 余旣沈疴瀕死。而遠公亦一病累月。乃其病中獨持齋甚堅。詞以訊之。瀕死三秋。僊臥十旬。已而已而。歎參苓暴貴。婦難竊藥。雞豚差賤。妃可呼豨。黃雀披綿。紫螯堆珀。更朵先生病後頤。屬麀耳。任人呼其鄙。我舉其肥。相憐同病。奚疑。只松下君偏折露葵。但瓠稱折項。欣焉命七魚名石首。誓不沾匙。我輩衰羸。全憑膾脯。

待得生天是幾時。言非戲。請相隨。果腹莫漫攢眉。

又 遠公臥疾長齋。余既與雲臣作詞寬譬。乃接來章有承歡有歎頤養空文。

自罰十年藜藿之語。因復作此廣之。并邀雲臣共作。

三復君詞。九轉之腸。淒如峽猿。痛百年菽水。半虛滌灑。九原松楸。難逮雞豚。莫打慈鴉。惟鋤孝筍。繡佛長齋。踞墓門。真嗚咽。念小人有母。綿定奇溫。羨君獨行偏敦。只慰藉吾徒。尚有言。記於陵廉士。生鵝可食。曾參孝子。膾炙常飧。禮謹其踰。親憂其疾。滅性寧酬罔極恩。還相勸。願終辭藿食。亟進熊膳。

又 詠菜花

極目離離。徧地濛濛。官橋野塘。正杏腮低亞。添他旖旎。柳絲淺拂。益爾輕颺。繡襪纔挑。羅裙可擇。小摘情親也不妨。風流甚。映粉紅牆底。一片鵝黃。曾經舞榭歌場。卻付與空園鎖夕陽。縱非花非草。也來蝶鬧。和烟和雨。慣引蜂忙。每到年時。此花嬌處。觀裏天桃已斷腸。沈吟久。怕落紅如海。流入春江。

又 郝元公先生生日同杜于皇蘇崑生黃稚曾家集生署中觀劇詞以紀事  
兩地人師十載問奇相依講堂。正郝隆長者居官磊落。陳琳下士閱世清狂。昨到梁  
溪。重披絳帳。恰遇生申燕喜觴。華筵上看雕輪徐動。玉佩成行。圓橋觀者如牆。有  
末座酬知一寸腸。歎烏衣誰認。王家舊巷。青衫難換。陸氏荒莊。畫鼓頻搥。銀箏細撥。  
簾外梨花一夜霜。東風曉。被此情如酒。膩住歸航。

又 甲寅立夏日同萬紅友吳天石過雲臣齋頭賞牡丹作

每到春餘。便過君家。來衝綺筵。正棟花風裏。金鈴細響。湖山石畔。繡幔低褰。綠葉扶  
紅。瓊酥襯紫。三種傾城各自妍。疏狂客。更詩催弈聖。酒引僧顛。時蘇仲補放庵上人  
在座沈香不記何年。算天寶風流事邈然。記錦袍學士。新聲倚曲。淡容虢國。薄醉  
朝天。事去休提。愁來須謝。眼底明妝盡可憐。春歸矣。仗花間蜂蝶。邀取春還。

又 爲雪持題像卽次原韻 像作大雪中數燕姬箏琶夾侍

屈指生平。衣葛知寒。食梅苦酸。倩冰綃數尺。圖成行樂。梨園一曲。譜出邯鄲。富貴何

常男兒自有除卻昇天作底難。掀髯處。怪六花一夜白盡江山。長空舞絮漫漫。縱漢苑吳宮夢裏看。喚燕支小婦。霓裳夜讌。迴波別隊。毳幙春寒。滿院紅肌。一簾香雪。老放英雄此內閒。吾狂甚。嚮畫中笑乞最後雙鬢。

又 題竹逸小像 像在萬竿翠竹中

誰伴先生茗椀。鑪薰書籤筆牀。記慈恩釋褐。名喧三殿。定昆乘傳。檄諭諸羌。萬里辭官。一身入畫。抽卻朝簪。換芰裳。琴樽外。更陰陰。空翠箇箇篔簹。竹郎閒與評量。論樑棟何須羨。豫章任截爲拄杖。躡他嵩華。劈成橫笛。吹出伊涼。根作龍拏。節如劍拔。誰許斑痕上。苦篁聞言喜。竹得風而笑。滿院笙簧。

又 曬書

憶昔吾家有萬卷樓。城西亳村。自江陵道盡。牙籤半失。咸陽焰熄。玉軸猶存。借去一甌。亡來三篋。墨化妖螭。赴海門。無多剩。似亂餘。故舊賣後田園。叢編暇日。還捫與藥裏零星。曝滿軒。任半生穿穴。碎同蠹蝕。有時發作。陡若龍掀。貧極須捻。杜詩盡捻。

書籍賣來問爾東家老來怕讀。閒對秋陽自較翻。吾休矣。亟束書高閣。且纜吾禪。

又 題徐二玉小像

貌君者誰。尺幅經營。天機渺漫。縱偶然位置。偏能高脫。無多筆墨。只取幽閒。緩帶溪橋。微吟山寺。目送飛鴻自往還。蕭疏極。任人情物態。了不相關。多君逋峭難攀。只日向衡門賦考槃。況霜紅露白。秋冬之際。杉黃柏赤。山水之間。竹杖逍遙。芒鞋散誕。古樹槎枒挂籜冠。從君去。好或窮巖岫。或弄潺湲。

又 懷程崑崙山西武鄉人舊判鎮江陞任安慶同知今爲耀州守有文名

疇昔從公上松寥山。觀北府兵。正魚龍蒸黑。魂魂海氣。水雲淪白。滾滾江聲。采石乘潮。皖桐移鎮。異代龔黃比大名。蘆溝驛。恰飛書寄我。感念平生。庚戌夏漳河署中接崑崙都門札。一麾出守孤城。又重向咸陽道上行。歎地名殺翽。耀州漢殺翽地黃沙颯沓。天空盪屋。紅樹縱橫。落照窮邊。壯年薄宦。手板將迎歲月更。驪山頂。望并汾秋色。一片鄉情。

又 懷畢載積山東淄川人舊通州守

憶與公游在癸卯冬。余方數奇。恰軍山萬疊。奔濤駭浪。後堂十夜。急管繁絲。頗怪推袁。非由說項。意外深慚國士知。顛狂甚。曾雪天腰鼓。上屋梁騎。入春又賦將離。悵別緒。茫茫不自持。正魂銷去國。燕泥剛墜。神傷餞客。柳帶將垂。記得微波。送君淮浦。倚棹偏於漂母祠。臣老矣。念王孫一飯。欲報何時。

又 甲寅十月余客梁谿初五夜剛半忽有聲從空來窅然長鳴乍揚復沈或曰此鬼聲也明日鄉人遠近續至則夜中盡然既知城中數十萬戶無一家不然嘻亦大異矣詞以紀之

葉黑楓青。紙窗碎鳴。其聲寥然。似憫體血繡。千般訴月。芻靈蘚澀。百種啼烟。鴉嘯轉張。猿吟淒異。崩剝前和樹腹穿。親曾聽。在他鄉。獨夜老屋東偏。詰朝遠近喧傳。編簷靈啾啾。卻復前。豈長平坑卒。盡憑越覲。東陽夜怪。羣會吳天。滿縣彭生。一城伯有。鬼董搜神仔細編。然疑久。怕難探龜莢。且問筵等。



又 呈伯成先生和仲震原韻

耕二頃田。栽八百桑。何時始諧。只強弓硬弩。消磨歲月。素箏濁酒。開拓胸懷。日晝栖  
栖。青袍鬱鬱。世上何人管樂才。狂歌發。正半天松響。大海瀾迴。多公酷愛輿臺。笑  
昨日于思今復來。且東籬載酒。看殘黃菊。西園把袂。踏破蒼苔。萬事糾紛。一身偏側。  
舍此吾將安適哉。吾休矣。任齒同馬長耳。似龍乖。

又 薛國符方伯招飲留宿園亭

秋色玲瓏。夜火參差。飛欄複廊。更丹楓黃菊。綴他簾幙。紅欄黛閣。映在池塘。岳牧崇  
班。溪山傲骨。小築烟霞。彷彿豫章。環堂後。走匡廬雪瀑。彭蠡銀瀧。公初從江右歸酒  
酣萬感茫茫。說番舶曾經。犯瘴鄉。時話昔年粵東圍城事正全家百口。鶻啼珠島。孤  
城大海。咒吼花洋。亂後名成。兵餘興嬾。又見蓬瀛好種桑。揮杯勸。任接天烽火。穩臥  
滄浪。

又 秋夜聽梁谿陳四丈彈琵琶

瑟瑟陰陰。嗟哉此聲。胡爲乎來。似靈鼃夜吼。狂崩斷岸。角鷹秋起。怒決荒臺。忽漫沈吟。陡焉掩抑。細抵游絲。綴落梅。冰絃內。惹一宵涕淚。萬種悲哀。十年前記追陪。乍握手。霜燈暗。自猜。歎朱門酒肉。誰容卿傲。梨園子弟。總妬君才。牢落關河。聊蕭身世。迸入空庭。小忽雷。顛狂甚。罵人間食客。大半駑駘。

又 贈別龔佩紉

南郭先生。門巷蕭疏。庭除寂寥。恰一灣蓼岸。遠檣列。薺數間。竹屋。夜雨鳴濤。曾記當年浪游京國。燕趙悲歌也。自豪。歸來後。喜依然。三徑。仲蔚蓬蒿。乾坤羣盜。如毛歎萍梗。吾生信所遭。且風燈。擘阮和之。檀板。烟帆。醉菊。侑以霜螯。十日聯牀。一尊下榻。白飯青芻。累素交。明將發。怕空江。疊浪。萬籟悲號。

又 留別韓聞西

昔客京華。花月無愁。文章有神。記歌終慣竊。念奴笛曲。酣來曾吐。丞相車茵。俠骨嵯峨。壯心騰上。肯受藍田醉尉。噴。休羈絆。笑本非殘客。詎是窮賓。百年幾度佳辰。且

乞取溪山自在身。想後園鶯啜。新簧尙澀。小橋梅事瘦。玉將滅。戀棧何爲。脫鞵亦可。歸趁風光弄早春。難忘處。只隔窗燈火。兩月情親。

又 題袁重其負母看花圖

吉貝沿街。枳殼叢闌。葵榴映牆。算三牲五鼎。貧家時缺。千紅萬紫。夏日方長。衣著斑斕。躬爲痴僕。負得萱闈。出北堂。藍輿少笑。相君之背。輓勝匡牀。筍籬樂塢。徜徉。惹白髮。逢歡意轉傷。記早年歌鵲。花誰上鬢。中宵刺鳳。草盡縈腸。人說兒賢。天教娘健。描畫還憑。願長康。披圖羨較看花上苑。事定誰強。

又 贈徐竹虛竹逸令弟家有我園

彼君子兮。藁竹青青。而中若虛。是何家第五。名齊驃騎。蜀中揚子。賦似相如。疇昔賢兄。溟雲遠宦。常羨優游。下澤車。今偕隱。成往來二老。西澗東畬。我園景物蕭疏。有雪檻烟廊。水竹居。算磕頭促膝。一羣梅鶴。望衡對宇。幾箇樵漁。與我周旋。小園日涉。近手花枝。壓架書。他家事。笑半泉綠野。久作寒墟。

又 舟過楓橋見鄰舫女郎倚舷攬鏡同弟緯雲賦

節是花朝。地是姑蘇。天又新晴。見參差畫鷁。紅欄粉幔。嬌嬈飛燕。翠袖銀箏。衆裏一人。悄焉自惜。出匣圓冰響一聲。玲瓏甚。爲綠窗浸水。覷得分明。酒潮潑灑初生。使周昉丹青寫不成。正畫眉橋畔。簸錢年紀。茨菰灣後。撩鬢心情。百幅鵝黃。半篙鶯脰。碧浪東吳處處平。誰藏取。又一輪春水。織筍斜擎。

又 贈雲間何伯輝 工治目疾

有地行仙。作大藥王。我今見之。自兩儀失曜。光翻銀海。百靈奮怒。訣付金鑪。日月爲璫。陰陽作冶。爭禮光明藏導師。分明甚。見月中蟾兔。世上醜雞。古今幾箇英奇。戲邀取先生妙手醫。是周時老輩。官餘左史。秦庭烈士。臞後漸離。半黍空青。幾莖仙滌。發覆開矇在此時。吾還乞。爲看花霧眼。并仗君治。

又 初夏同徐季重張邑翼朱致一葉九來家躬乙汎舟郭外追晤葛龍仙於

攸聞上人精藍兼送龍仙之西村別業

半艇晴雲兩岸疏花。渚禽喚風。正坦迤江郭，繞籬竹樹，零星烟寺，映水簾櫳。葉兒明窗，禪牀茶磨。天許閒人片刻同。僧廚綠。是豆香乍摘，筍嫩纔烘。何須避世牆東。有無數前游似夢中。記當年漫興，流連花鳥，平生豪氣，傲睨雲龍。能幾何時，一寒至此，對坐相看鶴髮翁。桃源路，倘漁郎尋到，莫遣雲封。

又

澆堂先生客南昌。幕府屈首經師。已踰兩載，甫歸廣陵，詞以訊之。

以磊落才，而注蟲魚，猶然譏之。況鬚如蝟磔，縮居幕下，與同驥渴，屈作經師。車廡三間，逸園半冊，求我童蒙，稚角兒，真奇事。似販茶商婦，出塞文姬。墨應盾鼻能爲。乃夏楚終朝，手自持。更灌嬰城下，三年烽火，彭郎山後，一片旌旗。月黑燈青，樽空夢破。想見書堂兀坐時。歸來鬢，惹小蠻忙問，雪到如斯。

又

題汪舍人蛟門少壯三好圖。圖作羣姬挾箏，度曲擁書萬卷，數鷓尾。

貯酒其旁，圖上題詞甚多。豹人則欲開閣禁釀，于皇則欲焚硯燒書。二說紛然，余故作此詞。

酒庫經堂。正競箏琶。客聲沸然。是秦川遺叟。整襟而入。杜陵野老。裂眼而前。或導荒淫。或規放誕。莊語談辭。盡可傳。喧豕甚。似輸攻墨守。訟芋爭田。不聞博奕。猶賢。但適興焉。能便舍旃。況漑堂集內。頗言聲伎。茶村暇日。詎廢丹鉛。卿論誠佳。吾從所好。亟喚蠻娘。鬪管絃。牙籤畔。漸玉簫風起。吹動觥船。

又 酬贈黃交三卽次原韻并示尊甫仙裳賢昆月舫

三四年來。老情亡聊。惟耽小詞。任世皆嗤僕。爲無益事。人方目我。是有情癡。花前生。水天別館。似夢年光。暗裏飛。菖蒲紙。把心情淡寫。偷寄崔徽。君才十倍陳思。愁病羈窮。屬和遲。況豪吟老庾。聲情磊落。狂歌法護。才調恢奇。我渡京江。重游隋苑。惆悵間行杜牧之。當年事。記萬家水榭。紅袖齊垂。

又 戲詠閨人踢毬子者

嬌困騰騰。深院清清。百無一爲。向花冠尾畔。翦他翠羽。養娘篋底。檢出朱提。裏用綃輕。製同毬轉。箴盡牆陰一線兒。盈盈態。訝妙躡蹴鞠。巧甚彈棋。鞋幫只一些些。况

滑膩纖鬆不自持。爲頻誇猥捷。立依金井。慣矜波俏。礙怕花枝。忽憶春郊。回頭昨日。扶上闌干。剔鬢絲。垂楊外。有兒郎。此伎真惹人思。

又 紙貴戲作

老至常閒。惟藉鈔詞。以永居諸。買衍波萬疊。燃脂瞑寫。薛濤一篋。映雪晨塗。甲乙周秦。拊擋辛柳。卷比牛腰。一樣粗。掀髯笑。任字嘲類疥。墨晒同豬。今年紙價如珠。問洛下當年。有是夫。縱畫他灰焰。還疑帝虎。刻他竹粉。莫辨之無。已矣途窮。幡然事濟。昨種芭蕉十萬株。成陰後。取花間全集。作擘窠書。

又 題徐禎起六十斑斕圖

老友者誰。城北徐公。舞衣斑斕。有豆區一畝。藤花半架。晴山萬疊。碧浪千灣。隱不求名。憂寧用老。竹戶蓬門。盡日關。家庭樂。喜龐眉矍鑠。皓首團圞。相從樵父漁蠻。只戲鼓歌樓。恣往還。笑鼎鼎朱門。幾人親在。番番黃髮。誰便身閒。何似貧家。蕭然戲綵。六十兒從膝下頑。倖蹉跌。惹八旬堂上。莞爾開顏。

又 贈宋御之

君果然耶。五十之年。而僕如之。記王瑀宅畔。呼鷹盤馬。伍胥塘上。賭梨園棋。一水青山。滿船紅燭。綰定垂楊萬縷絲。蘭亭會。正客逢雨後。人到春時。如今舊事難追。被海水天風。瀨洞吹。將曹劉沈謝。掩同粉絮。或縈簾幕。或墜污泥。南國風流。東都耆舊。幾箇樽前某在斯。吾與汝。似春歸蝶舞。花盡鶯啼。

又 送友入山採茶

十里溪山。竹粉纓巒。蘭風藻川。有蒙茸羅葛。蔽虧曦月。坦迤澗壑。向背林泉。夕渡遄歸。晨漁緩出。谷唱潭吟韻邈綿。居此者。是秦時毛女。漢代琴仙。人家四月開園。送君去。剛逢穀雨天。恰晴村綠掩。數間僧竈。清江翠箬。一帶商船。拍處盈盈。焙餘冉冉。歸臥迴廊瘦石邊。松濤沸。正龍團乍碾。蟹眼初煎。

又 梁谿西郭外有芹野草堂。吾宗沂州公別業也。公子某豪情斯在。治習未

忘。乃以李氏之平泉用作井公之博進。千金一擲。園屬他人。迄今已三易主。



矣公四世孫集生暇日扁舟經過此地臨風感舊惆悵絕多作詩紀事同人俱有和章余亦填詞一首

過西定橋有芹野園崢泓坦迤記花闌藥嶼島何澹澹烟汀雨瀨水太羅羅樂去爽鳩愴深銅狄牧笛吹風夜起波憑高望悵舊家光景邈若山河小樓一棹經過奈三度亭臺易主何縱王孫無恙東風認否主人重到燕子知麼笑說當年携繡一擲絕似名姬換馬馱君休恨較臨春結綺博進誰多

又 泊舟胥江大風雨

胥母門邊暴雨奔渾盤渦撞舂見後潮文種銀袍鞞鞞前山鄧尉黛髻迷濛我豈茶商得非估舶詎少家園半畝宮因何事唱江樓囉嘖愁水愁風須臾窈窕冲融又浪靜波恬漾遠空正淫龍歇舞天連島外渴烏乍躍日在禺中了了層青迢迢一碧依舊殘汀野廟紅吾長笑笑向來作劇多事天公

又 由丹陽至京口舟中放歌

月黑凌亭。風吼練湖。雪山皚皚。正楚天欲壓。橋多于薺。吳波乍染。岸碧如苔。對此蒼茫。居然遼落。記否江東出霸才。斜陽恨。惹行人憑弔。商女悲哀。丹徒客。昨帆開。問劉季奴。今安在哉。奈六朝剩壘。沙淘浪洗。千尋斷鎖。雨蝕烟埋。下瀨艤。橫江士馬。重見連雲列戍排。吾衰矣。且沽京口酒。上妙高臺。

又 從盱眙山頂望泗州城

立而望之。松耶柏耶。其盱眙乎。見半空樓閣。林巒掩映。從風城郭。沙澗縈紆。卻顧泗州。窪然在下。呀者成邱。水一盂。中央者。界幾條冷瀑。一線明珠。洪濤日夜歸墟。有鐵鎖浮橋。控舳艫。看奔潭橋馬。神功混淼。轟騰賽鼓。天籟譁嘩。十廟弓刀。百年帶礪。落日平田噪野鳥。堪憑弔。悵歌風亭長。泗上雄圖。

又 月夜渡江

粉月一規。雪浪千條。何其皓然。正稀微吳語。佛狸城下。參差楚火。胡豆洲邊。忽聽江樓。誰吹橫笛。今夜魚龍詎穩眠。推篷望。見秣陵似夢。瓜步成烟。揚州更鼓遙傳。記

小杜曾游是昔年。奈邇來情事鬢絲禪榻。當初況味。綠罽紅絃。萬古精靈。六朝關塞。都在螻蟻牛渚前。吾長嘯。把一杯在手。好箇江天。

又 秋日登姑蘇元妙觀彌羅閣

肅肅多陰。蕭蕭以風。危乎高哉。見飛臺榭。虹蜺轆轤。梅梁藻井。龍鬼嵒嵒。燈燭晶熒。鐸鈴戛觸。虎篆雷音。百幅裁鏘。劍佩是南陵朱鳥。北極黃能。玲瓏月殿雲階。況珠斗爛。嫵絕點埃。正井公夜戲。犀杵象博。麻姑盡降。繡帔瑤釵。叱日呼烟。囚蛟鎖魅。五利文成未易才。銀鸞背笑蟾蜍窟裏。金粟爭開。

又 爲錢塘女史雪儀作并戲示雪持

鬢影疏蕪。吟卷叢殘。諷淨名經。忽誰家偷遞。香詞一篋。人間那得。璧月雙星。頓惹詩顛。重溫昔夢。綺語瀾翻。懺未能。吳山下。想歌飄檀板。酒點銀瓶。龍堂已泮春冰。說小妹天人嫁許曾。雪儀妹已許字龍舍人。二爲只捧心處姊。鶯啼南國。掃眉才子。蝶怨西陵。綠萼爲媒。紅絲作聘。佇盼飛瓊入畫屏。東皇約。要兩般豔雪。玉戲前櫺。時雪

持有待闕鴛鴦之意故爲兩雪之語

又 詠硯爲李若士賦若士時將入楚

誰向螭潭剝紫雲。肝鑄白玉脂。便曹王臺上。嗤他銅雀。徐陵序裏。輸卻琉璃。瘦比龍精。嬌踰鵲眼。蒸出韓文與杜詩。窪而黑。是媧皇煉膽。嬴政鞭遺。醉磨盾鼻能爲。還笑倩防身鳳味隨。但每看劍動。神先跳盪。時聞笛起。與更淋漓。此去衡陽。祝融峯上。要寫懸崖百丈碑。顛狂甚。叱青猿代捧。蘸墨親題。

又 題崇川范廉夫松下小像友人女受長公

松下誰耶。玉貌臨風。于思于思。正濤翻翠鬣。支離拗鐵。霜凋黛甲。剝裂侵苔。韋偃皴成。畢宏畫就。戰壑干霄未易才。因何故。卻嗒焉若喪。萬慮成灰。琅山紫鷗喧。還記得君家往事來。有四海賓朋。極天甲第。滿堂絲管。夾水樓臺。如此兒郎。居然漂泊。范叔寒今至此哉。長安道。且款歔話舊。懷抱誰開。

又 題王山長小像

己卯之秋。余甫成童。流觀簡編。見諸省賢書。楚材最妙。於中傑作。數子尤傳。舊雨石  
霞。金昆亦世。先後同吟。杖杜篇。昭邱上。只思君不見。君在誰邊。相逢各已華顛。算  
燕市論交。亦偶然。嘆破硯。枯琴。此間孤冷。豪絲脆管。別屋天妍。三尺生綃。一泓冰雪。  
貌爾蕭疏。老鄭虔。掀髯笑笑。笑人間。何限圖畫。凌烟。

又 詠慈仁古松送陸蠡思歸錢塘

種自何年。金邪元邪。穆乎高蒼。恰崩濤亂瀉。熊啼兕吼。枯根直裂。虎跛龍僵。客有將  
歸。我來樹下。萬斛藤蘿漏夕陽。摩挲歇。笑樹猶如此。時代蒼茫。青春正好還鄉。只  
唱罷陽關。易斷腸。記前月揮鞭。將游梁苑。今朝分袂。竟返錢塘。世事何堪。人生難料。  
柿葉翻時。又悼亡。歸休恨。有一湖晴綠。西子新妝。

丹鳳吟 送別越生和雲臣韻

細數頻年游處。舞榭鶯梳。歌筵燕掠。墊巾側帽。雙倚東風院落。簾紋新染。水烟小定。  
更憶溪邊。畫橈斜閣。似夢如塵。情緒事去凝思。花影還籤牆角。今夜陽關怕唱。玉

樽激濤持旋卻。若到無諸國。有連天嘶馬。匣樹飛鵲。輕紅荔子。籠徧戈船綃幕。我在江南殘照裏。只行蹤落拓。武夷回首。倘依然念著。

輪臺子 采菱

別浦蓮歌乍歇。又棹入菱潭深窅。西風亂水瀾瀾。斜日遠帆了。小娃蘭槳齊開。鬪雲英。一色裙波裊。纔低珠腕。又弱蔓柔莖。將人繞。何愁角刺藤兜。把千頃水煙暗。箇羨清芬。較菰米荷房。一般幽悄。語折菱鄰船。再來須早。怕明日寒塘。剩白蘋紅蓼。櫓聲幽。驚飛渚鳥。笑盈盈。併摘花歸。可許妝臺照。

八歸 二月十一夜風月甚佳過水繪園聽諸郎絃管燈下因遣家信凄然不成一字賦此以寄閨人

彈得絃清。飄來笛脆。曲室諸郎歌管。他鄉風月佳無比。只是中年以後。心情頓嬾遙。憶故園妝閣上。鎮玉臂。雲鬢淒斷。傷心處。何事尊前聽一聲河滿。卻是絳河欲沒。珠繩乍轉。畫角譙樓哀怨。舊事如塵。新愁似夢。可惜一場分散。奈天涯滋味。瞞不過。

南歸魚雁吮霜毫。纔提還倦。莫慮春寒。羅襟紅淚暖。

又 秋夜婦病吳門遂不成行賦此寫懷

藥烟裊罷。爐灰畫盡。城上戍火半滅。去年記入西風候。曾也瘦人如菊。秋衾勝鐵。差喜而今身較健。奈婦病、吟聲酸切。惹一派、繞砌啼螿。怨苦替人說。准擬楓林蟹舍。霜篷霧翳。去弄烟波寥泐。秋常濃處。月將圓夜。擁權沈吟旋輟。算不如春裏。雨雨風風。過時節。偏逢著、五湖霽景。萬斛晴光。洞庭秋噴雪。

又 春夜偶成

城陰水際。閒尋往事。光景零亂難寫。畫眉橋北沿牆去。曾有迷藏伴侶。簸錢亭榭。生小誰忺鉛共粉。說不盡、衣裳淡雅。碧檻外、蠻柳絲絲。句綫恍如畫。今日延秋坊畔。令狐宅裏。依舊好花開也。杏梁燕子。玉籠鸚鵡。尙說十年前話。水晶箱子在。遮莫還存聖檀帕。東風起、櫻桃細落。糝上當初鞦韆紅粉架。

又 杜家廟距濟南四十五里有旅館頗幽韻砌下玉簪一叢尤楚楚可念徙

倚久之詞以寫懷

鞭絲小弄。征塵輕浥。雲水一片寥廓。涼橋卸馱。聊停憩。遙送明湖杳突。爽氣森薄。小閣矮窗。新粉壁。更繞砌。疏枝幽萼。背立處。暗省花名。瑣事頓縈著。惆悵臨行。那夜低鬢偏髻。惜別心情如昨。側門迴盼。倚闌人在。扶定腰身纖弱。嘆萍蹤一霎。峽雨湘烟。楚天各。思量煞。瓊釵滑膩。枕畔朦朧。三更和笑落。

賀新郎 雲郎合卷爲賦此詞

小酌醱醑釀。喜今朝、釵光篋影。燈前滉漾。隔著屏風喧笑語。報道雀翹初上。又悄把、檀奴偷相。撲朔雌雄渾不辨。但臨風、私取春弓量。送爾去。揭鴛帳。六年孤館相依傍。最難忘。紅蕤枕畔。淚花輕颺。了爾一生花燭事。宛轉婦隨夫唱。努力做、藁砧模樣。只我羅衾渾似鐵。擁桃笙、難得紗窗亮。休爲我、再惆悵。

又 賀阮亭三十

千馬江東走。陪滿座、鄒枚上客。爲君稱壽。七葉貂蟬連鳳闕。坐擁銀箏翠袖。又兄弟、



才雄八斗。三十王郎年正少。拾黃金、鑄印雙懸肘。此意氣古無有。淡黃十里隋堤柳。更多少。竹西歌吹。樊川詩酒。滿目關山原不惡。只是繁華非舊。算惟有、文章不朽。簌簌珠簾人不捲。看使君、燈火春城口。依稀羨、歐陽守。

又 瓜步與姜子嘉

佛狸祠下別。看此處、江花如練。江烟似織。憶昔結交堅戴笠。江左周郎英發。正爛醉、金釵之側。宋玉石之計。倪甫草俱大俠。更穎川、年少風流客。仰天嘯。冠纓絕。十年往事同陳蹟。恰傳聞、洛陽金盡。櫟陽獄急。一旦二桃疑盡釋。廣柳車中人出。又買得、如花小妾。送客驚心千萬里。但銷魂、此際真愁絕。吾自有、崩通舌。

又 甲辰廣陵中秋小飲孫豹人漑堂歸歌示阮亭

把酒狂歌起。正天上、琉璃萬頃。月華如水。下有長江流不盡。多少殘山剩壘。誰說道、英雄竟死。一聽秦箏人已醉。恨月明、恰照吾衰矣。城樓點、打不止。當年此夜吳趨裏。有無數、紅牙金縷。明眸皓齒。笑作鎮西鸚鵡舞。眼底何知程李。詎今日、一寒至此。

明月無情蟬鬢去。且五湖、歸伴魚竿耳。知我者、阮亭子。

又 月夜看梅花

皓魄光微淥。喜東風、瓊枝璧月。清輝灑。顧影娉婷無一語。吳女纖腰初束。斜倚在、珠闌曲曲。看到夜深風露冷。浸簷前、一片團圓玉。吾醉矣。共花宿。愁腸被酒還相觸。且狂歌、莫言興盡。再斟醺醖。忽憶開元當日事。中有梅妃蛾綠。何必羨、玉奴新浴。可惜樓東三十樹。雨霖鈴、都做連昌竹。花應歎、睡難足。

又 乙巳端午寄友用劉潛夫韻

醉憑闌干吐。倚清狂、橫陳冰簟。後堂無暑。聞說吳兒工作劇。弔屈龍舟似虎。我欲唱、公乎無渡。累自沈湘卿底急。枉教人、搗碎迴颿鼓。楚江畔、葦花舞。陡然磊塊多如許。喚靈均、前來共語。酌君椒醕。呵壁荒唐何必問。死累人間角黍。尙不及、伍胥濤怒。忽發狂言驚滿座。料諸公、知我心中苦。酒醒後、重懷古。

又 爲冒君苗催妝

遲日嬌鶯囀。簸輕風、半欄芍藥。參差人面。珠絡流蘇。犀壓角。十里龍綃微捲。料好夢、一春曾選。節近菖蒲。喧笑語、借五絲、先做同心纏。畫梁上、乳雙燕。笙歌沸處蓮籌轉。翦銀燈、紅酥檀暈。暗窺韓椽。小弟陸家工贈婦。春蚓花箋。蟠徧。何況是、丹青能擅。百種烟巒俱易畫。遠山眉、第一須葱蒨。看小試、君苗硯。

又

作家書竟題范龍仙書齋壁上蘆雁圖

漏悄裁書罷。繞廊行、偶然瞥見。壁間小畫。一派蘆花江岸上。白雁濛濛欲下。有飛且鳴而悲者。萬里重關歸夢杳。拍寒汀、絮盡傷心話。捱不了、淒涼夜。城頭戍鼓剛三打。正四壁、人聲都靜。月華如瀉。再向丹青移燭認。水墨陰陰入化。恍嘹唳、枕稜窗罅。曾在孤舟逢此景。便畫圖、相對心猶怕。君莫向、高齋掛。

又

丁未五日程崑崙別駕招同談長益何雍南石崖程于金山看競渡

一鼓魚龍急。看滔滔、妙高臺下。乾坤噓吸。彷彿雲旗和翠蓋。貝闕鱗堂齊葺。料此際、百靈都集。十萬黃頭皆突鬢。挽湘累、今夜誰先及。有人在江潭泣。吳兒楫尾飄紅。

褶。但迴颿、水雲颯處。翻身徑入。不鬪黃金惟鬪捷。江水駭時欲立。惹商婦、銀箏聲澀。一霎悲歡纔過眼。漸日斜、桂檝紛收拾。山如睡、黛還濕。

又 賀程崑崙生日并送其之任皖城 五月十四日

榴子紅如繡。正綺席、吳鹽下鼓。金盤雪藕。七載南徐揮羽扇。肘後黃金似斗。北固外、晴江夜走。留取臂間長命縷。算節過、五日剛踰九。重爲我先。生壽。遷官況在懸弧後。看他日、郡庭一望。匡廬溢口。今古量才惟一石。公也文章不朽。詎更歎、一麾出守。還擬樅陽城下過。獻新詞、再進當筵酒。公倘許、狂生否。

又 秋夜呈芝麓先生二首

擲帽悲歌發。正倚幌、孤秋獨眺。鳳城雙闕。一片玉河橋下水。宛轉玲瓏如雪。其上有秦時明月。我在京華淪落久。恨吳鹽、只點愁人髮。家何在、在天末。憑高對景心俱折。關情處、燕昭樂毅。一時人物。白雁橫天如箭叫。叫盡古今豪傑。都只被、江山磨滅。明到無終山下去。拓弓弦、渴飲黃虜血。長楊賦、竟何益。

俊鶻無聲攫。羨一代、詞場老手。舍公安託。歌到陽關剛再疊。月裏斜飛兔脚。簾以外、秋星作伴。我得公詞行且讀。任侏儒、飽飯嘲臣朔。大笑絕冠纓索。中朝司馬麒麟閣。籌邊暇、南樓愛挽書生酬酢。半世顛狂誰念我。多少五陵輕薄。我有淚、只爲公落後。後夜月明知更好。問陸郎、舞態應如昨。肯爲奏軍中樂。

又 送邵蘭零歸吳門仍用前韻

易水嚴裝發。休回首、故人別酒。帝城高闕。九曲黃河迎馬首。森森龍宮堆雪。流不盡、天涯白月。君去故侯瓜可種。向西風、莫短衝冠髮。人世事、總毫末。長洲鹿走蘇臺折。歎年少、常歌不醉。此非俊物。試到吳東門下問。可有吹簫人傑。有亦被、怒潮磨滅。來夜天街無酒伴。怕離鴻、叫得楓成血。亦歸耳、住何益。

又 題沙介臣詞并柬周翼微郁東堂二子仍用前韻

健筆森擎攫。自古道、才人無命。英雄有託。黃歇墳前軍鼓動。萬弩攢平陣脚。從此後、哀鴻競作。索米長安非失策。看掀髯、意氣雄河朔。荆高輩、未蕭索。鶯花麗句傳三

閣更旅舍、同時二妙、和歌相酢。硬箭軟裘推勁敵。爽氣毫端噴薄。乍出手、雙雕都落。我去諸公應憶我。記風前、紅燭燒如昨。息壤在、速行樂。

又 秋夜飲錢宮聲寓中示譚舟石周子倣李西澗章素文仍用前韻

故態狂奴發。君莫學、車中新婦口中石闕。同是天涯流落者。休使滿頭霜雪。且斜抱、琵琶彎月。聽到鈿蟬悽厲處。更突如、鐵騎織如髮。秋聲起、在林末。三更銀甲都彈折。不須問、千年宮殿幾番人物。記得館娃人似玉。喚作平康之傑。曾遇在、蘭膏將滅。萬事古來誰最苦。只青衫、淚與榴裙血。雞未喔、酒須益。時偶及吳門王姬姬時已落籍矣

又 秋日行西苑仍用前韻

太液秋鯨攖。紅蓼底、龍舟鳳艗沿流依託。記得橫汾雄漢武。月夜波心殿脚。又玉管、金簫間作。十二雲房都已閉。只將軍、縱犬誇平朔。何處覓、鞦韆索。行人斜過梳妝閣。入耳有、菱歌雁陣泠泠酬酢。自惜書生難得見。天上桂叢蘭薄。單一派、秋荷零落。

且拉車前騶卒飲對西風莫歎今非昨。依稀奏還宮樂是日聖駕從南苑還宮。

又 秋夜對月示弟緯雲仍用前韻

戍鼓城樓發。問客裏冰輪照我幾番圓闕。一片銀河天外落。光映千門如雪。總則是漢宮明月。試上麒麟枯冢望。問誰人紅粉誰黃髮。風乍吼。青蘋末。應侯有脅憑他折。但歌罷。仰天裂眼。識卿何物。窮矣男兒方失路。復壁誰藏英傑。拚潦倒。身名灰滅。細聽秋林都颯颯。只沙場斷鏃陰燐血。良太苦。竟何益。

又 題郁東堂詞仍用前韻

龍爪槐張攪。馳突處宛駟蹴鐵。死生堪託。我把金荃詞一卷。字字寫成釵腳。是吾友東堂之作。讀罷悲風生肘腋。羨君才不減王靈朔。相憐也。總蕭索。茂陵一病成擔閣。歎客裏無多暇日。我歌君醉。醉擘銀箏彈一曲。彈到秋雲都薄。只是訴。兩人淪落。泣下羞爲兒女態。問吾生。舌在還如昨。休作苦。且行樂。

又 席上呈芝麓先生仍用前韻

打鼓船將發。看水面、怒濤似屋。巨魚如闕。一路推篷吹笛去。無數葦花搖雪。忘不了、朱門皓月。萬里沙昏聞雁叫。料孤眠、白盡離人髮。回首望、謝家末。時緯雲尙留都下

西風衰柳還堪折。喜筵上、紅牙銀燭。他無長物。話到英雄方失志。老鶻飛來傑傑。又一半、疏星明滅。歸去焚書應學劍。愛風毛、雨遍千山血。益智粽、竟何益。

又 將之中州留別芝麓先生再疊前韻二首

匹馬衝寒發。看滿目、殘山剩水。轅轅伊闕。我到關河驚歲暮。卻值梁園飛雪。不須怨、汴京烟月。歌罷添衣仍命酒。只今宵、離恨多於髮。男兒事、有本末。珊瑚十丈憑敲折。歎世上、非公知我。幾成怪物。此外半生誰鮑子。負此真非豪傑。最感是、留髡燭滅。後夜相思銅雀下。想漳河、永染啼痕血。今不醉、後何益。

獸炭簾衣攬。華筵散、此身飲罷。茫茫安託。我有小秦王一曲。吹到城頭牆脚。今日事、何人所作。漫對西風增感慨。且臂鷹、躍馬游河朔。功名志、總蕭索。橫刀難上凌烟閣。吾且與、老兵健卒。悲歌酬酢。曾記睢陽添賊火。萬弩圍城肉薄。烽一點、陸渾山落。



轉眼平臺風物好。喜笙歌。宛雒人猶昨。不思蜀。此間樂。

又 贈程穆倩時年六十

痛飲蕪城夜。喜春秋。甫當六十。詞場雄霸。跣跂短歌歌。自壽。幻作蟲言變化。是慢戲。滑稽之亞。穆倩自壽作木蘭花慢四首中皆爲蟲言蟲達封侯何必問。喚蟲蟲。小語飄檀麝。君擊缶。吾行炙。四筵安坐爭相詫。算絕藝。非花薑尾。古來無價。牽率老夫兒子五。索笑挽鬚燈下。論此樂。勝於僕射。有酒且沾澆磊塊。任無錢。也向壚頭貰。休辭醉。先生詐。

又 徐竹逸招同幾士兄閣上看梅

一樹都如雪。君不見。尊前有客。歌聲辛切。醉倚花魂。花欲語。花似笑。人愁絕。我一語。亦爲花說。人既多愁。人已瘦。問花何瘦。瘦亦隨人折。相看處。酒休竭。臨風細取花重閱。羨物外。孤高簡傲。花中豪傑。恆怪世人輕比並。浪道檀腮粉頰。渾不稱。此花風骨。我欲擬之。銀作鎧。趁月明。浴盡三軍鐵。神還似。史遷潔。

又 爲徐晉遺催妝時十二月初八夜大雪

雙綰同心結。喜今夜、新人二九。殘年臘八。幾隊紗籠徐引導。光漾黃金跳脫。何況是、玉人如月。小捉養娘簾底問。問徐公、城北人爭說。燈下看、果英發。三公更自風流絕。響瓊籤、且煩青女。細飄珂雪。爲驗謝娘才調好。故把吳鹽輕撒。不須慮、銅輿街滑。我識李暮吹笛手。但今宵、鳳竹休頻擊。枕函上、印紅頰。

又 都門洗象詞同緯雲弟賦

百戲魚龍聚。晝陰陰、雲房冰洞。帝城無暑。日晡波心張水幄。列坐徹侯公主。其外有、傾城士女。少頃蠻奴乘象至。整鞭梢、踏入金塘去。喧逐甚、爾何怒。鼻殷捲盡西山雨。看水面、濤飛海立。銀傾雪注。猶記昆明傳象戰。秣馬夔童跋扈。今已慶、太平寰宇。浴罷含元宣立仗。望赭袍、一朵紅雲吐。率百獸、御階舞。

又 見南苑阱熊而歎之同吳天石賦

南苑花如繡。見一帶、長楊虎圈。咆哮百獸。此物傑然。餘猛氣。攀檻時時欲吼。像鐵騎、

金戈馳驟。可惜當熊人去。杏鎖宮槐。冷落黃金鑿。誰侍奉。金門帶。爛羊都尉通侯狗。但驍雄。偏嗟失勢。所遭不偶。猶記深山騰蹕日。獅子猢兒爲友。追險怪。曾踰宇宙。此日草間狐兔盡。束身歸。五柞同猿狖。蹠已落。宰夫手。

又 季滄葦侍御廣陵納姬爲賦花燭詞

螺子眉峯滴。遙想像。文窗冉冉。積鬢的的。誰遣朝天青雀舫。小泊烟江水驛。夾岸有。鈿車畫戟。日至尙遲添一線。恰宵長。更照團圓月。時仲冬十五夜爲長至前十日月影底。人兒出。仙郎況是文章伯。人都羨。金閨華彥。玉清仙籍。盡道臺霜行峽雨。先把鷓鴣冠摘。纔卸到。紅巾鞞歷。今夜當關須記取。對府中。烏與鄰雞說。休相攪。恁憐惜。

又 汝州月夜被酒感懷董二

今夜清輝苦。眞醉矣。人生有幾。關山如許。極目海天渾一碧。回首家鄉何處。總則是。年年羈旅。脫帽憑闌何限恨。倚風前。細把寒更數。誰更打。嚴城鼓。無端忽憶疏狂。

侶。曾記得、烏衣巷口。別來如雨。明月也知千里共。照盡秦樓楚戍。應漸到、故人黃土。只恐白楊和月冷。比人間、更有銷魂處。汝河水。白如乳。

又 登龍池絕頂憑虛閣同雲臣遠公賦

極目真空闊。倚巉巖、層巒競瘦。老松都活。湧洞荒寒非世境。昏曉陰陽盪割。更古木、冷烟膠轕。虎跡龍湫經過了。一枝筇、幾被罡風奪。纔到得、亂峯末。峯巔小閣危堪掇。嵌嵌嶽、呀然如竇。拳然如鉢。只怕石欄憑不穩。敗葉欲隨秋脫。況恰對、崖門初豁。我愛湖光能入望。約他年、再與攀蘿葛。看夜半、陽烏渴。

又 蘧庵先生五日有魚酒之餉醉後填詞

蒲酒濃如乳。更爲我、東溟斫鱸。大魚就脯。攜酒石榴花下醉。還選腹腴親煮。耳熱也、休提今古。只有寒潮圍故國。歎龍舟、寂寞無尋處。風乍起、瘦蛟舞。何須遠望悲荆楚。暗想像、廣陵舊事。淚多於雨。火照佛狸城下水。丞相孤軍難渡。記時節、也鄰重五。兒女誰知英雄恨。辟兵符、戲向釵頭賂。葵影綠、小窗午。

又 竹逸屢苦足疾詞以訊之

足亦爲頭責。問先生經年何事。蹒跚引疾。有足徑須行萬里。須踏龍堆馬邑。更須伴錦靴紅屐。卻怪兀如習鑿齒。恐美人。覽者交相厄。中有鬼。苦無力。客爲代語君姑默。看人世。太行劍閣。縱橫几席。尻馬神與吾自有。底事度阡越陌。足雖憊。猶全吾膝。言罷先生徐捫足。且支筇。虛室初生白。剛一笑。宿疴失。

又 食李戲作

咄汝前來此。問爾祖。人人都道。猶龍李耳。一自瑤星淪謫後。恰值楊花盡矣。又幻出李唐家世。縱劣猶能交貴介。伴浮瓜。游戲西園邸。楊家果。詎君比。如今慣代桃僵死。客經過。其冠不正。視同苦李。一入公門。長更辱。鑽核羞他名士。但說著。王戎冷齒。只有井邊堪避世。與螿蟪。飲啄稱知己。還愁遇於陵子。

又 贈善弈者蘇生

入市乘羊暇。乍歸向百花庭院。春衣暗卸。小與手談。殘紅徑。秋水滿。睚微瀉。日影碎。

劇棋難罷。爭賭宣城真太守。問何人。中正如卿者。秋善弈。爾其亞。局中有規。憑君打。莫沈吟。樵夫柯爛。瑤池花謝。聞道外邊風漸競。一子甚時纔下。休閒煞。春前陣馬。天帝井公方對博。又從來。似弈長安也。都付與。楸枰話。

又 贈蘇崑生

蘇固始人南曲爲當今第一曾與說書叟柳敬亭同客左寧

南幕下梅村先生爲賦楚兩生行

吳苑春如繡。笑野老。花顛酒惱。百無不有。淪落半生知己少。除卻吹簫屠狗。算此外。誰歟吾友。忽聽一聲河滿子。也非關。雨溼青衫透。是鵲血。凝羅袖。武昌萬疊戈船吼。記當日。征帆一片。亂遮樊口。隱隱柁樓歌吹響。月下六軍搔首。正烏鵲。南飛時候。今日華清風景換。剩淒涼。鶴髮開元叟。我亦是。中年後。

又 弓冶弟萬里省親三年旋里於其歸也悲喜交集詞以贈之并懷衛玉叔

暨漢槎吳子卽用贈蘇崑生韻

休把平原繡。繡則繡。吾家難弟古今稀有。萬里尋親。踰鴨綠。險甚黃牛白狗。一路上。

夔。蚊。作。友。辛。苦。瘦。兒。攜。弱。肉。向。海。天。盡。處。孤。蹤。透。三。年。內。無。乾。袖。平。沙。列。幕。悲。風  
吼。獵。火。照。依。稀。認。是。雲。中。生。口。馬。上。呵。身。爭。擁。抱。此。刻。傍。人。白。首。辨。不。出。窮。邊。節。候。  
猶。記。離。鄉。年。尚。少。牧。羝。羊。北。海。雙。雙。叟。長。夜。哭。陰。山。後。

又 惠山遇冒爰及穀梁酒間感事并示楊枝

細。雨。青。山。麓。野。塘。邊。故。人。忽。卸。布。帆。一。幅。失。喜。推。篷。還。笑。劇。難。得。他。鄉。骨。肉。問。那。處。  
酒。旗。斜。矗。我。有。新。年。離。鴻。恨。艤。烟。航。且。與。澆。醞。醪。知。來。日。何。方。宿。樽。前。況。有。人。如  
玉。再。休。提。千。場。錦。瑟。萬。堆。紅。燭。淪。落。舊。人。誰。尚。在。只。剩。何。戡。情。熟。船。倚。在。黃。蘆。苦。竹。  
落。照。重。逢。詢。伴。侶。也。未。將。言。應。螺。先。蹙。長。洲。水。年。年。綠。

又 中秋伏枕承遽庵先生有月餅果物之惠病起賦謝

今。夜。清。輝。漾。想。月。殿。菱。花。出。匣。一。輪。初。上。萬。戶。千。門。連。碧。海。處。處。鉤。簾。倚。幌。只。少。我  
一。人。凝。望。多。謝。東。鄰。遺。粃。粒。恰。分。明。掬。取。團。圓。樣。開。籠。看。神。差。王。紛。然。佳。果。還。相  
覓。措。病。眼。荔。奴。黃。皺。哀。梨。碧。漲。忽。憶。添。丁。千。里。外。阻。隔。丹。崖。綠。嶂。恨。此。物。無。緣。分。餉。

若使姮娥知我意。也璇闈、掩卻垂綃帳。應爲我、色惆悵。

又 暮秋臥病澄江客舍承劉震修沛元秦其天賀天士椒峯弟諸君枉顧因感亡友鄒程村董文友漫賦一首并示梅園主人韓爾鉉

一病驚秋暮。黯澹煞、五更青鬢。萬山紅樹。煎藥真長高誼在。結駟連鑣相顧。僕僊矣、諸君無苦。縱憶此心猶炯炯。試扶吾、一上秋城去。沙雁落、細如雨。韓園舊日曾歌舞。有多少、縷金裙子。酒和墨污。那數三千珠履客。高會春申極浦。當日事、何人記取。黔董顧鄒今不見。文友面黑程村長身只十圍梅似青銅古。花尙好、人非故。

又 冬夜不寐寫懷用稼軒同父倡和韻

已矣何須說。笑樂安、彥昇兒子。寒天衣葛。百結千絲穿已破。磨盡炎風臘雪。看種種、是余之髮。半世琵琶知者少。枉教人、斜抱胸前月。羞再挾、王門瑟。黃皮袴褶軍裝別。出蕭關、邊笳夜起。黃雲四合。直向李陵臺畔望。多少如霜戰骨。隴頭水、助人愁絕。此意儘豪那易遂。學龍吟、屈煞牀頭鐵。風正吼、燭花裂。



又 積雨乍晴竹逸買舟拉雲臣暨余郭外春游訪萬子紅友不遇因過石亭  
探古梅并坐古香庵小憩

喚箇船兒去。傍城河、柳絲蘸碧。漸拖官渡。聞訪故人人已出。門鎖小橋烟浦。空佇立、  
悵然誰與。人說前村梅更好。月朧明、綠萼棲毛女。趁波暖、響春櫓。僧樓小憩評今  
古。喜檻外、亂山絕澗。暗香無數。寒食一杯須作達。莫惹春愁萬縷。看滿眼、紙錢飛處。  
除卻吾曹二三子。只此情、堪共花枝語。花不應、灑紅雨。

又 次日紅友復折柬招游石亭值陰雨作詞謝之仍用前韻

并日邀遊去。正郭外、風絲颭袖。水烟籠渡。兩月春霖愁似海。漲了綠波南浦。剛一霎、  
晴溪容與。茶嶼竹籬帆影過。粉牆頭、暗立誰家女。沙鳥嫺、觸柔櫓。難忘最是亭梅  
古。記昨到、憑闌拋盞。落英閒數。帶暝遙峯嬌欲睡。香在衫痕鬢縷。春漸到、最銷魂處。  
來日縱無知己約。也重游、擬續花間語。無奈是、廉纖雨。

又 伯成先生席上贈韓修齡 韓關中人聖秋舍人小阮流浪東吳善說平

話

月上梨花午。恰重逢、江潭舊識。嗚嗚爾汝。絳燭兩行渾不夜。添上三通畫鼓。說不盡、殘唐西楚。話到英雄兒女恨。綠牙屏、驚醒紅鸚鵡。雕籠內、淚如雨。一般懷抱君尤苦。家本在、扶風盤屋。五陵佳處。漢闕唐陵回首望。渭水無情東去。剩短蠟、聲聲訴與。繡嶺宮前花似血。正秦川、公子迷歸路。重酌酒、盡君語。

又

茶村寺寓逢庭柏上人有贈

上人善吳歙爲蘇叟高弟兼工搗鼓

急雨銅街沒。喜瞥遇、一僧不俗。有愁都豁。半世不曾持梵唄。只唱曉風殘月。讓袞袞、羣兒成佛。音節柔和兼妙好。鬢陀花、簌簌翻林樾。遺恨事、無毫髮。寥寥畫鼓春雷發。似臨穎、十三娘舞。劍光奔突。贏得闍黎爭匿笑。詎是靈山衣鉢。長嘯也、岑牟難脫。萬事誰真誰算假。拍紅牙、那便閒生活。持此意、問迦葉。

又

春夜聽鼓師搗鼓

月黑燈搖霧。看鼓史、岑牟單絞。當筵箕踞。苦竹哀絲爭欲鬧。靜聽八音之主。讓老革、

憑陵今古。統地一聲千籟響。掣紅旗、突陣將軍怒。荷珠迸。碎如雨。有聲詎比無聲苦。又垂手、畫槌小歇。凝情無語。忍俊不禁停又滾。隱隱春雷慢吐。十三段。花攢錦聚。十番鼓。共有十三段。打到五更心已碎。正疑愁似夢無尋處。方趁拍。猛然住。

又 自嘲用贈蘇崑生韻同杜子皇賦 有小序

于皇曰。朋輩中惟僕與其年最拙。他不具論。一日旅舍風雨中。與其年杯酒閒談。余因及首席決不可坐。要點戲是一苦事。余常坐壽筵首席。見新戲有壽春圖。名甚吉利。亟點之。不知其殺伐到底。終坐不安。其年云。亦嘗坐壽筵首席。見新戲有壽榮華。以爲吉利。亟點之。不知其哭泣到底。滿堂不樂。相與抵几大笑。何兩拙不謀而同也。故和此詞。余因是亦有此作。

高館燈如繡。屈指算。攝衣登座。放顛時有。慣罵孟嘗門下客。無過鳴雞盜狗。吾寧與灌夫爲友。曾被兩行官伎哂。玳筵前。一片喧聲透。香醪潑。汚紅袖。歡場百戲魚龍吼。卻何來。敗人意興。難開笑口。自願無聊惟直視。奪得鸞篋搔首。叱若輩。何堪秣候。

事後極知余謬誤。恰流傳。更有黃岡叟。疏狂態。誰甘後。

又 新安陳仲獻客蜀。總戎幕府嘗贖一俘婦。詢之。蓋仕族女也。仲獻閉置別館。召其夫。邈之聞者。豔其事。爭爲歌詠。適宣城沈子公厚書來。徵詞。因賦是篇。

天畔蠶叢路。記當日。錦城絲管。華陽士女。一自愁雲。蠶蜀棧。飛下桓家宣武。有多少。花鈿血污。十萬蛾眉。齊上馬。過當年。花蕊題詩處。葭萌驛。鵲啼苦。春宵高譙元戎。府。明月下。玉容黯淡。有人低訴。妾本成都良家子。歎息鸞分釵股。客亦爲。淚零如雨。擲卻黃金歸破鏡。問德言。還認菱花否。吾事畢。拔身去。

又 余與于皇作自嘲詞。竟于皇復謂余曰。忽憶一事。大資嗚噓。昔甲申闖賊之變。迎降者大司馬某亦與焉。其人後官兩浙。開讌西湖。召梨園侑酒。卽命演闖賊破都城故事。數齣後。闖賊入城。一人執手板蒲伏道旁。自唱臣兵部。尙書某迎接聖駕。蓋某卽坐上某也。某悵然不懌。良久曰。嘻。亦太甚矣。某何

至是遂罷酒去。余與于皇撫掌之次，同賦是詞，仍用前韻。

嶺對離宮繡。聽鼙鼓、漁陽遺恨。乾坤罕有。記得黃巾初入洛。朝士馬都如狗。還自許。師臣賓友。誰把侍中貂細插。錦河山、忍被軍聲透。八風舞。郎當袖。梨園白髮潛悲吼。誰信道、千秋南董。繫諸伶口。馬上彎弧爭欲射。客有道旁泥首。捧降表、夕陽亭候。今日堂堂紅燭裏。正當年、肉袒牽羊叟。頭暗觸、屏風後。

又 中秋前五日看早桂

灑氣收殘暑。恰金飈、夜來染就。小山幽樹。叢桂離離香滿徑。正值秋棠開處。掩映也、倍添嬌嫵。紅燭三條圍鎖院。記姮娥、不肯相憐取。平生恨、那堪數。思量舊事多如雨。憶前生、婆婆曾在。清虛之府。淪謫紅塵三十載。卻羨廣寒清苦。忘不了、花陰玉兔。月到中秋光定滿。折花枝、吾欲驂鸞去。再快作、霓裳舞。

又 緯夫詞

戰艦排江口。正天邊、眞王拜印。蛟螭蟠鈕。徵發權船郎十萬。列郡風馳雨驟。歎閩左、

騷然雞狗。里正前團催後保。盡纍纍、鎖繫空倉後。掉頭去、敢搖手。稻花恰趁霜天秀。有丁男、臨歧訣絕。草間病婦。此去三江牽百丈。雪浪排檣夜吼。背耐得、土牛鞭否。好倚後園楓樹下。向叢祠、兩倩巫澆酒。神祐我、歸田畝。

又 秋日竹逸約同雲臣紅友渭文石亭看桂

萬斛涼雲瀉。買蜻蛉、烟潭容裔。晴秋瀟灑。黃葉村中行不遠。隱隱前山精舍。人已被、暗香縈惹。纔見巖梅齊著粉。染西風、幾桂旋開也。流光駛、似奔馬。捨舟緩服尋蘭若。正霜簷、累累金粟。參差低亞。竹色泉光幽映極。攜得一樽堪把。問此樂、何如僕射。忽見高塋延野燒。似赤龍、蹙踏山都赭。矯首看、莽驚詫。

又 重游菊圃紀事

烏柏全紅也。過溪橋、重游昨日。竹籬茅舍。笑語生香來漸近。衫影參差入畫。見一隊、明妝淡雅。要撚黃花親比瘦。小闌干、不許簾兒掛。人與菊、並堪把。霜天短鬢驚衰謝。恰何緣、人間尙有。鈿車羅帕。萬事西風吹散了。黃葉漫天而下。偏只向、看花人打。

若使淵明今日在。料先生也被閒情惹。狂奴態。甘遭罵。

又 題思嗜軒爲姜勉中賦用題青瑤嶼原韻軒前棗樹數株爲貞毅公手植

故以思嗜名軒

羊棗經霜罅。記當年、狂歌曾點。甘同嗜鮮。老榦虬柯三四本。冷翠幽光團射。曾脫帽、行吟其下。一自人纏風木恨。剩揩楹、仄磴欹危怕。蘿葛翳。麩麩挂。三年淚爲思親灑。葺亭軒、崢泓明瑟。重開圖畫。粉壁疏窗仍靚好。拭盡塵埃野馬。果熟也、莫從人打。不是灑西饒靳惜。是前人口澤斯存者。歌纂纂。蔭堪藉。

又 題郎官山雪霽圖送家伯駒還八閩

閩嶠盤天際。悵連年、幔亭昔夢。枕邊頻製。搦得郎官山半幅。日斷層崖雪霽。飛不透、鷗鷁聲裏。今日眞成歸計穩。漲蠻天、一片南還騎。桄榔麵。家山味。前灘喚困鄉音細。傍榕陰、晶丸萬顆。依然斜綴。綠螭房邊紅齒屐。喧笑應門童稚。誰暇訴、飄零情事。少頃武夷君有信。也頭童、面皺驂鸞至。驚此別。幾年歲。

又 繆園與穀梁話舊

鵲舌啼春冷。記并州、十年飄泊。蝶僥蜂倖。花露微蒸纔抑鮮。小閣圍香說餅。鬧多少、簾痕帽影。燭底新翻楊枝曲。字斜行、寫上春衣領。只此事、君應省。江南四月殘紅靜。又逢君、斜陽一水。盈盈舴艋。暫借芳園聊話舊。坐皺綠蕪三徑。算聚散、來朝難定。鴻爪那能長留住。笑驚腰、彭祖徒窺井。一彈指、三生頃。

又 竹逸齋中紫牡丹枯而復生爲填此詞

日暖鶯聲細。喜亭亭、依然玉琢。吳宮小字。暫別紅塵剛一載。遠傍畫樓珠砌。卻又鬪、新興鬢髻。多少桃腮和杏臉。算舊人、遠勝新人麗。論族望、雒陽魏。看花漫憶當年事。記人名、一般顏色。幾般才藝。自被子規催去急。零落嬌香滿地。拚舞榭、爲伊長閉。若使紫臺真再返。笑鴻都、枉用驂鸞計。花凝笑、又含睇。

又 舟泊楓橋同吳廣璧小飲金葦昭齋中歸過寒山寺因憶昔年阮亭王先生入吳夜已曠黑風雨雜遝阮亭攝衣著屐列炬登岸徑上寺門題詩二絕



而去一時以爲狂。今別去六七年矣。悵然賦此并懷阮亭。

纜繫烟汀尾。見一派江村橋下。斜陽水市。西舫東船。那可語。且過幽齋謀醉。恰海蠶園甘盈七。歸路欹潭如棧狹。映頹牆。倒出驚奇鬼。人道是寒山寺。寺門話向同行子。記王郎昔年黑夜衝泥經此。椽吏兩行爭匿笑。笑看官今何事。乞火照破扉題字。今日滿廊蝸篆綠。捫壁間。蝌蚪無存矣。誰會我懷人意。

又 題孫赤崖小像用曹顧庵學士韻 圖中三孫遶側

入洛人如璧。記當年才名爭數。江東孫策。況值賢兄新奪幟。謂扶桑殿元也細馬春游禁陌。看兩兩油幢繡戟。倏忽浮雲生宮殿。十九年。罰作長流客。纔出塞。鬢先白。京華握手鳴珂宅。劇悲歌。蛾眉勸酒。駝酥行炙。今日闔門重見面。更盡杯中琥珀。總莫問鴻泥雪迹。一笑披圖三珠樹。羨兒皆字獬奴呼釋。獬兒釋奴皆前人小名萬戶樂君休易。

又 贈徐月士次友人韻

萬事都成昨。剌胸中、不平鬱起。峯巒確犖。我有匣中三尺水。澀盡寒銜冷鏢。夜夜聽、秋城鼓角。青眼誰人吾竟老。喜逢君、交道真堪託。忘不了、燈前約。封侯自有嫖姚霍。且高歌、蹲蹲舞我。烏烏和若。十載樊川狂客夢。贏得揚州一覺。漸袞徧、四條絃索。綠醕黃花拚盡興。管來年、綵筆驚河朔。休只憶、江南樂。

又

友人蔣子馭鹿落拓都門。遨遊王邸。綠池應教稱曠代之。遭逢清夜陪游

極一時之際。會既而淮南仙去。子晉丹成。悲翠輦之潛移。悵金牀之不見。新愁入夢。昔事銷魂。憔悴南還。傷心實甚。適儲子雪持相遇。吳閩歸言。茲事爲

賦是詞

朱邸分青社。記當日、竟陵文藻。彭城風雅。盛世天家敦玉牒。花萼交輝其亞。正內殿、霓裳舞罷。龍子一從歸大漠。悵陳王、不憚苔生榭。呼賓從、銷閒暇。鄒陽流落江潭夜。剔秋燈、故人重見。在楓橋舍。憔悴白頭論往事。多少鸞箋鳳帕。說不盡、銅輿佳話。今日金風吹兔苑。任西宮、花放還花謝。拚夢到、王門下。

又 飲華商原齋頭追憶錢吉士先生先生商原婦翁余曾執經門下  
三十年前事。記童年。章華曾作。屈平高弟。家本寶華山下住。門映石湖荷芰。有一帶、  
疏軒曲砌。憶得危崖騰健鶴。咽秋燈。夜半歌山鬼。風乍刮。鬢成蝟。淒涼閱盡人間  
世。看多少。經堂書庫。拆爲馬肆。舊日生徒今亦老。相對賢門佳婿。更似舅。魁然無忌。  
是日并晤商原令嗣且盡君家黃菊酒。論人生。一醉爲佳耳。西州慟。成何濟。

又 途次遇華子瞻憶二十年前子瞻與秦對巖太史齊名均齒游處略同對  
巖官禁近居林下已十餘年今復從軍湘楚行色甚壯而子瞻淪落如故詞  
以寄慨

少日敦槃約。記同游。梁溪二妙。華年相若。繡袷紅衫雙掩映。宛似連枝花萼。船並艤、  
綠楊城郭。一客日邊紅杏放。染爐香。日講龍樓幄。又十載。歸田樂。彈冠近日之荆  
鄂。壓秋江。水犀下瀨。雄姿馬稍。帳下盧兒三十萬。伐鼓開船黃鶴。旗獵獵。北風夜作。  
一客織絺纒掩釭。到霜天。敗楮那堪著。姑一笑。視寥廓。

又 虎邱劍池作

山腹蒼皮罅。劈巉巖、一窪深黑。險於人鮓。仄嵌斜攢。龜脊滑。林氣水聲交射。有屈曲、龍蟠其下。上構危梁。淩絕巘。窈而深。鑿孔行人怕。吸冷瀑。半空掛。壞廊欹磴。哀湍瀉。望參差、雕樞黛閣。晶熒入畫。故國江山還在眼。添了西風戰馬。又殿上、夜鐘將打。雨蝕殘碑名姓在。醉摩崖、汝是知音者。石壁上有黃姬水唐寅題名相對坐草堪藉。

又 五人之墓再用前韻

古碣穿雲罅。記當年、黃門詔獄。羣賢就鮓。激起金閭十萬戶。白梃霜戈激射。風雨驟、冷光高下。慷慨吳兒偏嗜義。便提烹、談笑何曾怕。扶吾目、胥門挂。銅仙有淚如鉛瀉。悵千秋、唐陵漢隧。荒寒難畫。此處豐碑長屹立。苔繡墳前羊馬。敢輕易、霆轟電打。多少道傍卿與相。對屠沽、不愧誰人者。野香發、暗狼藉。

又 同園次過半塘飲戴季默家三用前韻

搖櫓蒼波罅。食指動、洞庭筍葢。溇陽魚鮓。掠過半塘橋不遠。雪練銀濤噴射。村漸逗、

屋邊籬下一路橫江吹鐵笛。調崩騰。恐惹魚龍怕。好都取。水窗掛。到來便把金荷瀉。劇清幽。竹梧相壓。尊壘如畫。老子放顛須盡興。管甚南來兵馬。時駐防兵初到酒已罄。何妨再打。門外八驕堪拉飲。問乾坤。誰勝公榮者。玉山倒。醉相藉。

又 姜貞毅先生敬亭山房卽文文肅公清瑤嶼也文肅與先大父同年而余尤辱貞毅公知愛今兩賢先後淪逝而余老客吳閩適勉中學在開尊酌我不禁人琴之感爰賦此詞四用前韻

閣迸嶮峴罅。漱松醪。紅薑點鼓。綠荷包鮓。醉憶尊公賢給事。百感濤傾弩射。記惜別。月明橋下。余與貞毅公握別廣陵倏忽山邱華屋恨。帶女蘿。山鬼招魂怕。延陵劍。何由挂。乳魚軒畔微波瀉。繚牆邊。亭臺金粉。李將軍畫。更憶平泉花木好。丞相曾施行馬。今日也。雨淋霜打。我有兩層思舊淚。總一聲。鄰笛吹來者。莎徑軟。仰天藉。

又 飲范龍仙齋頭感舊并示王升吉五用前韻

屐印蒼苔罅。恰經過。故人爲我。摘蔬蒸鮓。酒後燭花爭怒裂。颯颯霜飈酸射。笑李蔡、

爲人中下。身似江潭流落伎。但開元舊事重提怕。銀箏在梁塵挂。牙籤列屋香芸灑。尚依然。爐薰椀茗。法書名畫。八載離情何處寫。贏得琮琤簪馬。被一夜西風亂打。草沒吳宮人去久。算堂前燕子無存者。羅襟酒任沾藉。

又 蔡九霞招飲同雲間沈友聖賦六用前韻九霞尊人忠襄公殉國賊之難石腹空而罇。鬪贖阮斜欹壓筍。龍孫幾鮮。屋後松杉都作勢。黛色濤聲噴射。且與客提壺其下。慷慨攝衣。升上坐。夜蒼茫。說劍空堂怕。衣露肘。詩瓢挂。忠襄碧血高原灑。誓三光。騎箕裹革。丹青圖畫。抵几奮髯談往事。恨殺乾坤銅馬。將如此金甌碎打。且向蔡經家爛醉。只今宵背癢誰搔者。天可幕地爲藉。

又 讀漢書李陵傳七用前韻

壺口敲成罇。向牀頭一編佐苦。勝於雞鮮。痛惜河梁李都尉。飛將家聲善射。今至此子卿足下。陵旣孤恩。漢負義。睨刀環再辱。男兒怕。高高月長城挂。身降名恥憑誰灑。笑紛紛。人奴衛霍。淩烟描畫。循髮更衣聞緒語。起聽悲鳴櫪馬。正萬帳嚴更齊打。

讀未終篇浮大白。劇堪憐。箭盡蘭山者。頽然醉。花陰藉。

又 吳門喜晤丁飛濤賦贈八用前韻

生入榆關罅。記曾嘗。錦州銀鼠。遼河鮮。雪窖羝羊。天萬里。雁足帛書誰射。長夢汝。  
李陵臺下。頭白如今歸故國。見人民。城郭心驚怕。攜瓢笠。無牽挂。斷橋十里荷香。  
灑。恰晴湖。亂餘西子。蛾眉重畫。一笑風前齊得喪。世事塞翁之馬。稽首謝。獅王棒打。  
落拓蘇臺知己少。只青山。尙似當時者。杯正綠。掌堪藉。

又 月夜泊舟平望九用前韻

撥刺疏罾罅。正江鄉。鑿黃斫鱸。萍香抑鮓。風弄檣燈千萬點。點點隨波漂射。光直透。  
水晶宮下。寥亮空潭飄水調。客船孤。燭冷聽來怕。月又向前村挂。嚼吮鞵鞞銀濤。  
灑。恰鄰舟。亂旗雜火。軍裝如畫。下瀨戈船身手健。使得帆如使馬。惡浪裏。攤錢白打。  
歸矣吾家陽羨里。學當年。射虎南山者。任鄉里。苦無藉。

又 鴛湖烟雨樓感舊十用前韻

水宿楓根罅。儘沾來、鵝黃老釀。銀絲鮮鮮。記得筭堂和伎館。盡是儀同僕射。園都在、水邊林下。不閉春城。因夜讌。望滿湖、燈火金吾怕。十萬蓋。紅毬挂。重游陂澤。偏瀟灑。剝空潭。半樓烟雨。玲瓏如畫。人世繁華原易了。快比風檣陣馬。消幾度。城頭鐘打。惟有鴛鴦湖畔月。是曾經、照過傾城者。波織簾。船堪藉。

又 過武塘贈魏子存先生十一用前韻

廠倚龍松罅。記從公、紅槽壓酒。玉盤堆鮓。醉數一行天上雁。玉靶翻身仰射。笑萬騎、其材悉下。我遽別公游宛雒。虎牢關、徑仄攀躋怕。步步學。猿猱挂。湘潭鄂洛微雲灑。人爭羨、文章宗主。江山圖畫。歎我還鄉悲伏櫪。老作空牆病馬。骨節瘦、憑誰鞭打。乘興扁舟來話舊。雨迷離、自笑棲棲者。風雅事。惟公藉。

又 魏塘舟中讀錢爾斐先生菊農詞稿十二用前韻

筆補媧天罅。笑詞場、止貪濃腆。誰餐龍鮓。只有菊農詞一卷。竹翠梧光團射。向楮墨、濛濛欲下。爽勝哀梨清橄欖。更險如、雪棧宵行怕。快瀑布。炎窗挂。塾巾野服神飄。



灑。句清圓、諸般易及。一清難畫。把向鴛鴦湖上讀。澗水奔湏似馬。雪又向、篷窗亂打。好琢琉璃爲硯匣。架霜毫、牀用珊瑚者。還倩取、錦綾藉。

又 謁梅花和尚墓十三用前韻係元高士吳仲圭

古碣穿雲罅。奠幽墳、聊供蒲筍。奚煩脯鮓。搖曳疏花三四本。雪魄冰魂光射。慕正嵌、橫斜之下。隧道蘚苔皆純鐵色。捫斷螭、鑿獸碑紋怕。薜荔黑、牆陰挂。蕭蕭小院空香灑。指高原、一坏雲水。此中有畫。一自趙家陵闕燬。極目西風石馬。總分付、浙江潮打。只有歸然斯冢在。落梅風、捲散樵蘇者。英滿地、衫堪藉。

又 甲寅除夕十四用前韻

舊歷修窗罅。嘆貧居、支離困蝨。醜雞甕鮓。苦憶常年逢此夜。譁笑鬪藏覆射。賭瓜子、黃柑樓下。今日飄零諸弟妹。夢蒼涼、亭榭潛行怕。最怕是、蠨蛸挂。六街人靜梅風灑。望層城、明簾夜火。依然入畫。准擬東風來歲好。屏當春衫細馬。看士女、鞦韆笑打。萬事總如池水皺。便風吹、何事關卿者。椒酒醉、枕相藉。

又 乙卯元日十五用前韻

梅瘦侵牆罅。趁閒窗、椒觴汎蟻。辛盤盛鮓。抖擻門丞秦叔寶。貝帶璘。熈光射。笑公等、寄人簷下。鏡聽竈前占吉語。願今年、烽火無驚怕。雙彩燕。釵梁挂。軒墀未掃先宜灑。待春來、桃鬢杏臉。雨梳烟畫。五十過頭吾竟老。說甚高車駟馬。任街鼓、羣兒戲打。天意蕭蕭偏釀雪。小樓前、已有紛披者。拂簾幌。縈茵藉。

又 登南嶽寺大悲閣

峭閣騰危鶴。映新晴、亂崖杳嶂。龍湫獸窟。竹粉松脂空翠極。狼籍山厨僧鉢。分一半、綠人毛髮。倒灌寺門香雪海。又巖梅、萬樹參差發。微笑處。忘言說。駐颺悲嘯春禽聒。更林間、泉鳴谷響。慘悽神骨。今不來游春漸老。孤負浮生作達。且放眼、人間寥闊。關背一拳看愈好。蘚痕斂。嵌就玲瓏月。依稀是、袁家渴。

又 送西蜀余生赴洞庭梅社之約

積雨晴光霽。假南榮、蕭然斗室。爐熏梵夾。門外綠潭風亂響。何處櫓聲颯颯。又驚起、

陂塘睡鴨。此地蜀風殊不惡。蜀風陽羨地。以東坡得名。況翁家原住巴東峽。姑小住。歌相答。翁言光福村中塔。十年來。與周旋久。民風頗洽。每到春時。向晴昊。千樹繁花亂插。玉浪捲。直衝蒼雪。茶竈筍輿屏當未。鶴猿盟。夙訂三章法。亟歸荷。伯倫鍾。

又 讌玉峯徐健庵太史宅歌舞烟火甚盛

月照梨花午。讌華堂。西京趙李。東都燕許。玉珮珠袍聯翩至。綠酒春缸正乳。不須恨。英雄無主。穆護沙纔衰徧了。九天開。飛下瑤臺女。又解作霓裳舞。偃師百戲堂去。看場圓。交竿放出。火蛾無數。髣髴蜃樓海門市。西極狻猊偏怒。更炮打。襄陽門戶。傾刻鴉啼金井曉。擲頭船。且睡波深處。篷背上。響春雨。

又 不晤黃子艾庵十餘年矣。昨南耕自郡至。艾庵以溪南詞一卷寄予。循覽之。次追感舊游。兼懷鄒董愴焉。填詞卽用溪南詞中韻。

強飯還能否。說年來。家同鷗泛。門央鶴守。細註農家新月令。樂事吾生儘有。茅簷下。烏鳥擊缶。罨畫戴溪都不惡。好風光。只落閒人手。君漫士。余聱叟。陡然百感三杯。

後憶同時許多嵇阮。盡成卯酉。何限西風堆馬鬣。破碣藤纏雨溜。數宰木蒼蒼如斗。一作驢鳴人皆笑。繞筵前。謾罵撩衣走。袞袞是登場偶。

又毛卓人示我滿江紅詞數首。中多養生家言。作此戲柬。仍用贈黃艾庵韻。容我狂言否。君幾見紅顏翠髮。一生長守。萬戶我求還不得。大志訝君偏有。竟欲聽飛瓊鼓缶。爨大城頭閒聘望。問何人弱水曾攜手。空絕倒。繫腰叟。生天靈運吾甘後。且陶陶三杯卯酒。醺然到酉。幾度罡風天際捲。閬苑露桃紅溜。枉費了。厭禳星斗。我自人間能倔強。碧霄宮。懶逐仙班走。任相笑道傍偶。

又奉答蘧庵先生卽次原韻

炊熟黃梁否。笑乾坤。蜉蝣非夭。彭錢非壽。世上英雄本無主。感激何嘗不有。曾要把趙平原繡。禍首從來倉頡字。更怪他。煉石媧皇手。偏欲向虛空鏤。神仙將相俱難就。悵生平舞衫歌扇。藥爐茶臼。已矣無成三弄鐵。長倚秋江夜吼。知我者。荆溪浮叟。夏醒半窗蕉鹿夢。謝風篁。汝是驅愁帚。休再打唾壺口。

又 奉贈蘧庵先生仍用前韻

識得詞仙否。起從前、歐蘇辛陸。爲先生壽。不是花顛和酒惱。豪氣軒然獨有。要老筆、萬花齊繡。擲碎琵琶令破面。好香詞、汚汝諸伶手。笑餘子、徒雕鏤。秦宮漢苑描難就。轟中原、怒濤似箭。斷崖如白。我有銅人千行淚。撲地獅兒騰吼。聲撼落、橘中棋叟。鶴髮雞皮人莫笑。憶華年、曾奉西宮帚。家本住、金臺口。

又 初夏城南觀劇并看小兒作假師幻人諸雜戲

一夜紅都瘦。恰清和、街南百戲。分棚錯繡。爭占晴坡施幔幄。似水畫簾痕皺。鶯語剪、綠蕪濃晝。老大逢場聊逐隊。也婆娑、錦瑟鈿車後。向酒媪、且賒酒。曲終雜爨喧唇奏。有僂童、交竿綠橦。巧將身漏。據地帖腰連瑣袴。踢墮弄丸都有。銀海眩、銅峯欲覆。萬事總然兒戲耳。棗梨爭、也算蛟龍鬪。姑一笑、華陰叟。

又 乙卯端午

舊事思量否。記年前、天中佳節。沈吟搔首。此日傷心人漸老。誰耐離騷繫肘。喜繞砌、

葵榴初繡。笑看五絲纏艾虎。問汝曹、猛氣憑陵久。何故縛女兒手。楚天一片驚濤吼。沸中流。錦袍雪艦。笳鳴鼓奏。錯認蘭橈爭弔屈。惹起魚龍倏儼。都不見、椒漿桂酒。晷晷從來無競渡。也幸無、下瀨戈船走。漁父醉。唱銅斗。

又 蕩庵先生令孫女出閣詞以志賀卽次先生原韻

銅盒同心鏤。恰盈盈、風吹蟬鬢。花籠螭首。太史門闌新築館。喜氣塵寰稀有。况纔屆、女兒節後。時端午後一日山上有山齊太華。丈人峯、長調追辛柳。好騰徧、香奩口。

崔盧河北真嘉耦。拊鷓雛、玉堂花燭。璇房箕帚。暫了人間婚嫁事。東海依然碧皺。把五嶽、芒鞋製就。卻上玉清鑄氏籍。挈一雙、鸞鳳成仙友。松與柏、訂長久。

又 寄興呈蕩庵先生用溪南詞韻

一事然乎否。憶宵來、朦朧枕上。南柯出守。碎語幽禽催夢醒。花影半楞還有。喜牀下、濁醪盈缶。一卷烏絲饒寄託。怪時人、只道填詞手。說詩者、固哉叟。虎頭骨相吾甘後。更何煩、君平季主。推辰算酉。但得千秋傳好句。鶯嘴啄花紅溜。也抵得、腰懸金斗。

此意可憐還可笑。笑何年。碧海驂鸞走。仙路杳。緣難偶。

又 與毛子公阮交三十餘年矣。往時偶過蘭陵。常爲下榻。自文友亡後。經過

郡城。輒作西州之慟。坐與故人亦復闕焉。不面搦管填詞賦。呈公阮仍用前

韻

往事尋思否。記當時。伯仁一醉。諸公屯守。粉壁練裙沾灑徧。墨汁酒痕都有。曾醉請秦王擊缶。三十餘年如電抹。畫風光。少箇丹青手。能幾日。頽然叟。風生百感三杯後。憶從君。觴傾三雅。書窺二酉。今日低吟思舊賦。嗚咽山泉決溜。歎鶻血。啼完幾斗。不是郡樓吾懶上。怕重經。董相帷前走。忘不得。西園偶。

又 汴京中秋月下感懷兼憶三弟緯雲表弟南耕暨一二金陵省試親友

萬斛金波瀉。遍人間。雲鬢玉臂。清輝狼籍。歷歷扶疏丹桂影。一碧乾坤欲化。人正在。汴梁客舍。可惜宋家陵闕改。爛銀盤。依舊當空挂。可還似。東京夜。關河隔絕愁軍馬。憶家山。六朝佳麗。許多王謝。月到故鄉應倍好。無限風亭水榭。料此際。金樽對把。

已矣飄零何足道。鼓天風、鸞背終須跨。暫且學、姮娥寡。

又 作客東京寂寥。誰侶西風落葉閒。詣旗亭乃延秋全部於此徵歌中有一

人云曾相識訪之知吳下陸郎也。明日顧余邸舍談諧繾綣余落拓無聊感

生厚意爰贈此詞

酒向旗亭貰。驀然間、歌絲一縷。飄來騎罽。卻是吳中諸小部。隊隊檀槽羅帕。羣合樂、南薰門下。中有一人尤相熟。是襄王、筵上曾逢者。一句句、鄉關話。更闌軟語終難罷。歎此間、梁臺宋苑。斷垣頽瓦。我到東京真失計。卿亦何爲然也。得毋類、明妃遠嫁。此語殊悲非相戲。碎花枝、莫漫將人打。英雄淚、浩盈把。

又 登上方寺鐵塔。塔建於宋仁宗慶歷四年前。朝壬午河決曾沒於水。

欄楯浮空去。劃玲瓏、榴皮石髮。青紅無數。看盡宣和風景好。又看宮娥北渡。有多少、梨花夜雨。西望銅駝荆榛裏。算千秋、老輩惟吾汝。晉宋事、總塵土。鴻濛一氣憑魁取。躡丹梯、千盤百級。上通元圃。根插中原維地軸。其下黃河一縷。曾經過、怒濤煎煮。



無限西風神州恨。倩相輪、做盡興亡譜。鈴鐸響，百相語。

又 閏五月五日金沙道中次劉後村韻

浪闊驪珠吐。傍城河、依然游冶。水嬉消暑。前月葵榴還照眼。又見龍舟鬪虎。何不唱公乎無渡。兩遍蘭橈招不得。笑吳兒、枉費閒簫鼓。大魚吼。撇波舞。騷人詞客應相許。歎窮途、纍如憐我。分子桂醕。不信握瑜懷瑾者。猶羨人間角黍。看萬斛、天風正怒。此地良常連海館。料神仙、也念忠魂苦。喚江水、捲今古。

又 顏魯公八關齋碑

萬劫何曾壞。裂蒼皮、筋纏血裹。蘚痕攢蠹。剝角缺文銅綠滲。郢鼎犧尊兒輩。風雨急。百靈趨拜。多事囚螭還掣虎。覆巉巖、翻恨孤亭在。何不放、騰光怪。先生當日原兵解。想揮毫、握拳透爪。筆鋒英快。門枕睢陽荒戰壘。斷鏃愁燐似海。呼南八、聲情慷慨。千古雙忠遺跡並。剔殘碑、洗盡纖濃態。鷹側腦、搜天外。

又 九日後一日爲呂含章姬人催妝

憶昨登高去。上平臺、茫茫千里。碧雲紅樹。忽見香塵風外動。帽影衣痕無數。人正在、銅街偷娶。我揀簾櫳深處鬧。袖郎當、醉學迴波舞。還競打、細腰鼓。題糕罷作催妝句。羨新官、顛狂調笑。酒龍詩虎。俠少兩河誰不識。獨跨馬中赤兔。馬上者、人中之布。屈指明年隨大婦。捧掌珠、雙向花前賭。蘭與菊、秀終古。

又 感事

太息人間世。記南譙、秋窗夜話。客談新異。傳說當湖扶風馬。烜奕上卿門第。歎仰藥、一朝身死。紅粉成灰高樓燼。笑當年、枉費閒金翠。剩滿院、斜陽碎。扁舟疾下金焦寺。又傳聞、人天帝釋。跣趺西逝。多少神仙蓬島葬。惹得銅仙流淚。昨又說、井陘奇事。醉倚江船成一笑。總輸他、稔角東村子。牛背上、笛聲起。

又 輓驥沙朱南池先生

先生諱士鯤。明末以明經謁選得舉。西柳州府武

宣縣南荒僻遠國初尙未入版圖先生忠於所事歷官至吏科給事中子

澆任北流知縣壬辰王師入粵先生偕子澆暨闔門三十口俱殉節於北

流之黎村後數年其子溶徒步七千里覓先生埋骨所卒不得遂慟哭歸  
余敬爲詞奉誄并密其令嗣孝廉激文學溶

淚溼蒼梧樹。是千年、騷人謫宦。舊銷魂路。中瘞國殤三十口。颯沓靈旗似雨。光剌剌、  
雲中顧慕。銛鐔潭西羅神廟。笑迎神、枉費昌黎句。須讓爾、歆椒醕。招魂哭入南荒  
去。痛孤兒、芒鞋曾踏。萬山愁霧。峭壑懸崖藤霧歷。日落啁啾翠羽。尋不徧、鷓鴣啼處。  
誰認當年騎箕客。有猩猩、夜共獠奴語。蕉與荔、繡祠宇。

又 南耕齒疾養疴南岳山房初夏同雪持南水放庵過訪詞以贈之是日有

五虎踞坐楓隱寺門

臥疾禪房裏。問君年、纔過四十。胡爲如此。人笑君同師伯麟。君只狂呼自喜。狗竇豁、  
儘容卿未。猶剩左車能決肉。更何妨、擁鼻哦經史。石可漱、礪吾齒。青鞋且踏南山  
寺。更同行、詩僧詞客。善談名理。噉罷山廚櫻筍飯。佛閣晴空漫倚。一飽後、破除萬事。  
誰坐寺門閒說虎。萬山松、一霎腥風起。亟搖手、眞來矣。

又 送蔣京少隨尊公學憲之任豫章

雙槳搖晴淥。泝長江、潯陽西上。浪堆銀屋。卿月乘秋映映。湓浦高會。諸生白鹿。羨公子、翩翩綵服。君去鯉庭。浮畫舫。更何人。和我迦陵曲。誰共翦、西窗燭。秋容一望。真如沐。照江山、廣寒新樣。一輪圓玉。此地王郎題賦後。依舊落霞孤鶩。文采事、算君堪續。莫道衡陽迴雁少。倚西風、念我成衰獨。須頻寄、好詞讀。

又 連朝霽色殊佳。桂叢復放而寂。寂空齋。秋尋無策。兼之溪蟹大。上手中不名。一錢俱恨事也。詞以自嘲。并柬雲臣竹逸。

六曲銀屏矮。晃書籤、碧空乍沐。晴光無賴。料得空山叢桂畔。潑徧朝烟暮靄。貪結伴、鳴榔欸乃。篋少青蚨愁雇直。算今年、逋了秋尋債。還自笑、爾胡憊。老饕僵臥誰能耐。汨饑涎、湖干大上。肥香筐蟹。擣就橙齏賒得否。溪友得錢方賣。笑吟興、因君都敗。佳節來朝重九是。戰西風、破帽今還在。只愁被、秋陰礙。

又 丙辰九日

廢堞經秋壞，削巉巖。下臨絕澗，奔渾澎湃。俛仰浮生身世感，滿眼黃榆紫塞。笑一碧，關河無賴。多事劉郎題餠客，便彭城戲馬皆安在。賢豪蹟，總穉穉。橫刀舞稍平生快。卻胡爲丹陽男子，邇來殊儻。細把茱萸簪破帽，何限樓船下瀨。歷歷在，闌干之外。粗飯濁醪吾事畢，傍東籬，且了黃花債。今古恨，漫興慨。

又 中秋前一夕坐月虎邱

月上空山早。喜今夜，關河一碧。游氛都掃。二十年前曾醉此，余自丙申中秋看月虎邱。今已二十一年矣。坐客錦衣玉貌，事已作開元天寶。獨對孤光成太息。嘆秋娘已嫁何戡老。且細把金樽倒。颯然聲犯龜茲調。是征南牙門營將，箏琶競攪。贏得姮娥臨桂殿，揄袂娟然一笑。訝舊曲，人間絕少。滄海月明渾是淚。料來宵，晶餅看逾皎。重枕藉澗邊草。

又 丙辰中秋看月虎邱同雲臣雪持賦

風月佳無比。看石上冰輪瀲灩，長空新洗。金虎寒芒猶未散，耿耿吳宮劍氣。越顯得

翠奩如水。賒取元宵今夜做。颺春燈、嵌徧秋山裏。十萬盞、夜珠綴。懸崖疊巖笙簫沸。曲纔終、山腰樓閣、嬌歌又起。簇坐廣場紛笑語。何處香飄桂子。問此樂、浮生能幾。似欲天明天轉碧。透星星、宿火吳姬肆。涼兔魄、忍西墜。

又 十六夜步月惠山泉亭

短簿祠前月。又隨我、春申澗畔。度林穿樾。誰道孤光今夜減。依舊崢嶸映徹。人尚在、廣寒宮闕。只恐青天偏有意。散霜華、點盡愁人髮。搔首望、素娥窟。孤亭坐久狂歌發。亂山前、中宵驚起。林端棲鴉。憶昨吳宮絲管鬧。月館風簾盡揭。今只有、泉流明滅。喧寂乘除原似此。算嬌歌、妙舞終須歇。悟此意、是賢達。

又 和竹逸江村遇伎之作

寒食江村約。正水上、紛紛士女。采蘭調詭。中有一人曾相識。記在那家簾閣。驚會面、愁他非確。細取玉容花下認。果天涯、斷雨翻重握。花欲謝、人猶昨。風前小進休仍卻。從古是、蛾眉燕頤。此身奚託。我有紅綃無窮淚。彈與多情灼灼。悔則悔、當初輕諾。

十載雲英還未嫁。訴傷心、撥盡琵琶索。且少駐、對春酌。

又

贈何生鐵

鐵小字阿黑。鎮江人。流寓泰州。精詩畫。工篆刻。

鐵汝前來者。曷不學。雀刀龍笛。騰空而化。底事六州都鑄錯。孤負陰陽爐冶。氣上燭。斗牛分野。小字又聞呼阿黑。詎王家。處仲卿其亞。休放誕。人笞罵。蕭疏粉墨營邱畫。更雕鐫。漸臺威斗。鄴宮銅瓦。不值一錢疇惜汝。醉倚江樓獨夜。月照到。寄奴山下。故國十年歸不得。舊田園。總被寒潮打。思鄉淚。浩盈把。

又

春日拂水山莊感舊

峭壁哀湍瀉。枕春山。此間原是。裴家綠野。金粉樓臺還幕。已被苔侵繡瓦。蒼鼠竄。鄴侯籤架。今日西州何限感。踏花枝。翻惹流鶯罵。誰認是。羊曇也。西園疇昔高聲價。劇相憐。香閨博士。彩毫題帕。人說尙書身後好。紅粉夜臺同嫁。省多少。望陵閒話。公定還能賞此否。裊東風。蠻柳腰身亞。烟萬縷。正堪把。

又

送姜西溟入都

去矣休回顧。儘疏狂、長安市上、飛揚跋扈。誰道天涯知己少。半世人中呂布。仗彩筆、憑陵今古。伏櫪悲歌平生恨。肯車中、閉置加窮袴。君莫信、文章誤。楊花細糝京江渡。恰盈盈、租船吹笛、柁樓撾鼓。屈指帝城秋更好。寄語冰輪玉兔。爲我照、望諸君墓。相約當年荆高輩。喚明駝、倒載琵琶女。葡萄酒、色如乳。

又 岳州大捷

上以二月二日宣凱門外是日正值大雪恭紀

紫陌春如綺。正巴陵、征南昨夜、捷書飛至。闔闔門開排彩仗。夾道笙歌鼎沸。都不用、魚龍百戲。頃刻鳳樓拋鈿屑。算今朝、玉做人間世。洗兵馬、豐年瑞。臨軒彌覺天顏喜。喜春城、九衢花滿、千官珠綴。更向銀刀都裏望。小襯粉候殊麗。想入蔡、軍容如是。讖罷不須宣翠燭。水晶毬、萬盞天邊墜。長似晝、晃歸騎。

又

送四弟子萬之任黎城

中秋後一夕

月尙圓如許。只江郎、魂消欲別、黯然難賦。矯首玉河橋上立。爲我斯須還住。看歷歷、霜毫白兔。假使羿妃知此意。做璇閨、應也愁蛾聚。何苦照、征鞍去。此行莫道微官



誤算人間幾多彩筆。難紆尺組。上黨舊爲天下脊。共說雄藩澤潞。趁年少、黃皮縛袴。若到三垂岡上過。倚西風、立馬爲傳語。李亞子、竟何處。

又 題曹實庵珂雪詞

滿酌涼州醞。愛佳詞、一編珂雪。雄深蒼穩。萬馬齊瘖蒲牢吼。百斛蛟螭困蠢。算蝶拍、鶯簧休混。多少詞場談文藻。向豪蘇、膩柳尋藍本。吾大笑、比蛙黽。燕殘樺燭剛餘寸。歎從來、虞卿坎坷。韓非孤憤。耳熱杯闌無限感。目送塞鴻歸盡。又眼底、羣公袞袞。作達放顛無不可。勸臨淄、且博當筵紛。城柝沸、夜烏緊。

又 贈成容若

丹鳳城南路。看紛紛、崔盧門第。鄒枚詩賦。獨炙鵝笙潛趁拍。花下酒邊閒譜。已吟到、最消魂處。不值一錢張三影。儘旁人、拍手挪揄汝。何至作、溫韋語。總然不信填詞誤。憶平生、幾枝紅豆。江東春暮。昨夜知音纔握手。笛裏飄零曾訴。長太息、鍾期難遇。斜插侍中貂更好。箭髯鳴、從獵回中去。堂堂甚、爲君舞。

又 送三韓李若士省親之楚若士尊公時爲湖廣提督

秋到離亭暮。羨風前、珊瑚玉靶，翩然竟去。借問此行何所向，笑指巴烟鄂樹。是烏鵲、慣南飛處。路入南荒休騁望。有陶公、戰艦空灘雨。醜熱酒，浪花舞。嚴君坐擁貔貅旅。壓江流、一軍下瀨，目無黃祖。昨夜月明親饗士。要奏新填樂府。都不用、陳琳阮瑀。手掣紅旗翻破陣。看郎君、下筆驚鸚鵡。猿臂種，氣如虎。

又 賀李丹壑京闈秋捷閣學容齋先生令詞

年少眞英發。是當年、茶陵相器，鄴侯仙骨。噴沫驕嘶矜寵甚。所向全無空闊。喜歷塊、過都一抹。商隱曾誇袁師好。學參軍、祇解翻蒼鶴。誰似爾、最軒豁。詎關家世高門闊。羨便便、藝林經筍，嶒嶸突兀。昨夜月娥臨桂殿。笑倚冰輪蟾窟。正付與、天香時節。來歲杏園花倍好。捲東風、十里珠簾揭。爭看汝、繡袍纈。

又 用辛稼軒陳同甫倡和原韻送王正子之襄陽明春歸廣陵并囑示何生

龍若何名鐵

立馬和君說。到襄陽。爲余先問。隆中諸葛。往日英雄。潮打盡。怪煞怒濤崩雪。今古恨。總多於髮。再問大堤諸女伴。白銅鞮。可有閒風月。誰彈向。楚天瑟。纔逢燕市還分別。悵生平。無多知己。幾番離合。此去武昌魚不少。莫惜顏筋柳骨。要頻看。鄭虔三絕。一幅新詞。淒涼犯。囑來春。并示何生鐵。霜夜吼。劍花裂。

又

題大司農梁蒼巖先生五苗圖先生夢人貽宋繡一幅長松千尺下苗五

苗是歲先生第五耶生因名苗哥戊午秋先生招飲邸舍苗哥出揖屬爲此詞  
齷面桃花雪。羨昌昌。搓酥滴粉。珠裝翠刷。昨夜分明天上冷。玉兔初肥時節。早謫向。姮娥宮闕。騎上紫皇。獰小鳳。笑羣兒。項領尋常物。粗了了。甚賢達。曾經入夢。繚綾滑。是宣和。寫生墨繡。虬松都活。今日荷衣能出拜。果應蘭芽其苗。算此事。通都豔說。摩頂苗哥。須記取。奮扶搖。條鱗行堂掣。家自有。魏公笏。

又

贈高內翰澹人

家傍紅牆裏。羨薇郎。桃花綬帶。翩何清綺。白玉闌干黃金鑰。別殿秋晴似水。頻宣召。

綵毫才子。塵世那知天上景。但微聞、奏賦天顏喜。眉子硯。澄心紙。鄙人瑣瑣吳蒙耳。悵生平、潛蹤匿釣。埋名井里。一領綠簔三弄笛。伎倆如斯而已。只合向、江南閒睡。深感雲霄憑問訊。算人生、幾度逢知己。燕市上、浩歌起。

又 酬贈王山長卽次來韻

城與銀河接。正新秋、千門碧瓦。萬重晴雪。薄宦京華愁不了。聊唱新詞數闋。還卸取、玉簪儉節。曲犯梁州偏入破。劈關河、幾陣風騷屑。英雄恨、甚時歇。襄樊軍鼓鳴金鐵。問當年、周郎戰壘。沙沈戟折。一自幽蘭零落後。只剩湘潭愁客。笑乞米、頻勞書帖。稍待酒香籬菊放。儘生平、細共先生說。恐又惹、唾壺缺。

又 送彭直上下第還鄧州兼柬賢兄中郎

且作平生話。儘當筵、拍張脫帽。吹簫舞蔗。身是隴西猿臂種。家世由來善射。遭幾度、藍田尉罵。遲汝三年封侯事。笑誰令、健筆兼騷雅。彼李蔡、人中下。臨歧老淚如鉛瀉。趁杯闌、幡然竟去。輕弓快馬。到日賢兄憑寄語。撩亂柳綿飛也。有別緒、與之成把。

博望野花紅染血。訴行藏。風裏休悲咤。恐又震。昆陽瓦。

又 送家廣陵下第南歸海寧兼以誌慰

槐影搖清夏。送君行。紅亭綠酒。輕衫細馬。家世沙堤兼繡戟。誰不舊知名者。況彩筆。憑陵騷雅。月殿桂華新掇取。准金臺。買駿重論價。又遲爾。三年也。眞珠莫惜離筵。瀉。儘人間。羣兒自貴。底須悲詫。昨見垂楊詞幾闋。訴盡雨昏烟嫁。空歎息。娉婷入畫。自古柳爲天上宿。踈長條。定遣籠鴛瓦。會相見。龍墀下。廣陵有楊柳枝詞感遇絕佳

又 送西溟南歸和容若韻時西溟丁內艱

三載徐園住。記纏綿。春衫雪屐。幾曾離阻。又作昭王臺畔客。日日旗亭畫句。最難得。他鄉歡聚。眼底獨憐君落拓。又何堪。鵲鳥啼紅去。都不信。竟如許。千絲漫理無頭緒。問愁悰。原非只爲。渭城朝雨。如此人還如此別。說甚淩雲遭遇。笑多少。癡兒駭女。本擬三冬長剪燭。悵今番。舊約成孤負。和殘菊。隔籬語。

又 雙魚問爲閻牛叟賦牛叟兌閣遺徵曰甲申予客金陵妻獨攜子女避地

吳越常手書促子歸爲輕薄子啓械竊視歎箴勉得性情之正

軍馬臺城裏。記當年、君留建業。妾家吳市。江左英雄今誰在。太息周郎已矣。空還賸、斜陽燕壘。一派大江流日夜。捲銀燭、舞上青山髻。煩爲我、遞雙鯉。寄書殷浩輕猥子。卻翻言、旁無知者。臣開臣閉。筆格簪花挑來覷。不是一絨紅淚。也不賦、竹竿魚尾。味且雞鳴相莊甚。笑白頭、吟與盤中字。兒女態、裙釵氣。

又 送吳璫符歸武林

君去還來否。倚西風、頻搔短鬢。且攀衰柳。詞句沈雄兼感激。似爾驚才希有。論筆勢、蒼然最陡。可惜男兒分袂易。徧長安、尋煞無紅袖。誰爲我、勸君酒。芒鞋憶昨三邊走。正嚴寒、連營毳帳。幾重刁斗。從古陰山花最少。只有土花鋪繡。更只有、六花狂吼。今日秋容偏瀲灩。小湖頭、西子妝纔就。歸去也、恰重九。

又 爲馮躬暨催妝躬暨爲益都夫子世講是日夫子方有御書之賜白馬珊

河畔秋還未。羨人間、鵲橋先駕。紅絲雙繫。隔巷新人車乍到。四角銀鈴鳳子。已漸近、槐廳門第。相府沙堤行更穩。簇晶毬、滿路玲瓏綴。烟月下，香塵沸。火城纔散朝回騎。恰元僚、赭袍捧出。宸章新賜。麝墨淋漓題尙溼。千古君臣魚水。越顯得、門闌有喜。白馬珊瑚留佳兆。看他年、接武鸞鸞隊。天語在、應須記。

又

夏日爲代菊巖催妝菊巖滿洲人乙卯孝廉

乳燕飛晴晝。鳳城邊、靈符剛換。女兒節後。報道侯門方合。香預釀、菖蒲花酒。待醉也、玉釵纔溜。更喜石榴開幾簇。小闌前、要與猩裙鬪。一般樣、胭脂透。檀奴才在溫邢右。羨催妝、昨宵燭下。填詞立就。耳畔依稀聞郎字。似說東籬比秀。惹一笑、玉人回首。且俟秋來黃菊院。捲簾人、同倚西風口。問果是誰清瘦。

又

寄贈吳興沈鳳于時正五十

笑謂東陽子。論男兒、泥塗休恨。雲霄勿喜。自昔奇才多淪落。溷跡屠羊牧豕。算奴價、竟何如婢。細數平生袁灌少。只掉頭、優孟吾知己。問五十、行年是。碧菰城下烟波。

美。且徜徉、一帆茗雪。西風十里。地是烏程饒名酒。莫管人間萬事。姑引滿、頽然而醉。難得中秋逢兩度。碧團圓、長浸空明裏。湖面月。又東起。

又 諸城李渭清贈我以龍鬚數莖同曹舍人實庵陸編修義山沈大令融谷賦余篋中舊有虎鬚故篇中及之

猛性何曾改。記當年、元黃血戰。怒濤澎湃。一自海風吹陣破。神物居然頽憊。冷笑煞、紛紛蟲豸。失勢人豪多類此。有項王、刎死田橫敗也。一樣歸薶醜。虎鬚舊慣裝腰帶。是銅峯、獵徒脫贈。爲防百怪。長恨此生誰配爾。瑜亮相遭寧再。忍竟使、淮陰伍噲。今日兩雄都入手。便山魈、水蜮逢何害。況自有、吾髯在。

又 戊申余客都門時風塵淪落而合肥夫子遇我獨厚填詞枉贈有君袍未錦我鬢先霜之句一別以來余承乏詞垣而夫子之墓已有宿草久矣春夜偶讀香巖此詞往復纏綿淚痕印紙因和集中秋水軒倡和原韻以誌余感昔夫子填此韻最多集中嘗疊至數十首今者填詞用此亦招魂必效楚聲



之意也并寫一紙以示伯通

事已流波卷。憶春帆、酒中饒恨。將詞排遣。填到消魂千古曲。燭淚一時齊泫。紅漬透、吳箋蜀繭。知己相憐袍未錦。論深情、碧海量還淺。丁香結、甚時展。買臣自分難通顯。又誰知、此生真見。禁林春扁。俛仰鍾期成隔世。便化雲中雞犬。也刻骨、銜恩未免。今日錦袍雖換了。記前言、腹痛將他典。買素紙、向公翦。

又 立秋夜雨感懷和尤悔庵原韻

幕又廉纖矣。想天邊、也應長恨。淚如鉛水。牆脚野花無賴極。細算今朝開幾。攀摘罷、定然流涕。擬到橋頭尋日者。問半生、骨肉何如此。行人少、天新雨。颼颼況是秋盈耳。憶家園、黔婁有婦。宛然鄉里。颼颼西風吹去了。留贈黃金鈿子。難怪我、桐枯心死。冷雨茜裙都染血。忍相拚、送入秋墳裏。憑恨曲、喚他起。

又 七夕感懷再用前韻

鵲又填橋矣。滿長安、千門砧杵。四圍雲水。長記常年茅屋下。佳節團圓能幾。有和病、

雲鬢揮涕。縱病倘然人尙在。也未應、我淚多如此。彈不盡、半襟雨。如今賸有孱軀耳。便思量、故鄉瓜果。也成千里。誰借針樓絲一縷。穿我啼紅珠子。奈又說、春蠶竟死。囑付月鉤休湊灩。幸憐人、正坐羅窗裏。風乍吼、粉雲起。

又 中元感懷仍次前韻

節屆中元矣。九門邊、冷雲新畫。明羅疊水。朝罷千官紛笑語。知我凝情有幾。悄背著、紅牆流涕。慘不成行西苑柳。奈秋來、是物猶如此。能禁得、幾場雨。總調薑橘徒然耳。想珊瑚、魂來也怯。路三千里。亟倩蘭陀張淨饌。拋作貝多羅子。早勘破、人間生死。覺路蓮燈飄萬蓋。儘胭脂、傾向銀塘裏。化一片、彩霞起。

又 中秋感懷再次前韻

皓魄飛來矣。鳳城邊、打頭驚看。一規涼水。今夜市樓歡笑滿。盡道此生經幾。只有箇、人兒雪涕。便是月華圓不缺。到良宵、端正長如此。翻令我、淚如雨。酸歌詎到姮娥耳。轉嬋娟、漾人簾外。一晴千里。醉奪吳剛修月斧。腊盡金蟆兔子。更斫得、桂枝齊死。

若使冰輪能解恨。照雲鬢。但入重泉裏。何必要。又東起。

又 九日感懷再用前韻

又值題糕矣。滿長安。繡旗斜颭。車如流水。記得杜陵重九句。笑口此生開幾。也不似。今番揮涕。誰去登高。誰落帽。算秋光。枉了濃如此。轉不若。多風雨。諸君未識吾悲耳。儘豪狂。功誇漢武。智誇樗里。到得傷於哀樂後。幾陣鄰家笛子。心不許。英雄不死。歲歲黃花清瘦極。有和花。比瘦人簾裏。腸斷也。怕提起。

又 十月朔病中感懷仍用前韻

是日京城士女競燒冥帛於門外謂之送寒

衣

伏枕經旬矣。掩晴窗。誰爲稱藥。誰爲量水。又報鳳城頒正朔。佳節來年有幾。便有也。徒增悲涕。壁角風吹。殘曆本。細於塵。蛛網偏縈此。新和舊。恨如雨。梵鐘故遞愁人耳。是鄰家。寄寒衣去。北邙蒿里。疇昔春衫誇樣好。描盡花兒鳳子。纔直得。紅蠶一死。今日縱然隨例送。怕燕妝。難稱伊心裏。燒罷也。綵灰起。

又 臘月初六日是余生日卽亡婦忌辰也詞以志痛仍用前韻

嫁與黔婁矣。憶糟糠、搵他不住。兩眸清水。爲我懸弧緝楚夾。下到瑤籤第幾。直絮得、鸚哥流涕。今日蓮幢余轉拜。願相憐、再世休如此。花簌簌、墮成雨。安排果繫干支耳。記當年、代占雞卜。徧央鄰里。更喚街南盲婦到。彈動香蛇絃子。推測盡、五行生死。磨蝎早知真見祟。便長貧、忍客京華裏。朝飛雉、寒難起。

又 辛酉除夕恭遇兩宮徽號覃恩臣妻亦沾一命感懷紀事仍用前韻

一歲將闌矣。悵年華、挽他不住。滔滔似水。五十餘番婪尾酒。愁類今番有幾。蠟燭也、替人流涕。癡絕客冬逢是節。盼征軺、尙冀人來此。渾不道、竟成雨。栖遲只爲君恩耳。寧不念、茶香筍滑。銅官故里。今日五花沾一命。波及臣之妻子。敢尙訴、臣饑欲死。倘比黃花人尙在。製翟衣、寄到深閨裏。雖病也、定然起。

摸魚兒 家善百自崇川來小飲冒巢民先生堂中聞白生璧雙亦在河下喜

甚數使趣之須臾白生抱琵琶至撥絃按拍宛轉作陳隋數弄頓爾至致余

也悲從中來併不自知其何以故也別後寒燈孤館雨聲蕭槭漫賦此詞時  
漏已下四鼓矣

是誰家本師絕藝檀槽摺得如許半彎邏渺無情物惹我傷今弔古君何苦君不見  
青衫已是人遲暮江東烟樹縱不聽琵琶也應難覓珠淚曾乾處淒然也恰似秋  
宵掩泣燈前一對兒女忽然涼瓦颯然飛千歲老狐人語渾無據君不見澄心結綺  
皆塵土兩家後主爲一兩三聲也曾聽得撇卻家山去

又 清明感舊

正輕陰。做來寒食。落花飛絮時候。踏青隊隊嬉遊侶。只我傷心偏有。休回首。新添得、  
一堆黃土垂楊後。風吹雨溜。記月榭鳴箏。露橋吹笛。說著也眉皺。十年事。此意買  
絲難繡。愁容酒罷微逗。從今縱到岐王宅。一任舞衣輕鬪。君知否。兩三日。春衫爲汝  
重重透。啼多人瘦。定來歲今朝。紙錢挂處。顆顆長紅豆。

又 春雨哭遠公

怪連宵。暗風吹雨傷心事。竟如許。啼衫不恨分飛早。只恨論心何暮。溪畔路。昨歲裏。善權艇繫垂楊樹。洞門把炬。正古寺蒼涼。亂山葱翠。長嘯落松鼠。沈思極。不是雍歌聲誤。從來易散難聚。衰年故國逢知己。天也把人輕妬。情最苦。記前日。文園一卷多情句。病中親付。怕碎墨零紈。塵昏蠹損。和淚夜深撫。遠公臨沒前數日以青堂詞一卷囑予收藏

又 早春雪後柬雲臣

雪初乾。銀僵玉偃。冰牙猶挂簷露。漉漉春泥連巷陌。問者闕焉何久。君知否。聞說道。還京節。鎮喧刁斗。蠶吟咒吼。正萬斛餘皇。千羣組練。將壓大江口。吾老矣。那顧濤飛山走。長自尋花問柳。春光滿眼原非惡。況值小梅紅逗。簫管奏。只可惜。檀槽金縷人非舊。催成皓首。待三市月華。六街燈放。同飲夜橋酒。

又 哭王生王生常數夕作詞數百首詭云舊作其敏點如此故篇中及之

記年來。百無俚賴。聊將小令閒做。同巷有人才最敏。豔句頗能廣和。花影廢寫小字

斜行、各色蠻箋大。攜來詫我。任賦柳豪蘇。一宵立辦。詭說蠹餘課。誰能料。彈指一  
坏長臥。傷心腹痛車過。歷歷前游。還在眼。鄰笛吹來入破。劉白墮。算浮世生前。對語  
惟君可。慎毋計左。不信看城南。王郎新冢。夜雨綠苔澗。

又 澄江客舍水亭前有野鶴二日飲啄行潦中余傷其凌霄之質而辱在泥  
塗詞以唁之

倚西風、徘徊聘望。細流淦淦如許。月榭水軒臨斷岸。落木亂鴉無數。誰延佇。有兩兩  
幽禽、莎逕頻來去。柳陰深處。看滿陂蘆葦。一川葭葦。何計可留汝。思前事。處士亭  
栽梅樹。岳陽樓枕湘楚。玉京碧海閒風景。何限吹笙伴侶。時已暮。剩滿眼雞羣、噲等  
爲公伍。相憐不語。笑古往今來。事多如此。且聽夜窗雨。

又 早春接山陽陸密庵先生札兼惠我月湄詞賦此奉酬  
悵連宵、暗風吹雨。春寒歇在簾罅。忽聞鸚鵡籠中說。誰送香詞來也。披詠乍。似脫線  
真珠。亂向窗櫺灑。篇篇無價。便周柳纖柔。辛蘇感激。材盡出君下。爲君說。我有鵝

笙麝帕。能將風月吟寫。旗亭他日從君讌。准擬避君三舍。君莫訝。縱牛嶠願魚。今日誰憐者。花間曲罷。又孟蜀宮前。摩訶池畔。春草綠盈把。

又 蕁

憶家鄉。此時節物。四圍榭葉攢錦。沿湖小弄。莼絲滑。已覺水香微滲。論食品。應不數、雞酥羊酪。侯門藩。流涎那禁。伴玉膾鱸肥。雪花鹽鼓。微雨小橋飲。長安道。惆悵愁潘瘦沈。誰快凍酒初嘗。黏匙凝盃。知何限。絕憶吳娘烹飪。渾未審。笑洛下季鷹歸也。還由恁。思他則甚。拚一夜西風。五湖船上。倦覓綠簑枕。

又 宋牧仲謝方山曹實庵正子四先生招同人雅集次日正子和沈融谷詞  
見贈卽依原韻奉酬

記宵來。老顛欲裂。要騎碧海鯨鳳。銅荷燭淚。熒熒滴。沾滿衫兒嫌重。繚桂棟。記留住金鞭。不放狂奴控。公榮伯仲。任銀井堆霜。晶屏漏月。藥玉半船凍。吾生事。須付酒經茶董。不然帶眼移孔。杯闌忽憶家鄉好。萬點暗香浮動。亭楚頌。更一片笳園。茗芥



連唐貢。晴螺翠湧。且浣卻京塵。欲將冰枕。低選客窗夢。東坡買田陽羨。欲於此間種。橘構一亭名曰楚頌。唐貢吾邑山名。

又 詠窩絲糖 糖出大內遺製今西山一老中監尙能爲之後恐遂失傳矣

鼻春燈。赤瑛盤內。絲絲縷縷難理。平生說餅題糕興。慣與羣兒爭嗜。銅駝市。曾趁徧。賣錫小擔簫聲底。何曾見此。總輸與筵前。輕鬆纖軟。弱雪不勝齒。摩抄罷。髣髴夢。華小記。依稀南內遺製。當初赭帕低籠處。分賜龍孫鳳子。今何似。似宋嫂魚羹。又似楊妃荔。天家往事。也不信宮娥。曉寒呵手。搓得恁般細。

又 題徐電發楓江漁父圖

問何人。生綃滑笏。皴來寂歷如許。孤篷幾扇。西風底。滴盡五湖疏雨。垂弱縷。儘水蔓。江濱。信意牽他住。寄聲魴鱖。總來固欣然。去還可喜。知我者鷗鷺。行藏事。不是如今纔悟。浮名休再相誤。人間多少金貂客。輸卻綠簑漁父。誰喚渡。早萬木酣霜。紅到消魂處。湛湛楓樹。又遙襯蘆花。搖暗纖暝。闌了半汀絮。

又 題龔節孫仿橘圖 節孫關陵人卜居陽羨墓東坡之爲人故爲斯圖以明

志

有蘭陵寧馨年少。風前玉樹姚冶。縛茆樹柵東溪畔。正傍樊川水榭。誰圖畫。畫秋後。霜柑百顆高低亞。寒香暝射。擬楚頌名亭。追蹤坡老。此意儘瀟灑。人間世。總是蝸牛傳舍。休矜文采儒雅。海田幾徧栽桑後。萬事虛舟飄瓦。蜀山下。有蘇子祠堂。老木曾連把。如今盡也。便結得亭成。他年志遂。後日誰憐者。余邑蜀山下東坡書院內古木數株皆幾百年物今翦伐殆盡偶感及之

夏雲峯第二體 夏雨

楚簾生波。湘簾著水。夏淺勝春時候。豆棚底。心情小惡。楝花外。年光空逗。記三春。帽影衣香。漫細數。疏狂未居人後。奈六幅蒲帆。歸吳雖健。卻又愁如中酒。況是梅天。絲雨愔。儘按藍野水。點來都皺。一生事。秧車催去。四月景。蠶房擱就。倚小樓。看盡吳田。只漠漠陰陰。不堪回首。且白練裙。綠苔錢。閒寫小詞懷友。

金明池 憶亳村草堂柬徐南高

陣陣樵風。層層花浪。中是康崇舊宅。有不斷、湖光杳靄。遙山翠陰霽。皆滴。老梅花、玉  
偃銀僵。更門外、無數浦帆林笛。記衝酒橋南。尋詩巷北。細雨帽簷都側。一自飄流  
辭鄉國。剩露井閒苔。和愁堆碧。空廊鎖、桐花半畝。壞屋走、松枝千尺。賴故人、縛帚鋤  
園。早爲我添修。藥欄雞柵。料來歲花開。前村社散。頻夢春城羈客。

又 茉莉

海外冰肌。嶺南雪塊。銷盡人間溽暑。曾種在、越王臺下。記著水、和露初吐。徧花田、千  
頃玲瓏。惹多少、年小珠娘凝覷。奈賈舶無情。茶船多事。載下江州湓浦。姊姊飄流  
離鄉土。悵異域炎天。黯然誰與。燕姬戴、斜拖辮髮。朔客嗅、爛斟駝乳。望夜涼、白月橫  
空。想故國簾櫳。舊家兒女。只鸚鵡籠中。鄉關情重。相對商量愁苦。

又 臬署寒夜展鵲紅女史梅花畫扇感賦

歷歷殘更。沈沈深院。坐冷官齋樺燭。簷雨滴、人聲漸悄。又廊外、茶響將熟。想外邊、片

片瓊英。都解向、紅板橋南堆簇。悵何計尋香。無聊展畫。小檢齊紈零幅。遙憶粉娥調脂盞。恰和淚勻鉛。忍寒皺綠。簪花格。紅欲翠弱。沒骨繪神全韻足。料霜毫寫欲成時。襯纖月如銀。斜支臂玉。且吟弄空花。摩挲秋扇。也算探梅林麓。

又 蘧庵先生歸自吳門聞攜有秋岳先生新詞作此奉柬

夾岸輕陰。滿塘細雨。惹得亂帆堆綠。片石上、千場簫鼓。高臺後、幾番麋鹿。記皋橋、近秦娘家。恰梔子將開。枇杷初熟。只白髮江潭。東京遺老。傷心南朝豔曲。近日征南軍馬盛。料不比當年。家家絲竹。水驛閉、龍舟誰競。烟舫歇、蓮歌莫續。想連天、綠絲長洲。儘野鳥頻啼。沙鷗輕浴。且載得金莖。攜將蘭畹。歸當忘憂小錄。

又 丙辰秋日書事

落落門攤。寥寥間架。報道新添賦額。小市對、蝸廬馬磨。綺陌傍、朱扉畫戟。總和他、絮鐵錢。醪一例載。少府泉刀稅籍。有銅山兔脫。金穴蠅營。祇算黔婁陋室。瘦巷空壕風蕭瑟。儘堂燕幕鳥。遯逃無術。人競說、天家權酷。誰解學、仙翁點石。便天邊、月府清

虛怕未穩瓊樓。難安桂魄。見敬業坊前。奉誠園外。多少題門賣宅。

又 詠雁來紅

苔繡蒼琅。蔓縈屈戍。閒鎖街南空宅。見一片、霜條露萼。伴臥礎、冷絳如織。想夕陽、雁背微丹。斜壓下、灑向枝頭堆積。似顛顛秋娘。寂寥班女。倦鞦韆無力。颯颯賓鴻南雁日。正天水濛濛。關河歷歷。淒涼渡、青溪柵口。惆悵宿、黃陵廟側。徧江南、一夜西風。便也學春鶻。啼痕紅裊。恨漢苑無花。唐陵少樹。只染晴莎烟色。

綠頭鴨 清和

翠陰陰。頓染徧、小園前後。果然夏淺勝春。一聲鶯、穿窗透幕。滿街絮、撲帽縈巾。挑笻偏宜。脫綿乍可。風光尤喜恰初旬。清和景、水烟畫就。穀雨搓勻。漫因循。溪山好在。何妨荷篠垂綸。笑無端、一場春夢。問幾度、百歲閒身。趁冉冉、柔青緩綠。吟興劇鮮新。烘朵玫瑰。翦枝芍藥。摘梅煮酒且娛賓。屈指算、盈盈桑婦。漸作茶人。

笛家 屢擬過紅友郊莊探梅連雨不止詞以柬之

五里鶯聲。半村花氣。南郊迤邐。歸樵遙指。君家近。屋頭溼翠。窗眼疏香。濺裙水漲。落燈風緊。准擬攜琴也。思側帽。與細箋離恨。渡斜橋。背山郭。一片酒旗作陣。隱隱。詎知連日。烟迷楚岫。柳鬢全低。雪壓吳天。蘭心乍困。贏得倚徧雕闌日晚。吹徹玉簫涼嫩。況添西樓。夜窗疏雨。滴碎人方寸。便有日。訪溪梅。多管落英鋪粉。

又 九日長安遣興

秋士心情。女兒節物。懨懨愁坐。綠樽雖滿。何心勸。帝京此夜。鏤棗成斑。煎酥凝獸。題糕才健。麝帕紛貽。繡旗細裊。點綴侯門讌。正新晴。恣游賞。天氣不寒不暖。閒算。去年九日。有人樓上。笑摘黃花。斜倚西風。任他簾捲。今日懶覓登高伴侶。愁望秋槐宮殿。幾度逡巡。一番追悔。且倚闌干徧。怕萬一。鳳城邊。瞥遇南飛沙雁。

又 己未九日蛟門招同諸子游黑龍潭次實庵韻

滿目新晴。無邊野興。休論萬事。且須載酒題糕去。靈湫鏡黑。仄磴泥青。有人言是。老龍蟠處。一樣重陽。兩年羈宦。往事零如雨。被游人。問昨歲。破帽猶然存否。重晤。竹

西詞客剛來京國。亟拉吾徒。洗琰持螯。翩然豪舉。只憶深院小黃花朵。空顛釵梁鬢。縷。獨夜茫茫。他鄉惻惻。飲罷迷歸路。風急也。白楊邊。颯颯定和誰語。

畫屏秋色

西城秋眺懷緯雲弟久滯都門未歸用夢窗詞韻

放眼孤城側。落照前。一派傷心秋色。疊浪喧豨。怒濤澎湃。西水關窄。聽黃葉村中。乍揚砧響。旋復抑。釀晚烟。如此碧。更節近茱萸。天連烽火。不許離人此夜。不成思憶。前夕。蓮銅暗滴。夢重逢。帝里豔飾。錦箏銀瑟。弟酬兄唱。燭紅殘白。睡醒後含愁寄書。盼斷無去翼。念久客。誰舊識。囑付暮雲知。今宵消盡也得。人在暮雲以北。

白苧

早秋飲蘧庵先生宅隔牆聞絃索聲

淡銀河。映缸面。紅鱗微白。蕉軒梧徑。雅稱秋晴寂歷。更蒙茸。幽花雜卉。徧狼籍。快意儘樽前。休苦問。戰旗消息。日沒杯闌。再向空階布席。有萬斛西風。把小墀都拭。疑惑。幾層薜荔。一帶綠垣。何來遞響。高下玲瓏之極。久知是隔院。檀槽低摘。淒淒四座。似蘆花楓葉。潯陽夜舶。惹得今宵。無數吟蛩。牆下於邑。併入哀絲。倍作涼颼激。

春風裊娜 甲寅元夜

記舊時元夜。月挂紅樓。釵影亂。笑聲柔。火蛾兒。簇著凝妝豔粉。輕盈妖冶。打塊成毬。  
的的春嬌。溶溶夜景。夾路銀花爛不收。一曲紫綃催薄醉。六街絳蠟試清謳。誰料  
一天冰彩。化爲絲雨。隨風去。灑徧皇州。縈蝶翅。困鶯喉。誰家拋盞。何處藏闌。微雪猶  
零。怕沾鞋印。碧雲未合。莫上簾鉤。風光非舊。歎傳柑佳會。今年換做。萬里邊愁。

又 正月十二日同陸翼王宋旣庭吳志伊慶百徐大文葉九來道子李秋森

游白塔旃檀諸寺

被東風入戶。喚作春游。新霽動。峭寒收。望崢泓。太液龍堂鳳帽。參差上苑。碧甃銅溝。  
元夜風光。天家亭館。樹已將花人少愁。帽影帶晴薰御陌。鞭絲和暖糝皇州。經過  
旃檀繡剎。蓮幢芝蓋。行人說。翠輦常留。金犢穩。雪蛾柔。一車鶯燕。十里驂駟。舊族崔  
盧。花翎茜袖。新妝秦虢。秀鬢明眸。獨憐高處。有塔鈴碎語。當年此地。遼后妝樓。

引駕行 東旣庭



全吳館內。破楚門邊。十年事。記冶遊作使。與卿並倚吳閨。清狂簾前壁月。橋頭畫縠。鈿轅畔。游閒公子。紅燭銀箏。醉玉溫香。平康況曾經邂逅。枇杷巷口。掃眉娘。想那日。妖嬈喚馬。藥欄微雨。碧城涼。難忘。無端一別。腰身瘦盡東陽。奈曉風殘月。夢回酒醒。往事微茫。堂堂問江東士女。塗轍誰令我輩妨。料章華才子。也應點兩鬢吳霜。

十二時 偶憶

綿濛二月如酥雨。做出銷魂天氣。更獨客。冷清清地。拚只向紅篝倚。燈爇香焦。天寒酒醒。往事難提起。想那日。元夜迷藏。禊日鞦韆。人在綠楊絲裏。更當初。戟門嬉戲。一部烟花軼記。簾畔分釵。屏間惜曲。無限懨懨意。便海棠月上。夜深誰放花睡。奈幾年。飄零羈旅。已隔千山萬水。昨歲銅街。記曾一見。隱隱卓金車子。恰柳花如夢。又早香輪過矣。

又 觀獵

儘生平骨偏騰上。那識世間劉表。嗟落魄。古長安道。市上荆高又少。見說城南羣公。

會獵撫掌轟然笑。有十隊、細馬輕裘。硬箭強弓。圍簇盤鵬繡襖。往觀乎、且爲豪耳。莫以粗材相誚。斛律諸人。赦曹若輩。馬上詩偏妙。倏髀鳴餓鷗。拂林迅落飛鳥。坐平岡、燎狐炙彘。燕女如花迴抱。熱洛河斟。婆羅門舞。渾不似彈邊調。只李陵安在。碑前野烏羣噪。

蘭陵王 春恨

香腮託人與梨花俱弱。東風外、斜壓香衾。蹙損瀟湘遠山角。鏡鸞空掩卻。愁覩玉肌減削。又不是、中酒傷春。盡日沈吟倚妝閣。唾花裙上落。奈紫棧纔溫。紅綿正薄。水晶簾額輕寒絡。更陣陣春雨。懨懨殘日。小樓欲睡那便著。且自漱春酌。飄泊。舊時約。只柳綿花絮。年年如昨。綠徧平蕪天又各。念馬嘶門外。聽來常錯。清明寒食。無限恨。燕子覺。

又 秋況

倚簾閣。爽氣直通寥廓。涼瓦上、澹澹初暘。影似干將淬秋鐔。搗衣聲亂作。響入愁人

院落西風峭。陡把素砧。攙入霜天白翎雀。曲終睡還著。夢匹馬長城。迤邐沙漠。渾河路黑探兵錯。見都尉毳帳。賢王獵火。敵樓颯颯起。鷓鴣下短草如削。驚覺倍蕭索。漸暮色龍葱。水烟噴薄。夜蟾早逗東牆角。照滿地青桂。半街紅藥。可憐月底。又送到深巷柝。

又 詠閨人簸錢

粉牆側。風遞綠窗信息。琅然響。莫是青錢。簸入苔痕竟無跡。輕圓留不得。小玉春纖低拾。喧笑處。競理輸贏。朱汗龍綃背人拭。春慵倚窗榻。漸搓柳沈思。掐花追憶。人生幾度逢寒食。怕連朝風雨。滿城烟絮。韶華浪逐榆錢擲。一文便難直。小立悶還積。算幾篋青蚨。半貫赤仄。卜多字蹟都侵蝕。且潛買歡笑。強驅愁寂。團圓嘉識。把五銖看似歷歷。

大酺 七夕坐客大合樂漫賦

歷歷銀颺。簾外落。又是一番節序。今宵停寶杼。正南部烟花。西風牛女。端正窺簾輕。

狂換盡多少良儔俊侶。有白髮何戡。青春張緒。流商刻羽。漸露溼瓜筵。月穿針孔。紗  
幘無暑。醉搖梔子樹。是鬱金堂後。西偏路。誰知道。三生杜牧。前度劉郎。重來還到  
聽歌處。鈿盒一朝分。記不起。長生私語。算此際。情偏苦。離多會少。豈獨天邊河鼓。客  
且歌完金縷。

又 溪行野店小飲卽事

正野塘邊。春帆底。水膩吳綾一束。看看寒食到。小梅英。妝褪。暗彫香玉。杏蕊撩晴。鶯  
雛拂曉。幾對鷓鴣爭浴。板橋西客店。颺酒旗作陣。帶烟斜撲。有秀靨映門。嬌波窺戶。  
常壘情熟。篙師休浪促。夾衣解。貰飲何須贖。君不見。一生惆悵。半世因循。吳霜偷  
換。修蛾綠。況聽關山夜流多少。從軍笛曲。拚美醞。傾千斛。轉船解纜。社燕風簾相觸。  
泥香輕墮簌簌。

又 題毗陵海烈婦祠用片玉詞韻 烈婦徐州人流落毗陵。豔色爲漕卒所竊。

迫之不屈而死

恨廟竿紅垣。衣碧門外銀濤雪屋。羣妃蓬島讌。御天風來往。釵鈴戛觸。寂寂小姑悵。悵聖女。苦鳥啼歸修竹。古苔壞牆滿。任脫韁石馬。畫廊眠熟。歎螺髻煤殘。蝶裙灰燼。夜長人獨。靈旗歸太速。神絃歇。醉覲扶華轂。可惜是。亂水彭城。舊家小沛。望鄉徒極登臨目。入不言兮出。學唱箇。秋墳鬼曲。怨青塚。留江國。斑斑恨血。土花墳起紅菽。水腥打滅翠燭。

瑞龍吟 送董舜民之廬山用周美成春景原韻

西江路。多少湓浦波濤。鞋山烟樹。相傳白傅當年。月明送客。青衫溼處。船須罣記。得南康一郡。大江門戶。此中鶯疊匡廬。夜深毛女。緣崖笑語。君到試窺峭壑。縈紅繚碧。獅蹲豹舞。第一爲訊棲賢。可能如故。捫蘿別薛。好劃紀遊句。只休望。楚江赤壁。吳天瓜步。怕事隨潮去。望時又惹。高人愁緒。短髮搔千縷。君且坐峯頭。拈花成雨。晚來拍手。白雲堆絮。

又 春夜見壁間三絃子是雲郎舊物感而填詞

春燈炷。拚取歌板蛛螿。舞衫塵灑。屏間乍見檀槽。與秋風扇。一般斜挂。簾兒罅。幾度漫將音理。冰絃都啞。可憐萬斛春愁。十年舊事。慊慊倦寫。記得蛇皮絃子。當時妝就。許多聲價。曲項微垂流蘇。同心結打。也曾萬里。伴我關山夜。有客向、潼關店後。昆陽城下。一曲琵琶者。月黑楓青。輕攏細研。此景堪圖畫。今日館人琴。淚如鉛瀉。一聲聲是雨窗閒話。

又 夏景

天將曙。黯淡殘月窺窗。朝霞映樹。起來喚婢移牀。貪他井畔。早涼無數。悵誰與。俄頃碧雲低捲。火輪高吐。海天萬里炎蒸。渴龍天矯。陽烏旋舞。恰喜水邊桐際。風簾瀕洞。曠然無暑。長晝且將馬蹄。秋水閒註。松風小沸。親拆旗槍煮。還消受、竹肌墜粉。荷珠跳雨。漸漸斜陽暮。亂蟬嘶到。最消魂處。茉莉枝頭乳。浴罷碧闌干。簫聲一縷。無人只有冷螢來去。

西平樂 王谷臥疾村居拏舟過訊同南耕賦

篠里東偏。俞山北舍。中有隱者茅堂。鄰圃鈔書。隔溪賒秫。一村風雨歸莊。歎壁向霜天陡立。骨爲殘秋太瘦。多時曬藥西軒。終朝行散南岡。我買烟舫過話。柴門下。深巷劇空蒼。只須翦燭。無煩烹韭。欲與君言。竟上君牀。君不見石鯨跋浪。鐵馬呼風。今日一片關山。五更刁斗。何處乾坤少戰場。且擁孺人。相攜稚子。讀易歌騷。把酒彈琴。強飯爲佳。慎毋憔悴江鄉。

又 春夜寫懷

象管慵拈。鵝笙懶炙。春困斜倚圍屏。往事難追。舊愁易惹。更添夜雨淋鈴。記一騎衫痕似血。半夜簾紋如水。鳳凰橋上吹簫。蝦蟆陵下呼鷹。幾處鞦韆綠水。風弄影。篩碎碧潭星。秋娘一去。酒徒何處。萬水千山。有影無形。縱有日重遊洛下。再過秦川。鶴髮相逢。話舊。覓徧樓臺。祇剩寒鴉與亂螢。十載浮名。半生故國。且剩閒身。野寺山家。布襪青鞋。花前到處飄零。

玉女搖仙佩 客大梁月夜感賦

客愁無那。何日歸程。真向江淮起柁。惱殺天邊。一輪明月。掛在玉津園左。照著淒涼我。又雁飛牆角。馬嘶城堞。枕稜畔。如冰似鐵。仰視中庭。數點星顆。便有夢還家。生怕更樓。已曾合鎖。擘阮薰香都惰。祇剩繽紛。簾影對人低簸。暗數從前。宣和風景。多少花驄鳳舸。此夜誰端坐。匿笑處。顫立幾行釵朵。想又是。天街似水。梅花糝地。內家一陣香車過。遙映著。樊樓燈火。

又 登姑蘇元妙觀彌羅閣

仙壇竈窾。複館飛簷。架在蓮鬚藕孔。刻畫仙靈。雕鏤龍鬼。百怪躩踞梁拱。目眩神悽。恐更閃電。金泥。綃窗月湧。到烏雀。更無聲處。恍惚瓊樓。寒氣微中。童女守丹爐。碧柰花前。玉笙閒弄。前度劉郎情重。笑拍闌干。何限塵埃蟻蠓。銀漢茫茫。絳霄寂寂。訴與舊遊鸞鳳。淚灑鮫盤凍。吳宮事。只恨當初蠶種。空留下。湖山幾點。蘇臺一帶。年年花草昏如夢。東風外。綠波微動。

又 詠水仙花和蘧庵先生原韻



海國春深。洞天日晚。飄下幾枝仙蕊。望去疑無。看來入畫。朵朵風前擁髻。欲取餘花比。奈緋桃綠柳。大都難似。髣髴是、楚天如夢。湘水如苔。月明千里。有三兩鮫人。羣弄明珠。凌波遊戲。今夜空廊單枕。酒冷香焦。忽墮花前閒淚。憶得年辰。那家庭院。細雨簾垂丁字。人與花同倚。說不盡此夜。一欄空翠。誰信道。畫樓天遠。綠窗人去。看花長恁懨懨地。料花也、舊情還記。

多麗 題余氏女子繡陳思洛神圖爲阮亭賦

問多情。今古誰堪。雄長也。無如曹家天子。西陵臺上。虛帳更傳聞。東阿子建。少年情緒。駘蕩。水上明珠。波間翠羽。洛神一賦。神飛魂愴。只一事。家王薄行。難對中郎將。恐他日。黃鬚兒子。亦起非望。又翦出。輕雲態度。繡成流雪情狀。歎香閨。一雙纖手。比似文心。誰瑜亮。便使當年。袁家新婦。自臨明鏡。圖嬌樣。也還怕。傳神阿堵。宛轉須相讓。凝眸處。婀娜華容。千秋無恙。

又 爲李雲田周小君寶鏡題坐月浣花圖

暖紅篝月輪斜挂妝樓。恰雅稱、香閨心性。下階小試蓮鉤。好風篩、窗紗影碎。涼露溼、簾縠紋流。裙帶微飄。玉奴私語。人生易值此宵不。何況是、楚天巫峽。李漢陽人嫦娥別種清幽。羨此夜、月光人面。端正溫柔。漸滿砌、蛩蟬紅藥。如啼欲睡。疑羞倩輕綃。秋棠宜盥。央小玉、夜合將收。更與傳言。月波堪舀。莫問銀牀玉井頭。想像處、花前人月。永夜費凝眸。還只怕、畫圖難肖。搦管增愁。

又 劉公猷吏部每爲余言蘇門百泉之勝。冬日行汲縣道中。遙望峯巒幽異。未及登眺。感賦一闋。并以寄劉。

記劉子語我蘇門山好。更百泉澄泓。蕭瑟雷輓千尺銀瀑。亂松崖。經聲夜落。古樞溪、樵風晨噉。壽柏癭藤。危梯惡棧。山無不樹。樹無不鳥。徑豁訝數間虎落。時響幽人銚。儵然也。指間絃歇。山前月曉。一自渡。桑乾河水。馬頭恆向西笑。擬十月。寒衣手綻。來作山村荷蓀。太息塵蹤。難攀仙境。重來猿鶴應相誚。祇望見。蒙茸幕歷。一派青難了。回頭聽似有人兮。山半長嘯。

又 冰

玉壺中。井花徹底都凝。訝漣漪。風吹難皺。潺湲一夜無聲。太玲瓏。鱗堂貝闕。偏確聳。玉甃銀屏。烈士心邊。佳人肌上。一種晶瑩彷彿曾。還應似。飛仙劍俠。灰冷萬緣僧。都只被。奇寒苦凍。鍛鍊纔成。記前冬。蘆溝南下。歸舟卻阻河凌。四絃彈。頗黎劈裂。高挺擊。琴筑琮琤。玉駭蛟愁。珠飛兕吼。篷窗千里夢魂清。回頭笑。京華炙手。歲歲火雲蒸。還虧煞。沿街六月。喚買涼冰。

又 清明兼上巳作丁巳

算風光。依稀纔過傳柑。又取次。韶光媚眼。今朝三月逢三。映一行。水邊粉屨。立幾簇。橋上紅衫。皂莢園中。丁香樹下。春人影落百花潭。又何處。東風作陣。吹綻碧桃緘。從古是。清明上巳。兩好難兼。恰經過。幽坊小市。衣痕鬢縷。廉纖翠蛾招。流觴巷北。黃鶯喚。潑火城南。豔粉牆頭。紅香帽底。花枝婉婉礙晴簷。爭留住。錫簫戲鼓。准擬待新蟾。歸來晚。梨花院宇。情緒懨懨。

又 初夏同雪持南水放庵游南嶽小憩楓隱寺

弄微風。城南賣酒旗偏。且屏當、笛牀棋局。停橈第五橋邊。嶺濛濛、如將著雨。波細細、尙未成烟。妙欲生香。空能釀翠。人家四月焙茶天。迤邐處、松脂石骨。碧暗寺門前。僧寮好。窗中籬筍。厨下山泉。試低回、亭臺金粉。曾經烘染多年。畫廊欹、半龕佛火。雕欄換、一抹寒田。誰向行人。頻提往事。小樓鶯語最輕圓。支頤久、危岡亂木。暝色漸蒼然。徐歸去。羣峯帶我。晚髻尤妍。

箇儂 孫坦夫招飲女史澹容家分賦

轉瓣蓮巷左。見梵字、粉紅牆角。恰直箇儂。曉妝勻面藥。花冠喔喔。正蟬窗象格。西風輕颭。有碧桐花落。麤紈秀鬢工調謔。人是雙文。藝精六博。種種玉纖花弱。喜宿醒微析。春心猶惡。酒狂如昨。但人生行樂。此際秋娘。最憐輕薄。樽前況有韓嫣。碧雲天。偷撼鸞簫低學。更主是多才孫綽。平康巷、膝席分曹。滿座雄談馬稍。囑金吾、莫收更鑰。別來時、斜倚朱闌口。偶然思著。

又 丙午元夕雨

聽今宵疏雨也。算做一年元夕。舊事流波。一往如何覓。香街馬跡。記常年燈市。鞭絲帽影。有許多相識。闌珊燈火。梅精立。雅淡衣裳。輕盈姿格。人月同時一色。便旁人也道。此是秦虢。萍蹤頓隔。怕舊時李益。昔日君平。無人憐惜。簷前點點滴滴。似替人流淚。學人悽惻。拚此去。花朝寒食。都只向。雨雨風風。趁盡春光九十。紅篝擁。夜寒側。擬此情。并春柑傳與。何由寄得。

秋日將往吳門先寄園次澹心展成旣庭諸子

倚晴闌極目。見檻外吳山如積。罷酒登艫尾。烟篷浪舶。舞破空碧。問館娃何處。亂鴉啼換了。水鄉江國。渚蓮低掩。紅衣泣。似倚寒塘。暗傷斜日。將愁惹他行客。悵千年霸氣。彌望陳蹟。故人寂寂。住盤門小宅。臨頓荒園。蕭然裙屐。來朝候我簷隙。准秋燈夜綠。對牀同剔。奈烟郭。猶遮數驛。且趁著。萬頃洞庭。縹緲挂西風席。船娘唱。水面爭出。共江關。一片參差櫓。更闌聽得。

夜半樂 春夜觀小伶演葛衣劇任西華故事也

當時江左才調。樂安任昉。風麗推無偶。記驃騎陪軒。祕書把袖。青宮好士。朱門結客。更聞出入宮輦。翱翔苑囿。奈玉樹。人世偏難久。諸郎憔悴至此。西華東里。南容北叟。漫細數。平生密親懿友。葛帳誰嗟。練裙疇惜。可憐野鮮動輪。門稀漬酒。想此事。將毋古今有。閱此不覺。滿瀉瓊舟。狂掛玉斗。我論絕交君信否。倘然疑。君再聽。當筵紅豆。算蘭簿。何必籌身後。清歌且喜。簾垂繡。

六州歌頭 邗溝懷古

江東愁客。隋苑暗經行。鶯語滑。游絲細。夾衣輕。正清明。追憶當年此際。樓臺外。鞦韆畔。棠梨樹。垂楊渚。玉簫聲。一自風烟滿目。傷心煞。水綠山青。看江都雖好。舊跡已飄零。憔悴蘭成。意難平。念寄奴去。黃奴老。今古事。可憐生。回頭望。隔江是。石頭城。草縱橫。樓船南下日。君王醉。未曾醒。宮車出。晚鴉鳴。使人驚。惟有一江春水。依稀似。舊日盈盈。想參軍鮑照。欲賦不勝情。此恨曾經。

又 竹逸齋頭閱馮再來所著演攷賦此懷古

披圖長嘯發響劃巖巒。日南路真萬里。扼雄關。是苴蘭。憶昔繁華日。輦寶布。輸葑蕀。夔僮麗。賤錢重。雜花丹。靡莫牂牁。有幻師。鬻弄善舞能彈。更五溪六詔。縈繞點蒼山。鳥道屏顏。峭難攀。歎今古事。多割據。瀘水黑。甚時乾。响町國。哀牢郡。笑征鞍。不曾閒。莊躑開邊後。蒙氏廢。段家殘。離宮壞。金輿杳。沒諸蠻。髣髴三郎去。淋鈴也。何日回鑾。祇昆明劫火。映戰血成斑。羅袖紅殷。

又 春霽寄興

連朝陰雨。愁煞嫩寒餘。今晨起。驚霽色。晃階除。上人裾。盥罷抽書讀。哦騷易。繙莊老。纔散帙。旋掩卷。撚吟鬚。試聽春禽碎語。低頭想。有箇僧廬。翠畦恰半畝。旁用竹闌扶。樹影蕭疏。著花初。又前村外。斜橋畔。煙霧歷。徑紆徐。挑酒旆。搖歌扇。喚提壺。小花奴。正接天裙幄。沿綠水。匝平蕪。念此樂。真忘死。擲吾書。叔子固云佳耳。較雀臺。諸伎何如。一生幾兩屐。彼歌者誰歟。且往觀乎。

小諾皋 夏雨

密灑修梧。輕敲疏竹。一雨碧天如此。正日長亭院無繆。羈人徙倚。滿目烟潭草閣。多少紅蘭白芷。更明珠瀉向荷錢容裔。極浦沈沈。前汀瀾瀾。又小樓玉簫和雨。吹入愁人心裏。無限事。思量起。此際憑闌。幾回推枕。總是故園千里。忘不了。冰簟生寒。玉釵著水。風景而今依舊。無奈鬢絲不似。揀流落。楚尾吳頭而已。今夜樓中。明朝篷底。便瀟湘。宋玉悲秋。未必此情堪比。天欲暮。雨不止。

寶鼎現 甲辰元夕後一日次康伯可韻是歲元夜月食

星橋未瑣。火樹仍放。風光清綺。渾不散。游童白馬。雜沓笙簫闐寶砌。香奩畔。又夜情思整。笑看蘭缸結蕊。漸耿耿。金波萬頃。一派天街似水。昨夜孤負無眠意。枉費盡。描朱刷翠。問天上。素娥因甚。杳若秦樓嬴女吹。倚桂樹。盼廣寒車騎。無質霧迷三里。元宵夜。一鉤殘月。仄在碧雲堆裏。幸值今宵。重輪現。泰階重履。只鄒枚漸老。何日宸游陪侍。趁良夜。向春城醉。醉語如花伎。歎光景好處難圓。月也與人無二。



又 題定武蘭亭初搨和蘧庵先生原韻

筆精墨妙。風雅相尙。當年爾爾。論戈磔。爭誇典午。人擅韭花兼蠶尾。誰第一。是右軍  
逸少。庾翼家雞莫比。庾翼書云兒輩賤家雞愛野雉皆學逸少書須吾下當比之有  
妙帖。鵝羣裏。神蹟尤矜修禊。一自賺入梧宮閉。伴寶衣。長殉幽翳。還幸得。搨來  
定武。石本離離騰古翠。視淳化與光和兒輩。色門雞彝象盥。供歷代。君臣清賞。流徧  
深宮禁邸。人世滄桑。閱幾度。劫灰馬矢。歎龍僵虎踣。波及魯魚亥豕。揩老眼。向殘  
縑裏。滴透銅仙淚。痛多少。玉盃珠箱。鬼賣長陵夜市。

怨朱絃 寄淄川畢載積使君

憶水嬉。天氣鮮新。蘭葉離離。燕子紛紛。賣餚時候。韶光妖冶。撩人樂游原上。平康曲  
裏。舞衫歌扇如雲。更廣陵水色。半是堆藍。半是拖銀。樓上珠軒九曲。船上湘簾四面。  
一樣無塵。還爭羨。綠楊低處。刺史留賓。正吳娘。細繪紅鱗。玉簫作使。繡篋橫陳。小  
史菱花。妖童荷葉。宜笑宜嘖。嬌歌一曲。美酒千巡。忽見夕陽零亂。且隨著。裊裊金鞭。

隱隱香輪早辦兩行燈火。留待參差歸騎。同入城闔。奈此日、依稀記省。事已前春。

穆護沙 題茗中沈鳳子孝廉被園偕隱圖

吮黛調鉛素。偃霜毫、渲染如許。是東陽才子。蘋洲詞客。壓倒秦觀賀鑄。攜媿媿、吹簫樓上侶。小菖個、短籬疏圃。藥砌畔、紫葳蕤放。花架外、玉鬢髻吐。嫩紫嬌黃。長紅小白。烟條露葉倩誰梳。恰曉妝纔罷。手香輕摘。人在綠窗語。惆悵襟懷誰訴。鎮相看、卓家眉嫵。正春衫對挽。蠻箋低墮。情知粉郎新句。怕笛伎、箏人歌易誤。須紅豆、今番親譜。小立有、簾前桂子。授意把、碧簫潛取。摒擋偷聲。商量減字。月波浸徹畫屏虛。向前溪、更滌冰甌。宵闌煎顧渚。

三臺 春景用万俟雅言清明原韻

又紅閨掛殘斜月。香塵鏤完微雨。整飛蟬、一望碧虛前。見皎鏡、溶溶南浦。風光汎、漸蘸垂楊縷。三春景、如花似霧。鞦韆社、淡日濃烟。蹴鞠隊、繁箏急鼓。料鳳城、鈿車寶轂。不住紛紛來去。喚桂子、小玉報花香。日暖與、隔牆鄰女。踏青須、結伴東郊路。看多

少繡簾珠戶。喜今日滿院晴絲。怕明朝一庭落絮。更杜宇喚取春老。榆錢壓將春暮。憶去年元夜玩燈時。曾立在火闌珊處。轉盼又星橋燃蠟炬。鬧蛾兒紅樓紫府。休沾惹。竊玉閒愁。且安排尋香公務。

拋毬樂 詠美人蹴鞠

聞道凝妝多暇。蟬鬢嬌嬈。勻面纔了。纏額初竟。纖纖眉嫵。蘸畫靛翠羽低飛。壘香閣紅襟新乳。正好作劇尋歡。小疊魚箋。遍約嬉春女。向暖日紅樓。商量細數。氤氳粉澤。喧闐笑語。算白打鞦韆。和格五。總然無意緒。且水晶簾畔。斜穿鞠域。相邀同去。此際綽約輕盈。嬌花百朵。瓊枝一樹。寶釵鬆羅襪小。爭漾絳綃窮袴。玉醉花欹。吹亂紅巾幾縷。一泓香雪。臨風慢舞。髣髴似滾瓊閨絮。更香毬將墜。最憐小玉多能。傍襯凌波微步。漸蹴罷春愁。扶鬢影。嬌喘渾無語。小換輕容。滿身紅雨。

哨遍 詠彈箏

何處放嬌。研羅裙上一寸銷魂地。倚桃笙。恰恰罷梳頭。正是恹恹天氣。上青樓輕攏。

鬢棗乍捱。織筍萬種情如水。正搭定絞綃。妝完義甲。十二鈿蟬櫛比。對玉荷清影顫。瓊枝又小語流鶯上柳絲。慢撚斜搗。鬢鞞衫偏。那人情味。似秋夜楚天。急雨彈入空胎裏。鼓神絃含商。嚼徵盡伶俐。拍碎棠梨。唱殘紅豆。一雙玉翦低還起。印粉痕圓。凝愁聲重。碧到眉峯無際。怪窗前、簌簌落紅輕墜。見十五、檀奴綠窗西。要竊聽、曲中私意。不覺閣住銀箏。婉轉籌身世。種玉前緣。簸錢舊事。脈脈縈牽不已。家鄉秦隴幾時歸。此曲可憐猶在耳。

又 酒後柬丁飛濤卽次其贈施愚山韻

大叫高歌。脫帽驩呼。頭沒酒杯裏。記昨年、馬角未曾生。幾喚公爲無是。君不見莊周。漆園傲吏。洸洋玩弄人間世。又不見信陵暮年失路。醇酒婦人而已。爲汝拔劍上崦嵫。令虎豹君門勿然疑。古人有云。雖不得肉。亦且快意。君言在遼西。大魚如阜海無際。饑咽冬青子。雪窖人。聊復爾。土炕夜偏長。燭花盆湧。琵琶帳外。連天起。更萬里鄉心。三更雁叫。那不愁腸如醉。我勸君。莫負賞花時。幸歸矣。長嘯復奚爲。算人生。亦

欲豪耳。今宵飲博達旦。酒三行以後。汝爲我舞。吾爲若語。手作拍張言志黃鬚笑。捋  
凭紅肌。論英雄。如此足矣。

又 讀彭禹峯先生詩文全集竟跋詞卷尾兼示令子中郎直上兩君

自古穰城。從來宛葉。嶄絕誇形勢。有千年。諸葛臥龍岡。蕭蕭英魂霸氣。其西引武關。  
商於六百。昔人以戰爲兒戲。其南控襄樊。析郟房竹。常產畸人烈士。公也。生值亂離  
時。好說劍談兵。射且騎。鬚作蝟張。箭如鷗叫。言天下事。噫。此世何爲。巖疆好以公  
充餌。夔夔牂牁地。鬼燐生。鼓聲死。猶記靖州城。連營賊火。楚歌帳外。淒然起。公左挈  
人頭。右提酒甕。大嚼轅門殘肉。奈縛他烏獲。矐漸離。則女子傭奴。盡勝之。論通侯。羊  
頭羊胃。吾讀公也。全集有刀聲。戛觸。人聲。嘈噴。舞聲。絳繚。更雜筑聲。淒異。忽然牛飲  
酒池聲。又鬼聲。啾然林際。

又 會庭聞至

有客蒼然。萬里而來。精悍眉端做。訴蹉跎。少壯迅流波。算狂奴。半生磊砢。炙穀蹀高

談直驚帝座。周旋與我寧爲我。嗟廿載河湟。全家關隴。虞兮其若之何。況赫連城下。虎腥多。更無定河頭。毒龍窩。夜少氈房。馬腹中間。鼯哈竟臥。邀羌女秦娥。豪豬皮。染茜紅鞵。脫帽侮羣帥。醉來遑恤其他。奈少婦窮邊。三年淺土。壞羅裙被楓根裹。遂不覺神傷。悄焉淚溼。浮生漸識因果。乃豪氣狂蹤。盡摧挫。向法鼓齋魚。修梵課。更誰知。劫風吹墮。今年作事大謬。又捩蘆溝柁。道路上路鬼。擲揄近日。前輩何其計左。東風下第渡滹沱。笑洛陽黑貂裘破。

戚氏 東程邨文友

想當年。黃公墟畔。興翩翩。盤馬雕龍。春風門巷。盛貂蟬。有鄒陽董相。一時賞譽重琅玕。略記旗亭遊處。都相似爾我周旋。自許上流。人稱名士。終朝蹋臂縈牽。更兒呼德祖。弟畜灌夫。意氣無前。憶唱綠幘金丸。風流放誕。並坐響鷗絃。髣髴是。巷名金線。幕號紅蓮。回中下杜。油壁雕鞍。曾經墜粉遺鈿。狂奴減未。癡人死未。詬厲語亦相憐。分攜成舊雨。酒闌追省。一往淒然。同學少年雖健。奈酒徒散盡。不堪言。道政坊頭。

延秋門外憶了萬千。論窺簾、映柱人何限。都分付、碎雨零烟。念故人、一樣艱難。總蕭瑟、江南庾子山。寫瑤琴怨。我彈未了。又怕君彈。

鶯啼序 春日游平山堂卽事

三月雷塘口。多少游絲浴鷺。正瀲灩、文穀初平。金溝種滿芳樹。屏幕津樓斜蘸水。鞦韆春院閒吹絮。喜夾衣初試。艇子一雙搖去。陣陣鬢絲。層層簾影。齊問平山渡。隔船紗、裊裊亭亭。影落綠波深處。照菱花、水面明妝。唱竹枝、風前詩句。又東園、芍藥纔紅。金鈴爭護。蘭橈小攏。看遶徑裙花。漾塵微步。漸鋪遍、氍毹玉筍。飛觥春織拂素。紅子低敲。青梅小摘。欄杆卻立頻回顧。驀地見、玉鉤斜下路。傷今弔古。黯然偷注橫波。此處是隋皇墓。幾番悵悵。流水東風。往事渾無據。且趁江流正滑。好放蜻蛉。慢搖紈扇。重歌金縷。暝翠將沈。船頭欲轉。茱萸灣子紅橋下。妬游童、寶馬將人覷。可憐此際歸來。兩岸榆錢。一天絲雨。

又 蘭陵邵子湘有畫像五幀一展書一課耕一垂竿一游嶽一蕉團索余題

詞因賦是篇

一圖執卷堂前後。蕉黃竹翠。環牆隙。激水鏘鳴。澗澗聲循簷際。中有一人攤卷讀。不知所讀何經史。想讀當佳處。時復奮袂抵几。其一江村滌場納稼。髣髴柴桑里。敝村扉。箕踞松根。揮斥田奴疆。以映斜陽。老犍驅來。漾新蟾。雖鳧驚起。芍陂鄆杜。足平生。千場磴確。一圖泛艇。溼徧船頭綠。是洞庭烟水。軟幔障疏櫺。斜曷茶烟。細縈溪尾。釣得鰲來。曬將網去。撥棹入江鄉。漁市其一圖。竹杖還櫻履。層巒疊嶂。秋深樹葉參天。夜靜松花滿地。廢箸沈吟。輟耕太息。往事都非矣。何苦上書北闕。侘僚無成。種豆南山。蕪荒不治。龍爭七澤。虎鬪千山。釣名釣國終非計。便終南捷徑徒爲爾。亟圖翠蔓青藤。峭厂枯園。放吾鼾睡。

豐樂樓 辛酉元夜同叢山賦

上元許多往事。摺疊箋倦寫。對皎皎。一片冰輪。背人鉛淚偷瀉。記年少。心情百種。拋來都付傳柑夜。月將圓。狂到收燈。那宵剛罷。要識狂奴蹤跡。除是問寶釵羅帕。喜



人月一色相看。盈盈堆滿簾幮。粉牆西、火蛾低旋。軟幔左、飛蟬頻卸。也曾招、花朵般人。倚風輕罵。誰差詞客。去作官人。舊情仍亂惹。況今歲、鳳城中。烟柳外、添了萬盞晶籠。水邊斜挂。獅蠻假面。參軍雜饜。繡帷飄得天街滿。更夾路、香迷憑人打。鸞鞞獸襖。幾羣牙帳。毳門彈壓紫陌坊瓦。昇平士女。京國樓臺。荷九重放假。囑闔闔、雞人漫唱。月總西沈。人忍空孤。舞場歌榭。緩扶薄醉。御溝斜轉。前門小立。偏妬煞、綴犀釘鈿粟繚垣下。往來月裏摩挲。多被春纖。絮伊情話。燕京風俗元夜婦女競往前門摸釘爲戲相傳識宜男也

炊

聞

詞

蓮  
影



王士祿（天啓六——康熙一二）

字子底。號西樵。山東新城人。順治乙未進士。就萊州府教授。累遷吏部考功員外郎。癸卯典河南試。以磨勘。罹吏議下獄。事白。流寓吳越。旋以原官補用。遭母喪。悲號而卒。私諡節孝。工詩。與弟士禎並稱三王。著有十笏草堂集。

序

眉山二蘇風流競爽。獨至填詞。則丈六琵琶。偏讓老髯。而穎濱不得一語。以此定其爲兄弟耳。瑯琊二王。卽不然。向讀阮亭衍波詞。每出一語。落落如有香氣。固當奴視七郎。婢視清照。今遇西樵於邗上。出炊聞卮語讀之。靜情豔致。撮花草之標。似未肯放阮亭獨步。何也。古人佳句。多在歌眉舞袖酒黏花壓之間。乃西樵羈縻請室。八月南冠。他人書空咄咄。尙不能堪。而弄筆所至。與會迺爾。觀其胸中空澹。若無一物。以視鄒生書嵇生詩。相去何如。戲語阮亭。君卽有廣陵十部鼓吹。此事故須輸阿兄一著。或謂西樵方長齋繡佛。盥寫名經。不當憊此綺語邪。不也。天上無懵懂仙人。西方豈有鈍根佛子。假以炊聞卮語供養如來。如來必且微笑。以教迦陵諸鳥鶯子。大弟和以微妙音樂。百千天女。皆以種種花香而散其處。吳門尤侗悔菴撰。

# 炊聞詞

新城王士祿西樵

## 荷葉杯第一體 夢迴

紅暈倦。眸如纈。春歇。夢迴時。被香無賴。曉魂賦。還睡。掩簾幃。

## 又 和溫飛卿韻

小艇掠煙春浦。香雨。杜蘅紅。弱鬟斜掩畫窗裏。微起。綠楊風。

## 又 憶魯泉山居二首

憶待石橋金鯽。山夕。淥波涼。小亭紅杏幾枝側。斜日。撲衣香。記得山樓日課。春惰。枕書眠。竹籬微映露桃面。紅蓓。午晴天。

## 南歌子第一體 窗午

窗午花情倦。樓春鏡影妍。新燕啄泥天。枕屏圍小夢。阿誰邊。

## 三臺令 鄴下三臺二首

弔古重回遠目。憑軒遙指荒邱。不覩西陵歌舞。唯見漳河亂流。  
落日烏啼影寂。春風鼠竄苔斑。只有千年舊瓦。曾覆當時玉顏。

荷葉杯第二體 記得

又向春風相見。梁燕。記得去年時。有箇紅欄共晚卮。思摩思。思摩思。

望江南 望蘇門二首

天外影。人道是蘇門。磴覆松毛青到骨。崖封苔繡碧爲魂。儻許一追捫。  
蘇門好。何日得巾車。安樂有窩銷白日。嘯臺無恙臥青霞。微詠帽簷斜。

漁歌子 錦湖四時漁歌四首

雪霽冰澌水漫流。魯陂春漲繞磯頭。攜短棹。縱扁舟。逐鷺微曷下遠洲。  
繫纜青邱萬柳東。荷花面面午時風。懸箬笠。枕籠簾。臥待宵涼理釣筒。  
細雨淩微溼綠蓑。白蘋香裏斷鴻過。持蟹飲。扣舷歌。向夕漁燈炙紫螺。  
認籛敲冰下短叉。北風獵獵背篷遮。炊荻葉。蔽蘆花。擁婦呼雛醉晚釵。

蕃女怨 次温飛卿韻

曉風吹夢春色遍。棲穩梁燕。合歡衾。雙鳳扇。厭他常見。枕屏帆影向人來。又重迴。

調笑令第一體 春閨二首

花樹。花樹。翼歷一窗紅霧。月明寥落金樽。錦瑟年華斷魂。魂斷。魂斷。厭煞春宵銀漢。金雁。金雁。歷歷斜行箏面。紅絃素手縈愁。遲日凝妝上樓。樓上。樓上。南浦淥波晴漾。

西溪子 玉臺

何處紅樓郎醉。儂抱春風孤睡。玉臺前。誰共語。和影語。纔到雙眸暈處。最先知。劇憐伊。

如夢令 白沙江上送貽上之金陵

沙尾孤舟潮擁。手底離觴酒重。忽忽惱雲帆。不似青驄堪控。如夢。如夢。昨夜短篷相共。

又 欲別

欲別玉人歸去。細雨廉纖薄暮。紅燭靜惜惜。好共綠窗幽語。且住。且住。袞潤紫沈濃炷。

又 初夏二首

正是夏頭春尾。芍藥酖顏紅靡。向晚瑣窗風。悵絕玉人孤倚。還喜。還喜。夢裏燈花幾蕊。

風捻楊絲碧老。雨簸荷錢青小。何日草堂邊。臥聽一林黃鳥。堪懊。堪懊。誤被軟紅相撈。

又 憶柳菴山寺

憶住柳菴山寺。幽興隨心無次。支枕敞晴窗。臥選萬山紫翠。清吹。清吹。我愛礪松嫵媚。

天仙子第一體 本意

撥棹春溪深幾曲。桃花紅蘸清波綠。漁郎怪事憶人間。歸去速。閉仙谷。俯仰青山身



碌碌。

江城子第一體 閒庭

秋千搖影月微明。到閒庭。絕人聲。一點紅燈，依約綠窗楞。敲遍闌干佯不應。撥蘭燼。倦盈盈。應仄聲。

長相思 本意

風半廊。月半廊。鳳脰燈青玉簾黃。別時秋乍涼。蘋已霜。蓼已霜。碣石瀟湘尙渺茫。關河較夢長。

相見歡 贈季弟

若爲歌管銷愁。盪離憂。憶逐殘秋，征雁問揚州。意中漫憐東閣，少淹留。誰識到來，翻送秣陵舟。

河滿子第一體 倣和凝體二首

最是春風情緒，無聊無賴無端。枕瑟孤眠思好夢，被池虛繡雙鸞。爭似蕊黃花子，朝

朝貼向眉彎。

髻髻玉人情態。桃花淺醉春風。咫尺女牀仙樹遠。漫云宋玉牆東。爭似猩紅寶袜。朝朝約向酥胸。

調笑令第二體 成公智瓊

神霄弱女冰玉姿。帝許人世牽紅絲。濟北從事感精爽。雲車白日來葳蕤。芬香午夜疑同伴。卻遣人知非妾願。訣別遣君繡襦襜。魚山五載重相見。

相見魚山畔。五載精誠重會面。雲輶霞鞞神仙伴。心感多情弦掾。同車還許同心綰。洛水春波婉變。

又 天台二女

相將采藥仙山中。仙山窈窕迷幽蹤。越嶺循溪爲饑渴。溪流婉轉胡麻逢。溪邊忽遇雙嬌女。絳幃許結同心苜。謁來啼鳥喚鄉心。無端輕別神仙侶。

仙侶溪邊女。笑倚桃花相向語。絳幃雙結同心苜。婉態幽歡難舉。鳥啼鄉思茫無主。

輕別玉娥歸去。

又 洛神

合歡遺枕愁君王。洛川斜日蘅皋傍。精移思散若有遇。神光離合迷陰陽。此時宛  
覩凌波步。心寄君王魂定赴。卻感神人怨盛年。遺情想像真難賦。  
難賦。凌波步。心寄君王魂定赴。遺情想像悲靈遇。斜日蘅皋空暮。獨攜遺枕循歸路。  
愁逐洛川東注。

又 杜蘭香

芳蘭冉冉清湘湄。玉顏姝瑩天人姿。轉瞬青童引歸路。十年預約雲霄期。包山有  
士真靈配。唾孟留作登真記。侍女重來寄意深。壖城夢斷遙相遲。  
相遲。真靈配。侍女重來遙寄意。玉孟曾作登真記。更付黃塵仙帳。壖城歸去心期遂。  
雲路雙翔翡翠。

又 織女

飲 聞 詞

閒庭臥月香風流。美人朗豔來宜修。幽懷宛轉託神契。玉華簾展紅鴛綉。經年卻別情難斷。紫房遙寄青縑怨。枕香衣淚對愁眠。玉顏寂寞空霄漢。霄漢情難斷。撫抱臨歧空戀戀。紫房遙寄青縑怨。別後靈期汗漫。枕香衣淚留相伴。寂寂玉顏難見。

又 玉卮娘子

書生種花邏谷邊。暮春三月千花然。玉卮娘子騎馬過。青衣輒訂三生緣。殊絕若顏驚阿母。美人涕淚辭箕帚。玉盒殷勤贈別離。仙都日斷空回首。回首辭箕帚。殊絕若顏驚阿母。玉卮難復爲君婦。邏谷舊緣空有。遺君玉盒君憐取。腸斷仙都別後。

又 雲英

湘漢同舟逢麗人。錦屏昵洽難相親。酬詩別示青冥路。授漿恰覩紅蘭春。神仙果在藍橋驛。心堅玉臼終須得。多情共踐玉峯期。瓊樓攜手今何夕。

何夕。藍橋驛。百日爲期難自惜。心堅玉臼終須得。共踐玉峯仙宅。裴郎阿姊還相識。  
湘漢新詩重釋。

醉太平 郵夜

星前角聲。風前笛聲。惱人日夕逢迎。問王程幾程。別邊酒醒。歸邊夢醒。憂來如月  
明明。問秋更幾更。

生查子 豔情

窗曉露微明。未醒雙文睡。輾轉玩瓊顏。愛煞斜鬢膩。睡淺爲郎羞。擁損重樓被。後  
夜卻防郎。只枕郎君臂。

又 別怨

紫棧已停熏。銀蠟仍銷焰。共影守殘更。相惜還相厭。蕉萃此時心。郎定無由見。獨  
有夜啼烏。髣髴聞微嘆。

又 次女郎紫竹韻

階。憐。好。月。癡。窗。厭。孤。燈。慘。無。味。夜。來。風。空。逗。簾。犀。颯。  
莫。檢。枕。函。書。舊。淚。痕。痕。黠。都。  
得。幾。絲。愁。縈。損。春。山。點。

酒泉子 小院

細。雨。惜。惜。寂。歷。紅。薇。小。院。殷。輕。雷。卻。執。扇。綠。屏。深。  
涎。涎。紫。燕。彈。雙。尾。無。語。梁。畔。睡。  
簾。痕。孤。香。氣。靡。暮。寒。侵。

醉公子 街鼓

街。鼓。傳。三。四。不。見。蕭。郎。至。何。物。對。裴。回。玉。香。獨。見。鞋。  
錦。衾。空。豔。豔。沈。水。薰。來。厭。休。  
自。聽。更。籌。鴉。啼。金。井。頭。

又 次顧夙韻

梳。裏。朝。來。淡。羞。對。移。春。檻。斜。倚。綠。牙。屏。梨。花。小。院。扁。  
獨。坐。流。光。慢。遲。日。窺。門。限。蓬。  
鬢。亂。雙。蟬。心。慵。又。一。年。

昭君怨 樓外

樓外夕陽牢落。倚損危欄一角。何處見天涯。碧山遮。  
那似合歡雙枕。解使瀟湘路近。回夢惜餘歡。覷屏山。

春光好 秋千

紅索軟。錦旗平。蝶裙輕。一倍春光照眼明。鶯初鶯。  
人是如雲如月。天看非雨非晴。髣髴似聞花影裏。墜釵聲。

點絳脣 閨情

雨。飄空庭。夢回失卻桐廬路。春愁相赴。又是紅窗暮。  
卜損金釵。怕見芳園樹。微寒度。水沈銷炷。且伴春風住。

又 夢餘

蹴踏閒愁。先生被卻拘墟也。夢餘醒暇。又手槐涼下。  
樹畔驢兒。有似邯鄲野。歸去者。炊成瀟灑。莫道黃梁啞。

訴衷情第三體 次魏承班韻

蹙恨雙蛾翠損長。犀簾靜暮堂。新夢斷。亂蟬涼。慵續午餘香。宛轉篔紋光。似迴腸。清宵好。更夢橫塘。學鴛鴦。

浣溪紗 夏閨二首

瓊砌陰濃暑漸收。夢回樓角夕陽幽。晚花香裏上簾鉤。綠墮鴉鬟金雀隱。紅斜寶  
袂玉膚柔。風邊小立只低頭。

茉莉風涼沁洞房。瑣窗斜月墜清光。玉人枕畔卸衣裳。細語低迷防婢覺。幽情宛  
約惱郎狂。暗中無奈繡鞋香。

又 次少游韻

半下流蘇冒綠霞。緩歌捉搦按紅牙。春風先到秦娘家。選夢正宜衾鴨暖。昵人偏  
是鬢蟬斜。莫將銷恨屬名花。

又 別來

錦水文鴛宿處同。別來魂夢鎮惺忪。分攜記在綠屏東。執手悽悽還脈脈。回頭昵



呢苦匆匆。橫波低盪一雙紅。

又 春閨三首

嫵媚風光二月過。輕衫不愛繡銀鵝。蜻蜓淺碧纈文羅。  
似爲春醅。紅襟燕子又來麼。  
風亂細桃午倦時。雙鬢好爲掩翠眉。怕來春夢似游絲。  
竹惜欹枝。爲他情態也差差。  
情思懨懨厭襪羅。起來紅日玉臺多。關心殘夢怎騰那。  
子是翻荷。當窗自惜態娥娥。

又 豔情二首

笑倚秦箏理鈿蟬。午窗蘭氣絕清妍。詭人脈脈禪香肩。  
紀最堪憐。黑犀合子贈纏綿。  
柳葉眉長慣似愁。當歡微斂越風流。雙文小玉總仙儔。

小倦非緣思夢睡。柔情卻  
種得碧蘭憐露蕊。寫成朱  
瘦損腰圍如弱柳。梳成髻  
穠李風情誰得似。破瓜年  
夢淺羞郎還閉目。慵多喚

婢代梳頭。此鄉真個是溫柔。

清商怨 和歐公韻

銀牀梧葉落漸滿。悵流光欲晚。平楚高樓。連朝勞望眼。畫屏瀟湘漫展。恨夢破、雁和人遠。心上秋來。問秋秋不管。

菩薩蠻 露筋祠

船頭暮笛吹寒浪。蘋黃蘆折憐遙望。野岸出空祠。靈旗颺晚颺。無郎歌莫誤。不是青溪路。夜夜對重湖。魂歸片月孤。

又 夢破

邯鄲夢破抽身急。掉頭怕近長安日。使跨白驢歸。重尋舊釣磯。是非書幾卷。失學從兒懶。帶索好行歌。無勞春夢婆。

又 閨曉二首

春魂帶夢扶難起。玉欵翠弱妝慵理。不用鬱金油。鬢雲膩欲流。一雙羅襪瘦。小鳳

嬌紅珠。著罷立盈盈。蘭階無限情。  
玉階溫露細鉤小。拗來荳蔻含清曉。何處惜芳菲。春光繡蝶衣。  
卻歸妝鏡畔。佇立成微嘆。還理亂衾窩。憐他伴夢多。

又 有寄

拋儂幾尺煙波路。斷橋難斷魂來去。何處望全迷。西陵更向西。  
欲知情鄭重。驗取宵來夢。可耐不成眠。烏啼又曙天。

訴衷情第四體 曾記

白雲不戀戀溫柔。曾記臥紅樓。玉奴笑回蓮臉。親爲試篴篴。  
雲影散。雨香收。漫凝眸。幾樞淡月。半臂濃香。一寸眉頭。

卜算子 不寐

暗燭影疑冰。饑鼠聲如雀。窗隙寒風和漏來。夢又成耽閣。  
歸計尙蹉跎。春事全蕭索。此際殷勤覓睡方。欲下真無藥。

又 送春用徐師川體

春欲賦歸歟。餞汝青門路。咄汝能偕愁共來。好拉愁同去。春謂君良誤。愁與君何忤。此日幽拘除卻愁。誰與君同住。

采桑子 有贈

宜人最是橫波慢。睡態融融。紅燭微濛。杜牧清狂也到儂。愁君姓字偏難忘。耳畔東東。他日車中。悵絕輪邊斷續風。忘仄聲南人謂陳爲耳東。又唐人詩耳邊長似叫東東也。

又 春閨

流蘇不閉三春夢。宛轉梨雲。一霎氤氳。洛水湘波在宋鄰。醒來無事消長晝。臥損穠春。莫問芳辰。春絮春花慣惱人。

減字木蘭花 羈所七憶

竹西清署。昨歲稱觴曾暫去。慈母縫衣。又逐寒楓草草歸。湘纍新怨。二老遙聞魂

應斷念此如何。夢溯清淮夜夜波。

早年似陸。夜夜書燈。還接屋中歲如蘇。雨驛梧聲怨索居。

祇期暮齒。下澤同驅。吾

共爾。誰意而今。灑淚題詩寄卯君。

謝家小女。少日紅閨深處貯。嫁與黔婁。畫匣金釵廿載愁。

甘同終窶。未忘牛衣中

夜語。只爲逡巡。偕隱心慚舉案人。

桃花蘄雪。掌裏雙珠光似月。幾載身傍。次第鳩車看繞牀。

堪憐弱歲。饋棗崎嶇爲

汝累。莫事詩書。殷鑒於今近在余。

誰云弄瓦。繡襦相憐無異者。弱女非男也。與陶公慰醉顏。

還思賣犬。筍屐他年親

嫁遣。此意悠悠。面壁嬌啼我欲愁。

紫囊曾賭。早日階蘭欣在靚。昨歲於菟。乍見牽衣更捋鬚。

經時離別。頻夢蕪城形

水月。羯末封胡。此日幽憂倍憶渠。

單車宵引。鐵網珊瑚思探盡。深院梧桐。紅燭三條見至公。

玉壺秋月。人道歐公清

鑒別。我罪伊何。默默憑誰訊汨羅。

又 寄內

還知別後。人共爐煙宛轉瘦。燈底風前。憔悴茗華祇自憐。  
憑誰寄語。莫爲藁砧徒自苦。有日歸兮。攜手同君賦五噫。

後庭花 詠燕

浥塵小雨清明近。幾番花信。重來玉剪雙雙趁。玳梁堪認。  
故巢新補。芹泥潤。落紅相襯。流黃機畔人迴瞬。陡添嬌暈。

好事近 憶柳菴舊隱次放翁韻

回首碧山樓。四面遠天爲壁。窗啓俯臨層巘。看偃松蒼積。  
花關長晝不曾開。猿鳥共休息。卓午聒回幽夢。是衙蜂喧日。

謁金門 和馮延巳韻

晨睡起。倦眼微睜秋水。且散嬌慵春徑裏。露桃開幾蕊。  
鞦韆風前如倚。撲亂楊花

斜墜。正憶桐廬人未至。蛛絲輕送喜。

又 和尤悔菴寒夜韻

深宵寂。暗燭暈成愁色。小婢開簾寒側側。梅花明夜黑。雪片風邊瑟瑟。帶箇雁聲淒歷。孤枕愁聽蓮漏滴。枕痕朝看溼。

金蕉葉第一體 詠雁用蔣竹山秋夜不寐韻

晴空淡暮。遠飛來。互鳴似索。魚鱗雲影斷續。斜河正絡角。幾個疏星作作。井梧飄。酒懷乍惡。楚天秋水浩渺。寒沙幾處落。三墳書水雲魚鱗

憶秦娥 次少游韻

秋眉碧。月明幾夜流黃織。流黃織。誰家闌角。乍飄風笛。錦機羞鑷鶉鶉翼。遠書漫說長相憶。長相憶。玉籠愁絕。相思聲隻。相思鳥名

眼兒媚 和徐野君贈人韻

箇儂名字似東東。記曲又紅紅。眉月幽幽。鬢煙約約。膚雪濛濛。縹緲風情看不定。

幾處認巫峯。簾底樽前。花邊竹外。掌上圖中。

惜分飛 湖上有贈

淚眼非如潮有信。話到離愁便暈。此際看尤俊。橫波那爲多啼損。家住西泠還較近。蘇小同心試問。莫忘相思分。卻教油壁全無準。

又 有寄二首

共子真同魂與魄。不道輕輕便坼。無奈離魂急。獨留殘魄誰相匹。檢點屏帷尋舊迹。印臂釵痕未失。立盡窗兒黑。愁來那辨阡和陌。憶得相逢春欲暮。油壁西陵乍度。縹緲花和霧。風流欲壓陳王賦。賣眼燈前迴一顧。脈脈幽情早付。好月當窗處。背人卻把心期訴。

南歌子第三體 鷓鴣

簫局晨香裏。流蘇曉夢還。十三小女綠鷓鴣。情似十三明月。未全圓。花影紅屏午。春光碧戶傳。抱來雁柱十三絃。已覺一絃一柱。思華年。



又 次湘真春月韻

瓊樹濛濛映。紅窗漫漫流。雪兒好爲唱無愁。休負一規、親切照藏鉤。珠露從教溼。金罇莫遣收。餘光潑灑小眉頭。不似清秋、楚楚咽簫樓。用坡公王夫人語意

浪淘沙 次李後主韻

愁似水潺潺。百意闌珊。幾樵風做晚來寒。倩酒澆愁愁不顧。醉也無歡。岸幘倚疏欄。愧負青山。試歌行路古來難。何似隨僧閒洗鉢。溪畔松間。

又 次宋尙木憶昔韻

繡幕晚來重。怪底香濃。丁香如夢月朧朧。紅燭帶人耽笑語。過了疏鐘。倦眼玩酥胸。脂肉芙蓉。嬌羞銀蒜冑青蟲。往事臨風休更憶。吹亂心蓬。青蟲簪名

南鄉子第三體 初夏憶草堂次曹顧菴初夏韻

游屐息春忙。著雨幽墀似曲塘。砌外三桐層碧引。過牆。接葉愔愔覆草堂。搖日夕窗涼。破夢棋聲靜曲房。入夜流螢依竹見。還藏。篋展方流玉水長。

又 午日

愁劇意模糊。粽子還能益智無。且碾朱砂浮藥玉。胡盧。圖得閒愁半日逋。醉裏惜幽拘。吟罷懷沙日又徂。記得弇州詩句好。非誣。信有人間屈左徒。樂玉坡公盡名

木蘭花令 茫茫

茫茫交集情誰識。謂驅愁去愁仍蟄。放來屈賦就懷沙。腐後遷書傳貨殖。詩書贏得妻孥泣。孺仲妻賢真莫及。蓬頭歷齒任癡兒。有目何煩知六七。

又 遣愁

三春日日和愁住。愁汝來前與汝語。連朝愧汝太殷勤。我醉欲眠君且去。麾之不去愁良誤。心已厭君君好喻。不然便覓一丸泥。封卻汝愁來往路。

鵲橋仙 醉罷

只須冷笑。無煩細說。世事儘多鶻突。楚囚莫更泣南冠。教達者、啞人錄錄。且酣醇酒。試彈長劍。醉罷一歌獨漉。莊生齊物有遺篇。說千古、殤延彭促。

採蓮子 本意

風皺澄波綠漾陂。舉棹腕慵不覺蕩船遲。年少欲驚沙嘴鴛鴦睡。舉棹笑擲青青艾子兒。  
年少胡波慢似眼波秋。舉棹自愛風流照碧流。  
年少嫌他年少顛狂甚。舉棹棹入荷花不舉頭。  
年少

踏莎行 用少游韻

瑞腦烘猊。素筵排雁。綠窗深處新妝淡。嬌春偏覺眼波慵。宜人更是心情慢。  
珮響微風。琴鳴幽澗。還疑天女將花散。春光穠日惜分攜。碧城縹緲愁無限。

臨江仙 憶東堂花樹

最惜東堂花樹好。幾枝掩雪驕霞。春宵勝引酒情賒。共傾銀鑿落。細玩玉天斜。羣  
季惠連真不讓。新詩同競妍華。十年蹤跡似風花。赤欄樓角月。應解憶天涯。

蝶戀花 次韻少游二喬觀書圖

傾鬢頰雲肩。鞞玉髵几光凝。雙映修蛾綠。髣髴風光屏外足。攤書停卻尋春躅。  
鑪

裏雙煙青斷續。玉砌紅簾。不似牽蘿屋。公瑾伯符皆不俗。知無一事縈心曲。

又 和漢川盧令女題泥溪驛韻

翠幃紅簾晴少翳。花驛風香。漸覺穠春至。漫道鶉聲堪墜淚。木綿紅照人顏膩。江  
路盤迴山路細。謝女吟成。旅思清如水。彤管自憐多畫意。幽修分得浮嵐翠。

又 詠螢

雨後桐陰清似沐。苔色盈階。淡月明於玉。此際流螢飛蔌蔌。穿廊黏砌紛空曲。才  
墮花梢還入竹。欲下仍高。偏旁池邊屋。巧入風簾輕撲撲。幽光涼映須眉綠。

漁家傲 趙北口作

漁屋低低茅作瓦。幾灣碧柳真瀟灑。此地風塵原不惹。漁父者。於中結箇持竿社。  
樂事常年殊未寡。扁舟不繫隨波寫。濯足舫邊剛沒髀。言不假。垂鞭笑煞先生馬。

又 用王介甫韻

湖岸漁村週似抱。家家門徑開芳草。向背漁罾殊窈窕。凌曉到。晴磯已有垂楊掃。

坐着點頭行水鳥。近家何用收綸早。兩槳一舟堪送老。波而好。寬閒不與鷗爭道。

金蕉葉第二體 昔游

昔游記向西陵去。迴油壁、箇人曾遇。一笑燈前春心暗。擲幽情注。頓使清愁如瀟。柳枝帶結同心屢。尙惆悵、烏啼窗曙。可堪別後。雲中無復來香雨。忍看玉鑪雙炷。

解珮令 酒懷

淡妝輕裹。柳慵花惰。暢幽情、鴟夷仙舸。茉莉風涼。泊向段家橋左。悄窺人、月痕星顆。別來無那。魂銷夢夥。寄離愁、雁兒難邏。燭燼宵深。獨有單衾同我。問何時、酒懷能妥。

風中柳第一體 山志

何日山中真結三間茆屋。更週遭、千章山榭。客稀睡足。人幽影獨。映虛窗、晚峯添綠。抱膝無營。並絕周妻何肉。有春畦、芹香堪劇。松聲謾謾。溪聲續續。問從游、白鷗蒼鹿。

品令 寓亭竹

砌外一林竹。愛蕭散、供幽獨。閒窗拂戛。晝長臥聽。音和笙筑。雨重風輕。姿韻看來難足。露晞煙曉。受初日、開寒綠。夜深還。又月浮亂碧。宛然空谷。那得湖州。圖取變態千幅。

淡黃柳 新柳

陽春三月。裏裏東風急。陌上橋頭吹不息。渲得短絲成碧。看嬉春黃鸝恰恰。憐嬌色。曉日紅樓闌。似有箇、盈盈立。斂修蛾、且罷流黃織。灞岸條垂。玉關夢杳。袖向晴光暗濕。

行香子 別恨

別恨曾諳。往事重拈。記臨岐、暮色紅簾。牽衣回抱。細語謔謔。見眉痕重。淚痕滴。酒痕鹹。峽雲歸後。雨來空識。只宵闌。夢斷魂黏。孤眠無賴。回憶何堪。是鑪香歇。髮香膩。被香甘。

錦纏道 用宋子京韻

落拓心情寂寂難銷長晝。看羅巾、合歡雙繡。殷紅知是啼痕透。夢裏蘅蕪往事空回首。記樓頭細語。暗縈纖手。態盈盈、臉紅宜酒。悵萍蹤雨落青天。信芳心一寸。恩怨應雙有。

青玉案 用賀方回韻

清宵盼盼銀河路。只惆悵、華年去。密約芳期經幾度。紅絃翠管。風簾月篔。并與人何處。別時夏杪春還莫。燕燕鶯鶯漫成句。舊事縈心還幾許。微酣曾訪。短篷相遇。荷葉西陵雨。

兩同心 和韻宗梅岑詠鴛鴦

沙畔文禽。雙雙錦羽。依綠萍、妥夢芳洲。暖紅杜、尋歡遙浦。那還羨、紫燕交飛。青鸞偕舞。冷戲繡牀嬌女。拋殘鍼鏤。散嬌慵、水檻閒憑。照宛約、玉臺空嫵。晚歸去、凝視紅衾。黯然無語。

天仙子第二體 和湘真春夜韻

淡淡雙眉縈遠岫。草草涼襟還小袖。曲廊深處爲儂來。隨夜漏。烏栖後。枕臂啼痕紅欲透。撫抱纖腰春更瘦。凝怨橫波嬌不溜。如思如懊轉宜人。看山繡曠相扣。痛惜肯教衾浪皺。

又 用張子野韻

河滿不堪臨別聽。別酒醉來容易醒。持儂只問幾時來。頻攬鏡。憐光景。此意料君能暗省。離緒最愁窗色暝。明月又還窺隻影。空房應是怯孤眠。風欲定。鐘初靜。踏遍合歡廊下徑。

江城子第二體 用少游韻

游春夢好殢元郎。惱儂狂。呢儂狂。燕子鶯兒。底事送春忙。花露未晞雲影散。痕在臂。淚沾裳。錦屏髣髴賸風光。枕餘香。簾餘香。髣几文籀。無復映晨妝。小壘紅箋書恨字。憑誰寄。向伊行。



千秋歲 和少游韻

花間葉外。又見蜂黃退。階影慢。簾陰碎。合歡金縷枕。雙綬紅鴛帶。人去也。銀燈暈裏。羞相對。尙記橫塘會。荷葉青如蓋。蹤已杳。魂猶在。鳳匿香欲殄。蟬鬢雲將改。無奈是。愁心一寸深於海。

又 題霜哺圖爲袁重其壽母

袁生把臂。珍重頻相謂。從少日。依堂背。丸熊良已苦。坭鯁誰曾饋。圖反哺。清霜幾下。慈烏淚。太息欽君意。菽水君何媿。門子潔。風人貴。母持靈壽杖。兒作斑衣戲。歌一闋。爲君侑祝千秋歲。

又 爲吳爾世壽母

君家稱壽。海內文章走。誇盛事。紛人口。頗聞黃髮媪。早作青燈婦。冰雪裏。藐孤涕淚。曾相守。鬢翦陶家久。臺築懷清舊。兼兩事。須推母。春暉君解報。善頌吾何有。唯願取。新安江水成春酒。

又 壽戴紳黃司李

文瀾筆陣。早歲驚神駿。花萼繼。飛騰迅。傳經推戴德。佐郡同何遜。風景地。二分明月。窺人俊。覽揆當青鬢。底語爲君進。卻月邇。凌風近。玉壺冰色潔。寶瑟朱絲潤。還自有。君家柑酒鷓聲韻。

西施 本意

浣紗江畔女兒身。茗豔窈無鄰。誰人窺巧笑。獨自惜微顰。無奈君王薪膽。催人去。遣作館娃春。紅蘭草草吳宮事。空傳鸞霧疑神。還可念蒼茫一舸。五湖濱。無賴唯餘石上青苔跡。千載解愁人。

傳言玉女 用韻

自不能知何事。兩眉常皺。依稀只是無計支長晝。烏几凭暖。空妬雙煙金獸。愁城無縫。密於鴛鴦。欲浣離腸。不信有。消愁酒。別時略記。是歡儂共瘦。含淚無言。指與酸心梅豆。驚心又到那時時候。

風入松第二體 用劉後村韻

路歧不用更遲回。任運安排。由來造物多顛倒。將頽顏、好付樽罍。急景如春有脚。逸民似古無懷。啼鴉休更向人哀。紅友新開。裁書已報春山去。道先生、早晚歸來。此意還如江水東流到海難迴。

婆羅門引 憶舊

記分攜日。斜風密雨送蘭舟。共君無計夷猶。瞥眼垂楊夾岸。人影閉紅樓。嘆前期渺渺。往事悠悠。經春涉秋。夢尙隔、見何由。聞道吟儂舊句。紅淚時流。儂詩總好。問爭如、絮語話綢繆。須拋卻、莫費凝眸。

剔銀燈 燈花

迎晚紗窗還閉。又早是、蘭釭孤對。爐裏雙煙。牀邊單枕。合併惱人心意。獨伊見慰。卻縈縈、結成紅穗。訝道來朝何喜。莫也似、蛛絲相戲。金粟非秋。銀花連夜。猜料翻教無寐。宵闌頻睇。燄雖殘、肯將輕吹。

撲蝴蝶 用詞統無名氏韻

歌闌酒歇。悶把烏巾岸。牢愁未滌。看空庭又晚。幽拘白髮頻添。故隱春光欲滿。縱饒  
十牀瓊管。抒情短。當年曾記魯陂漁翁愛余嬾。風塵緬邈。荏苒芳訊斷。夢從蟻垤  
初迴。意與鷗波共遠。息壤舊盟須暖。

祝英臺近 用吳淑姬韻

日將晡。鶯漸嬾。寂寞梧還據。昧昧高天。轉掌幻雲雨。從來季主端蓍。君平說易。細思  
付都無是處。愁城阻。儘使費盡輸攻。墨守只如許。黑漆屏風。深夜若能覷。好趁五  
柳初榮。孤松尙在。效元亮。柴桑歸去。

一叢花 用張子野韻

生平途較阮公窮。何物抵愁濃。看來略似垂絲柳。更拖煙、杏雨濛濛。麾去不遙。喚來  
便至。防煞更無蹤。春冰化水已溶溶。幽鬱好教通。延歡送恨渾無計。若寒夕、遮斷  
簾櫳。那似柳綿。一當春晚。吹盡任東風。

送入我門來 無題

萼綠華羞。杜蘭香妬。阿誰得並瓊顏。悵惘穠春。了似不相關。風前禪態噴人調。卻帳底回身惜夜闌。此意惟儂心解。轉復憐卿情重。并日尋歡。芍藥花開。何計重盤桓。金猊抱炭。連心熱。奈玉虎牽絲。比淚澆。

金人捧露盤 惜花

惜春花。愁春晝。惱春風。爲晝長。風捲花叢。元微已去。星旛誰豎。小園東。樓高臺曲。朝來喜。未減芳穠。蝶兒翻。蜂兒鬧。鶯兒嬾。燕兒慵。料都因。春色匆匆。繡牀拋卻。清眸凝損。綺窗中。花茵堪藉。還辦取。臥紫眠紅。

紅林擒近 春日旗亭卽事用周美成韻

蘋葉晴溪小。柳花春店香。鵝兒黃似酒。鳧影白浮塘。偶來臨風曳杖。坐喜對水開窗。墟側小婦凝妝。鶯語更如簧。十載鞿宛洛。此日踏江鄉。側身弔古。茫茫金粉齊梁。况南徐南竟。江山如畫。放懷且飲千百觴。

瓜茉莉 本意

綺砌紅闌。新涼雨後足。微風畔。葉痕添綠。繁苞素蕊。媚晚色。漸開冰玉。最憐是。呢魄  
縈魂。縱迷迭。難比馥。美人睡起。捫餘倦。乍凝目。移夕簾。慵生新浴。盈盈小摘。枕屏  
夜。抱香宿。更雙鬢解事。露華一朶。清曉還陪膏沐。

洞仙歌第一體 七夕立秋

明河此夜。隱隱微雲掩。織女黃姑又相見。問千年嘉會。烏鵲填橋。誰慙恣。不遣靈期  
汗漫。樓中人嘆絕。況值迎秋。一葉梧桐落階畔。正念遠傷離。那得閒心。拈素縷。鴛  
鍼雙穿。想蕩子。回頭望雙星也。暗惜蹉跎。涼暄潛換。

簇水 聽蟬

夏木千章。草亭長晝清如水。小窗高枕。迴午夢。有聲堪喜。無限風思。露想縹緲青天  
裏。應識取。清音無滓。作復止。髣髴是。迎涼送暑。問襪襪。誰知此。蛙喧鷓巧。論鼓吹。  
難君似。況是居高聲遠。不藉秋風起。堪聽也。須辨巢由耳。

宣清 讀影梅菴憶語賦憶語冒辟疆爲如君董小宛作也

往事銷凝久。把殘編重讀。香魂如迸。映紅欄、弱柳憐人。伴文蘇、寒梅成媵。隨氏清娛。羊家淨婉。那堪相並。看月坐、擁書眠。雅稱夫君情性。如意珠沈。斷腸花發。人去春風病。嘆館閉雙成。綺窗深靚。紫箴碧腴空賸。釧裏流霞。是他年、洪都私證。釧裏流霞憶語車少君遺事也

滿江紅 自壽

四座休喧。聽賤子、狂歌自祝。端只爲、命遭磨蠍。運逢百六。徒欠書魚文字債。未修瀝鳥煙波福。念崎嶇、三十九年過。唐衢哭。清癯相。難食肉。渺茫事。空握粟。算何須多壽。方纔多辱。乘筏誤教浮業海。攜家悔不棲愚谷。問今朝、底物侑持觴。樽前筑。

又 用孫風山韻

岐路悠悠。看幾載、軟紅如簇。算何似、一邱一壑。紆青拖綠。脫卻塵衫烏納在。推開瓦枕黃梁熟。只而今、立地便抽身。原非速。甚不必、離騷讀。大無謂、秋風哭。但一週虎

落三間茅屋。卻署休休名自好。試歌纂纂兒能續。也勝如、側足走羊腸。邛嶰曲。

又 用曹顧菴江村韻

檢校歸思。共春後、碧溪同漲。山有信、鶴猿相憶。釣磯無恙。雨滲一犁田。犢喜波添三尺。河魚上道。同招冀缺。共妻歸。謀耕餉。五柳畔。晴絲漾。老屋上。春鳩唱。更掌教鳥集。花從蜂釀。曉日好操蘋渚楫。晚風任倚柴門杖。縱田家佳語。愧儲王。還能狀。

又 再用前韻

粟里春深。羨柳浪層層如漲。更喜得、敞廬容膝。南窗無恙。獨酌好謀形影共。高眠也自羲皇上。顧牀頭、藤笠與椰瓢。幽人餉。清溪側。看魚漾。遠村外。聽樵唱。況桃花堪飯。松花堪釀。自課織簾還有手。便從荷蓀非無杖。算吾生、約略可描摹。山居狀。

又 湖上遇顧菴見余和詞用韻見柬復次奉答

積雨湖頭。看門外、岸痕添漲。欣乍到、屐聲隨過。故人無恙。易得濁醪謀若下。難逢春水如天上。況韶光、淡宕恰新晴。天公餉。青雀舫。徐徐漾。白苧曲。愔愔唱。須好懷如



滌閒愁休釀。我醉欲持銅綽板。君閒那負青藤杖。任六橋、人指兩狂生。多奇狀。

又 再柬顧菴

睥睨煙霞笑人世。紅塵如漲。都一手、移來妙喜。維摩何恙。褊性祇宜棲物外。微名何必居人上。最移情、邂逅老東阿。新詞餉。花共鳥、紛搖漾。皮與陸、堪酬唱。況胡姬肆近。老春初釀。休暢肯教稀步履。沈酣未便需筇杖。莫輕辜、幾疊好雲山。朝昏狀。

又 再用韻柬顧菴並呈荔裳

三竺雙高。新晴後、煙巒青漲。殊慰藉、君侯花筆。別來無恙。宋玉非徒唐景亞。陳王的在應徐上。羨新詩、字字比瑤環。須交餉。墨有黶、微微漾。歌付雪、低低唱。算官廚法醞。更誰解釀。司馬高才原合腐。彥淵博學真須杖。怪吾徒、底事曬蟲魚。臣無狀。

又 湖樓坐雨同顧菴用前韻再柬荔裳

煙雨憑欄。愛浮黛、遙山紋漲。同抱膝、清言移晷。松枝無恙。堤柳已隨坡老沒。竹枝誰駕廉夫上。擬攀雲、踏遍萬峯巔。爲君餉。湖霧積、漁舸漾。林翠溼、提壺唱。向黃公壚

畔重沾新釀。漆後斷紋仍可鼓。削餘方竹還堪杖。問吾曹、補劓息黥心。誰能狀。

又 顧菴有同荔裳西樵湖樓小坐因憶阮亭之作再次韻并寄諸弟

杯酒從容拂斜檻。茶煙初漲。斷橋外、柳眉微蹙。苧蘿新恙。顧我已甘栖廡下。如公纔合居樓上。喜遙山、排闥送青來。還誰餉。看天半、晴雲漾。聽湖舫、朱絲唱。縱腸慳蕉葉。宜城須釀。試寄離心頻夢草。要扶殘醉還攜杖。好舒懷、爲指白蘇堤。陰晴狀。

又 顧菴有再東西樵兼懷京洛故人之作再用韻奉酬并懷公馥周暈諸子

露溼幽蘭。西冷畔、浮堤波漲。行歌去、聲傳金石。原思非恙。老友披襟雲水際。舊游回首煙霄上。自歸來、嬾作洛中書。心相餉。玉河暖、微風漾。宮柳碧、新鶯唱。可相攜還往。同消春釀。諸子勉籌前席箸。野夫好植耘田杖。任人驚、湖海氣難除。元龍狀。

又 用韻答蕭靈曦

攬擷煙雲。羨抱膝、墨池波漲。更縹緲、湘東三管。千秋無恙。處士風流邱壑底。王孫門閥陳隋上。感殷勤、歲晏肯華子。丹青餉。雨柵溼、風蓑漾。王裴句、秦黃唱。總宜修要

眇清思獨釀。髻客遺書歌荷蓀。須君搦管圖攜杖。好生情、別樣寫堽篋。山壘狀。宗梅岑屬靈曦畫蕪城風雨圖。見寄靈曦卽用余與梅岑倡和韻題詩其上。又用余與顧菴荔裳倡和韻作詞見贈。故有兩槩。以下四句髻客謂陳其年。其年亦和余八詞。其間阮亭消息并寄西樵一首。有句云才子爲官休亦好。弟應荷蓀兄攜杖。余摘求靈曦作圖也。

又 爲程穆倩賦星宿海研

咄汝陶泓。問何事、幻成千眼。錫嘉名、曰星宿海。承之無覩。雲夢誰能吞八九。蓬萊真見頻清淺。主人翁、奇語匹皇墳。須君展。青玉贈來荒緬。紫石獵。啞環。輒有奇傀夢告。神人圭冕。麈角一雙相佐佑。龍賓十二同游衍。導攤玄、遐想溯崑崙。條流遠。穆倩研銘後自記云。余友曹秋岳侍郎采端溪水巖從采者獲斯石。越萬里歸於余。其夕夢四目圭冕神人執是石語余曰。非玉非璞。百辰灼灼。天一之源。女其善琢。製成周身百眼。銘而名之曰星宿海。

又 用季孟蓮韻

岸尾橋頭。會珍重、玉人芳約。奈荏苒、流光似水。離懷作惡。花底三春輪紫燕。河邊七夕。憐烏鵲。欲消除。此病借禪機。從誰學。夢中路。尋頻錯。梁間月。看頻落。更愁窺酒醒。欲來難卻。顧我情條千縷結。懷君人柳三眠弱。只拚將、淚眼倚重樓。天垂幕。

水調歌頭 用吳梅村祭酒韻

年少耽游冶。脫帽倚紅樓。興酣龍拏鳳攫。文采並珊瑚。目睨公孫妙舞。足付賓王餘。灑落拓也風流。醉臥胡姬肆。忽忽不知愁。涉迷津。嬰世網。任虛舟。小山春草也應怪我久淹留。難挽韶華似水。難掇憂思如月。陶寫付筌篲。可耐豔歌歇。白日淡幽州。

滿庭芳 用坡公韻

白月爲心。朱繩比質。生平自負峨峨。司空百鍊。繞指已無多。到眼濃陰欲滿。心憂矣。謠罷還歌。細屈指。古來誰似。磨蠍說東坡。茫茫無可語。謁來千縷。暗緯愁梭。更溶溶漾漾。難翦如波。可耐春光萬里。尙寥落。臥盼庭柯。問何日。盟煙狎水。鷗鷺媚漁蓑。

又 憶慈仁寺海棠用芝麓先生韋祠海棠韻

蓉粉嬉春。薜姿延露。禪房勝日標奇。趁時芳草。正向綠墀滋。卻似勻和。懶隨輕裝就。千點紅璣。宜人處。似斜仍鞞。態倚曉風披。芳時。還悵悵。桃花韻雪。遙想仙姿。嘆去年花下。空有前期。誰製護花旛子。駐幽豔。莫使花衰。好點注。餘春如畫。留覆態盈棋。

又 贈姜子翥內君澹衣生日和芝麓先生韻

並蒂疑花。俱飛同蝶。早來相逐相憐。文窗幽窈。人玉與鬢煙。幾許春風消息。祇探向。明鏡臺前。鴛鴦字。背人學寫。顛倒遍蠻箋。嫣然。還自惜。迴眸一笑。鸚鵡能言。算碧樓紅玉。總是前緣。心喜宜男待女。花共草。入佩能全。爲歡好。一絃一柱。錦瑟趁華年。  
蘭花一名待女花

鳳凰臺上憶吹簫 和漱玉詞

靈鳳當雛。名花值蕊。思量往事回頭。記簾垂犀押。鏡挂珊瑚。人似鶉鷄白鷁。行坐裏。愛翫無休。誰能負。春風淺夜。明月新秋。悠悠。光陰荏苒。縱長繩百尺。逝景難留。看新來華髮。舊日朱樓。宛宛前歡堪覓。屏山畔。薄醉迴眸。臨風立。斜陽如昔。獨照清愁。

鷓鴣白鷓姚月華事

漢宮春 用稼軒韻

夢破茫然憶故園。春晝人境吾廬。衡門常掩無事。風味真殊。每當勝日。那肯使、鶯闌花疏。閒曳杖、遶苔選石。都來塵思全無。一自罡風吹落。使十年奔走。僕僕誰如。卻思猿朋鶴舊。渺渺愁余。魯連陂上。幾孤負、春鱸秋鱸。遠悵絕。南窗睨日。靜窺寂寂琴書。

倦尋芳 用王元澤韻

紅殷綠淺。幾許風光。攔做春晝。宛轉重門。掩映紅閨如繡。正芳時。成間阻。羅衫浥淚。千重透。最難堪。是茶閒篆冷。夢回時候。漫凝立。闌闌隔斷。不似雕闌。還近纖手。漱盡香醪。難與清愁相鬪。殘月疏鐘。人斷後。幾番捱過。還如舊。教愁顏。共風邊。新楊同瘦。

聲聲慢 次韻劉青田詠愁

難搜難括。非去非來。做成一寸千曲。欲盡根株。除是馬還生角。任教春風蕩滌。只昏昏。月黃煙綠。甚追逐。最難拚。更是天寒茅屋。漏向眉間一半。攬清鏡。已覺霧縈煙蹙。鬢鬢真形。五岳寸心。蠹蠹能令酒來都化。作鮫珠。界破幽獨。算千種。還誰解。區別細目。

八聲甘州 揚州作

醉餘惆悵絕。是從來、佳麗說揚州。看隋家天子。江都夢好。離別無愁。更有平安夜報。書記最風流。總此花和月。好任淹留。舊跡如塵難覓。空垂楊鶉暮。腐草螢流。望玉勾斜畔。落日滄荒丘。更何來、玉人簫管。喚二分、明月向珠樓。好憐取、紅橋煙艇。試泛清秋。

催雪 逃暑

清盥多閒。幽階似浣。且放湘簾垂地。喜長日悠悠。擺除塵累。一任鑠石流金。只墜眠。不受紅塵累。烏巾常挂。青鞋懶著。庭陰清闕。無事。心容裔。且瓊水浮瓜。冰檠薦芰。

笑河朔袁劉。灑然何意。碧樹晚涼。颯沓。又枝上。風蟬鳴嘒嘒。應不羨。短壑青松。赤脚層冰情味。

醉江月 送孫無言歸黃山次顧菴韻

居恆誇我道黃山勝處。峯峯奇絕。十載化離辭故隱。磨盡鞋芒冠鐵。卻向塵中。凝思霞外。頤朵西施舌。行行掉首。九牛難挽歸轍。知汝已佩蒼精。朋游莫訝。輕作人間別。三十六峯從此去。快浴硃砂湯熱。鷺羽爲蓑。麕皮作薦。坐撫孤松拙。笑看足底晴雲鋪海如雪。

又 贈亦世

人生幾許。嘆經年契闊。不殊梁燕。西子湖頭判袂後。攜手又來隋苑。蘇小車塵。錢王潮水。回首同飛電。芒芒交集。頓成洗馬清嘆。擢秀大別清湘。吾宗才子。允矣邦之彥。撫字陽城書下考。漫說安仁花縣。巨眼如箕。高情似水。肯作浮雲戀。舉杯醉月。澄江莫負如練。



解語花 和龔州題美人捧茶

銀牀緩汲。玉砌新晴。欄影惜惜細。峭寒斜倚。花陰畔、靜把小鐙親試。雲光露蕊。遙拖映、柔煙幾縷。松響消、勻寫嬌擎。媚嬖春風意。輕約鬢鬟髻。看芳磁如雪。光映黃指。珮幽環脆。參差近、頓喚餘醒教起。櫻桃小婢。越襯得、霍娘嬌麗。珊枕邊、徐嗅蘭香。還帶蘭膏味。

木蘭花慢 用陳參政送陳石泉韻

向風塵決計。急辦取。鹿皮冠。好濡足柴桑。褰裳谷口。掉首邯鄲。長歌採薇竟去。指煙霞深處。舊柴關。山雨代除荒徑。春溪爲浣塵衫。厭他拄笏對西山。兀兀一駝鞍。有錦水漁磯。黃山兔柴。首嘗洗眼重看。斜陽臨風曳杖。值鄰翁談笑不知還。怕說車輪生耳。還教置輻河干。

水龍吟 羈所自壽用劉後村自壽韻二首

靈均覽揆重逢。幽拘欲忘桑蓬事。飛光如箭。出人不意。忽焉還至。咄咄書空。芒芒集

臆了無情思。况狄雲望杳。謝池夢斷。肱雖曲。誰能睡。不用出疆載贄。受一塵、隸無懷氏。人間無用。江淹彩筆。揚雄奇字。試問何如。披裘安穩。漉巾容裔。待樊籠剖破。便攜德曜。變名吳會。

飛騰四十明年。及今歸去應非早。行藏略似。烏中杜宇。蟲中寒號。白眼依松。頽顏就菊。吾存吾傲。更漢陰抱甕。忘機用拙。泊如也。無餘好。時復登臺一嘯。舊山公。全慵書報。當年入洛。士龍故態。惟餘狂笑。短布長鏡。也應不減。隱囊紗帽。況白山舊隱。考槃仍在。無煩重考。

又 和坡公楊花韻

玉階畫省全慵。任教細逐桃花墜。撩他燕盼。呢他鶯囀。曉情暮思。天與顛狂。去來那管。重門深閉。看將低仍颺。依稀思婦。眠初妥。還驚起。纔到墀心。攔嘴。又輕黏翠屏朱綴。似捎似趁。無拘無管。攪將春碎。解伴年年。多情春草。無情春水。更紅簾揭處。幾番偷入。伴人嬌淚。

石州慢 用高季迪韻

淺夏蕭森。猶自餘寒。襟袖時灑。愁來還似。荷珠不定。雖多難把。盈樽濁酒。總來憑仗。消除片時。依舊相縈惹。若擬繪愁形。這三毛誰寫。東冶有徒能賦。旋釋髡鉗。日邊雲下。長樂鐘聲仍近。漫聽頻打。柔成繞指。人道磊落劉琨。欲慚方外。狂司馬。便使賦歸兮。較淵明遲也。

合歡帶 周澹園納姬揚州

擅江東。公瑾風流。況綺麗。更揚州。喜得龍門人未腐。買清娛。且伴遨遊。箇儂還有黃華妙腕。絳樹清喉。倩明珠。十斛貯將金屋。移入瓊樓。帷燈照怯。窗日憐羞。妝成倦倚香篝。不爲筵前矜顧曲。笑郎君。底費迴眸。雙飛好去。華清側畔。繡嶺前頭。待他年學誓長生。同看織女牽牛。澹園舊官翰林。又以文禍幾不測。故有龍門未腐之句。家臨潼驪山下。故有華清繡嶺之句。

泛清波摘遍 新秋同無言豹人二瞻又百廣陵城西泛舟作

玉壺攜酒。煙舫衝波。暇日共尋城畔路。霽花風柳拂檻。排窗看無數。還時遇。金釵照水。玉珮當歌。幾許芳洲游冶女。亂葉翳蟬。迴渚行鷗。觸景成趣。沿洄屢。更擬遙山舒眺。卻值片雲催句。兼帶薦爽迎涼。數點疏雨。情休遽。睥睨煙際不遙。招提竹邊重駐。聽取花宮夕梵。緩緩歸去。

過秦樓 初夏用芝麓先生追春韻

埤日烘鶯。簷陰詭燕。綠暗盈階幽草。紅樓小婦。解惜餘春。凭損一欄清曉。梧井碧影初齊。映戶當軒。葉濃花小。恰斜紋珍簾。闔門徐展。鳥閒人少。彈小悶。鍼縷慵拈。玉牀函夢。鸚鵡逗人堪惱。午香消炷。斜照篩窗。晚鏡倦眉輕掃。寶袂微風暗吹。似帶如疑。春和天老。畫屏邊。羅扇纔攜。幾箇早螢低繞。

沁園春 用少游韻

小雨擱晴。微暖揆寒。階景乍長。恰游絲依約。鶯和柳嬾。輕陰歷亂。燕逐花忙。幾處開窗。何人倚檻。領略風光青粉牆。傷哉僕。祇恨眉如壓。天色滄浪。愁懷此際無央。漫

負手閒階車轉腸。看似殘仍滴。依稀夜漏。如灰更裏。髣髴晨香。箋與天公。逡巡不報。且駕尻輿問醉鄉。還叵耐。是杜康力憊。難遣茫茫。

又 五閨詞爲吳香爲作

我友中牟。自序生平。達人之風。道閉目不窺。還成公案。折腰儻許也。勝飄蓬。飲不三升。餅無半菽。日築糟丘。念困窮。蕭散意。更香山居易。甫里龜蒙。懸弧五閨。才逢已斑鬢。行稱六十翁。歎河清難俟。良辰餘幾。社樗無恙。散木期同。詩唱黃河。書藏名岳。此壽原齊華與嵩。還相調。能十篇贈我。百閨遺公。

又 讀李鏡月廬游日記作

遙望匡廬幾載幽。思忽忽南昌。想峯排五老。半天空翠。泉飛三疊。百尺銀瀧。林跂東西。賢傳十八。勝跡心知不可忘。問何日向彭蠡渡口。一葦輕杭。臥游把卷。神颺似肩拍。匡君煙路翔。見地迴天迴。邀雲入戶。山深嵐重。遲月升堂。錦澗橋邊。玉淵潭側。恍惚心清聞妙香。才解信。道輞川愈疾。語不荒唐。

又 讀陳其年烏絲詞賦寄

屈指詞人，咄咄唯髻，跋扈飛揚。似波寒竟去，衣冠颯颯，燭昏欲醉，履鳥茫茫。紅豆筵中，白楊齋外，哀豔無端互激昂。憑人道，是秋墳唱苦，子夜歌長。廿年落拓名場，使歷落嶽嶠也未妨。看襴生單綫，搗聲忼慨，陳王芋蔗，舞態迴翔。兒女情深，風雲氣在，同此牢愁一寸腸。君毋讓，信黠如顧虎，狂比袁羊。

賀新郎 花燭詞爲劉峻度賦

銀漢期猶渺。訝今朝、人間牛女，橋成何早。妙譽天人三妹擅，前度劉郎還曉。那待得、秋風吹到。試向玉卮娘子問，也低頭、無語微微笑。應聽取，郎君了。佳期擇向朱明好。正薰風、荷香蘭氣，洞房清窈。隔巷停車知不事，咫尺仙源非杳。易盼到、麻姑仙爪。閨裏青山原解畫，描新眉、莫遣新人惱。須摹下，張家稿。

多麗 爲李雲田題周少君寶鏡坐月浣花圖和董文友韻

認霜綃。煙絲粉暈輕飄。隱隱見、雲開花弄，一輪明月堆高。桂如眉、雙描非敵，桃疑面、

半朵同姚。蜀錦爲茵。齊紈作扇。微涼依約。井桐搖。應憐取。斷腸花色。欲並小鬟嬌。還  
指點、銀餅玉斗。緩汲徐澆。看迷離、流黃殘影。徘徊懶下花梢。露侵衣。宵猊欲燼。風  
吹帶、別鶴難調。銀蒜愁寒。金荃羞詠。一庭花月冷纖腰。知何處、陳王八斗。羅襪賦蘅  
皋。空拋卻、畫中人在。良夜頻消。

上海图书馆藏书



A541 212 0014 9604B



